


**ELEMENTA
METAPHYSICAE
MATHEMATICUM
IN MOREM
ADORNATORUM...**

Antonio Genovesi





ANTONII GENUENSIS

In Regia Neapolitana Academia
Ethices Professoris

ELEMENTORUM METAPHYSICAE

TOMUS QUARTUS

De principiis Legis naturalis.



NEAPOLI MD. CD. CCLI.

EX TYPOGRAPHIA BENEDICTI GESSARI.

SUPERIORUM AUCTORITATE.

LIBRARY OF THE

UNIVERSITY OF CHICAGO

LIBRARY OF THE

UNIVERSITY OF CHICAGO

*Quid leges sine moribus
Vanæ proficiunt*

Horat. lib. 3: ode 27.



LIBRARY OF THE

UNIVERSITY OF CHICAGO

LIBRARY OF THE

UNIVERSITY OF CHICAGO

VIRO PERILLUSTRI,

Atque Ornatissimo

NICOLAO VIVIANO

ANTONIUS GENUENSIS

S. P. D.



QUARTA haec pars, NICOLAE VIVIANE, finem faciet Metaphysicarum lucubrationum, qua ego in parte ea de re, quam tu ex omnibus maxime probas, differvi. Placere enim tibi admodum sensi, & ex vitae ratione a te ab ineunte aetate suscepta, & ex multis sermonibus nostris, hoc debere esse praecipuum philosophorum officium, hanc diligentiam, ut omnibus rebus posthabitis, totos se in optimo vitae statu exquirendo collocent, & quatenus possunt, aliis probent: eos vero, qui in iis rebus occupantur, quas ab omni vitae humanae usu remotas nullius scire interest, & iners esse Telluris pondus, & plurimum aliis nocere posse, quos exemplo sua ad inanes acroaseis pertrahant. Ex multis autem partibus, multisque a causis optimus hic vitae status existit, sed a nulla aeque, quam a virtute. Quare veterum doctissimi omnem in eo curam operamque posuerunt, ut virtutem ad beate vivendum seipsa

seipsa esse contentam suis persuaderent . Quod etsi difficile est probatu propter tam varia, & tam multa tormenta fortunae ; tale tamen est , ut elaborandum sit omnibus, quo facilius probetur . Quid enim est omnium , quae in philosophia tractantur , quod gravius, magnificentiusque dici possit ? Quid ad effrēnes atque stultas cupiditates comprimendas validius ? Quid tandem ad pacate, ac propterea beate inter mortales vivendum accomodatius ? Ac ego sic semper habui, idque Tu, ut es in tota vetustate peritissimus, ex humana historia saepe animadvertisti, ita esse natura comparatum, ut insipientiam, vitia, & scelera miseria inseparabilis comitetur, sapientiam & virtutem beatitudo . Equidem eos casus, in quibus me fortuna non leviter exercuit, mecum ipse considerans, constantius huic sententiae adhaerere incipio : nam quum nullius rei mihi conscius essem, quamobrem animo angendum mihi esset, meque a tempestate actum in philosophiae portum recepissem, magna ego, ac talia, quae a nulla alia mortalium rerum sperarem, solatia a virtute petii, & exoravi . Quare factum est, ut me vehementer puderet praeteritae aetatis, quam ego in sterili rerum contemplatione pene totam consumseram, totumque me deinceps in id studium converterem, quod, ut noster ait Venusinus,

Aeque pauperibus prodest, locupletibus aeque,

Aeque neglectum pueris, senibusque nocebit .

Sed Te in primis auctore ac exemplari sum usus .

Nam & Tu saepe gravis monitor fuisti, & cohortatus es pluries, ut quoniam ego hanc inter nostros philosophiam praecipue excolendam suscepissem, non voce tantum ad eam adolescentes impellerem, sed scriptis maxime ; & Te in illo Bartholomaei nostri Interii (viri

orna-

ornatissimi, & de gente nostra plurimum promeriti) Musarum domicilio, ita de virtute & pietate saepe disferentem audivimus, ut existimaremus, nihil esse, quapropter aetas nostra veteribus Aristides, & Coruncanos invideret. Ac vero difficile dictu est, quid in Te prius, aut magis admiraremur, vim ne sententiarum, qua Tu nos totos concutiebas, an Atticam illam eloquentiam, qua non permulcebas modo animos jucundissime, sed quaecumque velles pertrahebas, an illud denique in coctum, ut ille inquit, generoso pectus honesto, quo sentiebamus, ea, quae disputabas, non, ut in philosophorum plurimis, oratione tantum contineri, sed totam & mentem, & animum occupare, esseque in naturam conversa, ut ne si velles quidem, aliud sentire, aut loqui posses. Nam Tu ita quum virtutis, aut nomen audiebatur, aut spectabatur imago, totus concitabare, ut facile esset animadvertere, in Te virtutem non in cortice haerere, sed totum pervadere. Quare effecisti, ut non intelligeremus tantum, sed ipsi oculis nostris videremus id, quod Socrates dicere solebat, Virtutem, si sine velo se nobis ostenderet, incredibiles in nobis amoris flammam excitaturam. Itaque ego quum alias, tum hoc praesertim exemplo vehementer iis subirascor, qui aut imprudenter, aut, quod similis vero, per summum scelus dicere solent, virtutem nihil esse, totumque id esse nomen inane, quo otiosorum Scholae Doctorum personant. Vituperare quisquam vitae parentem, & hoc parricidio se inquinare audet? & tam impie ingratus esse, ut eam accuset, quam venerari deberet, etiamsi minus consequi potuisset? Sed, ut opinor, hic error, & haec indoctorum scelerumque animis offusa caligo est, quod nec tam longe retro respicere possunt, ut eos, a quibus vita

a 3

homi-

hominum instructa primis sit, fuisse a virtute armatos discant: nec, praesentium rerum aut inscii, aut incuriosi, intelligere, eas, quibus brutis plurimum & feris nationibus antecellimus, commoditates, ab una virtute esse & procurari. Quid enim non modo nos, sed omnino vita hominum sine ea esse potuisset? Ea urbes peperit: ea dissipatos homines in societatem vitae convocavit: ea illos inter se primo domiciliis, deinde conjugis, tum litterarum & vocum communione junxit: ea inventrix legum, ea magistra morum fuit. Sed in eo isti sibi videntur triumphare, quod nullam esse in nobis virtutem rentur, quae non a nostri amore & utilitate proficiatur: qua re fit, inquiunt, ut virtutem mentiri possimus, habere nequeamus. Quos quum sine indignatione audiri nequeant, Tu etiam, ut es humanissimus, ridebis tamen, qui infinita iis ex veteri memoria exempla afferre possis eorum, qui pro virtute omnibus fortunae telis sese obicere non dubitarunt. Quamquam quam isti virtutem sibi consinxerunt, commenticia est: nam eam nos virtutem praedicamus, quae quum singulorum, tum totius hominum generis delicias & felicitatem facere possit, quae si a singulorum utilitate & felicitate sejuncta sit, nec ulla est, nec si sit, virtus esse potest, quae nec singulis, nec toti hominum generi utilis ullo modo est. Quomodo si singuli homines pro aliis sese interficiant, deserta sit hominibus Tellus necesse est; ita si se, vitam, fortunaeque suas, beatitudinem denique quisque contemnat, quo se aliis virtute probet, nemo omnium hominum non modo felix, sed ne erit quidem: ita fiet, ut, ea inuenta virtute, delendum sit hominum genus. Itaque Tu ita saepe disputasti, ut nobis persuaderes, divina providentia com-

para-

paratum esse, ut sibi primum hominum singuli, deinde aliis propter se natura ipsa conciliarentur, & ut essent, & ut bene beateque essent, idque esse in Natura pulcherrimum, et quod virtutis ut necessitas, ita magnae utilitates continerentur, ut hominum nemo non solum bene beateque esse, sed ne esse quidem posset, nisi ita vitae suae rationes institueret, ut una ipse cum aliis esse, ac bene beateque esse vellet. Quod qua ratione faciendum sit, Tu quidem probe nosti: sed patieris tamen, me, qui Tibi uni omnium optimo iudici instituti mei rationes reddendas suscepi, paulo altius repetere, praesertim quum haec non, ut vellem, in hoc, quem tibi mitto, libello explicata & digesta, sed ut erant aut ex tempore dictata, aut carptim scripta Bibliopolae edenda dederim, retexturus, novaque via & ratione exornaturus, si vita suppetat.

Quum ego hominem contempler, quinque in eo principes & natura ipsa insitas propensiones inesse sentio, quarum quidem tres cum omnibus animantibus nobis communes sunt, duae vero propriae. Habet nempe a Natura & ut sit, & ut bene sit, & ut genus suum servet propagando, & ut postremo beatus, estque gloriae, qua ceteris sui generis emineat, & ab omnibus distinguatur, percupidissimus. Sunt eae non tam cum natura ipsa conjunctae & copulae, quam commixtae, ac tota fusae, ut tum demum persentiri a nobis, nosque concitare & pertrahere desinunt, quum & ipsi esse desinimus. Itaque non in eo est a philosophia ponenda opera, ut eas stirpitus eradicet, quod quoniam fieri nequit, non potest nisi stulte pertentari; sed in hoc potius, ut ita componat, ut, quo sunt a natura datae, toti hominum generi sint utiles. Id quum fit, virtus existit, non ea quidem, quam

Stoici velut nulla cum ceteris hominibus cognitione juncti deprædicant, sed hæc, quæ ex ejus, quæ præditi sumus, naturæ moderatione esse potest, quæque sola esse hominibus utilis queat, quia ea sola efficere potest & ut esse propagarique possint, & ut bene, idest sine maximis doloribus, & ut beate, idest cum maximis voluptatibus, & tandem ut cum vera gloria, idest cum iis ornamentis, quibus tantum sine ulla simulatione concelebrentur. Quæ ex re intelligitur, quanto ii opere a vera ratione aberrant, quamque supervacaneum laborem in se suscipiunt, qui homines ad beatitudinem efformaturi humanæ naturæ non solum inscii, sed incuriosi, ea pertrahere nituntur, quæ illa tota ire vetat, quæque si eat, non minus stare possit, quam quæ adverso flumine devehuntur naviculæ. Ac ego quidem persuasum semper habui, dixique sæpius, ut, quoniam ab omni naturæ nostræ imbellicitate, dicam etiam debonestamento, ac undequaque perfecta & absoluta virtus haberi nequit, nisi a Deo, qui rerum universitatem potentissime moderatur & procurat, ab eo petendam, sperandamque. Sed quum ne Deus quidem providentia sua rerum naturas evertat, sitque illud in earum gubernatione pulcherrimum, ut aliæ aliis nexæ iis legibus regantur, quarum nullæ aliæ queant esse illarum naturis magis consentaneæ; par est ut hoc exemplar ii imitentur & sequantur philosophi, qui suis præceptis quidquam se naturæ humanæ beandæ afferre posse confidunt; alioquin via lapsi, quo feruntur concitatus, eo hominum generi nocentiores esse possunt. Sed eo, unde digressa est, redeat oratio nostra.

Prima, quæ ut in brutis animantibus, ita
in

in homine persentitur magis, quam animadvertitur, propensio est, ut sint. Quum ex tota rerum natura, omnibusque ejus qualitatibus, tum vero ex nulla magis, quam ex hac, Dei ego sapientiam & providentiam intelligo: Nam qui rerum universitatem & ut esset, & ut pulcherrima esset, procreavit, sapientissimus ille omnium artifex & moderator, hunc rebus singulis impetum & quasi sensum indidit, ut illae tota natura sua, ac vi naturae suae aequali, idest maxima, ut essent conarentur, utque nulla causa posset ab iis ut ne esse vellent impetrare, nisi quae ut ne essent quoque, eadem opera efficere quivisset. Inde vero haec in omni animante animadvertere licet: principio ut nihil prius, nec quasi ex libertate, sed ex ipsius naturae necessitate quadam, ament, quam ut sint: deinde ut nihil eadem naturae vi nec prius nec magis metuant, quam ut ne sint: tum ut nullam ob rem aliam totam naturae vim adhibere sint perpetuo parata, quam ut ea omnia a se removeant, quibus ut ne sint effici potest: tandem ut eadem vi incredibiles labores & dolores ultro subeant, & fortissime tolerant, si ita eis sit persuasum, non aliter vitam servari posse. Quibus ex rebus fit ut & nulli magis cum natura pugnent, quam qui impie ad genus humanum tollendum ingenii & naturae vires praepostere adhibent, & nulli de ea magis promereantur, quam qui & docent, neminem, ut in fornice, ita in hominum genere, esse posse, nisi quo naturae impetu fertur, ut sit, eodem conetur ut sint ceteri, & ipsi doctrinis ac praeceptis suis sic consentaneae vivunt, ut intelligere possimus humanae naturae consentaneae esse vel-
le. Est haec prima eaque maxima, quae in homini-

minibus esse potest , virtus , ut principio ita singuli sibi persuadeant , & ut esse velint a natura omnes habere , & neminem esse posse , ubi alter , ut ne alter sit , cupit : deinde ut sic se viresque suas moderentur , in eoque omnes intendant , quo non ipsi tantum , sed ceteri quoque omnes sint . Ex quo illud etiam conficitur , nullam naturae humanae maiorem esse perversitatem , nullum scelestius vitium , sed ne ullam quidem foediorum amentiam , magisque cum ipsa nostri natura & utilitate pugnantem , quam ita esse comparatos , ut nobis tantum , veluti si soli in Tellure simus , studeamus , amemusque , etiam cum totius humani generis everfione , esse . Sed videtur , inquiunt , a nostra utilitate tota ea proficisci virtus : quo fit , inquiunt , ut ne virtus quidem sit . Quasi vero velle & studere quisquam possit ut alter sit , qui non modo nolit , sed ne sentiat quidem se esse . Itaque ita isti disputant , ut aut omnem omnino ab homine extirpatam virtutem velint , aut eo imprudentes regrediantur , ut agnoscant , nullam esse posse non modo humanam , sed nec divinitus inditam , quae a propria felicitate sit sejuncta : Nam eae in primis , quibus divinitus ornatur , virtutes ad nostri & veram felicitatem promerendam nobis praecipue traduntur . Nullius autem virtutis hominem capacem dicere , nescio utrum sit toti hominum historiae adversari : certe impium est , & ad omnem Dei beneficentiam & providentiam tollendam comparatum . Concludamus hoc nunc , homines ad hanc virtutem , etiamsi ad id nulla nec divina , nec humana lege adigeantur , a sua ipsorum natura impelli , esseque non modo impios & scelestos , qui contra quam natura fert adnituntur , sed pro-

sus

sus amentes . Praeterea & illud animadvertamus , virtutem cum natura congruere semper , idest eam perficere , & ad finem , quo tota tendit , ducere , eorumque , quae huic repugnent , accessione fieri pejorem .

Altera autem item cuique animanti insita , quaeque non magis , quam prior illa , ab eo separari potest , propensio est , ut bene sint , idest sine dolore , sine aegritudine . Postquam animans est , ejusque vita in tuto posita , nihil natura ipsa magis aversatur , nihil metuit horretque magis , quam dolorem , aut quia non naturae consentientem , aut quia ejus destruentem . Philosophi in primis docti & acuti hinc animantium inflexiones omnes repetunt , ut eo se scilicet semper inclinent , quo dolor aut aegritudo fert : quia totus dolor , ut subtiliores alii disputant , nihil esse aliud videtur , quam voluntas ab eo statu aversa , in quo non secundum naturam sumus . Est quidem haec altera naturae animalis propensio priori illa posterior , ut ei tum demum locus sit , quum illa , ut dixi , in tuto est : sed est tamen cum illa copulata , & eousque cum tota natura perfusa ut non minus quam illa sit necessaria . Hinc fit ut naturalis sit & minime liber doloris metus , horror , aversatio : tum ut qua vi maxima rapimur ad vitam conservandum , eadem feramur ad aversandos dolores , nec eis cedamus , nisi quum vitae conservandae necessarios arbitramur . Itaque & secundum naturam est , sine dolore esse , & virtus item maxima ac naturae pulcherrime consentiens , adlaborare , ut sine dolore simus . Atque ut nulli sunt de genere humano magis promerentes , majoribusque laudibus digni , quam qui ea in re ingenium

nium dotesque suas intendunt omnes , ut minor sit (nam ut ne ulla sit , quoniam fieri nequit , ne expecti quidem debet) inter homines dolorum copia ; ita nulli magis execrabiles , quam ii , qui in id se esse natos sibi persuasere , ut omnibus modis vitae humanae tranquillitatem perturbarent : dicam etiam nulli magis stulti , quando res humanae nos docent , hominum fuisse neminem , qui alios miseros efficere voluerit , quin se se fecerit miserrimum . Nam ita natura & sapienter comparatum est , ut in tota rerum universitate nulla sit , quae homini aut maiorem miseriam creare possit , quam homo , si adversetur , aut maiorem felicitatem , si suis omnibus partibus alter cum altero conspiret amice . Quamobrem quum duo sint fontes , unde hominum dolores & aegritudines promanant , natura , & hominis ipsius ingenium ; est facile animadvertere , ubi homines hominibus amice copulentur , & mentis corporisque vires jungant , hos quidem , qui plures sunt & majores , omnes disternari ; illos vero non modo in pauciores conferri , sed imminui plurimum , esseque non tantum minus tolerabiles , sed quandoque etiam desiderabiles , quo aut naturae virgulae constantius adhaereamus , aut ne assidue perceptae voluptates minus delectent : nam sunt voluptates fere semper doloris consequentes , eoque gratiores , quo illi acriores . Quare & haec virtus secundum naturam est , ut qui bene esse velit , ipseque sine dolore , & aegritudine , non solum nulli injustum dolorem inferat , sed aut natos , aut illatos auferat , si possit , sin minus , levet & demulceat . Quid quod eo vel nec cogitantes a natura rapimur ? Nam omnes ad alterius miseriam misericordia commovemur . Quumque affectus sint quasi naturae moralis vinctes , quibus ,

bus, ut paulo post dicemus, naturales propensiones sustinentur, ac in naturae defensionem armantur; nihil esse potest magis perspicuum, quam a natura ipsa nos incitari, non solum ut ne quempiam laedamus, sed ut pro virili alii aliis opitulemur, quae nobis hunc omnium pulcherrimum indidit affectum. Quare ego non tam naturam, quam hominum voluntatem saepe accusare soleo, quae quod nobis est providentissime a Deo tributum, aut extirpare conatur, ne ullo modo sit, aut comprimere, quo minus in nostri felicitatem exseratur, aut corrumpere, quo in nostram convertatur perniciem. Qua de re ego te differentem audire malim, mi Viviane, quam quidquam dicere, quod tu pro penitissima, qua harum rerum notitia polles, minus probes. Dicam tamen ut possum: qui nihil reliqui effecimus, quo naturam pravis studiis perversaque voluntate aut comprimamus, ne, quo tendit, perducatur, aut corrumpamus, ut alio trabatur, non solum injuria, sed inscitissime & stultissime de ejus malignitate conquerimur, atque eo tandem evadimus, ut aut inique existimemus, nullo modo per eam licere esse bonos, quo vitiis & sceleribus nostris, qui honesti esse volumus, honestas, si diis placet, causas praetendamus; aut impie suspicemur, non esse Deo curae felicitatem nostram, esse ultioni. Qui si rogemur, qui alios, quum nostra interest, esse velimus justos & bonos, quum tota, ut praedicamus, natura prohibeantur, animadvertere possimus, nos esse mendacissimos, quum contra quod communi naturae sensu persentiscimus adversus naturae capacitatem disputamus, nec tam esse pravos, quam esse velle, futuros optimos, si quantum in vitiis operae locamus, tantum poneremus in natura, (quae Adamitica labe paulo quidem est obstipa, non vero inba-

inhabilis) ad virtutem flectenda, praesertim ea, qua par est credere pollere omnes, Dei ope.

Jam tertia totius naturae animatis communis & naturalis propensio est ea, qua ad suum genus conservandum impelluntur, qua quidquid in terra gignitur, aliturque, ita pervadi & animari videtur, ut quaecumque sit, non modo animantes, sed stirpes & plantas agitet, quarum rerum nulla est, quae ubi ad praefinitum sibi a natura tempus pervenit, non invitari se & allici ad sibi similem procreandam non sentiat, tantoque impetu animantes inflammet concitetque, ut impedita furere faciat, compressa extabescere. Sine qua quid esset, nisi deserta & horrida Tellus? Ut intelligere possimus, tantos naturae genitricis motus, tam multarum rerum atque tantarum ordines, in quibus nihil unquam tam immensa vetustas mentita sit, ab aliqua mente infinitae intelligentiae & providentiae gubernari. Nam seu dicas, esse vim aliquam vitalem & animantem per omnem mundum pertinentem, seu anima sui generis singulas mundi res animari & cieri, quum videas omnium in tanta generationum vicissitudine constantiam, statuas necesse est, praecessu mundo Numen praestantissimae Mentis, a quo haec fiant & conserventur. Itaque Zeno animantem esse mundum conludebat hac e re nostra nata similitudine. Si ex oliva modulante canentes tibiae nascerentur, num dubitares, quin esset in oliva tibicinis quaedam scientia? Quid si Platani fidiculas ferant numerose sonantes? idem scilicet censeris in Platanis inesse musicam. Cur igitur mundus non animans sapiensque judicetur, quum ex se procreet animantes atque sapientes? At recte ille quidem, si vim
hanc

hanc mundum animantem, atq; numeroſe progredientem,
 & gignentem, non ipſam per ſe & natura ſua conſtare,
 ſed ab ejus architectrice & moderatrice Mente, cu-
 juſ & ſequitur leges, inditam perfuſamque, quem-
 admodum par erat, cenſuiſſet. Nam ut eſt per ſe
 perſpicuum, nihil horum ſine ratione, modoque fieri,
 ita tantae mentis veſtigia, in rebus praefertim cor-
 poreis & brutis, non intrinſecus & a natura ſua pro-
 ficifci, ſed a Deo toti rerum univerſitati praefiden-
 te, dubitare non poſſumus. Sed coepi ſecus agere,
 atque initio conſtitueram: ſuſcepi enim tibi, mi Vi-
 viane, inſtituti operis rationem reddere, a quo ſae-
 pe me pietatis cauſa longius rapit. Quamquam qui
 ego id a re noſtra alienum eſſe dico? A Deo enim
 tota hominis inſtitutio inchoanda eſt, ejusque numi-
 ne & vi perficienda. Quod ergo ad eam propenſio-
 nem, de qua diſſeruimus, ſpectat, tu non dubitas,
 quia vehementiſſima ea ſit, ac ſecundam prioret illas
 duas viſ maximae. Sed ei locus non eſt, niſi quum
 duae illae in tuto ſunt: itaque ne perſentitur qui-
 dem, quum aut de vita periclitatur animans, aut
 magno aliquo dolore angitur. Quum vita in tuto eſt,
 nulluſque premit dolor ſi quempiam corripiat, maxi-
 ma agit vi, quouſque aut priores illae non obſtite-
 rint, ipſae per ſe in illam quaſi e regione irrumpen-
 tes, aut inde deductae rationes non compreſſerint.
 Quae ſi omnia deſint, inania puta cetera impedinen-
 ta, nec alio habe loco, quam quo aranearum telas
 majora habent animantia. Quin eo evadit aliquando ro-
 boris & furoris, ut nec mortis metu, nec incredibilibus
 cruciatibus queat coerceri. Qua ex re illud animad-
 vertere poſſimus, eſſe inſitas bujuſmodi naturae ani-
 mali vires & propenſiones adeo non ſolum pervi-
 cases,

caces , sed brutas , quum fraenum ruperint , ut nulla nec vi, nec arte cohiberi possint , totamque humanam vitam proturbent . Ex quo fit illud , ut magnae sit quum privatae, tum publicae praesertim generis humani utilitatis modum illis imponere . Quod quum item virtute fiat , quantopere sit virtus ad bene beateque vivendum nececessaria , nemo est , qui ipse per se non intelligat . Sed ea de re deinceps .

Duae , quae sunt reliquae hominum naturales propensiones , ita humanae naturae sunt propriae , ut nullam in illis bruta animantia partem habere videantur ; quorum altera est , felicitatis , idest maximae voluptatis appetitus , altera gloriae cupiditas , qua omni ope inter ceteros nostri generis eminere , ac distingui enitimur . Nam pecorum natura praeteriti immemor , absentium incuriosa , futuri improvida , praesenti tantum indigentia ac dolore commovetur , nec aut veterum memoria titillatur , aut incenditur absentium libidine , aut futuri metu , vel spe concitatur . Itaque sic naturae congruenter vivunt , ut nec cura praesentem dolorem augere norint , nec aut imaginatione absentium , aut novarum meditatione voluptatum praesentes turbare , atque in voluptatis ipsius fruitione majorum desiderio excruciaci . Ergo ubi nec corpus aegrum est , nec quidquam periculi imminet , nec aut venter , aut venus stimulat , humi resoluta , mollioris strati ignara , eoque minus anxia , non solum pacata & quieta sunt , sed otiosa & somnolenta , ut nulla sit inter ea ex superfluis invidentia , nullum odium , nulla contentio , nulla bella , quae homines misere affligant , atque in mutuam perniciem armant . Sed nos , naturae propensionibus abutentes , ac alio inflectentes , quam quo
na

natura tendunt, ne in summis quidem voluptatibus plene unquam nobis satisfacimus : pervigil enim animus aut praeteritas revocat, aut novas semper excogitat, eoque praesentibus minus tangitur, quo majores & jucundiores, quibus caret, sibi confingit. Summam hic appetit, eam nempe qua ita tota occupatur natura, ut nihil reliquum aut metui, aut appetitui faciat, nec animadvertit, eo esse in loco positum, ubi si fuerit adeptus, totus repente otiosus, atque iners sit necesse est, qui nullo ad quidquam praeterea agendum calcari prematur. Inde aut invidia macrescit, aut odio furit, nihilque est nec tam difficile & arduum, nec tam sanctum, quo ejus reprimi cupiditas possit. Jam bruta animantia ut nihil supra singularem naturam noverunt, ita nec gloriae, nec imperii sunt cupida. Quare nec ob ingenium, nec ob vires ulla est inter ea eminentiae ambitio, quae homines cetera futuros contentos noctu diuque vexat & extimulat; non quieturos, nisi humana divinaque omnia commiscuerint, ruinis simillimos, quae super id, quae oppressere, franguntur. Adeo, miserrima est ambitio, honorumque contentio? Qui, inquis, haec cum superiori oratione congruunt? Videris, inquis, naturae malignitatem, quo penitius retegis, accusare, eoque homines a virtute, quam supra defendendam suscepisti, absterre, quos virtutem cum tantis naturae vitiis adipisci unquam posse, quis sibi persuaserit? nempe mirifice consentiunt, mi Viviane, nec ego a consecranda ac consequenda virtute ullos animum idcirco despondere velim, quod hominum vitia, in quae nos incaute trahi nos sinimus, tam studiose depingam : non tam

Tom. IV.

b

enim

enim naturae , quam voluntatis ea sunt , quia
sunt illae propensiones humanae naturae pernecessa-
riae , quando constat sine iis vix esse in nobis
reliqui , quo brutis praecellamus , ut si iis homines
docte prudenterque uti scriverint , idest intra mo-
dum suum continere , esse possunt illi in eo ipso
boni & beati , quo se malos & miseros fieri ar-
bitrantur . Nam principio , nisi felicitatis , seu
summae & undequaque perfectae & securae vo-
luptatis amore tangantur , praesenti statu conten-
ti , eique , ut ostracae scopulis , affixi , humi pro-
ni & ventri obedientes vivant . Quumque natu-
ra imbecilli , nudi , omnium indigi , & ignari ,
segreges denique , nec nisi anis parentibus , ut bel-
luae , conjuncti , procreentur , nihil invenire , ni-
bil melius commodiusque efficere , nihil nec arte ,
nec industria perpolire , nihil postremo , nisi per-
petuo pecudes esse , nec scient , nec studebunt .
Tum ne a Telluris quidem consortio , non magis
quam stipites , separare se , & aeterna consecra-
ri bona unquam poterunt , ad quae illo felicitatis
amore incenduntur , & stimulantur . Itaque
& hic miseri sint necesse erit , & numquam ejus ,
qua superi perfriuntur , quaeque unica plena &
vera est , beatitudinis participes . Porro honorum
illa & gloriae cupiditas , qua ne barbari quidem
& immanes homines vacui sunt , effusas olim Tel-
lure gentes ac solivagas coegit ut inter se coirent ,
civitates , jura , ordines , imperia conderent ,
quorum si quis extrinsecus accersita hominum im-
probitate vitia accusare velit , is per me accuset :
sed insitam utilitatem & praestantiam ego defen-
dam semper . Nam quae est hominum vita , quos
nec

nec civitas mansuescit , nec ordines jungunt , nec jura & imperia coercent ? Quare omnia , quae sunt a perturbata beatitudinis & gloriae cupiditate mala , quae sunt certe maxima & gravissima , prava hominum induxit libido : libidinem autem ignorantia & imperitia : hanc neglecta ingenii & naturae cultura . Itaque in his omnibus multa est voluntatum nostrarum malignitas , nulla naturae . Malignitatem autem dico , mi Viviane , non defectum : nam veteri labe multis haud dubium deficiamus . Sed ut nos in omnem vitae pravitatem foeditatemque ipsa impellat natura , cui nulla ope repugnare valeamus , quam nulla arte regere , utque idcirco , quod est malignitatis , ad miseriam ut geniti esse videamur in , quo isti naturam criminantur , quo sua honestiora vitia esse videantur , id ego non modo impium , sed stultum quoque esse ajo .

Sed ut haec sint , inquit , magni certe sunt & perpetui naturae nostrae accusatores affectus , quos nec avellere possumus , nisi naturam radicitus extirpemus , nec ullo modo coercere , quando constat eos natura ipsa ex opinatis bonis vel malis contra omnem rationem erumpere ; & si iis obsecundare voluerimus , nae nos stulti fuerimus , qui ei rei modum ponere velimus , quae suapte natura infinitatem spectat , quaeque minus coercita perpetuo adolescit . Quum autem maxima vitae humanae pars aut amore , aut odio , aut spe , aut metu , aut cupiditate , aut aliis animi perturbationibus magis , quam ratione regatur , in idque non libertatis imperio , sed naturae ipsius vi rapiatur , feteamur necesse est , naturam in nobis peccare , non rationem . Quid , inquit , quod ne fieri quidem potest , ut quum imperfecta & manca in nobis

fit ratio, perfecta esse natura intelligatur? Nam nostra omnis vis & natura in animo & corpore sita est: animi vero in ratione & imperio, ut quum haec depravata sint, necesse est ipsa sit corrupta & depravata natura. Sed quam imperite haec disputantur? Nam nulla est totius humanae naturae pars (veterum Philosophorum descriptionem sequamur) tam structa sapienter, quam haec rationis experts, in qua isti ponunt motus turbidos tum irae, tum cupiditatis contrarios, inimicosque rationi, id quod ego alio quidem in loco demonstravi, sed hic paucis retractabo. Quum homo totius universi pars una sit, cum toto suo congruat oportet, quoniam est illud tum in tota sui immensitate, tum in singulis partibus ordinatissimae rationis & disciplinae. Quare finitae vis & naturae esse debet: nam quod undequaque infinitum est, & absolutum ipsum per se unum & totum est, nec ullius alterius rei pars esse potest. Ita fit ut nequeat ipse ad plenam beatitudinem sibi esse sufficiens. Ergo ut perfici, & beari, ita deterior, quam natura est, & infelicior extrinsecus fieri potest. Ex quo fit ut & cupiditatis, & irae, ac metus particeps esse debeat, sine quibus nihil extrinsecus sequeretur unquam, nihil refugiet, averfabiturque. Necessarium igitur est, ut hominis natura ex opinatis bonis, & ex opinatis malis agitetur, quo se ita componat, ut cum ceteris universi partibus harmonice consentiat, qua ex aequilibrata magna ejus existit vitae tranquillitas & beatitudo: agitetur autem, non leviter titilletur: neque enim nisi vehemens commotio nos inflectere potest, ut naturalem quandam nostri segnitiam, & quasi

si pondus superare possimus, eosque capere sitis, qui nobis conservandis & perficiendis apti sint. Has commotiones affectus appellavimus. Quomobrem affectus sunt appetitus vehementiores, quibus aut res naturae nostrae consentaneas alacres consectemur, aut perniciosissime adversas fugiamus. Itaque Stoici, qui mihi videntur in hac quaestione versari acutissime, partes affectuum volunt ex duobus opinatis bonis nasci, & ex duobus opinatis malis: ita esse quatuor: ex bonis cupiditatem, & laetitiam, ut sit laetitia praesentium bonorum, cupiditas futurorum: ex malis metum, & aegritudinem nasci censent: metum futuris, aegritudinem praesentibus: quae enim venientia metuuntur, eadem afficiunt aegritudine instantia. Laetitia autem & cupiditas in bonorum opinione versantur, quum cupiditas ad id, quod videtur bonum, illecta & inflammata rapiatur: laetitia ut adepta jam aliquid concupitum, efferatur & gestiat. Sed singulis affectibus partes ejusdem generis plures subjiciuntur, quas ego enumerandas hoc in loco non suscepi. Sunt igitur affectus naturae quidam stimuli, &, ut ita dicam, machinae morales vectes, quos qui auferat, totam ille homini vim, qua quum est usus, agamus aliquid, aut fugiamus, abstulerit, eumque trunco, aut crudo lateri similiorum, quam animantem, effecerit. Quare in eo Stoicorum solitum acumen & iudicium desideraverim, quod illi haec sola ratione sine ulla perturbatione, idest sine ulla naturae animalis commotione, ac constanter prudenterque fieri posse opinantur; ex quo illud efficiunt, nec necessarios esse huiusmodi in homi-

ne motus aversos , ut illi putant , a ratione , & naturae esse morbos , qui in sapiente , qui cuncta ex ratione placide atque constanter agere debet , locum habere non debeant . Nam ratio si nihil naturae nostrae cupit aut metuit , tranquilla est & placida , seque contenta , ut contra rationem sit , ullum eo tempore in nobis ciere motum : quum ergo nos concitat , cupit profecto aliquid , aut metuit : cupit autem quod deest bonum , metuit quod providet malum . Qui autem aut illud cupiat , aut hoc metuat , nisi persentiscat ? nec vero persentiscere potest , nisi a natura moneatur . At natura dolore loquitur , qui sine affectu esse nequit . Ita fit , ut affectus sint veluti voces quaedam naturae aliquo deficientis , vel quidquam sibi metuentis , sine quibus ratio nequeat in nostri subsidium excitari . Porro semel dolore excitato non quiescit , nisi quieta & tuta natura . Qua vero voce id significaret rationi natura , nisi voluptate & laetitia ? ergo & hanc quoque sentiamus necesse est . Quod si homini naturam doloris & voluptatis patientem nemo denegare potest , quin & rationis usum omnem auferat ; consequentes vero sint doloris & voluptatis affectus ; efficitur ut affectibus extimulari debeat humana natura , quo ratio nobis utilis esse possit . Itaque in tota ea disputatione labuntur Stoici .

Ita ne tu , inquis , disputas , quasi numquam extra virgulam turbidi , inconstantes , aversi denique ab omni ratione profiliant affectus ? Non id ego dico , mi Viviane : profiliunt enimvero ii saepenumero , neque in eo , quod omnes patimur , Stoicorum oratione egemus . Sed constituamus hoc
in

in loco id, quod ad Dei erga nos benignitatem adserendam in primis est necessarium, non ita nos procreasse, ut mali & scelerati essemus, nec esse affectus a natura humanae malignitate, sed esse ei necessarios, esseque quasi vectes, quibus aut sustineatur fortiter adversus ea, quibus destrui potest, vel a fine suo revocari, aut, quum est opus, agatur vehementer ad ea prosequenda, sine quibus aut non esse, aut non bene beateque esse possit; ac deinceps inquiramus in id diligenter, qua re fiat, ut tantae sint in maxima hominum parte, ac tam stultae a naturaque ipsa desciscientes affectuum perturbationes. Quod nisi fecerimus, ne illud quidem intelligi poterit, quibus regulis, quare arte ad naturam possint affectus componi: neque enim tales sunt, qui nullo modo infrenari possint, quod ex tota constat hominum historia. Quare videamus, quid illos tam saepe a natura aversos efficiat, quidque curata aut factu sit opus, ut ad rationem exigantur, neque plebejam Terentiani Parmenonis disciplinam vereamur,

. quae res in se neque consilium, neque modum

Habet ullum, eam consilio regere non potes.

. Incerta haec si tu postules

Ratione certa facere, nihilo plus agas,

Quam si des operam, ut cum ratione insanias.

Nam quid ille stultus, si ita se res haberet, monendo Phaedriam enecaret,

Proin tu, dum est tempus, etiam atque etiam cogita?

Superius demonstravimus, affectus esse nobis a natura

natura tributos , ut ita iis componeremur ; ut cum
 rebus , quibus circumdamur , pulchre consentire-
 mus , qua ex harmonia vitae nostrae fieret tran-
 quillitas & felicitas : ei quoque ut prospiceret
 & ratio data est . Itaque fit ut tum affectus
 cum ratione consentiant , quum naturae congruunt ,
 idest quum & ex veris bonis , aut malis nascun-
 tur , & iis aequales sunt , & consentanei . Ab
 ea regula quum excedunt , tum perturbationes sunt ,
 non solum non utiles , sed plurimum noxae : nam
 quoniam aut nullae sunt extra nos res , a qui-
 bus proficiantur , aut iis non congruunt , ex fal-
 sa bonorum aut malorum opinione excitantur : fal-
 sis vero malis natura nostra inutiliter affligitur ,
 nec falsis bonis perficitur . Duabus igitur ex cau-
 sis affectus pravi esse possunt , aut quia ex con-
 fictis bonis , vel malis progignuntur , aut quia ve-
 ris minime pares , ut quum aut id , quod nus-
 quam gentium est , cupio , vel metuo , aut quod
 est , magis aut minus vehementer cupio , metuo-
 ve , quam id cupere , aut metuere par est . Utrum-
 que item ex duplici fit causa , ignorance , &
 errore : haec vero ex negligentia , & prava educa-
 tione . Nam qui & studiosi sunt earum rerum ,
 sine quarum cognitione nemo bene vivere potest ,
 & rite ac sapienter educati , ii & recte uti
 sciunt , nec facile decipiuntur ; quia quum ali-
 quid ignorant (nihil enim ignorare supra homi-
 nis est conditionem) iudicium actionemque cohi-
 bere , atque mature deliberare didicerunt , ac , sicubi
 statim factum est opus , eam viam rationemque se-
 ctari , quae similior vero esse videatur . Postre-
 mo si de recta labantur , quum initarum a se
 ratio-

rationum poenitere se nequeat ; non valde illi ; ut stulti , sese afflictabunt , quin sapientiores suo periculo facti , gaudebunt etiam . Huc ergo ego regulas omnes affectus secundum naturam regendi confero , ut & addiscamus , quae vere sint res eae , quibus circumdamur , quibusque utendum est perpetuo , ac quatenus nobis bonae vel malae ; & ut a primis vitae nostrae annis assuescamus iis vivere consentanee ; quarum regularum prior mentis , altera animi virtutem continet . Qua ex re illud efficitur , ut , quod saepe diximus , bene beateque vivere non nisi cum virtute possimus . Quumque & illa rerum cognitio comprehensioque , & hic rebus apte convenienterque vivendi habitus studio & disciplina pluribus contigerit , illud quoque velim intelligatur , non ita nos esse procreatos , ut virtutis capaces esse nequeamus . Sed quoniam ab illa cognitione rerum , earumque nobiscum consensione aut pugna est praeclara vitae disciplina inchoanda , quae si falsa fuerit , aut prava , depravatus sit animus necesse est , ut ex penitissima philosophia Terentianus Simo dixisse videatur , mala mens , malus animus ; videamus quae sint illius praecipua praecepta , quibus necessaria nobis ad beate vivendum virtus continetur , atque , si Dei favor afflaverit , gigni & perfici in nobis potest .

Sed illud omnium primum accuratius perquiramus , subesse ne possint mentis imperio & regimini quum illae propensiones , tum affectus isti & perturbationes ? Id nisi constet , frustranea erit opera omnis , quae in iis moderandis , & ad certam rationem instectendis ponetur . Possunt autem in eo

tria

*tria considerari ; primum , ut ne perferantur ;
tum , ut ne erumpant , quum necessarium non est ;
tandem ut loco , tempori , rebus denique a qui-
bus inflammantur , consentiant . Eorum primum
omnino fieri nequit , praesertim in primis illis pro-
pensionibus : nam sunt , ut diximus , cum na-
tura ipsa animali commixtae , ac ita necessariae ,
ut nec esse , nec concipi sine iis natura possit ani-
mantium . Quare in eo non magis adlaborandum est , quam
ut ne agibilis sit ignis , cujus in eo motu ac concia-
tatione tota est posita natura . Duo reliqua fieri ob-
tinereque posse , ii dubitabunt , qui sibi penitus sunt
ignoti . Sed & ratio id confirmat . Namque ,
nec erumpunt unquam , quum non est usus , nec
a rerum natura discordant , nec longius , quam
necessarium est , praetergrediuntur , nisi aut igno-
ratione , aut errore , aut quum primus ille fer-
ror concitatioque animi inveteraverit , & tamquam
in venis medullisque infederit ; quae quoniam ca-
vere possumus , si sapimus ; rationis profecto re-
gimini & imperio subjiciuntur . Idem tota nos
docet hominum historia , quae frequentia ejus ,
quod dico , suppeditat exempla , eorum , qui &
naturales propensiones intra positum iis a natura
modum continuerunt , & cupiditati , irae , metui ,
saepe etiam cum vehementissime concitarentur ,
moderati sunt . Sed suppeditat sapientum , ut id ,
quod superius animadvertimus , intelligere possi-
mus , praeclare a Stoicis dictum , omnium per-
turbationem (quo nomine intelligunt aversas a re-
cta ratione , contra naturam , animi commo-
tiones) fontem esse intemperantiam , quae est a
tota mente , & a recta ratione defectio , sic
aversa*

aversa a praescriptione rationis , ut nullo modo appetitiones animi nec regi , nec contineri queant. Quemadmodum igitur temperantia , quae aut sapientia est , aut ab ea efficitur , sedat appetitiones , & efficit , ut eae rectae rationi pareant , conservatque considerata judicia mentis : sic huic contraria & inimica intemperantia , quae est ab inscitia & pravo habitu , omnem animi statum inflamat , conturbat , incitat . Itaque & non necessariae aegritudines , & vani metus , & superfluae cupiditates , & reliquae stultae perturbationes omnes gignuntur ex ea . Quemadmodum quum sanguis corruptus est , aut pituita redundat , aut bilis , in corpore morbi , aegrotationesque nascuntur ; sic pravarum opinionum conturbatio , & ipsarum inter se repugnantia , sanitate primum spoliat animum morbisque perturbat ; deinde non adhibita continuo ratio , quae sanat , permanat in venas , & inhaeret in visceribus illud malum , existitque vitium , quod avelli inveteratum non potest , quodque totam deinceps vitam foedat , & infelicitat .

Porro haec temperantia duabus a causis efficitur , rerum , ut dixi , cognitione & comprehensione , & vita secundum eam tempestive acta. In hoc prudens educatio , & praecox totius honestatis studium adhibendum ; illud nostri , universi , Dei investigatione continetur . Nostri cognitio in eo praecipue posita esse debet , ut quid in nobis sit necessarium , quantaque sit naturae nostrae indigentia intelligamus , quo ei congruenter vivere possimus , ut scilicet nec valde turbemur iis , quae praecaveri nequeunt , nec careamus ne-

cessa-

cessariis , nec superfluis luxuriemus . Nam & inutiliter iis nimium agitamur , quae evitari nequeunt , & defectu necessariorum dolemus , & rerum superfluitate aut inutili cura angimur , aut pandere opprimimur , aut e nobis quasi egressi petulantissime divagamur , incerti quo quieturi . Quasi cognitione omnes peraeque ac necessarium est , praediti essemus , essetque illa perpetua meditatione in naturam ipsam conversa , putas tu , mi Viviane , aut ambitione nos contabescere posse , aut avaritia excruciaci , aut ulla superflui libidine totos concitari ? putas aut otio , quum labore est opus , posse emarcescere , aut stulta necessariorum rerum effusione nos perditum ire ? Sed nec senectus ipsa & mors denique admodum timebitur , quum in id nos esse genitos animadvertimus . Univerſi vero in eo , ut & quae vere sint , & quantum quaeque res bonae sint , vel malae addiscamus , ut nec quae nusquam gentium sunt , cupiamus , metuamusve , nec plus , aut minus , quam concupisci , metuive merentur . Cujus scientiae defectu quot se stulte affligere videmus ? Itaque eos ridemus , ac jure quidem & merito , qui capripedes paniscos metuerint , qui porros magna religione coluerint , qui Lunae , vel Solis defectu , velut emortuorum , misere ejulaverint ; qui si mures soleas conſerint , expaverint , qui avium garritu aut volatu non privatas tantum res , sed ipsas in primis publicas regendas crediderint , qui si aut Sol alter in Caelo emicuerit , aut Cometes apparuerit , aut Septemtriones visi fuerint ardere , aut quidpiam aliud , quod natura fit , fuerint conspicati , toti exanimati contremuerint . Jam Dei ,
id est

ideſt ſupremi naturae totius artificis & moderato-
 ris , cognitio , ad eam , de qua diſſerimus , tem-
 perantiam in nobis procreandam , alendamque , prae-
 cipue eſt neceſſaria , ut nempe ſciamus & eum
 eſſe , & infinitae eſſe intelligentiae , potentiae ,
 bonitatis , & ab eo rerum univerſitatem effectam
 eſſe , & ſapientiſſime procurari , noſque ita pro-
 creatos , non ut brevi tantum praefentis vitae cur-
 riculo ſpem omnem vel metum concluderemus , ſed
 ut nunquam interituri aeternitatem ſpectaremus :
 qua cognitione qui deſtituuntur , ſpem omnem me-
 tumque intra praefentis vitae ambitum coercentes ,
 in proſperis quidem rebus toti diſfluunt , ac diſ-
 ſipantur , in adverſis vero aegritudine & dolore ene-
 cantur ; utriſque nempe pereunt miſerrime , nec
 illud praeclarum totius vitae gubernaculum adhi-
 bere ſciunt , quod Flaccus noſter eleganter ait ,
 Sperat infauſtis , metuit ſecundis

Bene praeparatum peſtus .
 Quare ego nihil aeque neceſſarium ad bene bea-
 teque vel in praefenti vita vivendum eſſe cenſeo ,
 quam rite & praeclare cum Deo agere ; quin ita
 mihi perſuaſi , ne cum hominibus quidem honeſte
 & ſapienter eum viſitandum , qui hominum illum
 parentem & gubernatorem aut ignoret , aut non ,
 ut par eſt , tota mente ac animo completatur at-
 que ex divinis formulis veneretur .

Haec , quae diſputata ſunt , eo pertinent , ut
 eos , qui a rerum natura in nobis dolores & per-
 turbationes ſaepe progignuntur , aut caveamus , aut ,
 ubi id fieri omnino nequit , in minorem , quoad fie-
 ri poteſt , numerum conſeramus , eoſque fortiter
 ferendo extenuemus , quo bene ac beate vivamus .

Sed

Sed restant infinita pene dixerim mala , quae non a Natura , sed homini sunt ab homine . Nam non a natura , sed a voluntate est humana , ut mentiamur , circumscribamus alii alios , dolis atque insidiis decipiamus , & spoliemus , totaque vita velut in perpetuo bello simus , & afflictemus : ut ineptissimas etiam causas sumamus , quibus ferociamus , immanes simultates & inimicitias geramus , conseramus inter nos bella , expugnemus atque evertamus civitates : ut hominum macella & amphitheatra nobis constituamus , loca sanguinis & publicae impietatis , ut mandi homines cernamus jucundissime , & bestiarum laniatibus dissipari . Brevi , insidiae , fraudes , doli , avaritia , rapinae , vis , scelus , audacia , obscœnitas , turpitudine , flagitium , mala omnia cetera , quae toto in orbe homines mente noxia pariunt , homini sunt ab homine . Est quisquam , qui in his , ubi nulla etiam sint a natura mala , beate esse & vivere possit ? Quare viro , qui ex recta ratione , non aut ex sensu , aut ex imaginatione felicitatem suam metiatur & sequatur , in eo operam ponere debet præcipuam , ut haec , quod ad se spectat , nulla sint . Id iustitia & amicitia procuratur , quarum altera efficit , ut neminem laedamus , suumque jus integrum cuique esse sinamus ; altera , ut quocumque modo possimus , aut consolando , aut consilio , aut re , ut Terentianus Menedemus ait , juvemus . Ac neminem quidem laedimus , quum nulli quidquam injusti doloris inferimus , ut quum nihil quod ad alterius animum , corpus , famam , bona , justam spem pertinet deteriorius efficere studemus : nam inde dolere homines solent.

solent . Suum vero jus cuique tribuimus , quum
quod quisque aut a natura , aut ab arte sua &
industria , aut quocumque modo , quo aliorum jus
violatum non sit , habet , eo uti fruique sinimus ,
atque si laeserimus , in integrum restituimus .
Omnibus tandem amici sumus , si non dubitemus
cum iis , quoad scimus , ac possumus , animi , cor-
poris , fortunae bona communicare , qua mutua
aliorum aliis bonorum accessione fit illud in socie-
tate prope divinum , ut singuli homines tantum
sciant queantque , quantum omnes conjuncti , & co-
pulati .

Quamobrem tute ipse intelligis , mi Viviane ,
quas ego primas atque insitas naturae rationalis
leges habeam ; nempe non plures , quam has duas :
**DEO , TIBI , RELIQUIS HOMINIBUS SUA
JURA TRIBUITO : IIS ESTO AMICUS .**
Sed qui tandem haec jura tribuemus ? nimirum si ita
vitae nostrae rationes instituerimus , ut Dei , no-
stri ipsorum , aliorum juribus congruenter viva-
mus , quod est naturae , ut ego interpretor , con-
venienter vivere , sine quo nec esse , nec bene
beateque esse possumus . Ut , e. g. quoniam Deus
& supremus omnium imperator est , & , Guberna-
tor , & parens , Imperatori serviamus , gubernato-
ri simus obsequentissimi , Patrem amemus , ac ve-
reamur necesse est , si naturae congruenter , id
quod maxime nostra interest , quod saepe dictum
est , vivere amamus . Tum quandoquidem nihil
nobis natura arctius conciliat , quam nos ipsos , fit ut natu-
ra ipsa nobis amicissimi simus ; amicus vero nemo sibi
est , qui non , ea quorum accessione pejor fieri po-
test , caveat , sequaturque ea , quibus perfici , ac
bene

bene beateque esse potest . Tandem ea est nostri natura , ut nec solis nostris ac privatis bonis vivere possimus , nec , si possimus , bene ac beate possimus : ita fit ut alii aliorum communicatione bonorum egeamus ; quae esse nequit , nisi ita omnes comparati simus , ut non modo neminem laedere velimus , sed omnibus & esse velimus , atque simus amici . Si quis est omnium qui haec & saepe secum consideret , & in succum , ut dicitur , & sanguinem convertat , & secundum ea vitae suae rationes instituat , cum ego sapientem esse dico , eamque adeptum temperamentiam , si ne qua neminem esse posse beatum , Stoici docent .

Quibus ex rebus & illud conficitur , esse in natura ipsa regulas , quibus justum ab injusto , honestas a turpitudine secernatur . Nam quin convenienter naturae vivere totius hominum generis felicitatem faciat , superius demonstrata dubitare nos prohibent : quod vero non singulorum , sed totius hominum generis felicitati conveniens est , id suprema est totius generis humani lex ; cui propterea quod congruit id est generis humani justum & honestum ; ut quod cum ea pugnat , injustum & turpe . Quemadmodum quum salus publica summa sit cujusque populi lex , quod decemvirales Romanorum leges praeclare sciscunt ; ea est quoque justis atque injustis , honestis & turpis cujusque populi regula . Quare ut in privatis Civitatibus nequit vera utilitas , idest civitatis felicitas , cum honestate contendere , ita ne potest quidem in magna totius Telluris Civitate . Itaque accepimus , Socratem solitum execrari eos , qui primum haec natura cohaerentia , opinione distra-

xissent

æssent . Cui quidem ita sunt Stoici assensu, ut etiam, quid-
quid justum & honestum esset, idutile esse censerent,
nec utile quidquam, quod nec justum, nec honestum.

Nec vero Naturae tantum sunt hujusmodi leges,
sed divinae, ut non utilitas modo generis humani ad eas
servandas incitare debeat, sed in primis pietas &
religio adversus Deum . Nam ita Deus totam
rerum Naturam construxit, ut ea legibus immu-
tabilibus regeretur, & contineretur . Ejus homi-
nes portio una sunt : itaque iis naturaliter subji-
ciuntur . Quum autem rationis sint participes, ut & eas
leges intelligere, & ad supremum Dei in tota Natura im-
perium referre possint ; oportet ut & libenter iis obsecun-
dent, pareantque, ne si aut contemserint, aut repugna-
verint, perduelles sint, magnoque obnoxii supplicio .

Sed quo haec explicemus distinctius, repeta-
mus paullo altius, ut ita intelligamus apertius,
quibus nos Naturae legibus subditi nascamur, qui-
bus parendum omnino est, ut et esse, et beate
esse possimus . Homo & res una est totius uni-
versi, & sibi copulatum, adnexumque corpus habet:
idem & vegetatur, ut plantae, & sentit vi-
vitque, ut ceterae animantes : jam & rationis
est particeps, & generis humani pars una : po-
stremo peculiaris alicujus Civitatis civis, aut sub-
ditus, aut imperans, aut parens, aut liber,
aut alio quocumque in situ positus . Haec, quae
re copulata sunt, cogitatione differunt, suntque
ab iis secernenda, qui, quibus Naturae legibus na-
turaliter homo subjiciatur, contemplantur. Nam subji-
ci-tur quidem pluribus etiam nolens : sed moralibus ut vo-
lens ipse se subjiceret oportebat. Ac quia res universi ali-
qua est homo, rerum legibus metaphysicis subditur natu-

*valiter ac volens nolens . Hae leges ad omnes peraeque
pertinent res , nulla res potest simul esse & non
esse : nihil esse aliud potest , quam id , quod
est : nulla res ex nihilo suapte natura esse
potest aut in nihilum reverti . His igitur homo,
quia res una , natura ipsa subiectus est . Jam quod-
cumque corporeum est , impenetrabile est , divisibile
ac corruptibile , mutabile , grave , iners &c.
Eae sunt genericae & naturales corporum leges , qui-
bus quum homo corporeus sit , est natura ipsa
obnoxius . Tum plantae & nascuntur aut e se-
minibus , quae augmentum extrinsecus capiunt ,
aut ex naturae quibusdam archetypis & formis ,
quae sese externa vi subagitatae explicant , & nu-
triantur , vegetanturque , & consenescent , ac po-
stremo intereunt : aeri , igni , Naturaeque elemen-
tis aliis sunt subiectae . Sunt eae plantarum le-
ges : iis igitur & nos subijcitur , quate-
nus plantarum similes sumus . Praeterea animan-
tium omnium communes leges et a natura positae
sunt , ut voluptatem et dolorem persentiscant , ut
qua vi maxima queunt se conservent , ut coitu
utriusque sexus genera propagent : amore prolis tan-
gantur : metu , ira etc. concitentur . Eae et ho-
mines quoque rapiunt , quia animantes . Postremo
mentes ratiocinio omnes utuntur , antecedentia ni-
mirum et consequentia pervident , causas et effectus
internoscunt , rerum fines prospiciunt , media eli-
gunt , deliberant , sui juris sunt etc. Sunt hae
animorum leges : at sunt homines quid aliud ,
nisi animi rationis participes , corporibus utentes ?
ergo et animorum legibus subditi natura sunt . Sed
istiusmodi homines similes natura procreantur omnes ,
atque*

atque ad mutuam societatem ineundam aptissimi ; ac ita ut sociati sibi que amici , felices esse omnes possint ; segreges atque sibi inimici , miserrimi : iidem soli ex omnibus animantibus sentiunt ; quid sit ordo , ac decus in societate ; quid omnibus utile , aut noxium , quid iustum , aut iniustum , honestum , aut turpe . Quae hinc nascuntur leges , ad omnes pertinent homines , quarum summa est , totius generis humani felicitas . Ea sunt jura gentium , quae proinde ii omnes , qui nihil a se humani alienum esse putant , sancte servare , jus fasque est . Ob eandem rem , cives peculiarium civitatum , quarum suprema lex est salus publica , cujus & necessitatem intelligunt , & causas , earum Civitatum legibus ita sese subicere debent , ut legibus ejus Civitatis , quae tota Tellure comprehenditur . Inde quoque fit ut , quoniam singulos hominum status sua jura sequuntur , sintque alia imperantis , alia subditi , alia magistratuum , alia civium , alia parentum , alia liberorum , iis omnibus apte convenienterque vivant necesse est , ut integrae Naturae (quod factum est opus , ubi bene beateque esse velint) congruenter vivant . Servabunt autem hujusmodi leges , si nihil , quod cum illis pugnat , moliantur , contra facient ea omnia , sine quibus illae , quo tendunt , ire nequeunt : tendunt vero , mi Viviane , quum ad singulorum , tum ad omnium conservationem & felicitatem . Praeterea ita servabunt , non quasi fato aliquo rapiantur , sed ut qui supremo totius naturae opifici , & moderatori pariant libentissime : nam ab illo sunt positae : ille est earum & auctor & vindex . Quas quum & didicerint accurate ,

c 2

& usu

Et usu ipso in naturam converterint , tum illi se probe composuisse sciant , eamque adeptos , quam supra diximus , virtutem , Et temperantiam , sine qua nemo non modo beatus , sed ne esse quidem potest . Sed videor longius progressus , quam quod per epistolam licebat . Quare te rogo , mi Viviane , ut haec etiam atque etiam tecum ipse consideres : velim enim tibi sic persuadeas , me nullius hominis , his praesertim in rebus , iudicium pluris facere , ut si probaveris , scito me nulla re magis superbire posse : sin improbaveris , neminem esse , qui severius damnet . Ceterum cura ut valeas , Et me ames , Et sic habeas , te a me fraterne amari .

Neapoli anno Epochae Christianae 1752.
pridie Kalendas Septembreis.

INDEX

CAPITUM.

LIBER I.

De principiis legis naturalis.

Cap. I. **Q**uod homo, qualis nunc est, solis naturae suae viribus nequeat esse plene beatus, quodque egeat ope entis intelligentissimi, potentissimi, optimi, ut possit ad hanc beatitudinem contendere. pag. 4.

II. Quod existat ens aliquod intelligentissimum, & potentissimum, a quo Universum procuratur. 12.

III. De summa Dei bonitate, qua vult omnes homines beatos, deque legis naturae, & necessitate generatim. 17.

IV. Lex naturae explicatur distinctius, atque adversus profanos homines iterum adferitur. 25.

V. Systema legum naturalium Thomae Hobbi enarratur. 34.

VI. Hobbesianum systema perpenditur & refellitur. 42.

VII.

VII. *Enarratur & refellitur systema Spinozæ.* 52.

VIII. *Grotii doctrina super principiis juris naturae cognoscitivis expenditur* 58.

IX. *Systema Pufendorffii enarratur.* 64.

X. *De principiis juris naturalis ex Cumberlandi mente.* 69.

XI. *De Heineccii systemate super principiis legis naturalis.* 75.

XII. *Superius systema nova ratione adornatur, ac notiones primae & genericae legis naturae moralis proponuntur.* 81.

XIII. *Wollastoni & Ashley Syckes de lege naturae morali systema.* 87.

XIV. *Christiani Wolfii & Henrici Koëbleri de principio legum naturalium uno & adaequato doctrina exhibetur.* 95.

XV. *De natura actionum moralium, tum de conscientia & imputatione morali.* 107.

Monitum volumus lectorem, non habuisse nos in animo ultra hunc libellum progredi : constitueramus enim pleniorē tractationem de Officiis in Ethicae elementis exhibere. Sed quoniam brevior erat libelli moles, quam ut a Bibliopola emitti interesset, extudit, ut loco saltem appendicis aliquid adderemus. Sic igitur habet; esse id potius rei, quam animo gerimus, veluti specimen quoddam, quam rem ipsam : adde, ne integrum quidem, nec exaflatum.

19

L I B E R II.

Quemadmodum ex legibus naturae hominum & civium officia ducantur. 118.

Cap. I. De officiis adversus Deum. 119.

II. De officiis hominum erga seipsum generatim. 128.

III. De cultura animi.

IV. De officiis erga alios perfectis & absolutis. 146.

V. De officiis justitiae hypotheticis, ac primum de dominio, ejusque acquirendi modis originariis. 162.

VI. De modis acquirendi dominiis derivativis. 172.

VII. De officiis, quae ex Dominio rerum profiscuntur. 181.

VIII. De pactis & contractibus, deque officiis inde provenientes. 186.

IX. De officiis adversus alios juris imperfecti. 202.

X. De amicitia. 217.

XI. De officiis statuum naturalium. 229.

XII. De statu hominis sociali, deque primis ejus officiis. 235.

XIII. De Imperantibus, tum de subditorum officiis. 146.

XIV. De officiis magistratuum. 248.

Adbortatio ad studia litterarum.

Ad-

ADDENDA ET MUTANDA.

Pag. 4. Totus titulus capitis primi scribatur, ut est in indice capitum, aut ita intelligatur, quod perinde est: scilicet ibi *miser* accipitur pro eo, qui non est plene & undequaque beatus.

Pag. 4. praef. v. 28. consentiunt, lege consentiant.

Ibid. pag. 17. v. 21. quod, lege quae.

Ibid. pag. 19. v. 14. ad miseriam ut, dele *ut*

Sequenti versu, videamur in, quo, leg. videamur, in quo

Ibid. pag. 24. ex errore, lege, & errore.

Ibid. pag. 32. v. 12. temperamentiam, lege temperantiam

Pag. 18. vers. penult. cetera nugae, lege cetera nugae.

Pag. 30. v. 16. lege utrisque.

Pag. 80. v. 25. nostrum lege nostram.

Pag. 181. In titulo lege proficiscuntur.

In adhortatione pag. 3. v. 18. in id, lege in eo.

Ibidem pag. 20. fortibus magnis, lege fortibus & magnis.

DE PRINCIPIIS LEGIS NATURALIS

PRAEFATIO.



Principiorum legis naturae perquisitionem ad eam philosophiae partem pertinere, quae Metaphysica appellatur, constat inter omnes. Itaque quo plenior habent tirones Philosophi rerum Metaphysicarum institutionem, hunc libellum, quem ego plures ante annos in Scholae usum scripseram, velut appendicis loco Elementis Metaphysicae addo. Brevior is quidem est, quam ut iis facere satis possit, qui paullo sunt in hac disciplina versati: sed, si opuscula nostra in eorum manus deveniant, ii meminerint, nos adolescentes instituendos suscepisse, non doctos: eos autem satis instituisse arbitramur, ubi primis utilium rerum rudimentis imbuerimus. Saepe enim dixi, quum totam philosophiam, tum hanc praesertim subtiliorem, non tam lectione, quam meditatione confici. Ac mea semper sententia fuit, obesse his in rebus plurimam lectionem, qua oneratur magis memoria, quam mens illuminatur. Quum haec principia in societatem humanam derivanda sunt, tum vero tandem Naturae & hominum historia perdiscenda est, id quod nec fit, nec rite fieri potest, nisi quum non ingenii tantum vires, sed in primis iudicium plurimum adoleverit. Quare fit, quod dixi, pauca, eaque electissima, faciliq; via & ratione, philosophari incipientibus esse proponenda. Ea qui profecerint, ipsos per se augere, ornare, & in publicam utilitatem derivare oportet.

Tcm. IV

A

Mi-

Mirabuntur autem fortassis nonnulli, quid causæ sit, cur & de natura Dei in hoc libro differam, & ab ea jus naturale repetam : nam & de his in superioribus luculenter actum est, & quosdam esse constat, qui quum jus in natura esse docere instituunt, sed cum Atheis rem nullam habere velle praefantur. Sed qui ita praedicant se totius rei, ad quam explicandam aggrediuntur, ignaros profitentur. Nam & oportuit hanc tractationem, quam ego alia ratione & via, quam superiora conscripseram, a suis principiis proficisci; & nullum esse in natura jus potest, nulla esse a natura ipsa constituta justitia, nihil natura honestum aut turpe, ubi aut non Deus est, aut rerum humanarum non habet procuracionem. Itaque hoc quum excidisset Grotio, in Doctorum omnium virorum reprehensionem incurrit. Ac vero, nisi vocabulis nos deludere velimus, jus illud quod *cogens* dicitur, lex, quae honesta jubeat, vetetque contraria, esse nulla potest toti hominum generi communis, nisi totius humani generis supremus sit aliquis legislator : nec vero, ubi Deum sustuleris, est alius totius hominum generis legislator. Natura enim, quae dicitur, a Dei vi & imperio segregata, aut cujusque est singularis natura, a qua nemini quidpiam imperari potest, aut mera mentis humanae notio, atque a rebus ipsis abstracta. Accedit, quod opinio Dei, & Legis alicujus naturæ adeo apud omnes homines recipiuntur, ut alterum sine altera nemo unquam abstulerit. Insipiens ille, de quo David, Deum tollit : inde *corrupti & abominabiles dies ejus*. Theodorus Atheus, de quo plura Laertius, cum Deos sustulisset, id quod erat consequens, nihil natura turpe ac honestum, nihil justum aut injustum esse docuit. Exterminavit ex mundi cura Deum Epicurus : sed idem posuit, solam esse utilitatem justitiae & aequi matrem. Quocirca Cicero perspecte animadvertit, Deo, aut providentia ablatis, ne justitiam quidem ullam ac fidem inter homines esse posse. Idem vero tractationem de Legibus a Deo auspica-

tur.

LEGIS NATURALIS.

3

tur. Jam novelli homines, qui juri naturae nervos omnes inciderunt, in primis profani illi Hobbius, & Spinoza, Athei fuisse convincuntur. Ac vero nisi Deum esse omnibus sit persuasum, non potest, quod per se est perspicuum, nisi sola utilitate justum ab injusto secerni. Qua doctrina nihil est pestilentius, atque ad homines adversus homines armandos accommodatius; id quod videmus continenter contingere ubicumque aut in integris societatibus, aut in privatis hominibus ea praevalet legi & rationi. Itaque constituendum est, justitiam & honestatem veram quidem utilitatem facere, sed longius repetendam, quam ab utilitate: utilitatem potius ex informatis legis naturae notionibus, idest ex anticipata justitia & honestate definiendam. Quamobrem quamquam mea semper sententia fuit, quae honesta, eadem vera esse utilia, nec turpia & injusta vere utilia; tamen ita haec tradenda sunt, ut intelligatur ab honestate veram utilitatem nasci, non contra, honestatem utilitate metiri; adeoque regulam honesti & justii omni esse utilitate antiquiorem. Unde autem ea, nisi a praestantissimo naturae legislatore repetetur? Non ignoro esse plerosque, quibus placet legem naturae esse eas naturae humanae *inclinationes*, quibus naturaliter ad objecta nobis consentanea ferimur: alios, qui *rationis rectae dictamina* legem naturalem appellant, viros in primis acutos & doctos. Sed quoniam lex proprie dicta nulla est sine obligatione; nec obligatio nisi ab imperante; naturae illae propensiones, aut rectae rationis dictamina, principia esse possunt legis alicujus naturalis *cognoscitiva*, ut vocant: lex certe non sunt, nisi hoc vocabulo turpissime abuti velimus. Quibus ex rebus conficitur, a natura Dei omnem de jure naturae disputationem suscipi oportere.

Nostrae igitur tractationis haec erit via & ratio. Principio in naturam ipsam humanam inquiremus, ostendemusque hominem, qui nunc est, natura ipsa miserum esse, nec sine lege directrice ad beatitudinem

A 2

nem

nem recta unquam contendere posse. Tum hanc legem exigere legislatorem sapientissimum. Tertio praestantissimam hanc naturam existere, atque ab ea toti hominum generi legem esse promulgatam. Quarto eorum systemata refellemus, qui quum jus naturæ explicare vellent, stirpitus evellerunt. Quinto eorum opiniones super principiis juris naturæ *cognoscitivis* perpendemus, qui maxime hodie probari solent. Postremo loco notiones primas legis naturæ expediemus, ac regulas paucas & genericas trademus, quibus legem illam naturæ singulis obvenientibus speciebus adaptare possimus.

CAPUT I.

Quod Homo, qui nunc est, natura sua necessario est miser, quodque egeat ope entis intelligentissimi, potentissimi, optimi, ut possit ad Beatitudinem contendere.

§. I. QUUM temporum angustiis prohibeamur, quae super hac re sparsim commentati sumus in hunc locum conferre, oro ut hujusmodi propositiones ipsi per se latius philosophiae titrones diducere velint, ac in se & natura sua experiri. Nam quamquam nos, quum haec lucubraremus, naturam nostram ob oculos haberemus; existimamus tamen nihil nos ab humano alienum habere: ac propterea difficile non esse ex sua quemque natura eorum, quae disturi sumus, uberiores rationes haurire.

§. II. Mens hominis non est infinita: brevissima potius est, & multiplicibus erroribus subjecta, atque in eo potissimum decipi potest, & passim decipitur, quod ad cognitionem spectat boni & mali: itaque in tota humana vita passim videre est bona pro malis, mala pro bonis traduci. Non est ut hujus propositionis argumenta longius petamus; intima enim cujusque experientia patet. Communi quoque hominum omnium sensu & vita comprobatur. Quod si quis ejus rei

rei plenius convinci velit, una pulcherrima schola humana erit historia.

§. III. Ex perceptionibus boni vel mali naturalia in homine desideria, vel aversiones, nascuntur, & quidem necessaria, atque in ratione bonorum, vel malorum activorum. Instar axiomatis habeo, quod aequè in cujusdam positum est conscientia. Videri possunt quae ea super re edisseruimus in secunda parte, quo in loco humanae libertatis imperium & fines explicuimus. Ne cui autem scrupulus ex vocabulis incessat, animadvertat quaeso, nos desideria & aversiones a voluntatibus discriminare. Ac desideria quidem appellare primas illas naturae nostrae commotiones atque propensiones erga bona cognita, aversiones, commotiones ac horrores a cognitis malis provenientes: voluntates vero liberas electiones, vel cessationes. Desideria & aversiones in necessariis naturae nostrae motibus ponimus, quibus corripi solemus ante omnem consultationem & voluntatem. Haec autem propositio quum intimo cujusque sensu, tum tota hominum vita, ac magna omnium consensione comprobatur.

§. IV. Voluntates hominis ut plurimum sequuntur desideria, aut aversiones: seu desideria & aversiones in maxima hominum parte, ac ut plurimum, solent esse motiva determinantia; fellebanturque profecto Stoici, qui sapientem sola ratione, nulla vero animi commotione, omnes actiones suas regere docebant: aut nisi fellebantur, quod similis vero est, imperitis imponebant. Quid quod ratio ipsa non videtur nos determinare ad agendum aut cessandum, nisi voluptate aut dolore, idest praemio vel poena propositis? Id cuique per se intimè exploratum esse potest, si ad singulas suas actiones attendat. Ejus autem rei ratio est, quod natura nostra beatitudinem, seu animi perfectam quietem & voluptatem, continenter quaerit. Itaque ubi a desiderio vel aversione sollicita est, quietem expetit, vel ad objectum desiderii sese deter-

minando, vel ab objecto averfationis se avertendo. Quumque nulla objecta finita eam plene perficere possint, inde & illud est, ut perpetuo anxia sit, atque inconstans per plurima divagetur. Ceterum non ita haec propositio intelligenda est, quasi haec motiva necessario nos determinent: nam quum objecta desideriorum nostrorum & averfationum, si summum bonum, & maximum malum excipias, finitae sint actionis, voluntatem cogere nullo modo possunt, quae infiniti est appetens. Itaque & si voluntas secundum ea fere semper determinetur, non tamen necessario, sed libere determinatur, magis ut experiatur, quam ut his sibi satisfaciatur.

§. V. Actiones hominis liberae, quum externae, tum internae, ad praescriptum voluntatum nascuntur; neque sine voluntatibus esse aut intelligi possunt. Externas & internas liberas memoro: quia necessariae quum usum rationis & consultationis praevertant, a voluntate non proficiunt. De iis vero nihil attinet ad nos dicere. Legibus mechanicis, non moralibus reguntur. Porro & haec propositio ex iis est, quae loco axiomatis haberi debent. Quae enim actiones non sunt voluntariae, earum ne ratio quidem principium est: quae vero sine ulla voluntate & ratione actiones fiunt, mechanice fiunt, non libere.

§. VI. Homo potest operari erronee. Nam potest percipere bonum pro malo, malum pro bono [ex §. II.], indeque nasci desiderium mali pro bono, boni averfatio pro malo (ex §. III.): & voluntas efficiendi malum pro bono; bonum fugiendi pro malo (ex §. IV.): ex quibus operationes existunt erroneae (ex §. V.), idest minime naturae suae & fini consentaneae.

§. VII. Beatitudo posita est in statu voluptatis undique perfectae. Axioma est, super quo nulla esse potest Philosophorum controversia. Frustra autem est distinguere inter voluptatem animi & corporis: voluptas enim non est, nisi animi: causas tantum voluptatis ita partiri possumus, ut aliae ad animum, aliae ad

ad corpus referantur. Itaque veterum Philosophorum concertationes *de fine*, nisi (quod ego opinor) super causis efficientibus verlatæ omnes fuerunt, ineptæ profecto fuere: nam finis hominis non potest alius esse nisi perfecta animi quies, ac plena & stabilis voluptas: quæ autem hanc beatitudinem afficiant causæ, id si illi inquisivere contentiosius, operæ pretium fecerunt: est enim humanæ vitæ præcipuum. Quamquam admiratione dignum videri potest, viros alioquin acutissimos non intellèxisse, certis nos atque in natura nostra infixis miseriæ causis agitari omnes, nullamque habere in nobis, aut iis, quæ nos circumstant, rebus, opem, qua ita nos ac naturam nostram perficere possimus, ut plene simus beati. Nisi fortasse id senserunt quidem (sunt enim eorum præclara quaedam super hac re effata) sed susceptam semel disputationem, ut erant illi ad sese mutuo conficiendos animati, ex usu Scholarum magis, quam ex veri amore persequi voluerunt.

§. VIII. Miseria posita est in statu doloris & perturbationis. Eo major autem est hujusmodi miseria, quo dolor & perturbatio majorem habent intensitatem & durationem; minor, quo minorem. Propositio est cujus evidentia ex superiore axioma manat. Quoniam enim beatitudo posita est in statu voluptatis undique perfectæ, ac quidquid a beatitudine desciscit, id miserum est; sequitur, eum esse miserum, qui animi dolore, ægritudine atque quacumque perturbatione agitur. Inde fit ut quum Deus sit beatissimus, omnia ex illo hæc exulare necesse sit.

§. IX. Homo factus est ad Beatitudinem. Homo natura sectatur voluptatem, & vehementius majorem, perfectissimam necessario, idest tota sua natura & vi. Idem vero averfatur dolorem, & quidem majorem magis, maximum necessario, ac tota sua natura. Sunt hæc cuiquam ex intimo sui sensu nota. Quum autem beatitudo sit posita in statu voluptatis undique perfectæ (7), miseria in statu doloris &

perturbationis [8]; sequitur, hominem beatitudinem quidem necessario, idest sua natura, consecrari; averfari vero miseriam. At quod tota vi ac natura nostra sequimur, & in quod naturaliter propendemus, in id profecto a natura sumus geniti.

§. X. Qui operatur erronee non potest beatitudinem aut adipisci, aut conservare, etiamsi adeptus fuerit. Nam quum malum pro bono amplectatur, bonum pro malo averfetur, qui erronee operatur; & dolor, adeoque miseria ex malo, voluptas & beatitudo ex bono nascentur; is recta miseriam petit, beatitudinem vero fugit, qui erronee operatur.

§. XI. Qua ex re haec sequuntur consecraria. Primum, ut qui magis errat, magis etiam miseriae sit obnoxius: minus, qui errat minus. Quum autem qui magis sapiens est, minus erret; efficitur, ut qui magis sapiens est, minus miseriae sit subjectus. Tum, ut nisi quis sapientissimus sit, ut nunquam erret, is primam hanc miseriae causam vitare nullo modo possit.

§. XII. Homo suae relictus sapientiae nequit esse omni ex parte beatus, atque haec est prima miseriae humanae causa, eaque cum natura ipsa humana cohaerens. Nam quum homo non sit infinite sapiens (2), ac ne esse quidem *κατ' ἐστίαν*, *essentialiter* possit; errori subjectus est, ac propterea miseriae (10). Est autem prima haec, ut dixi, miseriae nostrae causa naturae ipsi infixae, & ut ita dicam, *essentialis*. Quandoquidem quum ei essentialis esse nequeat sapientia infinita; essentialis erit defectus a summa illa & absolutissima intelligentia: unde quoniam natura ei adhaeret huiusmodi malum *metaphysicum*, ut Leibnitiani vocant; natura quoque haec illi miseriae causa adhaeret, ac penitus est infixa.

§. XIII. Qui nec in se undique perfectus est, ut nihil sibi desit ad perfectam beatitudinem, nec infinitae potentiae est, ut possit id omne efficere, quod maxime cupit, ut & se plene perficiat, & adversa omnia potentissime removeat, is hinc quoque miser

ne-

necessario est, si naturae & potentiae suae relinquatur. Nam is & non habet in se voluptatis plenae causas sufficientes, & vi destituitur, qua aegritudinem, dolorem, perturbationes a se amoliri possit. Itaque & natura sua impar sui est desiderio, & omnimodis torquetur affectibus, qui ex natura imperfecta, nisi potentissima vi sustinetur, necessario erumpunt.

§. XIV. Homo & finitae est naturae, ut non sit sibi ad beatitudinem sufficientissimus; & imbecillis, ut non possit ipse per se mala omnia propulsare: itaque quum sibi plurima deesse per sentit, tum plurima cupit, quae efficere nequit. Quocirca ex binis etiam illis causis in se ac suapte natura, nisi aliunde perficiatur, & juvetur, miser est. Ac necessario miser est: nam nec potest non sentire, quae sibi desunt, nec, quum beatitudinis, idest infiniti boni, natura sit appetens, non ea cupere necessario, quae sibi desunt; nec tandem non ea velle propulsare, nec interim posse, quae ei mala accidunt.

§. XV. Confectum est, si quid cerno, hominem, qualis nunc est, necessario esse miserum, & quidem ex triplici fonte. Nam nec infinite intelligens est, ut possit omnem errorem evadere: nec infinite perfectus, ut ipse sibi ad beatitudinem sufficiat: nec omnipotens, ut queat & quae concupiscit omnia consequi, & quae horret omnia a se distingere. Potest is quidem (idque humana sapientia personat) & dare operam ut minus erret, quo minus sit miser: & ad naturae exigentiam suas cupiditates adducere, quo minus torqueatur: & necessaria mala fortiter ferre, quo minus sentiat: voluntaria vero sapientia & prudentia vitare, ut ne magis etiam miser sit, quam natura est: sed ut suae relictus naturae, nec erret unquam, nec ullis cupiditatibus agitur, nec mala, saltem necessaria, sentiat, id vero efficere nullo pacto potest. Quam ob rem perridiculi mihi Stoici fuisse videntur, qui eo hominem sophismatibus suis evehere conabantur, qua ire tota resistit natura. Quasi scilicet qui
natu-

natura & necessario miseri sumus, ut demonstratum est, phantasia velut noctambuli, beatis esse possimus. Re enim, non cogitatione haec nobis beatitudo concilianda est.

§. XVI. Ex quibus illud consequitur, hominem, ut sit undequaque beatus, indigere ope entis sapientissimi, perfectissimi, potentissimi: nam nec finitum intellectum perfecte emendare potest, nisi infinita sapientia: nec naturam plene perficere, ut nihil ei desit, nisi natura infinite bona & perfecta: nec mala omnia potentissime amoliri, nisi infinita potentia. Quocirca si nullum sit in universo ens intelligentissimum, optimum, potentissimum, omnium animantium, quae in terra gignuntur, miserrimus sit homo necesse est: quippe qui eas in se miseriae causas habet, quibus ceterae animantes destituuntur: nam eae postquam ventri & veneri satisfacere, nullis aliis cupiditatibus perturbantur. Quumque non sint infiniti appetentes, ad naturam, non ad libidinem vivunt.

§. XVII. Atque idem porro sequitur, si quidem existat in universo ens intelligentissimum, optimum, potentissimum, sed universi nullam curam, nullam procuracionem gerat, nec ullam habeat humani generis providentiam. Quamobrem Athei, qui omne Numen tollunt, & Epicurei, qui Deum quidem ponunt, sed omnem ei denegant providentiam, non possunt non esse omnium animantium miserrimi. Nam & insitam cuilibet miseriam non possunt non continenter persentiscere; & nullum ad eam levandam aut in se, aut in rebus extra se positis praesidium inesse non solum intelligunt, sed ultro fatentur. Inde vero est, ut nulla sit in hominum societate gens pestilentior: nam non possunt non saepissime desperatione agi: ex quo sequitur, ut quidvis moliri, ac omnia perturbare, sicubi possint, parati sint,

*Indomitus veluti quadrupes ubi frena momordit,
Par levibus ventis rapitur celerique sagittae;
Exspatiatur agris, & fossas transfilit audax;*

Tum

Tum si fortè tubam, aut equitis crepitantia flagra
 Audierit, cunsum ingeminat, fugit ocior Euro,
 Inque leves nebulas volucris pede spargit arenam:
 Jussus restrictis tandem subsistere loris,
 Non equitem sentit, non lora; sed impete cecco
 Fertur, anhelantem donec sessumque relinquat
 Spiritus, ac tumidos vincat labor ipse furores.
 Haud jecus illecebris diraque cupidine raptus,
 Pectore sacrilego qui sanctum numen abegit,
 Dissimulat quidquid verax & conscia recti
 Alio corde monet natura, neque audit habenas:
 Exhaustus tandem jactante libidinis aestu
 Concidit, incassum suspirans viribus aegris (a).

CAPUT II.

Quod existat Ens aliquod intelligentissimum, & potentis-
 simum, & quod Universum cures.

§. I. **P**lurima esse genita in Universo, non
 aeterna, eaque aut intelligentia, & po-
 tentia, aut inertia & bruta, plurima quoque quotidie
 corrumpi, inter explorata habemus. Itaque super ea re
 contentiose disputandum non est. Neque vero rege-
 ratur, quaecumque nasci & interire videntur, modifi-
 cationes esse substantiarum aeternarum: nam id pri-
 mum ineptum est & absurdum: quippe quum natura
 aeterna sit *immutabile esse*, quemadmodum in Ontolo-
 gia demonstratum est; intelligi non potest, qui muta-
 tioni esse possit subjecta. Deinde quidquid illae sint,
 generationes certe sunt rerum a rebus, veluti hominis
 ab homine, plantae a planta.

§. II. In generatione, infinita entium genitorum
 & generantium series repugnat. Nam quum in hac
 serie nulla statuatur prima, quae contineat rationem
 suffi-

(a) *Poliniacus in Antilucetio lib. 1. vers. 790.*

sufficientem caeterarum omnium rerum, tantundem est infinitas rerum series, quarum una ab alia pendeat, ponere, atque statuere effectus infinitos sine ulla ratione sufficiente, quod & ineptum est & absurdum.

§. III. Existunt in Universo generationum entium viventium, & rationalium series: id patet exemplo plantarum, brutorum, hominum. Quum autem repugnet series infinita a parte ante (2); consequitur harum serierum omnium primam esse, & independentem causam.

§. IV. Ex nihilo sine ulla externa causa, & sine ulla ratione sufficiente, nihil fieri potest. Cujusque ergo effectus causa existat necesse est, in qua contineatur integra, & adaequata ejus effectus causa sufficiens.

§. V. Existit principium aliquod aeternum activum universi. Est enim aliquid, quod generatur & interit; etiam intelligens & potens (1): id per infinitam generantium, & generatorum seriem fieri non potuit (2), sed per series non infinitas (3): quae porro series ex nihilo esse non potuerunt, idest sine causa, in qua earum adaequata ratio sufficiens non containeretur (4); ergo est ens aliquod aeternum activum principium universi, in quo serierum omnium entium mundanorum adaequata ratio sufficiens contineatur.

§. VI. Si fingatur existere aeterna materia sine motu, haec a quiete sine causa externa ad motum nunquam transibit (4). Eodem modo si fingatur existere materia cum vi motrice sine ullo intellectu & ratione, nec quidpiam aliud, impossibile intrinsecus erit ex hujusmodi materia emergere posse rationem & intellectum. Pluribus aliis propositionibus eadem ratio adaptari potest, omniumque eadem semper erit demonstratio.

§. VII. Existit principium aliquod activum aeternum, quod sit intelligens & potens. Nam in seriebus rerum mundanarum quaedam sunt intelligentes & potentes [3]: si nihil autem esset aeternum intelligens & potens, series istae essent sempiternae, idest
sine

sine ulla prima, quod esse nequit [2]; existit ergo ens quoddam aeternum intelligens & potens, in quo sit ratio sufficiens adaequata serierum mundanarum intelligentium, nisi dicere velimus, hujusmodi series ex causis non intelligentibus provenisse, quod aequè impossibile est [4. & 6.]. Quae quidem nisi vehementer fallor, perspicue demonstrant, existere mentem aeternam intelligentissimam, & potentissimam, quae sit prima causa creatrix, & conservatrix universalitatis rerum. Sed operae pretium erit haec paulo accuratius pertractare, atque longius provehere.

§. VIII. Sine mutua quadam attractione singulorum materiae partium & magnorum globorum mutua aliorum in alios gravitatione universalitatis rerum ordo consistere non potest. Enim vero sine attractione minimarum materiae particularum corporum unitas nec esse nec intelligi potest, quemadmodum Philosophi demonstrarunt: nec sine mutua magnorum globorum gravitatione mundanus ordo aut nasci, aut stare potest. Quae res quoniam explorata est, atque a Physicis demonstrata, longiorem orationem nostram non exigit.

§. IX. Vis attractrix particularum materiae minimarum, nec infinita est, nec necessaria & unum in modum determinata, ut nullius alterius modificationis capax sit. Nam vis haec attractrix decrescit in ratione duplicata distantiarum, quemadmodum est a Newtono demonstratum, & varie modificatur pro varietate particularum: quae autem talia sunt, nec infinita esse possunt, nec necessaria suapte natura, idest unum in modum determinata.

§. X. Si vis attractrix, & vis gravitatis essent aeternae, independentes, eae & infinitae essent, & necessariae: nam infinitas & necessitas attributa sunt essentialia Entis aeterni, quemadmodum Metaphysici demonstrant; ex qua re conficitur, eas vires a causa aliqua pendere: nam nec infinitae sunt, nec ita necessariae, ut nullius alterius modificationis sint capaces (10).

§. XI.

§. XI. Vires hujusmodi provenire nequeunt ab anima mundana una individua & aeterna atque naturae ipsius necessitate operante, quemadmodum Pantheistae opinantur. Ita enim & infinitae essent, & unum in modum determinatae, ut ex superioribus patet: quae quum sint falsa, ab hujusmodi principio esse nequeunt.

§. XII. Quum ergo vires istae non sint aeternae, necessariae, & essentiales materiae, nec proveniant ab anima mundana, nec ex nihilo esse possint, aut ex serie causarum infinita, ut ex superioribus constat: reliquum est, ut proveniant ab ente aliquo aeterno & intelligente, quod libertate, non vero ulla naturae suae necessitate eas creat & conservat.

§. XIII. Axioma est Philosophorum omnium, eorundem effectuum eandem esse causam.

§. XIV. Causa aeterna intelligens & libera, quae vires illae creantur & conservantur, eadem causa est universi, & quidem unica. Enim vero quum universum hoc spectabile duabus illis viribus contineatur (8); eae vero vires a causa aeterna intelligente & libera proveniant (12): eadem illa causa erit universi. Quum vero vires illae ita universum conforment, ut in eandem finem, atque ordinem conspirent, ut patet vel ex mediocri rerum naturalium contemplatione; & eorundem effectuum eadem sit causa (13); conficitur unam hanc intelligentem & liberam aeternam causam, unicam esse universi causam.

§. XV. Est autem haec causa non solum ad originem, verum etiam ad conservationem universi necessaria. Nam nec sine illa prima universi stamina, & primae conformatrices universi vires intelligi, & esse possunt, nec sine illa conservari; quum & finitae sint, & modificationum variarum capaces, adeoque perturbationis. Super qua re lectu dignissima sunt, quae Newtonus scribit in Scholio generali principiorum mathematicorum Philosophiae Naturalis, quaeque saepe adnotat in Scholiis Opticae.

§. XVI. Hoc Ens aeternum, quod causa est universi

verſi creatrix, & conſervatrix, & intelligentiſſimum eſt, & potentiſſimum, & optimum. Nam hoc Ens conſervat hunc praeclarum pulcherrimumque univerſi ordinem (15): qui conſtat ex ſtrutura partium infinitarum numero & varietate, finibuſque peculiaribus infinitis: conſervari vero is ordo nequit niſi ſumma intelligentia & potentia; Intelligentiſſimum igitur eſt & potentiſſimum. Praeterea quum hoc Ens aeternum ſit, nequit non eſſe perfectiſſimum: nam quae exiſtentiae & eſſentiae ſuae nullas habent cauſas, nec habere poſſunt ſuae limitationis: quae vero talia ſunt, infinite perfecta ſunt. Vide ut hoc argumentum proſequitur Wolfius in Thelogia Naturali.

§. XVII. Conſtat ergo exiſtere Ens quoddam intelligentiſſimum, potentiſſimum, & optimum, cujus numine rerum haec univerſitas creata ſit, & conſervetur. Quum autem unum huiusmodi ens ſufficiens ſit, quippe in quo contineri poteſt ratio ſufficiens omnium poſſibilium, & unum demonſtrent ordo, & unitas univerſi; non dubitamus unum illud eſſe, non plura. Hoc autem ens *Deum* appellare ſolemus ex adſpectu praecipuae ejus proprietatis, nimirum intelligentiae: ergo exiſtit Deus, & quidem unicuſ.

Schol. In divina Natura adſerenda argumenta diverſorum generum protulerunt Philoſophi. Praeter ea, quae ex intima metaphyſica deſumuntur, quaeque paulo ſublیمiora ſunt, quam ut omnes homines intelligere poſſint, praeclara ſunt & perſpicua, quae ex rerum naturalium ordine atque ſtrutura deducuntur. Sunt ea numero prorsus infinita: nam nulla res eſt, quae, ſi attente contemplati fuerimus, characterem aeternae huius mentis non praeſeferat, ſeu vaſtiſſimos univerſi globos, eorumque perennes, & adcuratas motiones, ſeu naturam luminis, ſeu partes Telluris noſtrae, aeris atmofphaeram & vires, totius globi terraquei ſitum, aquam, montes, plantas, bruta, homines intueri velimus: ex quarum rerum ſingulis Derham exactiſſima argumenta exiſtentiae divinae
men-

mentis contrivat in Theologia physica . Sed praestat pauca observare de unius oculi structura, quae adeo mirabilis est , ut ea solum omnibus numeris absolutam demonstrationem existentiae Dei praestare possit . Finis oculi unus est visio . Neque enim cum Lucretio delirare ullus potest , oculos non esse factos videndi gratia , sed factos fortuito , eorum hinc usum esse detectum . Jam vero ad eum finem ita partes omnes oculi conspirant , ut manifestum sit ab industri aliquo Artifice esse compositas & conformatas . Nempe ut visio perficiatur , necesse est , ut externarum rerum imagines in oculi fundo depingantur . Depinguntur autem radiorum focus exacte in retinam incurrentibus . At foci hujusmodi nullo modo in retinam cadere possunt , nisi dum ex objectis reflectuntur divergentes , ope aliqua convergentes evadant . Eam in rem conformata est tunica cornea , atque ita dispositi humores forma extrinsecus convexa , ut radii lucis oculum penetrantes refringantur refractione ad perpendicularum , atque ita convergentes evadant . Praeterea quoniam aut nimia copia lucis , aut nimis parva quantitas impediunt , quominus imagines clare & distincte depingantur , ideo musculus instructus est oculus , quibus pupilla dilatari , aut constringi possit . Tum propugnacula addita sunt extrinsecus , palpebrae , & supercilia . Praeterea eo loco locatus est , in quo maxime erat necessarius . Infinita alia hujusmodi adnotant Derham , & Niewentitius , quae demonstrant aperte non sine cura supremæ mentis fieri . Concludamus Ciceronis verbis , „ Quod si omnes mundi partes ita constitutæ sunt , ut neque ad usum meliores potuerint esse , neque ad speciem pulchriores : videamus , „ utrum ea fortuita sint , an eo statu , quo cohaerere „ nullo modo potuerint , nisi sensu moderante , divina- „ que providentia . Si ergo meliora sunt ea , quae „ natura , quam illa , quae arte perfecta sunt : nec „ ars efficit quidquam sine ratione ; ne natura quidem rationis expers est habenda . Qui igitur con-

„ ve-

venit, signum aut tabulam pictam cum adspexeris,
 scire adhibitam esse artem: cumque procul cursum
 navigii videris, non dubitare, quin id ratione atque
 arte moveatur: aut cum solarium vel descriptum,
 aut ex aqua contemplere, intelligere declarari horas
 arte, non casu: mundum autem, qui & has ipsas
 artes, & earum artifices, & cuncta complectatur,
 consilii & rationis esse expertem putare? Quod si
 in Scythiam, aut in Britanniam, sphaeram aliquis
 tulerit hanc, quam nuper familiaris noster effecit
 Posidonius, cujus singulae conversiones idem efficiunt
 in Sole, & in Luna, & in quinque stellis erranti-
 bus, quod efficitur in coelo singulis diebus, & no-
 ctibus: quis in illa barbarie dubitet, quin ea sphae-
 ra sit perfecta ratione? Hi autem dubitant de mun-
 do, ex quo & oriuntur & fiunt omnia, casum ipse
 sit effectus, aut necessitate aliqua, an ratione ac
 mente divina: & Archimedes arbitrantur plus va-
 luisse in imitandis sphaerae conversionibus, quam
 naturam in efficiendis; praesertim cum multis par-
 tibus sint illa perfecta, quam haec simulata soller-
 tius.

C A P U T III.

*De summa Dei Bonitate, qua vult omnes homines
 beatos, deque legis natura & necessitate
 generatim.*

§. I. **N**atura intelligentissima, potentissima,
 optima, idest Deus, sibi est ad perfe-
 ctam beatitudinem sufficientissima: neque ulla re exter-
 na aut perfici potest, aut turbari. Nam quum sit in-
 finite perfecta, nullius externi boni indigere potest ad
 beatitudinem. Quumque ejus Sapientia sit infinita,
 potentia vero & voluntas aequales, nec errore
 perturbari potest, nec desiderio angī. Itaque nihil ei
 deest ad perfectam beatitudinem.

Tom. IV.

B

§. II.

§. II. Qua ex re consequitur, ut natura hæc beatissima nec invidet ulli, nec irascatur, nec malefica sit. Nam invidere & irasci imbecillitates sunt naturæ alicujus boni indigentis: nullius vero boni indiget Deus. Præterea alteri malefacere, quin sit ei quocumque modo bonum, aut ex invidentia proficiscitur, aut ex ira, & odio; at nulli invidet Natura beatissima, nulli irascitur; ne malefacit igitur quidem. Itaque quam absurdum sit Manicheorum systema, qui super Deum bonum malum alterum induxerunt, qui quum æque sit sapientissimus, potentissimus, & perfectissimus, in eo tamen suam ponat integram felicitatem, ut aliis malefaciat. Pugnant enim hæc cum Natura æterna & beatissima.

Schol. Sed quaeret quispiam, si ita se res habeat, qua ex causa tot mala homines perpetuo affligant? Scilicet, quemadmodum argumentatur apud Lactantium Epicurus, aut Deus potest auferre mala, nec vult: aut vult, nec potest: aut neutrum. Si primum, invidus est, & malignus; si alterum, imbecillis: si tertium, & invidus & imbecillis. Hæc argumenta effecerunt, ut recentibus temporibus existimaverit quidam, defensores unitatis Dei impares esse ad ea super re cum Manicheis disputandum. Petrus scilicet Baelius, quum Manicheorum argumenta ornasset, atque longe lateque provexisset in Dictionario Historico Critico Articulis Manicheus, & Pauliciani, confidenter pronunciat, solvi non posse. Sed aut ego fallor, aut sunt illa inepta sophismata (a). Quod ut intelligatur ob-

fer-

(a) Quidam ut huic argumento respondeant, omnia mala pernegant. Nulla esse mala Euclides Megaricus docuit apud Laetium. Stoici sola peccata in malis habent, ut sola honesta in bonis. Vide Cic. disp. Tusculan. v. S. Basilus Hom. 2. in Hexameron sola item peccata inter mala numerat: cetera nugæ esse nec in malis censenda.

servandum est cum Leibnitio, tria esse malorum genera, quae in natura humana reperiuntur, metaphysicum, Physicum, & morale. Metaphysicum est defectus a summa perfectione, idque necessario naturis creatis inhaeret, quas facere infinite perfectas non potest Deus. Morale vero, idest peccatum, ex metaphysico originem trahit; neque enim ob alias causas peccant homines, nisi quia finita ratione abutuntur. Physica tandem mala, si attente expendantur, realia sunt bona; siquidem iis homo aut punitur, ut ad bonam frugem convertitur; aut praeparatur ad virtutem, quae vel continetur beatitudo, vel ad beatitudinem itur. Sed cur, inquit, Bælius, moralia mala Deus pro summa sua sapientia & potentia non impedivit? Nempe impedire, atque emendare perpetuo studet, quantum natura finit humana, quod inferius ostendemus. Vide dicta in III. parte.

§. III. Deus nequit velle hominum miseriam, quin ipsi sibi consciscant, ac mereantur. Nam quum sit natura beatissima, nequit ulli malefacere, quin mereatur (2); nullum vero majus malum creaturis rationalibus inferri potest, quam miseria; non potest igitur salva sua bonitate creaturarum rationalium miseriam velle, quin illam mereantur. Quod si opponatur, ita fieri, ut intelligi nequeat, qui cum hoc theoremate doctrina poenarum infernalium concilietur, quippe quae aeternae sunt: respondent Theologi, poenas hujusmodi sempiternum durare, quia semper perdurat damnatorum pertinacia, & protervitas.

§. IV. Deus vult voluntate antecedente hominum beatitudinem. Efficit enim homines beatitudinis & miseriae capaces, & ita quidem, ut natura ipsa beatitudinem appetant, averlentur miseriam. Quod si nolit esse beatos, nolitque iis media beatitudinis praestare, quum ipsi suapte natura beati esse nequeant, quinimo ut nunc sunt ad miseriam internis & externis naturae causis impellantur; vult eos miseros, quod velle nequit (3). Nec sola ratione id discimus,

Ied tota Religionis revelatae OEconomia : passim enim in divinis scripturis testatur se velle omnes homines beatos fieri, atque ad agnitionem veritatis venire.

§. V. Ex natura Dei sequitur etiam Deum velle perficere hominis intellectum, voluntatem, & potentiam. Nam quum ex natura Dei sequatur, ut velit hominem beatum; nec is esse ullo modo beatus possit, nisi emendatis auctisque intellectu, voluntate, & potentia; ex quarum facultatum imperfectione hominis necessario provenit miseria; nisi facultates illas perficere velit, atque emendare; vult eum esse miserum, quod Naturae Divinae adversatur (3).

§. VI. Deus nequit communicare homini suam infinitam intelligentiam & potentiam; itaut illa sit homini essentialis. Dogma scilicet est eorum omnium qui de Deo philosophantur, efficere creaturam non posse, quae intensitate perfectionum, & extensione sibi sit aequalis. Quod & pluribus aliis argumentis confirmari potest, & iis potissimum, quibus aperte demonstratur, Naturam divinam esse non posse nisi unicam. Praeterquamquod pugnantia inter se sunt, quemadmodum perspecte observat Wolfius, Naturam undequaque perfectissimam, eandemque dependentem. Limitatum enim sit necesse est quidquid non suapte existit natura, sed ab altero.

§. VII. Quoniam ergo homo nequit ipse habere essentialiter infinitam intelligentiam, naturam, & potentiam; consequitur non eum esse posse natura beatum, sed participatione tantum alterius rationis, bonitatis, & potentiae. Nempe potest Dei supremam rationem sibi quomodocumque revelatam rationi suae addere, aut substituere, & divina bonitate ac potentia adjuvari.

§. VIII. Deus potest facillime hominem perfecte beatum efficere tribus mediis. I. Communicatione supremae rationis ne erret II. Ope eum adjuvando, ut quod rectum & bonum intelligit opera perficiat.

III. Bo-


III. Bonitatis suae diffusionem. Nempe quum sit intelligentissimus, potentissimus, optimus; intelligitur perspicue, id nullo negotio efficere posse.

Sch. Quaerit hic fortassis quispiam, ecquid causae sit, cur non & in hac quoque vita plene beatos efficiat Deus homines? Nempe ejus beatitudinis, cujus sunt illi capaces, dum hic agunt, omnibus media suppeditat: nam & rationem, qua bona & mala discernere possint, natura ipsa omnibus impertitur; & cum ratione prima quaedam justi & honesti semina: & impetum ad se conservandum, ac suam felicitatem perquirendam indit. Accedit eodem lex altera supernaturali modo promulgata, ac quacunque patet Tellus diffusa, cujus summa est mutua hominum caritas, qua maxima, quae in terris haberi potest, beatitudo continetur. Sed quominus plene hic beatos efficiat, naturae totius ratio & positus ordo vetat; neque enim hujusmodi homines Naturae hujus, cujus pulchritudo in rerum perpetuo ac ordinatissimo cursu posita est, partes esse possent. Itaque immortales & beati ad alterum & intelligibilem mundum pertinere tantum possunt, non ad hunc corporeum, ac harmonice defluentem. Quocirca, quod Dei benignitatem decet, legibus, in primis naturae, quae omnes peraeque spectet, homines, dum in terris degunt, ita moderari, ut qualemcumque, cujus hic capaces sumus, beatitudinem adipisci possint, id illum efficere porro demonstrandum est.

§. IX. Lex est intellectus & voluntatis finitae norma ab eo promulgata, qui & sapientissimus sit, ut recte regere possit; & potentissimus, ut adigere ad observationem valeat; & qui jus habeat in eos, quibus dat.

§. X. Et quidem Lex ferri nequit, nisi ab eo, cujus ratio praestantior sit. Nam quum debeat regere intellectum, & voluntatem, omni erroris suspitione carere debet; quod esse non potest, nisi promulgetur a ratione sapientissima. Itaque perspicue dictum est a

De-



Democrito, *imperare sapientioris esse*. Praeclara super ea re observat Aristoteles in Politicis. Inde vir doctus eam distinctionem hominum repetit, ut sint alii *natura servi*, alii *natura dominantes*. Nempe qui stupidi sunt, & lateres crudi, quum ratione directrice destituantur, servire tantum possunt, non etiam imperare; quum contra ii, qui praestante sunt ratione praediti, & se & alios regere possint. Oportet etiam, ut Legislator potentiam habeat impellendi subditos ad obsequium legis, alioquin lex doctrina potius erit, & consilium, quam lex. Sed & oportet, ut Jus in eos habeat, quos legibus regere studet, ut legislatio sit iusta.

§. XI. DEUS habet omnes characteres perfectissimi, & veri legislatoris. Nam & est intelligentissimus, idest infinita ratione praeditus, qui idcirco intelligit perfectissime, & creaturarum rationalium defectus, & vias atque rationes omnes, quibus regi eas oportet. Deinde est potentissimus, ut possit ad leges observandas adigere creaturas rationales propositis poenis vel praemiis. Tandem quum sit omnium creator, & conservator jus habet absolutum in omnia, ut idcirco nemo sit, qui queri possit, sibi libertatem naturalem diminutam. Nempe quaelibet creatura natura ipsa sub Dei imperio nascitur, atque est. Sed & solus Deus supremi naturae legislatoris characteres habet, quum solus sit sapientissimus, potentissimus, optimus.

§. XII. Quae quum sint, videamus porro, quae ratione Deus ope legislationis & gratiae homines ad veram beatitudinem ducat. Atque principio legislatione, & gratia homines plene beatos efficere potest. Nam quum divina legislatio sit communicatio supremae rationis divinae brevi hominis rationi; gratia vero communicatio potentiae, & bonitatis divinae; legislatione & gratia fontes omnes humanae miseriae purgare potest.

§. XIII. Virēs, quae sunt in natura, quarum red-
dere

dere rationem per antecedentes non possumus, sed quarum ratio sufficiens aut in natura est, aut in Deo, leges naturae mechanicas appellamus. Ejusmodi sunt vis attractrix in materia universali, vires centripetae, & centrifugae Planetarum, quibus universi ordo continetur. Si quae sunt ejus generis in natura humana, leges naturae humanae mechanicas habemus.

§. XIV. Finis est id, ad quod caetera ordinantur, seu cujus gratia res & est, & operatur. Hominis finis esse alius nequit, nisi perfecta beatitudo; nam ejus gratia & est, & omnia necessario operatur, ita scilicet, ut citius nolit esse, quam non esse beatus. Quare hic in hominibus ad beatitudinem impetus lex est naturae humanae mechanica (14).

§. XV. Homo a natura ipsa monetur, ut se regat aliqua lege Entis intelligentissimi, & potentissimi. Est enim hominis finis beatitudo (ex superiori) ad quam natura ipsa fertur. Quum vero beatitudinem hanc consequi nequeat, nisi perfectione intellectus, appetitus, naturae, & potentiae (ex superioribus) quae perficere nequit, nisi ope Entis intelligentissimi, & potentissimi; consequitur a natura ipsa moneri, ut se lege entis hujusmodi regat. Naturalis haec est in omnibus hominibus cognitio, idest talis, ad quam natura ipsa impellitur, si vel minimam super natura sua, & origine contemplationem instituerit. Est autem haec doctrina prima quaedam fax, qua homines omnes regantur in perquisitione *legis naturalis*.

§. XVI. Homo, qualis nunc est, naturae lumine conjicere potest existere summam hanc legem, ejusque generalissima capita saltem intelligere. Eam propositionem sic demonstro. Nam Homo naturali sua ratione haec intelligit: esse supremam quandam mentem intelligentissimam, & potentissimam: ab eo omnia esse facta, & gubernari; adeoque hominem ipsum, qui universitatis rerum pars est. Agnoscit praeterea summam illam mentem, nec invidere cuiquam posse, nec irasci, nec malefacere; adeoque velle non posse, hominum

miseriam, sed velle beatitudinem. Jam ea beatitudo ut obtineatur, exigitur omnium primum emendatio intellectus, quae fieri nequit, nisi communicatione summae divinae rationis, quae aeterna est, & naturalis lex; ergo naturali sua ratione intelligit existere supremam legem creaturarum atque finitarum mentium directricem. Itaque qui legem omnem naturalem pernegant, ii negare quoque debent cognosci ab homine ea omnia, quae superius demonstrata sunt.

§. XVII. Et quidem praecipua, & generalissima Capita naturalis hujus legis homines omnes intelligere possunt, qualia sunt, nos non esse nostri dominos, sed custodes & amicos, adeoque maxima cura debere nos conservare, nihilque efficere posse adversus nostri conservationem, ex quo capite officia erga nos ipsos manant. Præterea caeteros homines esse natura nobis aequales, adeoque quemadmodum nihil contra naturam nostram moliri possumus, ita nihil adversus caeteros: ex quo capite officia adversus alios derivantur. Tandem Deum esse nostri creatorem, gubernatorem, benefactorem, adeoque debere nos illi servitutem, invocationem, gratiarum actionem, quae sunt prima capita, ex quibus officia erga Deum sequuntur.

§. XVIII. Accedit eodem auctoritas divinarum scripturarum. Ex iis patet luculenter, Deum, quotiescumque veteres illos mortales ad justitiam & honestatem adhortabatur, ad justum & honestum naturales notiones revocasse, velut conscientiae a natura ipsa informatas. Ita Gen. IV. v. 7. Cainum exhortans. *nonne, inquit, si bene egeris recipies: sin autem male, statim in sordibus peccatum aderit?* Homicidium, quod Cainus meditabatur, velut natura vetitum, ac proinde malum supponit: patientiam vero & mitem animum natura bonum. Eaedem divinae Scripturae in Ethnicis, de quibus saepe loquuntur, justum & honestum notitiam inesse docent. Pharaon Aegypti Rex indignatur Abrahamo, quod non indicasset Saram uxorem esse, quo factum esset, ut ipse in uxorem duceret

ceret: id quod testatur, natura ipsa edoctum, non licere alteri uxorem eripere. Infinita sunt hujusmodi similia. Pleraque etiam addi possent novi testamenti loca, quae diserte id docent. Sed id necessarium non est.

§. XIX. Ex quibus consequitur manifeste, Deum providisse hominum naturae promulgatione sapientissimae legis, quae duceretur ad beatitudinem. Nempe eam non via tantum rationis, sed revelationis quoque, idque copiosius manifestavit. Interim qualemcumque opem hominibus lex ad beatitudinem praestet, nisi etiam vires humanae naturae augeantur, & sublineantur, sola lex per se satis non est ad hominem plene perficiendum. Atque haec consideratio hominem ducit in cognitionem divinae gratiae; ut idcirco ii, qui eam pernegarunt Naturalistae, rationi quoque adversari comperiantur.

C A P U T IV.

Lex Naturae explicatur distinctius, atque adversus profanos homines iterum asseritur.

§. I. **E**SSE in natura legem, quae sit actionum hominis liberarum norma, in qua erga creaturas rationales summa Dei bonitas ostenditur, superius demonstratum est. Sed sunt illa accuratius uberiusque retractanda, priusquam in hujus legis primas notiones, ac *principia*, ut vocant *cognoscitiva* inquiramus. supervacaneum enim est legis hujus naturalis partes explicare velle, nisi illa ita contra profanam gentem adstruatur, ut nulli deinceps exceptioni sit obnoxia. Itaque a legis ipsius vi & natura iterum exordiemur.

§. II. Est legis vocabulum ambiguum: nam aut eo significatur norma quaelibet actionum in ratione posita, veluti arte, exemplari, & ut Graeci Philosophi dicunt, *Idea*: aut superioris alicujus imperantis voluntas, qua velit sibi subditos, uti in actionibus suis regen-

regendis. Si cum priori notione accipiatur, & homini cuilibet sua ratio, & ratio Dei Deo erit lex, eritque extra dubium omne positum, entia rationalia, Deum, Angelos, homines, nihil moraliter agere, nisi ratione, quum & Deus nihil, nisi ratione duce agat, & mentes aliae, ut nihil agunt libere, nisi voluntate, ita nihil moraliter sine ratione; est enim voluntas, ut alibi dictum est, ultima mentis ex ratione determinatio. Ceterum est infinitum inter Deum, & creaturas rationales discrimen quum in aliis, tum praesertim, quod ad hanc rem spectat. Nam Dei ratio summa est, & absolutissima, ut idcirco non eget alterius ratione, ut recte & sapienter agat: contra vero quum aliae creaturae rationales finita sint ratione praeditae, nisi illa suprema Dei ratione regantur, idest aeterna lege, longe ab eo fine, quem natura sua spectant & appetunt, aberrare possunt.

§. III. Si cum altera notione, quae ejus vocabuli propria est, dum de Legibus differitur, legis vocabulum accipiatur, erunt ejus proprietates essentiales omnino quatuor. 1. Ut sit ratio summa: 2. Ut sit ratio ejus, qui jure imperet: 3. Qui ea subditos obligare velit: 4. Et possit. Principio enim nisi lex sit summa ratio, indigebit ipsa alia ratione qua regatur, neque idcirco esse poterit aliorum norma. Deinde nisi is, cujus ratio lex est, jure imperet, jure quoque ei non paretur, ut si adigere velit ad obsequium, sit injustus. Praeterea nisi velit obligare, admonitio potius & consilium erit, quam lex. Tandem nisi possit ad obsequium rebellantes adigere, tota inutilis jacebit. Quibus ex rebus sequitur, solam aeternam Dei rationem ejus voluntate & potentia suffultam veri nominis legem esse, & quidem perfectissimam: caeteras vero quantum de illa participant, quod est a Cicerone observatum. Sequitur quoque falli eos, qui legis naturalis nomine intelligunt dictata humanae rationis velut a Dei ratione praecisa: sunt enim haec scita & pronunciata rationis humanae nec sum-

ma

ma, nec talia, quae homini lex esse possint. Informantur quandoque etiam a nostri utilitatibus, ut nihil sit facilius, quam esse erronea. Lex autem & extra omnem erroris aleam constituta sit necesse est, & vim subditos obligandi habere debet. Quocirca probare nequeo Ricchardum Cumberlandum qui haec tantum rationis naturalis scita pro legibus naturae habet (a).

§. III. Hoc autem modo explicata quaestione, paucis ejus nunc historiam enarremus. Nihil esse natura justum aut injustum, honestum aut turpe, bonum aut malum morale, sed omnia haec consuetudinibus, & legibus humanis originem debere, plures quum apud veteres, tum praesertim recenti memoria professi sunt. Nam & Plato (b), & Aristoteles (c), & Laertius (d) & Plutarchus (e) quosdam ejus opinionis Auctores memoraverunt. In primis celebre est dictum illud Calliclis in Gorgia Platonis, qui quae Philosophi de justitia & injustitia veluti ex naturae fontibus dixerunt, vocat *speciosa praeter naturam adinventata, hominum deliramenta*. Aristippi Cyrenaici vox erat, nihil esse in natura justum vel bonum, vel turpe, verum omnia lege & consuetudine definiri (f). Eadem fuit Democriticorum & Epicureorum doctrina, ex quorum mente illud scribit Horatius,

Nec natura potest justo secernere iniquum:

Sola est utilitas justi prope mater & aequi. Lib. 1, Satyr. 3.

Id quod erat systemati suo mundano conforme. Scilicet sublata providentia nec Religio ulla esse potest;

ex

(a) De legibus naturae adversus Hobbium cap. 1. §. 1.

(b) Lib. 10. de Legibus.

(c) Lib. 1. ad Nichomacum cap. 1, & alibi.

(d) Lib. 2. Segm. 16.

(e) In vita Alexandri Macedonis.

(f) Laërt. Lib. 2. Segm. 143.

ex quo porro sequitur, ut & fides, & societas humani generis, & una excellentissima virtus iustitia tollatur, quemadmodum perspecte observatum est Ciceroni (a).

§. IV. Nihil hoc in loco dicam de Scepticis; nam quum eorum Schola, nihil sciri, nihil comprehendi posse doceret, non liquere praedicabant, iustum ne esset aliquid natura, nec ne. Videri potest Sextus Empiricus Hypothipoleon Pyrrhoniarum Lib. III. cap. 22. Imprimis autem celeberrimus fuit Carneades novae Academiae conditor, qui in sophisticae artis oblationem, quum Legatus ab Atheniensibus Romam missus esset, apud Senatum uno die pro iustitia disertissime disseruit; altero vero contraria disputatione iustitiam evertit, quo factum est ut Cato Censorius, qui utrique disputationi interfuerat, velut hominem perniciosam cito dimittendum curaverit. Nec vero ab eadem sententia alieni fuere, qui Principes nullis teneri legibus per nefariam adulationem docuerunt, quod cum Alexandro Magno fecisse Anaxarchum, scribit Plutarchus. Celebratum est Euphemi dictum apud Thucydidem [b]. *Regi, aut Civitati imperium habenti nihil iniustum quod utile.* Et Taciti aliud lib. xv. Annalium, *in summa fortuna id acquius quod validius.* Recentiore memoria, diversa licet via & ratione, in eadem re docenda concurrerunt Thomas Hobbesius, & Benedictus de Spinoza, quorum ille in libris de Cive & in Leviathane, hic in Tractatu politico, qui imperfectus inter opera ejus posthuma extat, jus cujusque naturale ex naturali potentia metiuntur, ut tantum cuique liceat, quantum viribus suis pollet.

§. V. Sunt vero alii, qui licet & Deum esse ponant, & ab eo sancte administrari omnia concedant, negant tamen natura ipsa quidpiam esse ac necessarium iustum & honestum. Qui item in duplici sunt classe: nam quidam non negant in aeterna Dei ratione

(a) Lib. 1. de Nat. Deorum cap. 1.

(b) Lib. VI.

tionē primas justitiae, & sanctitatis notiones contineri, quae sint leges aeternae, normae quum primis voluntatis Dei liberae, tum etiam caeterorum spirituum: sed inficiantur, ejusmodi leges ratione naturali intelligi posse: adeoque, quod est consuetudinarium, legibus aut revelatis, aut humanis justitiam deberi docent. Quod tantundem est, atque fateri rotunde, nullam esse naturae legem, idest talem, quae ratione hominis naturali promulgetur, atque inter homines omnes propagetur. Ego in hac opinione fuisse censeo Lactantium, virum alioquin disertum, nec indoctum. Alii vero, post Okamum celeberrimum illum Nominalium Sectae conditorem, non pauci e Schola, & Renatus ipse Cartesius (a), qui voluntatem Dei velut praecisam ab aeterna ejus ratione fontem universi juris esse dicunt, ut quod Deo placuit, id continuo sit justum. Hoc ego in erratis pono, non quod non sit justum & sanctum quodcumque Deo placuit; nihil enim ei placere potest, quod naturae suae non sit consentaneum; nec est illius naturae quidquam consentaneum, quod non sit justum & sanctum: sed quod ante omnem Dei voluntatem (liceat hoc in loco ad mentis nostrae brevitatem accommodate loqui), in ipsa ejus natura & intellectu, ratio inest justitiae & sanctitatis. Itaque inde Dei voluntas, ut ita dicam, informatur, ut nihil velit nisi quod justum sit & sanctum.

§. VI. Pluribus hos errores confutarunt & olim Platonici atque Stoici, & nuper viri doctissimi Hugo Grotius in Prolegomenis ad libros de Jure belli & pacis, Cudworthus in libello de aeternis justitiae & honestatis notionibus systemati intellectuali addito, Ricardus Kumberlandus de Legibus naturae adversus Hobbesium, Pufendorffius lib. II. de Jure naturae & gentium

(a) Resp. ad object. sextas. Vide ut eum hominis errorem redarguit Cudworthus de aeternis justitiae & honestatis notionibus cap. 3.

tium, Hubberus de Civitate, alique pene infiniti. Nos paucis. Ac principio eos, qui negant polle naturam iusto secernere iniquum, uno argumento refutabimus. Deum esse, idest mentem aeternam intelligentissimam, potentissimam, optimam, atque ab eo quum caetera, tum praesertim homines gubernari, ex superioribus patet. Exigit autem gubernatio, ut legibus naturae singulorum adaptatis regantur, quibus finem suum consequantur; ergo providentiae divinae interest, hominem ad finem suum agere legibus, quae humanae naturae aptantur. Constant jam homines duplici vita, animali, & rationali, quarum nec prior sine legibus mechanicis consistere potest & ad finem suum tendere, nec posterior sine legibus moralibus, idest sine legibus, quae rationem humanam augeant, forment, regant; utriusque ergo legibus homines Deus gubernet necesse est. Et priores quidem idest mechanicae, quum non in rationem nostram agere debeant, notae nobis sint an ignotae, nihil omnino refert: at posteriores ignotae inutiles; oportet ergo, ut eas per rationem promulget. Regitur autem ratio in iis, quae vitam hominis moralem spectant, legibus ex fine hominis desumptis; ergo hinc petenda ratio legum naturalium exploratrix atque interpretatrix. Est porro hominis finis beatitudo: ex hac ergo ratio petenda est legum naturalium exploratrix, atque interpretatrix: nempe Deum vetare quaecumque hominem infeliciorem efficere possint, praecipere vero, quae conservate sunt apta, & beatum facere. Vide Tullium lib. 1. de Legibus. Ita refelluntur ii, qui non natura, sed opinione constitutum esse jus docent.

§. VII. Facillime quoque refelluntur, qui secundo loco sunt memorati. Et ii quidem, qui negant esse in ratione naturali vim, qua prima saltem legis naturae capita intelligantur (nam in ceteris non pugno) superiori argumento facile confutantur: constat enim ex eo, esse in natura humana dictamina quaedam rationis, quibus pleraque Dei imperia

in-

intelligamus: tum etiam productis legis naturalis *principiis cognoscitivis*, ut vocant, quod nos inferius efficiemus. Ac vero qui ita censent, ii eos omnes, ad quos revelatio aut facta non est, aut fando nunquam pervenit, nulla lege, nulloque iusti & honesti criterio naturali uti, fateri coguntur, ac proinde ne peccare quidem ullo modo: ex quo sequitur ut injuste ii malis, quae sunt in natura, torqueantur, quae, ut dictum est, hac ratione cum Dei bonitate componuntur, si sint remedia, quibus aberrans hominum voluntas ad leges iusti & honesti revocatur. Qua ex re intelligitur, hanc opinionem cum Dei bonitate & providentia pugnare, quae ut non patitur, vitam hominis animale nullis regi legibus mechanicis, ita pati non decet, ejusdem vitam rationalem ac moralem, quae multo est praestantior, sine legibus moralibus traduci. Quid, inquit, aliquis, si ut in hunc statum devenirent homines primorum scelere commeriti sunt? Non video id sequi: boni enim & sapientis principis non est, ut vetera scelera deleantur, regulam iusti ab injusto discernendi adimere, quo plura & majora admittantur. Accedit, quod recta ratio omnibus constat, saltem in praecipuis, ubi recte homo utatur.

§. VIII. Ex natura igitur divinae providentiae & bonitatis consequitur manifesto, non solum esse debere in natura leges humanae vitae directrices, verum etiam principium earum cognoscendarum manifestum & certum, saltem quod ad prima pertinet capita. Nam ut omnes homines in singulis officiis plene instituantur, id e sola ratione fieri difficillimum esse intelligo, quum ob alias causas, tum ob hanc praesertim, quod non omnes tantae animi capacitatis & intentionis esse possint, potissimum a curis vitae animalis distracti. Oportet itaque, ut dictum est, esse in natura principium legum vitae directricum cognoscitivum. Quum autem id principium esse debeat toti hominum generi commune; nec toti hominum generi communis sit revelatio; sola superest ratio,

cujus

cujus via hujusmodi leges hominibus omnibus promulgatae sint. Et conficitur quidem humana ratio duobus, facultate ratiocinandi, & notionibus, seu principis quibusdam, quæ omnis ratiocinatio inaedificetur. Oportet ergo & facultatem circa bona aut mala, iusta aut iniusta ratiocinandi, & notiones quasdam scientiæ moralis genetrices, seu e natura ipsa humana erumpentes, seu ex natura rerum proficiscentes, seu undecumque delabentes, omnibus esse hominibus communes. Id vero sic se habere tota humana historia docet. Nam primum de facultate ratiocinandi, qui litem serio moveat, esse video neminem: nemo enim hominum est, aut extitit unquam, qui seu circa magna, seu parva non sua utatur ratione, sibi quæ aliquid concludere persuadeat. Quin nemo est, qui non acutissime & recte ratiocinetur in iis rebus, cum quibus diu versatus est, id quod barbararum ipsarum gentium exemplo constat. Deinde esse notiones quasdam primas & immutabiles, quæ ex hominis fine, & convenientia cum natura rationali deducantur, ex quibus Dei leges naturaliter percipiuntur, id ex iis, quæ inferius sumus dicturi, erit perspicuum. Ut vero multa paucis comprehendamus, atque in antecessum dicamus, quis ignorare potest, qui Dei, sui ipsius, aliorum hominum naturæ non sit plane inscius, oportere esse Deo amicum, a quo est, quidquid est: tum sibi, qui est ac esse natura sua amat: tandem aliis, quibuscum naturam habemus communem? Itaque vel barbarus intelligat necesse est, ea esse efficienda omnia, quibus hæc amicitia & confirmetur & foveatur; & ea evitanda, quibus aut possit extingui, aut dissipari. Sed hæc postea.

§. IX. Constat ergo rationem suam Deum hominibus communicare, quæ vita humana sapienter, iuste, honeste transigi possit. Id superest, ut ostendamus, Deum velle his scitis, hac ratione, homines vivere; nisi enim ita sit longe illa a ratione legis, ut dictum est (§. II.) abest. Id vero sic paucis confici

potest. Deum de suo in res omnes imperio nihil remittere, perpetua rerum omnium cura & providentia demonstrat. Ac vero ne decet quidem illum huic imperio renunciare: pugnat enim id non modo cum ejus natura, quae ut est rerum omnium effectrix, ita non potest non esse conservatrix, sed cum ejus quoque bonitate, quae iis prodesse amat, quae ut nequeunt suapte esse natura, ita sua vi bona & perfecta esse non possunt, nec fines suos contingere, nisi a Deo & moveantur, & regantur. Vult ergo Deus, ut creaturae rationales supremi illius imperii vim & rationem observent, turbaturae alioquin sui ac naturae ordinem. Quumque intelligat naturam humanam ita a se esse procreatam, ut voluptate & dolore determinetur, & ad agendum, & ad cessandum; dubitare non possumus, quin ut homines praestantissimam hanc regulam sequantur, poenis obliget, aut praemiis animet: alioquin inutilis tota illa cura futura esset. Non negaverim, si puram naturalem rationem consulamus, distinctam hujusmodi poenarum & praemiorum cognitionem assequi hominem non posse: sed id nihil prohibet, quin generatim saltem intelligamus, adesse parata (a). An enim Deum muneri suo,

Tom. IV.

C

ac

(a) *Obligatio juris naturae intelligibilis est: Civilis vero sensibilis. Nam poenae naturali legi adnexae & intelliguntur, non spectantur, & remotiores sunt. Quum autem homo qualis nunc est, ingenio sit pravissimus, illis tantum gubernari nequit. Hinc nata necessitas sanctionum Civilium. Interim evadere possunt sensibilia praemia & poenae juris naturae, si in animum saepe revocemus, magnam vitae tranquillitatem sequi, ubi ex recta ratione & mente congruenter vivamus, miseria vero magna, ubi cupiditates nostras sequi velimus. Nam ego id saepe, dum nationum historias legerem, observavi, non in cultioribus tantum nationibus veracem virtuti magnos*

iii-

ac sapientiae deesse dicemus? Est porro Deus potentissimus, qui ejusmodi poenas exigere possit: justus & incommutabilis, ut velit; suprema ergo ejus ratio homini naturaliter communicata, omnibus quod ad prima saltem capita intelligibilis, absolutissima naturae lex est. Quibus constitutis particulatim in hujus legis notiones primas & aeternas inquirendum est. Sed omnium primum ii confutandi sunt, qui nuper quum legem naturae explicare videri vellent, totam stirpitus evellerunt.

CAPUT V.

Systema legum naturalium Thomae Hobbesii enarratur.

§. I. **A**Uctores ego impiorum quod ad juris naturae theoriam attinet duos facio, Hobbesium, & Spinozam, magnae Naturae Civitatis perduelles. Hobbesii nunc dogmata enarremus & confutemus, mox Spinozam aggressuri. Duo edidit Thomas Hobbes opera, in quibus Juris istiusmodi humani generis communis naturam & origines aggressus est explicare, seu in quibus potius jus omne naturale subvertere conatus est: alterum de Cive, alterum Leviathan, seu de materia, forma, & potestate Civitatis Ecclesiasticae, & Civilis. Et opusculum quidem de Cive pluries culum, & recusum est. vi-

tribui honores, sed etiam in barbaris, ut si non semper virtuosi praemiis cumulentur, quieti saltem vitam suam agere sinantur. Quamquam non ego veram virtutem dixerim eam, quae, qui praeditus sibi videtur, indignatur, se negligi, nec ad prima Reip. munera evehi. Virtutis praemium maximum est ut a turbis remoti tranquille vivamus; quo qui contenti non sunt, falsae virtutis specie & se & alios deludificant.

viathan cum caeteris Hobbi operibus Amstelodami anno 1668. duobus tomis in 4. Liber de Cive viris quibûsdam doctis impense placuit, quod geometrica prorsus methodo Philosophiae Moralis principia comprehensa parvo libello tradantur, & pleraque contineantur praeclare oblectata, & demonstrata accurate. In primis vero Gassendus in Epistola Samueli Sorberio data librum vocat, non vulgarem, dignumque qui omnium, qui altiora sapiunt, manibus teratur: & Pufendorffius copiose laudat praefatione in libros de jure Naturali & Gentium *velut in quo sint quaedam quantivis pretii*. Sed accuratius de eo populares sui judicarunt, quibus scilicet Auctoris scopus notior erat. Samuel Parckerus disput. 1. de Deo & Providentia contendit, Hobbiū nihil nobis aliud obtulisse, nisi quod apud Veteres in Epicuro reprehensa invenimus. Ricchardus vero Kumberlandus ex instituto illum & docte confutavit in Opere celebratissimo *de legibus Naturae*. Becherus velut imperitum earum rerum, quas de moribus scripsit, accusat, ejusque nefaria dogmata paucis exprimit. *Justum*, inquit, *& injustum perperam aestimat: legem male definit: Principem impie solvit lege: Civitatem, quam adornat, aut deformat, aut evertit. Paſtorum religione non multum tangitur*. Quid pestilentius in hominum societatem invehi potest?

§. II. Sed explicemus primum hujus hominis Systema totum, mox articulatim confutaturi. Efficio autem id tanto libentius, quanto hic liber gratior saeculo nostro, ac nonnullis etiam Italarum est, qui redivivum in eo Nicolaum Macchiavellum cernere sibi persuasere. Jus ille primum a Lege naturali distinguit. Et jus quidem *naturale* vocat *libertatem, quam quisque natura habet facultatibus naturalibus secundum rectam rationem utendi* (a). Legem vero naturae appellat, *dictamen rectae rationis circa ea, quae agenda, vel omis-*

(a) Lib. I. de Cive cap. 1. §. 7.

renda sunt ad vitae membrorumq; conservationem, quantum fieri potest diuturnam (a). Ejus vero super his rebus Philolophia huc redit. Hanc scientiam exordientdam esse a principiis non ad libidinem confictis, sed veris, quaeque ipsi clare persentiscamus, indeque geometrica methodo deducendam: ea vero principia ex intima hominis natura haurienda. Nihil dici potuit ad rem accommodatius, idque non in hac tantum scientia, verum in omnibus aliis faciendum, nisi desipere velimus. Sed quid magni promissor hiatus?

§. III. *Pergit: Natura humana diligenter examinata, continuo prodit magnum hoc totius rei Moralis principium, Ingenia hominum ejusmodi esse a natura, ut nisi metu potentiae alicujus communis coerceantur, fore ut sibi invicem diffidant, & selemutuo metuant, & ut propriis viribus singuli sibi cavere cum jure possint, tum necessario velint [b]. Ei principio addit postulata, ut ille vocat, duo, quorum primum est cupiditatis naturalis, qua quisque rerum communium usum postulat sibi proprium: alterum rationis naturalis, qua quisque mortem violentam, tanquam summum naturae malum, studet evitare. Ab his principiis (pergit ille in Epistola dedicatoria) pactorum & fidei conservandae necessitatem, atque inde virtutis moralis, officiorumque civilium elementa in hac opella evidentissima connexionem videor mihi demonstrasse. Haec ille, in quibus clare videre est pravam hominis mentem, qui e natura humana vitiis faedata ac depravata, potius, quam ab ejus fine, quem recta ratio praescribit, totius naturalis juris fundamenta excitare conetur. Nam cum hac nos natura nasci Adae ac irae filios, id inficias ire nequimus, neque super ea re Hobbio controversiam movere possumus, quando &*
tota

(a) *Ibidem lib. 1. cap. 2. §. 1.*

[b] *Praefatione in libros de Cive, seu in Epistola ad Lectorem.*

rotā id Divina Scriptura docet, & omnium hominum vita confirmat: sed ut ex hujusmodi natura excitentur totius naturae juris principia, id ego pessime fieri ajo. Sed ea de re paullo post.

§. IV. Videamus autem ut inde philosophatur: Principio homines omnes natura esse aequales ponit: deinde & omnes necessitate quādam naturae *non minore, quam qua fertur lapis deorsum, ferri ad appetitionem ejus, quod sibi bonum, & ad fugam ejus, quod sibi malum, maxime autem maximi malorum naturalium, quae est mors.* Ex quo concludit, secundum rectam rationem esse, ut unusquisque omnem operam det, qua se, suaeque conservet, & defendat. Quod autem secundum rectam rationem sit, id Jure naturali sit; ergo primum est Juris Naturalis fundamentum, *ut quisque vitam & membra sua, quantum potest, tueatur.* Praeterea cui inest Jus ad finem, is etiam ad media jus habet: habet autem homo jus ad vitam tuendam; ergo & jus utendi omnibus mediis, & agendi omnem actionem, sine qua conservare se non potest. Judicare autem, quae nostrae vitae intersint, non aliorum est, sed nostri. Ergo secundum suam cujusque rationem peculiarem uti potest quilibet jure & mediis vitae conservandae & tuendae:

§. V. His sic praepositis, pergit ulterius, atque statuit, in statu mere naturali, idest ante, aut extra imperium civile, *omnia esse omnium*, idest unicuique licere facere quaecumque, & in quoscumque libet, quae sua interesse putet. Atque ideo, concludit, in statu naturali mensuram iuris esse cujusque utilitatem [a]. Id vero Jus in statu naturali inutile esse censeat. Nam quum omnes alii velut natura aequales, aequale jus habeant, ac vim aequalem, ob quae nemini ulla re uti licet tuto; effectus juris nullus est. Ob hoc igitur jus aequale, & ob naturalem hominum

[a] *Lib. I. de Cive, cap. 1. §. 10.*

proclivitatem ad se mutuo laceffendum, efficitur, ut status hominum naturalis sit status mutui belli. Enim vero bellum est is hominum liberorum status, *in quo juris sui persequendi gratia per vim & dolum concertant*, quemadmodum Cornelius Van-Binckerfoechius definit [a]: habent autem omnes homines naturaliter jus in omnia, atque ad ea persequenda a natura incenduntur, tum vi, & dolo concertant, quod Gentium barbararum, ac extra Rempublicam positarum luculenta exempla docent: in mutuo ergo bello versantur, quoad status ille naturalis perdurat.

§. VI. Jam mutuum hoc bellum, mutuusque metus ad homines conservandum nullo pacto idonea esse possunt. Qui enim conservari possunt in eo statu, in quo ad mutuam perniciem armantur omnes? Ergo amor ille nostri proprius & necessarius, ex quo jus in omnia deducimus, quemlibet docet, ut de jure illo aliquid remittamus, ac de statu naturali concedamus in Rempublicam. Id vero fit per pacem. Nihil enim aliud bello adversum, nisi pax. Ergo primaria notio legis naturalis, seu primum dictamen rectae rationis ad nos conservandos est, *quaerendam esse pacem, quatenus habendae ejus spes aliqua affulserit: ubi ea haberi non potest, circumspicienda esse belli auxilia* [b],

§. VII. Ex quo principio caetera peculiaria legis naturae praecepta derivat, eaque paucis verbis complectitur. Ac principio jus in omnia non esse retinendum ratio dictat: alioquin nulla inter homines pax iniri potest, nisi ejus juris remissione quadam. Remittitur autem aliquid de jure in omnia pactis conventis, quae quamdiu durant sacra tecta, tamdiu habetur pax. Ergo inde sequitur manifesto altera naturae lex, *pactis standum, sive conventionum fidem servandam, tanquam conciliandae paci necessariam*.

§. VIII.

[a] *Juris Publici lib. 1. cap. 1.*

[b] *De Cive cap. 1. §. 17. & cap. 2. §. 11.*

§. VIII. Tertia porro lex est, *ut beneficio benefici-
cium quum possis rependas*. Ea lex ad pacem magis
magisque constabiliendam & confirmandam necessa-
ria est: nam a pace ad bellum non subito fit transi-
tus, sed veluti per gradus, quorum primus est, *de-
negata gratitudo, humanitas, benevolentia*. Quorsum
etiam tendit quarta lex, *ut unusquisque se caeteris
commodum praestet*. Qui enim alteri incommodus &
molestus est, eum paulatim ad bellum incitat, quod
vitandum, ex superioribus.

§. IX. Ex eodem porro pacis conservandae prin-
cipio, atque imminuendi hostium numeri, sequitur
5. Hobbesiana lex, *oportere alterum alteri sumpta cau-
tione futuri temporis, praeteriti veniam, petenti & poe-
niti, concedere*. Nisi enim concedas, bellum te fove-
re manifesto argumento ostendes; id vero est, quod
naturae primaria lex vetat.

6. Lex est, *In ultione sive poenis spectandum esse
non malum praeteritum, sed bonum futurum*: nempe ut
praeclare Seneca post Platonem, *Nemo punit, quia
peccatum est, sed ne peccetur*.

7. Vero lex est, *Ne quis vel factis, vel verbis,
vel vultu, vel risu alteri ostendat, se illum vel odisse,
vel contemnere*: nam haec omnia ad rixam, & pu-
gnam maxime omnium provocant.

8. Ut quaecumque jura unusquisque sibi ipse
postulat, eadem etiam unicuique caeterorum conce-
dat: alioquin aequalitatem naturae evertit, & ad bel-
lum irritat animos.

10. Est, *ut unusquisque in jure aliis distribuendo
utrique parti aequalem se praebeat*: quae lex consecra-
rium est duarum superiorum.

11. Quae dividi non possunt, communiter, si fie-
ri potest, utenda esse, idque, si quantitas rei permit-
tat, quantum quisque velit: sin quantitas rei prohi-
beat, praefinite, & proportionate ad numerum uten-
tium.

12. Quod si neque dividi, neque communiter res
C 4 habe-

haberi potest, tum utendum est 12. Naturae lege, quae praecipit secundum Hobbesium, ut ejus rei usus vel alternus sit, vel uni tantum sorte adjudicetur, utque in alterno usu sorte quoque, uter prior utatur, judicetur.

13. Quumque fors vel sit naturalis, ut primogenitura, vel prioritatis occupationis, vel arbitraria, quae nempe statuta sit consensu contendentium, sequitur inde 13. Juris praeceptum. *Quae neque dividi, neque communiter haberi possunt, aut cedant primogenito, nisi pater Jus illud transtulerit, aut sint primi occupantis.*

14. Autem lex est pacis Mediatoribus praestandam incolumitatem: nam quum sine iis vix iniri possit pax, nisi ea incolumitas iis praestetur, nullus erit ineundae pacis modus.

15. In disputatione super applicatione harum legum ad facta servanda est 15. lex, oportere utrumque de Jure inter se disceptantium submittere se alicujus tertii arbitrio: nimirum difficillime disceptantes in causa propria aequalitatem juris servare possunt.

16. Neminem Arbitrum esse oportere, cui commodi vel gloriae spes aliqua adpareat major ex victoria unius partis, quam alterius: quod scilicet non possit aequalitatem servare.

17. Si autem controversia sit de facto, quum alter factum negat, alter ait, Arbitrarius neutri credat, sed ubi signa certa facti non adparent, ibi secundum testes, qui utrique parti videantur aequi, sententiam ferat.

Ex quibus sequitur 18. *Nullum pactum vel promissum intercedere debere inter Arbitrum, & partes, cujus vi cogatur in gratiam alterutrius pronunciare.*

19. Tandem lex est, ne ebrietate ratiocinandi facultas labefactetur. Quae lex nimis peculiaris est, ut pleraeque aliae Hobbesianae, quae idcirco in leges naturae primarias collocanda non erat. Nam si consuetudinaria quoque interferere voluit, hoc ipsum XIX. praeceptum ad omnes effectus extendere debuit, qui
aeque

aeque ut vinum inebriant, ac rationem de loco suo deturbant.

§. X. Porro super his legibus haec censet. i. Eas semper, & ubique obligare in foro interno, sive in conscientia, non semper autem in foro externo. Nempe etiam quum extrinsecus observari nequeunt ob necessaria impedimenta, retinendus adhuc est in illas amor & obsequium, atque perpetua & constans voluntas secundum eas vitam instituendi. Extrinsecus autem minime servandas docet, quum caeteri non servant: tum enim qui observat cedit in non observantium praedam, atque idcirco contra rectam rationem facit, quae nos tueri oportere dicitur (a). Praeterea leges naturae immutabiles, & aeternas esse dicit, ut quod vetant, nunquam licitum esse possit, quod jubent nunquam illicitum. Quod ita intelligit, non ut nunquam extrinsecus eae violari nequeant; sed ut nunquam fas sit animatum esse adversus illas (b). Tandem eas leges, quum sint conclusiones quaedam ratione intellectae de agendis, & omittendis; lex autem proprie & adcurate loquendo sit ratio ejus, qui aliquid fieri, vel non fieri aliis jure imperat; non esse proprie loquendo leges, quatenus a Natura procedunt, sed quatenus a Deo in Scripturis Sacris latae sunt (c). Copiose vero Cap. iv. demonstrat leges illas in Scripturis Divinis clare positas esse. His tandem peractis totum Philosophiae Moralis corpus inde conformare studet.

CA-

(a) *De Cive* Cap. II. §. 27.

(b) *Ibid.* §. 29.

(c) *Ibid.* §. 34.

Hobbesianum Systema perpenditur, & resellitur.

§. I. **A**Tque hujusmodi est systema legum naturalium Hobbesianum, tale scilicet, in quo veris quibusdam plurima falsa sunt admixta, quae totam doctrinam moralem labefactare possint. Nos singillatim singula expendemus, ac altera ab alteris secernemus, tum solidis argumentis quae sunt falsa refellemus. Principio legis naturalis definitio multipliciter falsa est 1. Dictamine rectae rationis intelligi naturae humanae finis, atque ex eo porro leges naturae derivari, possunt, non effici: seu dictamen rectae rationis principium esse potest legum naturae cognoscitivum, ut vocant, non obligationum, seu *lex naturae* proprie dicta. Itaque *lex naturae* est ratio imperantis Dei dictamine rationis humanae promulgata, non ipsum humanae rationis dictamen. *Lex*, inquit Cicero in primo de Legibus, *est ratio summa insita in natura, quae jubet ea quae facienda sunt, prohibetque contraria*. Haec igitur duo dum ille miscet, inde eam conclusionem deducit, qua leges omnes naturae evertantur, nimirum eas proprie loquendo leges non esse, nisi quatenus in divinis Scripturis revelatae sunt. Quod tantundem est dicere, atque rectam rationem regulam quidem esse humanae vitae, minime tamen quae legis habeat rationem & naturam; quum neque perfecta esse possit ratio humana, nec sibi poenas minari, sine quibus nulla *lex plena* est, quemadmodum superius demonstratum est.

§. II. Praeterea ea verba, *ad vitae membrorumque conservationem, quanto fieri potest diuturnam*, nimis arctum temporis spatium nec totum objectum legis naturae continent. Et quidem quum duplici vita sit
ho.

homo praeditus, animali, & rationali, & rationalis immortalis quoque sit, necesse est ut ultra hanc vitam legis naturae usus extendatur, ut utramque vitam, & quidem pro sui conditione ea lege ordinemus. At Hobbesius, nobiliori vita exclusa, animalem tantum spectat, eamque legibus naturae procurari contendit. Qui si idcirco facit, quod animos humanos mortales esse credit, ea omnium primum infania reprimenda est, quod a nobis alibi factum. Sed etiamsi demus mortales esse animos, quum objecta pleraque mentis humanae diversa sint, & distincta ab objectis vitae corporeae, non debuit Hobbesius legem naturae ad solam procurationem vitae corporeae restringere: quum bona mentis longe sint nobiliora.

§. III. Scio & Samuelem Pufendorffium in eadem fuisse opinione, aut prope eadem, non extra ambitum praesentis vitae disciplinam Juris naturalis pertendere, adeoque contendisse, moralis esse Theologiae formare hominem ad vitam sempiternam, in quo ille est gravissime a doctis reprehensus, in primis ab ejus interprete Barbeiracio. Nam quum ratio naturalis, cujus lumine disciplina haec conficitur, doceat etiam, animos cum corporibus non interire, non potest ea disciplina praesentem tantum vitam spectare. Theologia igitur moralis, & naturalis Jurisprudencia non sine discrepant, ut Pufendorffius putat, sed principiis, quae illa a divina revelatione haurit, haec a ratione naturali.

§. IV. Veniamus ad principia Scientiae moralis, ut ille vocat. Principium illud, *ingenia hominum ejusmodi esse A NATURA, ut nisi metu potentiae alicujus communis coerceantur, fore ut sibi invicem diffidant, & sese mutuo metuant, & ut propriis viribus singuli sibi cavere quum jure possint, tum NECESSARIO velint*, nec consentaneum est cum iis quae sequuntur, maxime si cum primo Postulato conjungatur, & omnem disciplinam moralem frustraneam reddat.

dit. Pluribus id ostendit Kumberlandus (a): nos paucis. Primum nego *hoc*, quod Hobbesius dicit, *hominum ingenium* esse a natura, ut alii aliis diffidant. Tum nego, necessario nos a natura rapi, ut tales simus. Enim vero si natura ipsa ita comparati sumus, ut alii aliis diffidamus, alii alios metuamus, praeterea ut necessario ad nos omnia trahere cupiathus, natura ipsa nostra cum legibus illis Hobbesianis pugnat, quarum summa est, *oportere & in commune consulere*. Quocirca leges illae, quas deinceps tanto studio evolutat, non magis hominem formare ad societatem possunt, quam caetera omnia, quae sunt in natura, a naturalibus ac necessariis eorum motibus humanis sanctionibus convertere possimus. Inutilis igitur tota illa tractatio Hobbesio videri debuit: nec fas erat Philosophum contra animi sensa id suscipere emendandum, quod nequit esse nisi pravum, atque ita hominibus parum acutis imponere velle.

§. V. Ac vero non hanc esse ex origine sua hominis naturam, quam ille depingit, inde perspicuum est, quod huiusmodi ingenium in iis hominibus, qui aut non sunt educatione & commercio depravati, aut nondum a libidine affectuum correpti, nullum esse deprehendatur. Certe integrae gentes, quo a commercio remotiores, eo simplicius, atque ex naturae usu vivere reperiuntur. Minus apud eas cognita vitia, plus virtutis, idest plus ejus integritatis, quae a natura est. Vulgatum est illud Justinii historici, plus profuisse Scythis ad honeste vivendum vitiorum ignorationem, quam Graecis cognitionem virtutis (b). Confirmat hoc ipsum Pufendorffius exemplo infantium, in quibus natura integrior est, quique ad mutuam caritatem a natura videntur facti, quippe qui etiam cum ignotis ignoti con-

(a) Cap. 1. de Legibus Naturae. Vide l'Esprit des Loix lib. 1. cap. 2.

(b) Justinus lib.

conveniunt, in mutuos statim amplexus, & alia amicitiae signa ruunt. Distinguendum igitur Philosopho erat inter ea, quae naturae sunt insita & prima, & ea quae tempore adveniunt. Nam usu vitae, educatione, abusu mentis, phantasiae, sensuum, idest pravis iudiciis, impetu affectuum, plurima paulatim crescentibus nobis adsciscit natura nostra, atque insito ingenio admiscet, quae minus acutis insita & prima videri deinceps possint: ex quibus nemo prudens naturam humanam aestimaverit. Alioquin colligere possumus ita a natura nos esse comparatos, ut insaniamus, ut furemur, ut occidamus, ut icortemur, quod bona hominum pars in his toti aut versentur, aut occupentur. Quid si quis dicat, quum aspexerit sphaeram rubram, sphaerae naturam & essentiam in hoc esse positam, ut sit rubra? Quod si liceret in primas naturae nostrae & insitas qualitates introspicere, si adventitia secernere, hominemque non qualis esse deprehenditur, sed qualis primum genitus est, contemplari, aut vehementer fallor, aut aliud ejus ingenium reperiremus, quam quod Hobbesius esse arbitratur. Praesertim quum simile non sit vero, hominem ad societatem, ut infinita demonstrant, a Deo genitum, iis fuisse instructum propensionibus, quibus ab omni societate non possit non abhorreere. Quod si quis sibi persuadeat, nihil dubito eundem persuadere sibi posse, sapientem Architectum lapides rotundos, atque a se mutuo maxima vi dissilientes, ad fornicem comparasse. Quid quod quae sunt animantium generi alicui essentialia, ac a natura ipsa ingenta, ea & omnibus ejus generis individuis communia sunt, & semper, & ubique, quod nunc, in hoc hominum ingenio; quod Hobbesius praedicat, non obtinet; id quod demonstrat, non naturale esse, sed adventitium. Mihi totum hominum genus velut equitatus quidam esse videtur. In eo corpora equos referunt, mentes equites. Is ut equitatus esset equitibus utilis necesse erat, ut viribus ac virium vestibus quibusdam instructi essent equi: sed moderatio equi-
tum

tum esse debet. Corpora nisi & vita, & viribus, quae vitam comitantur, imprimis affectibus, essent praedita: ne agi quidem posset, nec ullius essent imperantibus Mentibus usus, sed Mentium officium est ita ea moderari, ut ne terminos, nostri felicitati praefixos excurrant. Id regimen ex informata ratione petendum. Informatur autem ratio notionibus virtutum: virtutes regulae sine desumptae efficiunt: regulas rerum relationes, quod alibi dicitur.

§. VI. Nec vero magis acute Postulata constituit. Nam quod ait, naturalem homini esse cupiditatem omnium rerum usum ad se trahendi, id non video probari, nisi exemplis naturae commercio vitae & affectibus depravatae. Omnia enim ad se trahere nec naturae hominis animali, nec rationali necessarium esse video: ex quo satis aperte intelligo, eam cupiditatem non a natura esse, sed a libidine: quandoquidem natura nullum animal nisi ad necessaria omnibus suis viribus rapit. Scilicet natura animalis iis contenta est, quae sibi sufficiunt; quemadmodum in omni animantium genere videre licet: ea vero nec omnia sunt, nec multa. Agnovere id Veteres omnes, qui naturae pauca sufficere magna approbatione dixerunt. Jam nec rationalis naturae est huiusmodi cupiditas, si non ex libidine, sed ex recta ratione censenda est: talis enim rationalis natura cupiditates ex naturae animalis indigentia, atque ex utriusque vitae fine desumere debet; nisi insanire velit. Nunc autem & naturae animali, ut dixi, sufficiunt pauca, & cum utroque vitae fine superflua concupiscere pugnat: nam & praesentem tranquillitatem plurimum turbat inutilium ac superfluum cura; & ad plenam felicitatem impeditiores nos reddit. Praeclare Horatius

Ille potens sui,
Laetusque deget, cui licet in diem
Dixisse, vixi (a)

§. III.

(a) Lib. 3. Ode 29.

§. III. Alterum Postulatum in iis quoque locum habet, non qui ex recta ratione vivunt, sed ex voluptate sensuum, & rationis libidine, quibus ut nihil optabilius vita, ita nihil formidabilius morte violenta. Contra ii, qui ex virtute, idest ex recta ratione vitam instituunt, culpam magis timent & vitium, quam mortem, quae non potest esse summum naturae malum, nisi Epicuri de grege porcis, quorum tota vita sensus est: illis vero non raro maximum est naturae bonum, non singulorum tantum, sed totius societatis, cui moriendo prodesse pulcherrimum profecto est. Egregie idem Horatius totum hoc virtutis ingenium depinxit [a]

*Iustum & tenacem propositi virum
Non Civium ardor prava jubentium,
Non vultus instantis tyranni
Mente quatit solida; neque auster
Dux inquieti turbidus Adriae:
Nec fulminantis magna Jovis manus.
Si fractus illabatur Orbis
Impavidum serient ruinae.*

Sed egregie tota haec res a Cicerone est explicata quum in primis libris de finibus, tum ex instituto in primo Disputationum Tusculanarum, ut idcirco non egeat oratione nostra.

§. VII. Pergit porro Hobbius, atque ex amore nostri necessario concludere sibi videtur, naturae nostrae Auctorem velle, ut nos conservemus (egregium id quidem & verum); adeoque inter leges naturae primarias esse, ut quisque vitam & membra sua quantum potest tueatur. Et haec quoque recte, si illud quantum potest non de potentia physica, sed de morali accipiatur, ut haec sit sententia, debere nos, aut potius posse, tueri tantum ac quatenus ut nos tueamur suprema lex vult, non quatenus possumus, & quantum. Nam quum praestantissima illa Dei lex aequè velit

[a] Lib. 3. Ode 3.

velit ut caeteri omnes conserventur, & quidem plures magis, quam unus, si me tueri non possum, nisi Civitatis, aut magnae hominum partis intereptione, tueri non possum, nec debeo, nisi dicere Hobbius velit, legem illam naturae humanae gubernatricem plus singulos spectare, quam communitatem. Itaque non rite ex illo principio conficit, posse nos quaecumque, & erga quoscumque moliri, ex quo porro nullum est scelus, quod homines velut jure suo committere nolint. Fingamus sapientem Agricultorem mille laetissimi agri plantis hoc dedisse jus, ut singulae quantum possunt se conservent & tueantur, non tu illum vehementissime indignaturum putes, ubi pyrus, quo se conservet, ac tueatur, reliquas omnes excindere, aut radicitus extirpare aggrediatur? singuli homines non sui tantum, sed aliorum alii gratia progignuntur; singulis ergo non sui tantum sed caeterorum quoque amor & cura praecipitur. Ita ergo se quilibet conservare debet, ut simul conservet alios: ita amare, ut non reliquos omnes oderit. Ac si alterutrum optandum sit, unus ne, an tota communitas intereat; non potest postremum hoc eligere, quin toti rerum naturae adversetur, quae partes totius ergo, non totum partis unius efficit. Quare ego veteres Romuleos feris comparare soleo, qui ut se, idest hominum omni vitae aura indignorum manipulum conserverent; toti Italiae bellum indixere; sui que juris esse crediderunt caeteras gentes funditus extirpare. *Tanta molis erat Romanam condere gentem?* Quis non execrables Cyrum; Alexandrum; Caesarem habeat, qui toti gentes, velut pecudes, suae cupiditati immolarunt? In quos qui encomia scripserunt mihi illi peccidibus stupidiores fuisse videntur. Heroes ii inter homines habendi qui populis beandis; non evertendis, nati sunt. *Deus est mortali juvare mortalem, & haec ad aeternam gloriam via,* praecclare inquit Plinius (a).

§. VIII.

[a] Lib. I. cap. 7.

§. VIII. Minus quoque accurate caetera struit , quae sequuntur , ut concludat , statum hominum naturalem esse statum belli mutui (a). Nimirum aut non

Tom. IV.

D

in-

(a) *Gentes ferme omnes a naturae statu seu a libertate naturali ad Civilem paulatim venisse , qui eorum attente historiam legerit aperte intelliget . Naturalem autem hunc statum inter adultos homines esse mutui belli non ego dubito : nam & sunt singuli sui nimium studiosi ac amatores , & invidi alterius bonorum , & percupidus habendi alieni , & adeo in vindicationem proni , ut plerique veteres scriptores vindicationem juris naturae & gentium appellavere , quorum loca copiose , ut solet , congeffit Grotius lib. 2. cap. 20. Intelligo nec primum id esse nec insitum humanae naturae ingenium , ac si rationem sectari homines voluissent , alium esse debuisse naturalem statum ; sed veteri labe & prava educatione factum est , ut a ratione desciscentes ferinam omnes agitaverint vitam . Quaecumque nationes extra Imperium Civile repertae sunt , privatas injurias omnes privatis viribus ulcisci compertae sunt . Quumque injuriae hujusmodi nequeant inter plures non esse frequentes , frequens quoque bellum & mutuum . Tales nunc etiam sunt major pars Americanorum Septentrionalium , Afrorum , Insulanorum Asiae plerorumque . Ipsas Europae nunc cultissimas nationes ab eodem statu provenisse idipsum in primis demonstrat , quod olim vindicationem injuriarum haberent privatam , qua fiebat ut in mutuos caedes continenter raperentur . Germani mirabantur , quum Romae juris dicendi formam contingerent , quod injurias iustitia Romani finirent , quae ipsi armis vindicabant (Vell. Patere. lib. 2. cap. 123.) Sed & eadem singularia certamina vagae Latii gentes habuere antiquitus : habuere Graecae . Utriusque Gentis Poetae , qui Heroicam historiam conscribere , id satis indicant . Quin in ipsis constitutis Imperiis , nisi summa res ab uno , aut Senatu*

rega-

intelligit, aut ignorare simulat, jus esse quidem homini cuilibet in bona Telluris, sed minime illud in omnia & singula. Jus enim est in ea, quae vitae conservandae sunt necessaria: hac vero non sunt omnia & singula. Ut si Imperator centum millia aureorum exercitui largienda donet, singulis militibus jus quidem in illa est, jus autem non cuilibet in omnia & singula, ut si valeat jure alios excludat. Itaque rota hominis argumentatio sophistica est & captiosa: quippe terminos habet conclusio universaliores, quam qui in praemissis positi sunt, ut Dialectici loqui amant. Positum enim est, jus esse cuilibet ad vitam conservandam; idcirco ad omnia, quae vitae conservandae sunt necessaria: Quum autem haec non sint omnia & singula, sed paucissima, quibus vita est contenta; non rite infert, jus esse cuilibet in omnia, velut in individua, ut nihil sit quod excipiat. Ex quo porro pessime conficit, homines natura ipsa super eodem velut

in-

regatur, perpetuum futurum & mutuum bellum demonstrant Resp. populares. Intestina Reip. Rom. bella historia Rom. copiose narrat. Narrat reliqua Italiae historia fata Rerump. Florentinae, Pisanae, Lucensis, Genuensis. Tum quum plures reguli Italiam & Galliam obtinerent, perpetuo bello dilacerabant. Nec certe aliunde legum civilium faciendarum facta necessitas. Democritus apud Stob. Serm. 38. Non prohibuissent leges suo quemq; arbitrio vivere, nisi alter alterum offensum iisset. Lucret. lib. V. v. 1147.

Acrius ex ira quod enim se quisq; parabat

Ulcisci, quam nunc concessum est legibus aequis,

Hanc ob rem est homines pertaesum colere aevum.

Constat ergo naturalem statum cum iis, quae habent homines, vitiis, ac perversa, qua sunt corrupti, educatione, mutui esse belli; nec in eo reprehendam Hobbium, si eum statum non ex insitis naturae sumat, nec ex ratione, & jure in omnia.

individuo concertare, atque in mutuo bello non tam esse, quam nasci. Quae quum sint, caput ipsum totius systematis Hobbesiani contaminatum est. Quum vero in eo capite tota Hobbesiana machina inaedificata sit, ne stare quidem illa potest.

§. IX. Sed sunt, inquit aliquis, Hobbesianae illae leges & perspicuae, & verae, quod esse non possent, nisi principium, ex quo illae contrivantur, perspicuum esset & verum. Nempe non illae ex Hobbesiano principio consequuntur, sed ex convenientia cum natura rationali, qua de re paulo post. Verae sunt scilicet Hobbesianae conclusiones (licet non omnes) *per accidens* (nam ita disputant Dialectici), non ex principiorum vi, ac potestate, ut si concludam hominem esse mortalem, quia oculis praeditus est, potest illud esse verum, licet non hujus virtute. Quamquam ne omnes quidem Hobbesianas leges legitimas dixerim. Nam, ut exempli loco dicam, conditio illa in prima lege posita, *quaerendam esse pacem, quoad ejus habendae spes sit*, nimis est vaga ac ambigua; ut perpetuis bellis & discordiis aditum aperire possit, potissimum addito, quod ille docet, in his rebus, quae ad vitam pertinent, in statu naturae quemlibet esse sui judicem, neminem alterius. Explicandum enim erat, quae esse debeat illa spes, quae pacem suadere possit, aut si ea ceciderimus, ad bellum impellere. Non enim hoc ex arbitrio, minus ex nostra libidine de finiendum. Sed non ego Hobbesianum librum cribrandum suscepi: principia tantum in examen voco: ea falsa esse ajo. Id mihi videor perspicue demonstrasse.

Enarratur & refellitur *systema Spinozae*.

§. I. **M**irum videri alicui potest Hobbium, & Spinozam infensissimos humanae libertatis hostes de Jure & Legibus naturae disserere, quasi legibus ullis moralibus locus esse possit, sublata libertate. Sed qui attente rem expenderit, is intelliget, eam ab illis super naturae legibus doctrinam vulgatam fuisse, qua leges omnes naturae evertantur, ac pro inde desinet mirari. Et Hobbius quidem non aperte, sed callide, dum leges naturae adstruere videri vult, penitus subvertit, ut superius demonstratum est: at Spinoza apertius. Extat inter ejus opera posthuma liber imperfectus, qui inscribitur *Politicus*, in quo ille juris, & legis naturalis naturam, atque fundamenta, tum originem & constitutionem societatum, & imperiorum explicare adgreditur, & quidem consentaneae iis, quae cum in Tractatu Theologico Politico, tum in Ethica docuerat. Rem igitur universam hunc in modum exorditur.

§. II. *Nulla res (inquit cap. II. §. 2.) per se existere & conservari potest, sed existit, & conservatur Dei potentia, idest, ut is interpretatur, potentia cujuscumque rei, quae in natura est, nihil aliud est, nisi ipsa Dei potentia, qua res omnes existunt, & conservantur: qua potentes sunt.*

§. III. Jam habet Deus in omnia absolutum jus, quod inquit, ipsa est Dei potentia: quandoquidem nihil potest Deus physice, quod & moraliter nequeat. Qua in re ille Hobbesio consentit, qui Jus Dei in homines a potentia irresistibili derivat. Ex eo vero concludit, singulas res, quae sunt in natura, tantum divini Juris habere, quantum habent potentiae divinae: quod nimirum quaelibet naturae res divina potentia potens est (a).

§. IV

(a) *Ibid.* §. III.

§. IV. Itaque hoc vocabulum *Jus naturale* totam significat Dei potentiam, quae est in natura, quaeque est ipsa natura rerum omnium. Quocirca dicuntur homines Jure naturae, & jure suo quidpiam agere, quum ex legibus suae naturae, idest ex legibus suae potentiae agunt. Nihil ergo quod possunt homines naturae vi non jure agunt (a).

§. V. Ex quo sequitur, inquit, ut stulte sibi persuaserint Philosophi, Jus naturale esse aut praecipiens, aut vetans: nam quum Jus cujuslibet definiatur ejus naturali potentia, Jus vetans aut ea vetat quae possumus physice, aut ad quae potentia nostra non pertingit. Primum Jus est contra Jus; alterum inutile est (b).

§. VI. Quid autem sibi volunt illa vocabula *sui*, aut *alterius juris* esse? nempe quum de corpore dicuntur, is sui Juris est, qui tanta pollet naturae potentia, ut caeteris resistere valeat, atque agere ex sua potentia, non ex alterius: is vero alterius juris, cujus potentia minor est potentia illius, cui proinde concedere necesse sit (c). Quum autem ad mentem transferuntur ea vocabula, *Juris sui* dicitur, qui sua ratione libere utitur, & vivit, quique a nullo alio callide decipitur, velut sapientes; is vero alterius juris, cujus ratio exigua est, quique idcirco ex alterius vivit ratione, aut qui callide decipitur, quales sunt insipientes (d).

§. VII. Ex his principiis portentosa, sed consentanea, derivat corollaria, quorum unum, aut alterum referemus. 1. Paſtorum omnium, & conventionum fidem, qua una societas & vita humana continentur, funditus evertit. *Qui*, inquit, *quidpiam alicui promittit*, is naturali sua agendi potentia, ac pro-

D 3

pterea

(a) *Idid.* §. IV.

(b) *Ibid.* §. VIII.

(c) *Ibid.* §. IX.

(d) *Ibid.* §. XI.

pterea Jure minime se spoliat, ut in illum conferat : adeoque si possit promissis resistere jure suo resistit, nec est, quod de rupta fide, qui minus potest, quaeratur : quum quaeri non possimus, Jure naturae alios agere. Atque in hoc iterum Hobbio consentit, qui non aperte quidem, sed sua item calliditate pactorum fidem enervat, dum ob metum, ne altera pars desiliat a pacto, neminem stare promissis Jure naturae debere, scribit (de Cive cap. II. §. XI.) Nempe hoc illud est de Achille

Jura negat sibi nata : nil non arrogat armis.

§. VIII. Nec minus portepotolum & horridum est hoc alterum. Quum tantum sit uniuscujusque Jus, quanta potentia naturalis; nec potentia aequalis in omnibus, ne Jus quidem aequale. Qui minimam habet potentiam, is minimum Jus: propterea ab eo, cujus major est potentia, absumi jure posse timeat necesse est. Timeat quoque necesse est omnes eos, qui aequalem habent Potentiam. Quocirca statuit in statu naturali singulos a singulis timere debere, adeoque statum hunc naturalem esse statum mutuae inimicitiae, in quo & Hobbio consentit, licet ex aliis principiis ratiocinetur.

§. IX. Progreditur inde ad originem & constitutionem Civitatis. Quo plures, inquit, homines in eundem finem sociantur, unione singulorum, major eorum evadit potentia, atque idcirco majus jus naturale. Quum status hominum naturalis sit status inimicitiae (a), prorsus necessarium est, ut plures simul in eundem finem conveniant, ut collatis potentiis vitae, & bonis suis consulant. Quum convenierint, tum jus omnium, idest omnium conjuncta potentia, imperium civile dicitur, & is in quem singulorum jus confertur, Imperator. Hic autem quum singulis sit potentior, ob unionem singularum potentia-

(a) §. VIII.

tiarum in uno, singuli ei obedire tenentur, ejusque propterea voluntates sunt leges civiles. Is vero, cui resisti nequit, & omnia impune facere potest, & omni jure, atque legibus exsolutus est. Paria scripserat Hobbius: nam cap. iv. §. xii., & xiv. de Cive bina illa diserte ponit, & *quidquid fecerit Principem impune esse, & eundem legibus Civitatis non teneri.*

§. X. Haec nunc perpendenda sunt tanto adcuratius, quanto quaedam propius veri speciem ementiuntur. Tribus fundamentis inaedificatum est perniciosum hoc systema. I. Dei potentiam & Dei jus idem omnino esse. II. Et eandem rem esse potentiam Dei & Creaturarum. III. Nec in Deo esse ullam, nec in homine libertatem. Quae tria profanus homo in primis duabus Ethicae, ut diximus, partibus demonstrare adgreditur. Tria errata. Nam principio etsi Dei potentia, voluntas, ratio, una eademque res sint, ea tamen res talis natura sua est, ut voluntatis divinae norma non sit ipsa voluntas, sed divina Ratio, seu Intelligentia, qua justii & honesti aeternae & immutabiles notiones continentur; Potentiae vero voluntas moderatrix, ut dictum est. Supremum ergo Jus, & dominium Dei in res omnes voluntate quidem & potentia exercetur, sed non ipsa divina voluntas & potentia est: nascitur enim partim ex aeterna Dei ratione, partim ex eo, quod ex nihilo cuncta Deus creavit, adeoque ex eo quod quaecumque sunt, ut sint, & conserventur, ab eo pendent. Itaut ne si velit quidem Deus, possit a se abdicare Jus hoc, & dominium, quod *essentialiter* connexum est cum *dependentia* rerum a divina natura. Non recte igitur divinam potentiam cum divino jure in omnia perturbat Spinoza.

§. XI. Deinde quum Principium voluntatum, & operationum Naturae Divinae sit eadem illa aeterna Dei intelligentia, exsecutrix vero divina potentia, quae est velut instrumentum intelligentiae, nec potentia divina ulli alteri causae subdit, profecto Deus, & in

mundi creatione, & in gubernatione liberrimus est. Quid enim? A potentiori cogitur ne causa? Ne ipse quidem Spinoza dixerit, nec quivis alius, qui qualemcumque Dei informationem habet. A rebus ne externis? At pugnat cum veritate, naturam perfectissimam & potentissimam ab ulla externa causa cogi necessario. A sua tandem natura? Scio hoc contendere Spinozam. Sed quis non videat quam sit ridiculum asserere seipsam naturam quamlibet posse cogere? Quam vero ineptissimum naturam perfecte beatam? Constat igitur Deo absolutissima libertas. Sua vero libertate & homines esse praeditos, clarissime demonstratum est a nobis in secunda parte. Primum igitur atque ultimum systematis Spinozistici fundamentum ruinofum est.

§. XII. Secundum superest determinandum, quod quoniam est illi praecipuum, copiosius a nobis refellendum est. Principio utemur argumento ad hominem, ut vocant. In Ethica (a) hic homo statuit Dei omnipotentiam actu ab aeterno fuisse, & in aeternum eadem in actualitate mansuram, idest quidquid divina omnipotentia fieri possibile est, uno actu ab aeterno factum esse. Ex quo etiam consequitur, divinam omnipotentiam, quae sit tota in actu, & indivisibilis, ubicumque est, totam esse, atque inde ubicumque est infinitam esse. Quum vero apertissimum sit, singulorum naturae entium potentiam finitam esse; conficitur apertissime naturae potentiam non esse ipsam essentialem Dei potentiam. Praeterea omnipotentia Dei tota in actu est, ut Spinoza fatetur; ergo ubicumque est, tota in actu est. Non est autem in singulis entibus tota in actu, quum homines, ex:gr: non totis semper suis viribus agant, sed plerumque, parte virium; ergo singulorum entium potentia divina ipsa Potentia non est. Tandem ex adplicatione
infi-

(a) *Parte I. pag. 18.*

infinite potentiae ad Ens quodlibet, sequeretur effectus infinitus, non secus atque ex multiplicatione infinite lineae per finitam, rectangulum existit infinitum: at id falsissimum est, ut inductione probari potest; verum igitur esse non potest singulorum entium naturae potentiam eandem esse divinam Omnipotentiam.

§. XIII. Quid igitur, dicet quispiam? Non participat Deus creaturis singulis suam potentiam eamque confirmat? Participat, sed ita ut potentiae & vires singulorum entium sit effectus potentiae divinae, non potentia ipsa. Non alia prorsus ratione, atque vires motrices, quas homines machinis communicant, non ipsae sunt hominum vires, sed virium humanarum effectus. Quamquam etiamsi vel maxime tantisper demus, Potentias singularum rerum ipsam esse Dei potentiam per universam naturam diffusam; non inde sequetur Jus creaturarum naturale, atque potentias naturales unum idemque esse, quoniam! superius demonstratum est, falsum esse principium, unde hoc consectarium deducit Spinoza, nempe potentiam Dei ejusque jus in omnia unam eandemque rem esse.

§. XIV. Quoniam ergo constat, ut in rebus aliis, ita in hominibus suas esse vires, quibus operantur, quaestio de Jure naturae huc redit, an quantum physice tantum jure possint, seu an ex voluntate Dei sequatur, ut quantum homines physice possint, tantum possint moraliter? Ea vero controversia ex fine humanae vitae dirimenda est. Vires agendi homini datas, ut propositum ei finem persequeretur, nullus dubitat: cum ergo in finem vires eas intendat vult Deus. At quoniam cum iis viribus libertas agendi conjuncta est, ut idcirco non solum parte virium, & quidem plurimis modis, agere possit, sed etiam modis infinitis super infinitis propemodum vitae objectis, atque ob eos varios agendi modos possit a proposito fine deviare, & consequenter a voluntate Dei; sequitur non quantum, & quomodo physice potest, jure etiam, idest

idest moraliter posse ; sed jure tunc operari , quum viribus naturae suae utitur aptate & convenienter ad propositum sibi finem , contra jus vero , si in agendo ita libertate abutatur , ut a fine desciscat . In hoc igitur posita est divina Lex naturalis , ut nimirum ostendat homini , quae ad finem illum faciant , eaque praecipiat , & obligatione sanctionis eo libertatem flectat : quae vero devia , eaque vetet , & minis poenarum absterreat ab iis faciendis : quae tandem *adiaphora* , idest indifferentia , permittat , ut possit in his homo integra potentia naturali uti . Atque hunc in modum convulsis Spinozistici aedificii fundamentis , caetera quoque corruant necesse est , ut non sit opus inde deducta confectaria longius refellere .

C A P U T VIII.

*Grotii doctrina super Principiis juris naturae
expenditur .*

§. I. **P**ostquam superius impedimenta e medio disjecimus , superest ut in *legem* ipsam *fundamentalem* , & principium totius juris naturae *COGNOSCITIVUM* , ut vocant inquiramus . Variant super ea re gravissimi Auctores , ii maxime qui velut signiferi hujus disciplinae habentur . Nos praecipuorum sententias in medium proferemus : nam etsi in Kumberlandi & Wollastoni doctrinam plurimum propendeamus , agnoscimus tamen , commode etiam ex Grotii , & Pufendorffii systematibus officia hominum derivari posse . Hugo igitur Grotius , cujus eximia sunt in rempublicam litterariam merita , primus omnium in justum corpus prima legis naturalis scita retulit , editis libris tribus de Jure belli , & Pacis , in quo opere omnem , ingenii conatum effudit . Propositum Grotio fuit jus illud explicare , *quod inter populos plures , aut populorum Rectores intercedit , sive ab ipsa natura profectum , sive divinis constitutum legibus , sive moribus , & pacto ta-*
cito

cito introductum, ut is in Prolegomenis loquitur.

§. II. In primis distinguit vir doctus jus Naturae a jure Gentium, eaque hoc discriminat, ut illud sit, quod ex natura ipsa humana, & ratione profluit naturali: hoc ex consensu aut omnium, aut plerarumque Civitatum (a). Primi illius juris matrem esse ipsam humanam naturam docet; ea enim nos, inquit, etiam si nulla re indigeremus, ad societatem mutuam adpetendam ferret (b). Inter ea, pergit, quae homini sunt propria, est adpetitus societatis, idest communitatis, non qualiscumque, sed tranquillae, & pro sui intellectus modo ordinatae cum his, qui sui sunt generis (c). Haec autem societatis custodia humano intellectui conveniens fons est ejus Juris, quod proprie tali nomine adpellatur (d). Quumque ut talia principia in nobis existerent, Deus voluit, tale jus merito Deo adscribi potest (e). Quae Grotii doctrina, si recte accipio, huc redit: proprietates naturae humanae naturales, idest illi congenitae ac insitae ad Deum referri debent: inter proprietates autem hominum ingenitas est adpetitus societatis tranquillae & pacatae: hic igitur appetitus a Dei voluntate est. Voluntate scilicet Dei rapimur ad societatem tranquillam & pacatam: vult ergo Deus, ut homines societatem hanc custodiant, atque quocumque possunt modo foveant, vetat vero quocumque subvertere possunt: atque custodia haec societatis universi Juris fons est. Nam quod ille alterum statuit, *judicium recte conformatum*, illud nisi ad primum hoc referatur, inutile est, quousque demonstretur, qua regula judicium conformandum sit. Id enim hoc in loco quaerimus, quanam illa sit
nor-

(a) In Prolegomenis §. XVI., & XVII.

(b) *Idid.* §. XVI.

(c) *Ibid.* §. VI.

(d) *Ibid.* §. VIII.

(e) *Ibid.* §. III.

norma, qua iudicium, quod ad vitam sapienter transigendam pertinet, informatum, rectum sit sibi que constans.

§. III. Alterum Grotii Principium Juris naturae cognoscitivum est consensus Gentium cultiorum: nam ubi multi diversis temporibus, ac locis, idem pro certo adfirmant, id ad causam universalem referri debet, quae in nostris quaestionibus alia esse non potest, quam aut recta illatio ex naturae principiis procedens, aut communis aliquis consensus: illa jus naturae indicat: hic Jus Gentium (a). Enim vero phaenomeni universalis, idest temporum, & locorum omnium, causa esse debet universalis. Quum autem aut nationes omnes, aut pleraeque idem pro justo aut injusto habent, phaenomenon est universale: non potest ergo a causa peculiari proficisci, sed ab universali; ejus vero causa universalis esse alia non potest, nisi aut rei ipsius evidentia e Naturae fonte manans, aut populorum in idem consensus; quarum causarum prior Jus naturae, altera Jus Gentium, ita Grotio dictum, demonstrat,

§. IV. Plura sunt huic Grotii doctrinae a viris doctis objecta, quae paucis complexus est Heineccius in *Elementis Juris Naturae & Gentium lib. 1. cap. 3.* Principio adversus primum Grotianum Juris naturalis fontem opponit, quod officia erga Deum, & nos ipsos pleraque locum essent habitura, si vel maxime homo solus & extra omnem societatem humanam in hoc terrarum orbe viveret; ex quo conficit adaequatum Juris naturae Principium illud non esse (b). Opponit praeterea Principium illud non esse evidens: nam incertum est, utrum homines societatem ament, quia utilem experti sunt, an quia ad societatem a natura rapiuntur. Sane in societate adperenda quilibet rei suae consulit: non igitur constat illud, quod Gro-

[a] *Ibid.* §. XI.

(b) *Loco cit.* §. 75.

Grotius pronunciat, homines nullius etiam rei indig-
 gos ad societatem adpetendam rapi. Accedit quod ho-
 minum adversus homines odia, & irae contrarium vi-
 dentur probare. Ad rem Libanius declamatione IX. :
Nonne mite quiddam animal verborum tenus homo est?
sed rebus ipsis agreste, & effrene. Nam quaenam
Leonum adversus Leonem expeditio? Quod bellum inter
ejusdem generis belluas? Quod apud illos est perjurium?
Quae pactorum violatio? Quae perfidia tanta, & ava-
ritia? Quod apud illos aurum? Qui pecuniarum amor?
Quas commestationes, & crapulas noverunt?

§. V. Duo potissimum adversus alterum opposue-
 re. I. Quod evidens non sit: II. Quod minime ve-
 rum. Nam nec possibile est sententias veterum natio-
 num, aut omnium, aut plerarumque super officiis
 hominum noscere, nec facile recentium. Illud, quia
 plerarumque nationum memoria funditus intercidit,
 nec nisi Graecorum, & Latinorum historia extat, neq;
 illa omnium temporum, atque locorum. Hoc vero,
 quoniam quaedam sunt nationes inaccessae, aliae qua-
 rum non facile mores, & instituta sciveris. Praete-
 rea haec omnia a viatorum fide habemus, quae in
 plurimis suspecta esse debet, seu quod scire non po-
 tuerint, quae narrant, seu quod insita quadam levi-
 tate mentiantur; seu quod decepti decipiunt. Quod
 si ex sensu Graecorum, & Latinorum de opinione
 omnium gentium judicare velimus, sophismatis genus
 admittemus, quod Dialectici Scholastici vocant *a*
secundum quid ad simpliciter. His accedit, quod quae-
 dam sint, quae jus naturae ex Grotii ipsius sententia,
 verat, quae apud plures nationes usitata reperias, cu-
 jusmodi fuere & *poliandria*, idest unius foemina cum
 pluribus viris nuptiae simultaneae, & nuptiae paren-
 tum cum liberis, & furta, & ultio, & plurium Deo-
 rum cultus, quorum exempla luculentissima protulit
 Pufendorfius.

§. VI. Non puto tamen haec tanti esse, ut propterea
 aut minus veram, aut sibi constantem Grotii doctrinam

cen.

cenſere debeamus, praefertim ſi paucis additamentis illuſtretur. I. Illud argumentum, quod verbis Heineccii propoſuimus, Grotii ſyſtema non ferit. Neque enim Grotio conſtitutum erat, niſi de eo jure dicere, ex quo officia inter populos & populos, atque eorum Rectores proficiſcuntur: nec ille Theologiam naturalem, & moralem, aut Ethicam monaſticam, ideſt quae pertinet ad mores hominis ſolitarii conformandos, ſpectabat. Nemo ergo ab illo exigere debet tale Juris naturalis Principium, ex quo officia quoque adverſus Deum, aut adverſus noſmetipſos explicentur. Quod qui fecere, ii Grotii propoſitum non videntur intellexiſſe. Eſt ergo Grotiani ſyſtematis principium illud ad omne jus, quod inter homines, & homines intercedit, expediendum, adaequatum.

§. VII. Nec longa judiciorum ſerie indiget, ut conſtituatur, quum quique per ſe ipſum intelligere poſſit, hominem nec extra ſocietatem naſci, nec educari poſſe vitalem: ex quo vel idiotae concludere poſſunt, non poſſe Deum non praecipere ſanctiſſime ſocietatem colendam, qui velit homines eſſe & conſervari. Uno ergo ſyllogiſmo tota ea demonſtratio continetur. Nec brevior eſt Heineccii ipſius ratiocinatio, qua nititur probare, hominem ad amorem generis humani obligari, quem ille amorem principium eſſe contendit Juris naturalis cognoviſcitivum evidens, verum, & adaequatum.

§. VIII. Quae vero adverſus adpetitum ſocietatis opponi ſolent, ex perturbatis, atque corruptis hominum moribus nullius ſunt momenti adverſus Grotianum ſyſtema. Principium enim cognoviſcitivum legum naturalium, quemadmodum ſuperius obſervatum eſt, non eſt deſumendum a qualitatibus, & vitiis naturae humanae adventitiis, ſed a proprietatibus inſitis, & eſſentialibus. Adpetitum vero ſocietatis anteriorem eſſe ad omne vitae humanae commercium, inde patet, quod, ut dictum eſt, homo nec naſci vitalis poſſit extra ſocietatem, nec exiſtere &
con-

conservari. Idipsum comprobatur ex amore infantium inter se mutuo, ex amore naturali & necessario parentum in liberos, qui amor adeo omnem societatis experientiam praecedat, ut sit etiam in brutis illis, quae amore societatis non tanguntur; qua super re praeclara quaedam scribit Tullius in I. De Officiis. Videri potest ut totum hoc argumentum pertractat Pufendoiffius de Jure naturae & gentium Lib. II. cap. 1. §. 4.

§. IX. Quod attinet ad alterum Grotii Principium, qui cum oppugnant, non plane ejus mentem allequuti videntur. Principio Grotius in subsidium tantum & confirmationem argumentis secundi illius generis utitur: ceteroquin fatetur, fontem hujus Juris esse *Societatis ingenio humano convenientis custodiam*. Deinde non ignorabat Grotius, aegre cognosci ab hominibus posse nationum omnium super variis vitae humanae officiis sententias: sed recte tamen opinabatur, sicubi eae sciuntur, magnum inde argumentum desumi posse, esse aliquid natura justum, aut injustum. Laudat ille quidem Graecos tantum, & Latinos Auctores, quod ii dumtaxat ex veterum memoria supersint. Caeterum quum constet, Graecos atque Latinos cultiores fuisse reliquis nationibus, merito his in rebus eorum judicium instar omnium haberi potest, aut caeteris omnibus praeferri. Quod spectat ad exemplum Idololatriae, in eo, quod est caput, unum esse supremum Deum, cui nullus alius sit par, gentes omnes consenserunt, quod plurimis demonstratur a Cudwortho in Systemate intellectualem cap. IV. Reliqua superfluitio ad rem eam, de qua agimus, minime pertinet.

§. X. Quae quum sint, intelligamus, praeter eas, in quas ipsi coivimus, Civitates, esse aliam totius generis humani, in qua omnes nascentur, non quam pactis conficiant, & cujus omnes natura, non voluntate sint cives: hanc Civitatem esse homini conservando necessariam, non secus atque oculo totum corpus

pus

pus. Itaque quum Deus velit homines esse, & conservari; velle quoque, ut haec humani generis mutua societas custodiatur, & quoad scimus ac possumus foveatur. Praeclare Alexander Macedo tantam Tellurem *Civitatem suam* appellabat, exercitum vero, cui praeerat, *ejus Civitatis arcam* (a). Qua ex re sequitur I. Hominem omnem operam dare debere, ut se dignum hujus Civitatis civem reddat. II. Nihil facere jure posse adversus hanc societatem. III. Obligari ad ea omnia agenda, sine quibus haec societas stare nequit. IV. Par esse (nam id est boni civis) omnia ea efficere, quae societatem istam facere possint beatiorum. Perspicua sunt haec, atque ex natura ipsa hominis sponte sua profisciscuntur.

C A P U T IX.

Systema Pufendorffii enarratur.

§. I. **S**Amuel Pufendorffius Lib. II. de Jure Naturae & Gentium Cap. I. ut huic tractationi viam faciat, omnium primum ad demonstrandum adgreditur, hominis naturae non congruere, ut vivat exlex. Nam & praeditus est libertate, qua ad sui, aliorumque perniciem abuti potest, nisi ea legibus regatur: Et quum homo sit animal caeteris sanctius, mentisque capacius altae, & cognitionem quandam cum Deo habeat; requirebat profecto ipsius dignitas, & praestantia, qua caeteris animantibus eminet, ut certam ad normam ipsius actiones exigerentur, quippe citra quam ordo, decor, & pulchritudo intelligi nequit (§. V.) Praeterea quum major sit ingeniorum humanorum pravitas, quam brutorum, quandoquidem illa venter tantum, & venus sollicitant, quae ubi placaveris, pacata sunt omnia, homi-

(a) *Plutarchus in Alexandro.*

minem vero affectuum, & cupidinum brutis ignotorum colluvies agitat, nec ad certum tempus, ut in illis, sed perpetuo: is nisi lege regatur, qualis futura sit hominum vita? Luporum, Leonum, Canum inter se decertantium turbam videres, imo infestius quid, quum nullum sit animans, quod homini plusquam homo nocere possit, & velit (§. VI.) Accedit quod in homine longe major sit ingeniorum diversitas, & varietas, quam in ullo genere brutorum, siquidem ut praeclare Horatius Lib. II. Sat. I. *Quot capitum vivunt, totidem studiorum.* Quae nisi lege composueris, ut in Musica, ubi plures & diversae voces, faedus & inmaenus sonus ferit aures, ita hic summa vitae humanae confusio proventura sit [§. 77.] Tandem ceteris omnibus animantibus imbecillius animal homo est; cui nisi jure & lege subventum fuisset, is etiam omnium miserrimus fuisset [§. VIII.]. Ex quibus consequitur, divinae fuisse providentiae, naturalem hominis libertatem intra certos concellos latis legibus continere.

§. II. Quibus demonstratis in cap. II. in statum hominis naturalem inquiri. Status hominis naturalis is dicitur, in quo homo per ipsam nativitatem constitutus concipitur, prout abstracta intelliguntur inventa, atque instituta humana, aut homini divinitus suggesta, quibus aliam veluti faciem induit vita humana (a). Is status tum intelligitur clarius, si fingantur homines e Tellure nati, quod & veteres Aegyptii (b) & Epicurei docuere (c). In eo naturali statu nunquam universum genus humanum simul & semel extitit, quum sciamus primos mortalium a Deo creatos, positosque in societate conjugali, & qui inde nati sunt, sub imperio natos, & commoda vitae a Deo doctos: sed veteres Auctores (ut & nonnulli recentes) nullum dubio lo-

Tom. IV.

E

cum

(a) *Ibid.*(b) *Diodorus Sicul. lib. 2.*(c) *Lucretius lib. 5.*

cum relinquunt, quin sequentibus temporibus plurimi mortales a veteri vita desciscentes in statu naturali vixerint (a). Tum adversus Spinozam, & Hobbesium differit, ostenditque statum hunc naturalem non esse belli, & inimicitiae statum, sed pacis: repetendum nempe esse homines statum non ab impetu, & inclinationibus animae sensitivae, quasi nulla esset in homine ratio, sed a ratione, quae praecipua hominis pars est, quaeque habet in caeteras facultates regimen, quae ratio tantum abest ut statum illum praeferat, ut amorem potius & pacem suadeat (ibid. §. 9.). Quod confirmari potest exemplo puerorum, earumque nationum, quae a veteri vitae simplicitate, quae multum habet pueritiae, nondum discesserunt, neque eorum commercio depravatae sunt, qui rapere omnia, & avare imperitare solent. Qua de re supra dictum est.

§. III. Interim nihil eo statu miserius esse demonstrat. *Finge* (inquit lib. I. de Officio Hom. & Civ. cap. III. §. 3.) *hominem citra omnem ab aliis hominibus accedentem curam & culturam ad robustam aetatem proventum, cui nihil sit scientiae, nisi quod ex proprio ingenio velut ultro pullulavit, eundemque ob omni aliorum hominum ope atque consortio in solitudine destitutum: sane vix miserabilius animal deprehendetur, elingue nimirum ac nudum, cui nihil aliud relictum, quam herbas radicesque vellere, aut sponte natos fructus legere: sitim fonte, flumine, aut lacuna obvia levare: repellendis aeris injuriis antra subire, aut musco, gramineve corpus utcumque tegere: tempus taediosissimum per otium exigere: ad quemvis strepitum, aut alterius animantis occursum exhorrescere: denique, fame, frigore, aut per feras bestias perire.*

§. IV. Quae quum sint, ut genuinum fundamentum legis naturalis intelligatur, docet ipsam hominis

(a) *Aristoteles Saepe, Cicero, Horatius.*

minis naturam, conditionemque, & inclinationes accurate contemplandas (a). His vero pensitatis facile patescere, quae Cicero de Finibus Lib. III. de omni animante scribit, ea quoque in homine locum habere, simul nempe atque natum est animal, ipsum sibi conciliatur, & commendatur ad se conservandum, & ad suum statum, & ad ea quae conservantia sunt ejus status, diligenda: alienatur vero ab interitu, iisque rebus, quae interitum videntur afferre. Ex quibus duobus, miseria nempe hominum in statu naturali positorum, & amore sui, fundamentum juris naturae eruit. Est scilicet homo animal sui conservandi studiosissimum, per se egenum, sine sui similium auxilio conservari ineptum, ad mutua commoda promovenda maxime idoneum: idem tamen saepe malitiosum, petulans, & facile irritabile, atque ad noxam inferendam promptum, & validum. Ejusmodi igitur animal ut salvum sit, bonisque fruatur, quae in ipsius conditionem cadunt, necessarium est, ut sit **SOCIABILE**, idest ut conjungi cum suis similibus velit, & adversus illos ita se gerat, ut ne illi ansam accipiant eum laedendi, sed potius rationem habeant ejusdem commoda servandi, & promovendi.

§. V. His positis (pergit ille de Offic. homin. & Civis Lib. II. Cap. III. §. IX.) adparet fundamentalem legem naturalem esse hanc, cuiuslibet homini quantum in se colendam esse & servandam **SOCIALITATEM**. Socialitatis autem nomine earum virtutum complexum intelligit, quibus homines ita conformantur, ut in unum harmonicum corpus jungi quum velint, tum possint. Nam quemadmodum ut ex pluribus lapidibus fornix struatur, non quaevis lapidum figurae aptae sunt, sed eae tantum, quibus singuli singulis copulari possint, & teneri conjuncti; ita non

E 2

qui-

(a) De jure naturae, & gentium Lib. II. Cap. 3. §. XIV.

quibus animorum habitus & formae aptae illae sunt ad societatem ineundam & arte continendam, sed eae tantum, quibus facile alii cum aliis coeant. Totum id socialitas est. Ex quo consequitur, ut quoniam qui vult finem, vult etiam media, sine quibus finis obtineri nequit, omnia quae ad istam socialitatem necessario, & in universum faciunt, jure naturali sint praecepta: quae eandem turbant, aut abrumpunt, vetita intelligantur. Reliqua autem praecepta tantum sunt, velut subsumptiones sub hac generali lege, quorum evidentiam lumen illud naturale hominibus insitum insinuat. Ut autem probet ea praecepta vim legis proprie dictae habere, pergit eodem loco ostendere a Deo illa manare. Nam quum non possit Deus non velle, ut homines iis viribus, quas sibi prae brutis peculiares esse sentiunt, ad naturae suae incolumitatem utantur, neque id obtineri queat, nisi servatis iis legibus, quae incolumitatem colendam dicunt, inde concludit, intelligi ab omnibus obligari homines ad eas leges servandas.

§. VI. Quae adversus Pufendorffium objecta sunt, ad duo capita referri possunt. I. Non esse id principium evidens, ut etiam idiotae inde officia derivare possint. II. Nec esse adaequatum, quum officia hominis erga seipsum, & Deum aegre ex illo deduxeris. Parum autem utrumque adcurate I. Quod exculti homines faciunt, quum ex artis principiis consequentia vitam spectantia deducunt, id idiotae velut habitu quodam naturae efficiunt: vim nempe praeceptorum naturalium sentiunt, etsi principia ipsa disciplinae non intelligant. Quo modo Mathematicus & idiota quidquam cum proportionem efficere possunt, quamquam posterior proportionis regulas ignoret. Ita Zabaglia ille noster Mechanices vim & usum tenere potuit, non solum totius ignarus Mechanices, sed etiam litterarum omnium rudis. Natura ipsa quivis sentit, hominem in adiutorium mutuum generatum esse, ut loquitur Seneca Lib. I. de Ira Cap. V. Sed non omnes

in-

intelligunt hujusmodi socialitatis primas, & altas rationes. Quod si quidpiam pronunciandum sit falsum, quod idiotae non intelligant, non video quid superest veri in scientiis sublimioribus.

§. VII. Quod spectat ad alterum, officia hominis adversus seipsum ex illo principio recte contrivantur, si observaverimus socialitatem ita demum posse coli, si quis ita sit formatus, ut sciat cum aliis concorditer vivere. Sic vero formari nequit, nisi in omnibus officiis, quae sibi debet, instructus sit, & compositus. Quanquam si concedamus, quaedam esse adversus nos ipsos officia, quae non facile ex illo principio derivare possumus, ut nec officia adversus Deum, non idcirco minus perfectum erit Pufendorffianum opus. Quum ille Juris naturae, quo gentes continentur, praecepta explicare voluerit. Quum itaque totum opus Auctoris fini respondeat, perfectum omnino censendum est.

C A P U T X.

De Principiis Juris naturalis ex Cumberlandi mente.

§. I. **Q**UO tempore Pufendorffius Lundini in Svecia, quo in loco docebat, Corpus juris naturae & gentium vulgavit, idest anno 1672., eodem prorsus anno Ricchardus Cumberlandus Anglus edidit Londini *Disquisitionem philosophicam de Legibus naturae, in qua etiam Elementa Philosophiae Hobbianae refutantur*. Eo libro summo opere delectatus est Pufendorffius ipse, usulque passim in sequentibus sui operis editionibus. Natus est Cumberlandus Anno 1632. humili prorsus loco. Litteris operam dedit primum Londini, mox Cantabrigiae, versatusque est adcuratissime in Philosophicis praecipue, & Mathematicis disciplinis. Studiis attritus extinctus est paralyti Anno 1719. aetatis suae 87. Opus

de Legibus naturae novem continetur capitibus, ordineque geometrico compositum est. Barbeiracius edidit Gallice Anno 1744., qua lingua legendum Auctor fuerim: habet enim latinum opus dictionem incomtam, atque asperam, plurimisque in locis Delio narratore indiget.

§. II. Cumberlandus igitur legem naturae fundamentalem ex creaturarum rationalium fine repetendam censet. Systema illud omnium spirituum, seu omnium creaturarum rationalium, mente comprehendit: deinde ex fine hujus systematis legem naturae fundamentalem perquirat. Ut omittamus quae ad totum systema intellectuale spirituum pertinent, quae hominis sunt propria prosequamur. Finis hominis e natura ipsa hominis intelligitur esse qualiscumque, cujus capax est, beatitudo. Beatitudo autem, quae homini in terris agenti contingere potest, in duobus posita est, ut corpus sine dolore, & animus sine aegritudine sit: ergo his duobus totus praesentis hominum vitae finis absolvitur.

§. III. Jam is finis, quo natura ipsa nostra velimus nolimus necessario tendit, non potest esse nobis propositus, nisi ab auctore generis nostri, idest Deo: quae enim naturalia insunt rebus, ea Deum habent auctorem. Jam vero quum exploratum sit, qui vult finem, velle media, praesertim si causa sit sapientissima; dubitare non possumus, quin Deus velit adhiberi ab homine ea omnia media, quae eum finem spectant, vetetque contraria. Quumque Deus sit summus hominum Imperator, est haec ejus voluntas, qua praecipiat, qua vetet, suprema creaturarum rationalium lex.

§. IV. Ut autem ejus legis praecipuum fundamentum cognoscatur, inquirendum in id est, quo servato, finis ille obtinetur, neglecto, longe ab eo aberratur. Nam quum ad nostram felicitatem efficiendam ordinatae sint leges naturae, id certe earum omnium erit fundamentum, quo posito felicitas nostra obtinetur,

tur, ablato, amittitur. Id autem sequenti ratiocinio perquirat. Ponamus omnes creaturas rationales, mutua sese benevolentia, quoad intelligunt, & possunt, complecti, atque commune totius systematis bonum in omnibus suis actionibus spectare, ea ab iis habebitur felicitas, qua maiorem nullam ipsae sibi praestare possunt; nam & nulla earum alteri quidquam mali faciet, & omnem, quae pollet, opem alteri feret. Ex. gr. si ea hypothesis ad homines tantum restringatur, carebit vita humana iis malis, quae homini sunt ab homine, quae numero, & intensitate omnium sunt maxima, & e contrario fruatur omnibus iis bonis, quibus praestantiora a nullis aliis causis sperare potest. Ergo dubitare non possumus, quin si omnia huius systematis intellectualis membra mutua se benevolentia complectantur, eam hic felicitatem habitura sint, cujus ipsa sunt capacia. Ponamus item haec membra sese mutuo infectari, in mutuo esse bello & inimicitia, nihil miserius eorum vita excogitari poterit. Ex quibus conficit Cumberlandus, mutuam hanc benevolentiam primum esse fundamentum felicitatis vitae humanae, atque idcirco primum quoque fundamentum legum omnium naturalium, quae hanc felicitatem spectant. Ita ratiocinatur Cap. I. laudati operis §. IV.

§. V. Neque vero aut arbitraria est ea hypothesis, aut obscura & ignota mortalibus. Nam nulla evidentior demonstratio proferri potest, qua ostendatur causam aliquam esse veram, nisi haec, quod ea causa posita, effectus realis sequatur, ablata, auferatur. Quum autem posita ea benevolentia, & communi boni generis humani cura, singulorum nascatur felicitas, ablata, amittatur; est ea causa realis & vera. Quinimmo quum non alia ratione finis ille obtineri possit, uti per se perspicuum est; est quoque causa necessaria (ita ratiocinatur eodem in cap. §. VII.). Quo modo regula solvendi geometrici alicujus problematis, quod uno modo solvi potest, vera quidem est,

si ea adhibita problematis solutio sequatur: & necessaria, si nulla ejus solvendi alia superfit via. Deinde nemo est, qui non intelligat, totum hominum genus esse corpus unum, quod nec sanum esse potest, nisi membra integra sint & sana, nec rite functiones suas peragere, nisi membra omnia harmonice conspirent in eundem finem. Nemo est, quem latere possit, bonum totius hujus corporis in membra influere, nec proinde membra tranquilla esse posse, ubi totum sibi ipsi dissidet. Experientia quoque omnes docet, nec solitarios homines commode vivere posse, imo ne vivere quidem: nec in societate sine mutua hac benevolentia & boni communis reciproca cura.

§. VI. Ex ea doctrina potissima legum naturalium capita facile quivis deduxerit. Paucis id praestat Auditor noster §. XXIV. ejusdem capituli. Principio quum servari totum nequeat concisis partibus, inde sequitur Lex illa, quae est totius Justitiae humanae fundamentum, & qua sublata, nullo modo vita humana consistere potest, *neminem innocentem laeseris; si feceris, in integrum restitue*. Laeditur autem quisque, quum quod suum est quocumque modo aut turbatur, aut imminuitur, aut deterius efficitur. Suum cujusque adpellatur quodcumque bonum seu ingenitum, seu adquisitum rite, aut ad mentem, aut ad corpus, aut ad utrumque, aut ad fortunam pertineat. Ex omnibus enim his bonis consistit illud quod *suum* dici solet. Egregie haec explicat Henricus Koehlerus in dissertatione prolusoria ad Elementa juris naturalis. Innocentem autem dixi: nam quum laesio alicujus publici boni ergo fit, quod contingit, quum puniuntur, qui alicui crimini obnoxii sunt, quod crimen in damnum societatis vergat, proprie laedi non dicuntur. Posterior legis pars ex priorē consequitur: nam qui laesit, nec damnum reparare studet, is laedere continuat.

§. VII. Deinde ut publica felicitas obtineatur, non sufficit abstinere ab inferenda injuria: nam vita humana non suis tantum bonis contenta esse potest, sed

sed communicatione indiget aliorum. Ergo lex illa fundamentalis Cumberlandi nos etiam docet, ut quocunque modo possimus, seu consilio, seu viribus, seu operibus nostris in commune consulamus, idest, ut caeterorum bona pro virili promoveamus, & quaecumque nobis fieri ab aliis volumus, id & aliis nos faciamus. Dici non potest, quantopere humanae vitae mutua tranquillitas hac caritate promoveatur, quantumque in nos ex nostra erga alios beneficentia bonum redundet. Nam quemadmodum quum corporis membra alia aliis serviunt, singula bene & valide se habent; ita quum homines alii aliis, quoad sciunt, & possunt, opitulantur, nemini quidquam deest, quod esse, & vivere possit beatus. Vide Tull. Lib. I. de Legibus.

§. VIII. Praeterea, qui bonum commune in omnibus suis actionibus spectat, is ita se componat oportet, ut praecipuis publici boni causis afficientibus, aut publicis rectoribus, in primis Deo, Principibus, aliisque Imperatoribus supremis, eorumque ministris, placeat, quod sit obsequio, atque amore erga illos. Accedit quod Deus supremus ille omnium Imperator nos impense amat, id quod ostendunt innumera & continua ejus in nos beneficia animi, corporis, rerumque externarum: ergo monstro simile est eum non reamare. Hinc deduci possunt in Cumberlandi systemate officia omnia, quae Deo debemus, quae duobus continentur *OBSEQUIO*, & *AMORE*. Neque enim aliud est pietas, nisi Deum amare, ejusque voluntati esse obsequentissimum: quicunque enim Deum amat, ac veretur, caetera quoque ei officia, quum interna, tum externa libentissime praestat. Quid quod ille amor necessarius est ad nos rite amandos? Difficile enim est se mutuo fratres amare, qui communem patrem non ament. Itaque amor & reverentia erga Deum efficit ut nos veluti ex communi patre prognatos, ac propterea fratres, diligamus, amemus, atque alii aliis utiles & benefici esse studeamus. Ceterum hanc partem

tem Philosophiae Moralis paucis attingit Cumberlandus, velut qui aliud spectabat. Propositum enim illi erat leges societatis regendae explicare, & Hobbesianam oppugnare Philosophiam, non vero religionis naturalis dogmata tradere.

§. IX. Tandem ex eodem principio sequitur, ut quilibet sibi conservando, perficiendo, ornando, quoad fieri potest salvo communi bono, studeat: cura enim totius consistere nequit sine cura singularum partium. Et quo modo, si oculi cogitent, intelligunt nec oculos esse, & vivere posse, ubi totum corpus intercidit; nec rursus corpus absolutum esse, ac perfectum sine oculis, ac proinde oportere oculos duplicem in se curam suscipere, totius & partis, ita tamen ut altera alteri non adversetur: eodem modo singuli homines, & toti generi humano conservando, atque perficiendo studere debent, certi, quod partes tranquillae esse nequeunt, ubi totum perturbetur; & sibi, quum nec quietum, nec perfectum totum esse possit sine singulorum perfectione, & quiete. Ea autem cura triplex habet objectum, animum, corpus, & externa corporis bona: nam ab iis tota nostri tranquillitas pendet. Supersedeo nunc ab iis enarrandis, quae Vir doctus super ea re edisserit. Merentur ea apud Auctorem ipsum legi. Nam etsi nonnihil habeat Cumberlandiani operis lectio laboris, ob arctissimam & pene geometricam ratiocinationum seriem; utilitas tamen qualemcumque cum labore non compensat modo, sed vincit.

C A P U T XI.

De Heineccii Systemate super Principiis Legis naturalis.

§. I. **P**lurima Cumberlando ac Samueli de Cocceji debet Heineccius quod ad hanc rem spectat, etsi vix ullam ille Cumberlandi mentionem habet. Hic igitur Auctor in I. Libro Elementorum Juris Naturalis & Gentium cap. III. profligatis aliis opinionibus §. tandem 77. ut quid sibi rem omnem accurate expendenti in mentem venerit, perspicue ostendat, alte repetit. Principio observat, Deum tanquam Ens infinitae sapientiae & bonitatis nihil aliud velle, quam ut homines, quos condidit, vere felices sint; ac beatissimi. Quum enim ipse tanquam Ens perfectissimum nulla re indigeat; homines qui soli ex rebus creatis nobis notis felicitatis capaces sunt, non sui ipsius felicitatis causa condidit, sed ut eos verae felicitatis participes redderet. Vult ergo ut homines libertate sua ita utantur, ut eam felicitatem semper prae oculis habeant. Est autem Dei voluntas fons Juris naturae, ac justitiae; ergo Jus naturae in hoc totum tendit, ut actiones hominis liberae ad veram felicitatem regantur.

§. II. Jam vero felicitas in fruitione boni, malique absentia consistit; ergo leges naturae in id intendit supremum Numen, ut vero bono perfruamur, malumque evitemus. Quandoquidem autem bono perfrui non possumus, nisi per amorem; inde porro infert, Deum lege naturae nos obligare ad amorem, eumque amorem, & principium Juris naturae, & ejusdem veluti compendium esse (ibid. §. 79.). Quod mox confirmat Scripturarum Sacrarum auctoritate. Nam Christus Servator noster aperte docuit, ex amore Dei super omnia, & proximi sicut nostri, universam legem pendere [Matt. 12. v. 37.]. Paulus vero

ro charitatem vocavit *summam legis*, & *legis impletionem* (ad Romanos XIII. v. 9. 10.) & *finem praecepti* [1. ad Titum cap. 1. v. 5.]

§. III. Porro amor ei est adpetitio Boni conjuncta cum voluptate ex ejus perfectione & felicitate percepta: odium vero averfatio mali, conjuncta cum voluptate ex ejus infelicitate percepta. Itaque, inquit, *ex ejus rei, quam amamus, praestantia & felicitate voluptatem capimus, eamque rem, quantum in nobis est, amplificare vel conservare connitimur. Quod contra odio prosequimur id infeliciſſimum potius, quam felix ac beatum eſſe cupimus* (§. 80.). Ex quo conſequitur, amantem nihil aegre velle facere ei, quod amat; nam id eſt odiſſe; ſed velle potius omnia in id bona, quoad poteſt, conferre.

§. IV. Objecta autem, quae amari a nobis poſſunt, tria omnino ſunt, *Deus, Noſmetipſi, Alii*. Deus amore devotionis amandus eſt: Nos amore amicitiae: Alii item amicitiae amore ut aequales. Qui itidem amor vel eſt juſtitiae, vel humanitatis, ac beneficentiae. Amor Devotionis, ſeu obedientiae, eſt amor Entis praestantioris, perfectiorisque, cujus praestantia ac felicitate ita delectamur, ut illud omni veneratione atque obſequio proſequendum cenſeamus. Amor juſtitiae eſt is amoris amicitiae gradus, quo quem amamus nullo modo laedere parati ſumus. Amor vero benevolentiae is amoris amicitiae gradus, quo quem amamus, quocumque modo poſſumus juvare ſtudemus.

§. V. Quibus definitis, tum progreditur ad propoſitiones fundamentales legum naturae & naturalium officiorum expediendas. Ac primum Deus eſt Ens perfectiſſimum, & a quo toti pendemus; ergo lex naturae jubet omnibus animi viribus colendum, eique perfectiſſimum, ac intimum quoque cultum praestandum (§. 91.). quo ex axiomate omnia, quae Deo debentur, officiate deducit eodem libro Cap. V. Deinde noſtrum ipſorum amor non poteſt aliter eſſe comparatus, quam ut ad perfectionem, & felicitatemque noſtram conſequendam,

dam, & pro virili conservandam, & amplificandam obligemur, dummodo id facere possimus salvo amore, quem Deo & aliis debemus. Itaque axioma, quo officia omnia erga nos continentur est, *Homo nihil eorum, quae ad suam perfectionem, & felicitatem adsequendam, conservandam, amplificandam, pertinet, praetermittere tenetur, dum id sine amoris Dei & proximi violatione fieri potest (a)*. Ex eo vero Principio officia erga nos ipsos late prosequitur eodem lib. Cap. VI.

§. VI. Tandem quandoquidem homines omnes nobis natura aequales sunt; illa vero naturae aequalitas aequalia etiam amoris officia exigit: consequens est, ut alterius felicitate non minus, quam nostra delectari oporteat, ac proinde ita alios amare, ut nos ipsos. Unde tertium existit axioma, quo officia omnia erga alios continentur, *Homo hominem non minus quam se ipsum tenetur amare, nec alteri quod sibi fieri non vult, facere; contra illi facere omnia quae sibi ab altero fieri cupit*. Quae autem hujusmodi sint officia, prolixè explicat novem sequentibus ejusdem libri capitibus.

§. VII. Quilibet nunc ipse per se facillime intelligit, Cumberlandi, & Heineccii Systemata super legibus naturae unum idemque omnino esse: uterque enim *amorem* Principium illud esse *cognoscitivum* officiorum naturalium docet. Uterque praeterea demonstrat, nos ad amorem obligari ex nostri *sine*, idest *felicitate*. Paulo latius eam doctrinam deducit Heineccius, atque altius etiam repetit: concinniores tractationem, & faciliorem adornat, quod in Cumberlando desideratur. Accedit id quoque discriminis, quod Cumberlandus systema nescio quod spirituum animo concipit, cujus partes omnes benevolentia mutua inter se connecti vult: tum in Platoniorum quorundam notiones propendit: quae duo aut non agnoscit Heineccius, aut diserte repudiat.

§. VIII.

(a) *Ibid.* §. 93.

§. VIII. Interim viri docti dum giganteo more veteres hujus disciplinae Auctores perditum eunt, ut soli regnent, vim quaestionis non satis dilucide explicasse mihi videntur, in primis Heineccius. Itaque iis primum oppono, non hic quaeri tantum, quid nostra utilitas, quae recta ratione gubernatur, exigat in vita hac ducenda: nemo enim negaverit exigere nostri beatitudinem, eamque consistere non posse sine communis boni communi cura: nam ipse id Hobbesius, quem ille oppugnat, docet, qui idcirco de jure omnium in omnia demum aliquid vult, quod eo jure, dum nihil in commune consulitur, & singuli intercidunt. Sed non statim sequitur id quod recta ratio e re nostra esse docet *lege aeterna & naturali praecipi*, contrarium vetari: quod nisi constet, nulla esse potest lex naturae in Cumberlandi systemate. Scilicet ex solo amore voluntaria sequi possunt officia, quae extorquerè tanquam ex jure non liceat. At hominis ea natura est, ut non voluntariis contenta esse possit officiis: exigit enim & ea quae vel ab invitis praestentur (a). Deinde quum uterque conetur probare, extare voluntatem Dei, quae benevolentia, aut amor praecipitur, adeoque lege naturae nos ad benevolentiam, & amorem obligari; ab utroque quaeri potest, cadere sub lege possit amor, aut odium, quatenus affectus sunt? Si sibi consentanei esse volunt, negabunt; quum diserte fatentur, lege morali solas actiones humanas, idest liberas, non etiam mechanicas & necessarias regi posse: sunt autem affectus omnes necessariae naturae humanae commotiones coactionis impatientes, quas ratio & voluntas gubernare possint, non aut excitare, aut excitas cohibere, nisi bonorum, aut malorum representatione, quod est a nobis demonstratum in secunda

(a) Vide Koehlerum in exercitationibus de jure naturae dissert. prolusoria.

da parte ; sub lege ergo aut praecipiente , aut vetante cadere nequeunt . Quare quoniam pulcherrimum hoc systema fovendum omnino est , & quoad in nobis est , promovendum , conabimur paullo clarius Principium istud *benevolentiae & amoris* expedire , atque confirmare , ac ab objectionibus vindicare .

§. IX Renatus Cartesius part. 1. Epistolarum Epist. xxxv. , quae data est ad Canutum Reginae Sveciae administrum , praeclare distinguit inter Amorem pure *intellectualem* , sive *rationalem* , atque eum Amorem , qui naturae animalis commotio est *Prior* , inquit , *non mihi videtur aliud esse , cum quod ubi anima nostra bonum aliquod sive praesens , sive absens , percipit , quod sibi conveniens esse judicat , se cum illo voluntate conjungit , hoc est se ipsam quam bono hoc considerat veluti totum aliquod , cujus illud est pars una , ipsa vero pars altera . Deinde si praesens est , hoc est si illud possidet , vel ab illo possidetur , aut denique cum ipso conjuncta est , non solum voluntate , sed etiam realiter , Et de facto , eo modo , quo ipsi convenit conjungi , motus voluntatis ejus , qui eam cognitionem comitatur , qua scit hoc esse sibi bonum , est ejus laetitia . Si vero absens sit , motus voluntatis ejus , qui eam cognitionem comitatur , qua scit se illo privari , est ejus tristitia . Motus autem ille , qui cognitionem istam comitatur , qua scit acquisitionem ejus fore sibi bonam , est ejus desiderium . Omnesque hi voluntatis motus , in quibus consistit amor , laetitia , tristitia , desiderium , quatenus sunt rationales cogitationes , non vero quatenus passionem , possent in anima nostra , quamvis corpore nudata , locum habere . Haec ille . Inde vero Cumberlandiano systemati lumen & vis addenda est .*

§. X. Scilicet lex naturae , quod saepius a nobis dictum est , quae Dei aeterna ratione , & voluntate constat , non alia ratione homini est necessaria , nisi ut contententi illi ad beatitudinem , quae ei naturaliter est proposita , brevitatis rationis , & voluntatis inconsistentia non obsint . Adpetit quidem homo beatitudi-

nem

nem suam naturaliter, neque ut eam amet lege ulla indiget, quippe ad quam necessario rapitur: sed ut recte amet, id nisi lex illa accedat, non habet a natura, cujus ratio brevis est, & depravationi obnoxia. Ergo, ut rite, atque recte amet praecipit lex naturae: recte autem amat quum intelligit, quae sint vera media, quibus illa obtinetur, atque ad ea media, motus suos voluntarios dirigit: ea ergo media, ut lex naturae explicet necesse est. Sunt autem ea media amor Dei, amor nostri, amor aliorum, & quidem amor rationalis ejus naturae, quae a Cartesio explicata est. Hic amor sub lege ista cadere potest, quae tum praecipit, quum docet vera bona, atque ut ad ea feramur, sanctionem adjungit. Ad triplicem igitur amorem illum lex naturae nos obligat. Quumque postquam eum amorem docuerit, idest ostenderit ex eo tantum nobis felicitatem provenire posse, quam nobis naturaliter proponit, nisi amemus, cognitione, & voluntate nostra abutemur; jure crimini nobis verti poterit ejus amoris violatio, & ob eam violationem julte plecti possumus. Atque hunc in modum prior objectio refellitur.

Opponunt deinde, in hoc systemate omnes naturae leges ex utilitate nostra derivari. Scilicet eo totum spectat, ut nos felicitatem nostrum adipiscamur. Omnia autem ad utilitatem nostram conferre periculi, & perturbationis humanae vitae plenum est. Sed huic objectioni non est necesse, ut pluribus respondeamus, quando constat, utilitatem nostram veram non esse, ubi aut publicam utilitatem prodimus, aut de obsequio in Deum supremum nostri legislatorem quidquam imminuimus. Quod quoniam per se perspicuum est, demonstratione nulla indiget. Non igitur Cumberlandi, & Heineccii systemate leges naturae omnes ex privata nostri utilitate derivantur, sed ex communi, nec privatam spectant, sed publicam.

§. XI. Quaeret autem hoc in loco quisquam, quomodo ex superiori systemate in singulis vitae humanae

nac

nae actionibus intelligi potest, quae sint justa aut injusta, honesta aut turpia? Nempe nullo negotio. Nam quum aliquid agendum occurrit, tum consultabimus I. necessarium ne sit ad amorem erga Deum conservandum, an ei adversetur, an neutrum? Nam si necessarium esse deprehendatur, agendum est: si contrarium, omittendum: si neutrum, dum ne amoris nostri aut aliorum adversetur, permissum intellige II. Necessarium id sit ad rectum nostri amorem, contrarium, neutrum? Primum imperatur faciendum: alterum ne fiat vetatur: tertium permittitur, modo ne Dei, & aliorum amoris sit contrarium. III. Necessarium rursus sit ad amorem erga proximum, contrarium, an neutrum? Primum praecipitur: alterum si amoris iustitiae adversetur, vetatur ut injustum: si beneficentiae, & humanitati, prohibetur ut turpe. Si neutrum, dum ne Dei aut nostri amoris rationali officiat, permissum est. Sed haec latius diducere eorum est, qui de officiis differunt.

C A P U T XII.

Superius Systema nova ratione adornatur, ac notiones primae & genericae legis naturae proponuntur.

§. I. PAUCIS ego nunc quid super principiis legis naturae sentiam explicabo. Videri quidem possum in hoc capite ab iis dissentire, quae in priori parte Elementorum Metaphysicae Prop. 48. scripsi. Sed qui utrumque locum diligenter conferent, ii intelligent, me hic non novam doctrinam cudere, sed veterem expedire latius, atque e novis fundamentis excitare. Conferam autem rem omnem in hac theorematum, latius, si vita suppetat, diducturus in Ethicis.

§. II. Prop. I. Homines natura aequales nascuntur. Id est inter perspicua, si naturam humanam in infantibus, in quibus tota & sola inest, contemplari ve-

Tom. IV.

F

linus.

limus. Nam quod in adultis est discrimen ab educatione, arte, & vitae commercio totum est: Naturae enim constitutio, vires, propensiones, dispositiones, & si quid est aliud, quod a natura proficiscitur, in omnibus infantibus aut eadem, aut pene eadem deprehenduntur; nisi quod discriminis quod ad corporis temperiem aut habitum climata faciunt, quod tale non est, ut idcirco ad plures species homines pertinere, in quo magni quidam Philosophi ineptiverunt, affirmare possimus. Hujus ego rei testem do totam generis humani historiam: nationum enim omnium infantes, utcumque habitu corporis aut temperamento discriminati omnes easdem habent insitas propensiones, eorundem capaces affectuum, iisdem mentis aut corporis habitibus apti. Promptius quidem alii, alii tardius, nemo tamen non omnino.

§. III. *Prop. 2.* Homines ad mutuam societatem a natura generantur. Argumento est, quod instrumentis societati aptissimis nascuntur omnes praediti, non modo ad loquendum apti, quod profecto esse nequit, nisi societatis ergo, quod acute vidit Aristoteles, sed etiam iis affectibus obnoxii, qui nisi in societate hominis cum homine locum habere nequeunt, qualis amor, misericordia, caeteri. Sed hoc ipsum infantium item natura, quae nondum nec adultis affectibus, nec pravis moribus, falsisque opinionibus est depravata, declarat. Statim enim infantes, ubi alii aliis ignoti conveniunt, primum omnium in mutuam quamdam admirationem rapiuntur, tum in complexum ruunt, ac tandem sociale vitam instituunt; id quod esse nequit nisi a Natura, quae homini hominem conciliet. Quod si obiecto infantibus praemio individuo animis dissociantur, ac in partes diversas distrahuntur, id non inde est, quod integrum singuli obtinere velint, sed quod aequam partem, quam ubi singulis tribueris, pacati statim sunt & amici. Quod demonstrat ita singulos se suaque amare, ut aequalem aliis curam amoremque non invident, obstatum alioquin majori, quae sibi nocere possit.

§. IV.

§.IV.*Prop.3.* Totum ergo genus humanum unum est veluti corpus, ejus singuli membra sunt, una civitas, ejus singuli cives, Deus vero imperator supremus. Nam & in mutuam societatem facti sunt; & in eundem finem destinati, & communium vitae humanae utilitatum gnari, & similibus propensionibus, viribus, habitudinibus instructi, & ita tandem comparati, ut alii ab aliis segreges vitam agere nequeant, nisi miseram, sibi que nocere plurimum possint; conjuncti vero possint sibi prodesse plurimum, ac esse beati. Nam quo ego altero argumento conficiam, plures lapides ad eundem fornitem spectare, aut plura membra ad idem corpus, nisi quia video, iis ea esse figuris conformata, ut & in unum coire possint, & natura sua exigant, & separata inutilia, conjuncta tandem aliquid esse?

§.V.*Prop.4.* Tota haec Civitas quum ad communem, tum ad singulorum felicitatem constituta est. Nam & hanc felicitatem singuli natura ipsa & necessario appetunt, & conferre ad eam plurimum possunt, ubi in mutuam opem & vitam conspiraverint. Quare falluntur profecto ii, qui in mutuo bello homines nasci putant, idest in mutuam perniciem a natura armari: id enim si esset non in mutuam societatem homines generarentur, quae in communi omnium cum omnibus bello esse nulla potest.

§.VI.*Prop.5.* Haec ita esse a Deo constituta, dubitare non possumus: nam leges, quibus systema mundanum compactum est & regitur, a Deo sunt, ut ex superioribus constat. Itaque huic ordini & nos consentaneam vitam agere debemus, ne supremo Dei imperio adversemur, frustra que nitendo nihil aliud, nisi nostram miseriam nobis consciscamus. Nam quid aliud agit, qui naturae adversatur? Hoc ergo summi Imperatoris imperium lubenter agnoscere debemus, eique laeti parere. Et quamquam ad id ipsum nostra quoque natura & utilitate rapimur, confert tamen & plurimum ad id incitari etiam reverentia Principis ipsius:

ipſius : quandoquidem fieri non poteſt , ut qui Civitatis alicujus Principem nec reveretur nec amet, communia Civitatis jura ſervet .

§.VII.*Prop.6.* Debemus Deo primam & maximam amicitiam, ſed eam, quae praeſtanda eſt ſupremo omnium domino, benefactori liberaliſſimo, providentiſſimo gubernatori, patri amantiſſimo. Nam Deus & ſupremus dominus eſt, & benefactor, & gubernator, & pater. Quare quum ab eo tantum ſumus quidquid ſumus, ejus tantum vi conſervemur, ab eo tantum plenam beatitudinem ſperemus, nihil prius neque majus habere poſſumus, quod amemus, & quatenus ſcimus, & poſſumus colamus. Enimvero cui alteri iſe eſſe poterit amicus, qui Deo non ſit? Nam nemo alius eſt in quo plures & majores ſint rationes, quamobrem cum eo perfectam amicitiam habeamus, & pervigilantiſſime cuſtodiamus. Naturae igitur ordini & rerum relationibus adverſatur, qui Dei amicitiae & cultui quidquam aliud anteponit, iſdeſt legi ipſi naturae primariae, quae rerum ordinem ſacrum tectum ſervandum jubet.

§.VIII.*Prop.7.* Quilibet homo ſtudere debet, ut poſſit eſſe ſibi amicus, & ſibi amicus omnino eſſe debet. Nam quilibet homo ad beatitudinem a natura gignitur; ergo quilibet a natura ipſa incitatur & ut ſit, & ut bene beateque ſit, quae ſunt duae primae ac maximae naturae humanae propenſiones ingentiae & communes. Ut autem ſit, ac bene beateque ſit, in id ſe comparare perpetuo debet, ut ſe conſervet, ac excolendo perficiat. Perſcit autem ſe quiſque iis habitibus, quibus privata, publicaue vita tranquilla & beata efficitur. Quum autem eae ſint virtutes; virtute ſe perficere ac beatum facere homo poteſt. Id quum efficit, amicus ſibi eſt: niſi efficiat, ne dignus quidem ſua amicitia: quippe amicitia eſſe nequit, niſi inter bonos. Itaque ſic vivere quiſque debet, ut nihil in ſe admittat, quod vereatur amico facere; nihil omittat, quod amicitia exigit. Distinguendum igitur eſt inter hanc, de qua loquimur, amicitiam, & amorem,
quo

quo omnes naturaliter se amant. Est enim amor ille naturae quidem impetus; haec vero amicitia rationis & electionis. Illo rapimur in naturam conservandam; hac in virum bonum efficiendum. Quocirca quamquam nemo est, qui odisse se potest; plures tamen sunt, qui nec amice sibi vivunt, nec sunt ea amicitia digni: quandoquidem qui si ut secum, ita cum aliis vivant, jure illis inimicissimi esse videantur. Hinc ego omnia hominis adversus seipsum officia deduco. Quumque hanc amicitiam natura ipsa praecipiat, ut demonstravi; ea quoque omnia officia praecipit, quae inde consequuntur.

§. IX. *Prop.* 8. Ex jure naturae omnes homines mutuam sibi debent amicitiam. Primum amicitia inter aequales est, & homines omnes natura aequales nascuntur; ergo in naturali alii erga alios amicitia, quam adulti non delere, nec foedare, sed fovere debent, si secundum naturam vivere volunt. Deinde omnes homines in mutuam societatem generantur, quae sine mutua amicitia vera esse nequit. Tum sibi debent amicitiam; ergo sibi debent ut sint viri boni; inter bonos vero natura ipsa communis amicitia est. Tandem in mutuam felicitatem conspirare debent, quae sine mutua amicitia obtineri nequit. Ac vero pone omnes sibi mutuo esse amicos, erunt omnes viri boni, omnesque beati: nam quae vitam humanam misere miseram faciunt, ea sunt mala, quae aut nostra nobis ignorantia, vel malitia procreat, aut alii aliis inimicissime inferimus. Quae a natura sunt, nec mala sunt, ut ego alias demonstravi, & quam paucissima sunt. Pone item omnes sibi mutuo esse inimicos & infestos, quid vita humana turpius ac miserius? Quocirca si natura ipsa rerum nostri felicitatem exigere videtur, & eam appetimus omnes; eaque habetur, ubi omnes omnibus amici fuerint, determinatur, ubi alii aliis mutuo sint infesti; haec erit verum praesentis vitae tranquillitatis adipiscendae medium, illudque propterea natura ipsa praeceptum.

Qua vero ratione ex reciproca ac omnium cum omnibus amicitia officia hominis adversus homines contrivari possint, id non est hujus loci.

§. X. Ac officia hominum ab his principiis, quae suapte natura clara sunt, derivari facile possunt. Sed illud animadvertendum est, quae actiones humanae jure naturae reguntur, non omnes eodem modo regi. Nam sunt quas *abscisse* lex naturae praecipit, aut prohibet: sunt quas *relative* tantum: sunt item quas suadet, aut dissuadet: tandem quas permittit. Alteri injuriam facere praecise & absolute prohibet, ut nullo casu liceat. Nuptias inter fratres & sorores *relative* tantum, ut tales supervenire causae possint, quibus liceant, veluti si ad fratrem & sororem genus humanum referatur totum, ut quum homines esse coepere. E duobus bonis melius eligere suadet, non praecipit. Nuptias adulto humano genere singulis non praecipit, sed permittit. Haec philosophus accurate perpendere debet, ut scilicet quoto gradu honestatis vel turpitudinis actio sit discernere possit.

§. XI. Illud difficile definitum videtur, quae regulae servandae sint, ut id dignoscatur. Ego ad sequentes confero.

I. Quae cum amicitia Deo, nobis, aliis debita e diametro pugnant, *abscisse* jure naturae vetantur. Nam eam amicitiam absolute naturae lex praecipit.

II. Quae talia sunt, ut sine iis amicitia illa consistere nequeat, lex naturae praecipit *absolute*. Ratio est eadem.

III. Quae hanc amicitiam intensiorem & perfectiorem efficere apta sunt, sed omissa non dirimunt, lex naturae suadet. Nam sine illis legis naturalis finis obrineri potest.

IV. Ea, quae talia sunt, ut si adsint amicitiam quidem illam non dirimunt, sed non sinunt esse plenam & perfectam, lex naturae dissuadet. Ex eadem ratione.

V. Ea quae seu omittantur seu fiant, amicitiae illi

illi nec derogatur quidquam, nec additur, permittit naturali libertati. Nam ea sunt extra finem legis.

VI. Quae generatim considerata amicitiam istam laedere comparata sunt, sed in quibusdam circumstantiis posita malignitatem illam deponunt, *relative* verat.

VII. Quae ad amicitiam servandam generatim quidem sunt necessaria, sed quorum in tempore, aut loco, necessitas cessat, *relative* praecipit.

C A P U T XIII.

Ashley Syckes de lege Naturae Systema.

§. I. **I**Nter eos ac quidem inter primos, qui nostro hoc saeculo ad legem naturae explicandam magno ingenio sunt aggressi, facile ego collocaverim Wollastonum. Hic in eo opere, quod haud dudum adversus Atheos & Deistas scripsit [a], penitissime legis naturalis indolem, atque usum & vim expedit. Wollastoni doctrinam paucis complexus est Ashley Syckes (b) ac nonnullis additamentis illustravit. Utriusque igitur nos cogitata exponemus. Ac Syckes alia quidem ratione exorditur, quam qua ego referam; quippe qui a regula ipsa humanarum actionum initium facit, mox humanam libertatem, atque existentiam supremi Numinis demonstrat. Sed ego lestoris utilitati consulam, dum inde ejus systema enarrare suscipio, quod ille postremam ejus partem facit. Ita & intelligitur facilius, & cohaerebit arctius.

§. II. Hominem inter agentia libera esse connumerandum iis argumentis demonstrat Syckes, quibus

F 4

nulla

(a) *Ebauche de la Religion naturelle.*

[b] *Examen des Fondemens, & de la connexion de la Religion Naturelle & revelee.*

nulla esse possunt evidentiora . Est enim homo indifferens ad varios habitus : nihil exploratius esse potest inter homines : nam & nullis habitibus informati nascimur : & paulatim plures ac diversos induimus : & obliteramus alios , alios fovemus , totique in diem , quum volumus , mutamur . Persentiscit quisque intimus , se natum aptum cum variis animi disciplinis excipiendis , tum etiam pluribus ac diversis habitibus moralibus , virtutum , aut vitiorum , ac postremo habitibus corporis . Totum hoc , quidquid sumus , quod ad hujusmodi modificationes pertinet , sumus , quia volumus ; nec volumus , nisi quia & intelligimus , quod volumus , & quod intelligimus ac volumus , possumus . Praeterea his habitibus & viribus ita utimur , ut quandoque parte virium agamus majori , vel minori , quandoque totis . Est igitur cum ratione nostra conjunctissima agendi , atque nos pluribus & diversis modis determinandi potentia . Haec libertas est . Itaque in iis entibus , in quibus nec ratio est , nec libertas , nulla quoque hujusmodi inest indifferentia , sed necessario eodemque modo semper agunt . Id quod demonstrat potentiam nos habere ad plura & diversa determinandi (a) .

§. III. Porro qui tali libertate est praeditus , ut & plura ac diversa intelligere possit , & in varias partes sese determinare , is nisi ex regula certa & immutabili actiones suas componat , necesse est ut perpetuo aberret ab eo fine , quo natura ipsa pergit , totaque vita perturbetur . Inquiramus ergo , sit , nec ne , ulla hujusmodi in Natura certa ac constans regula , qua homines actiones suas rite conformare possint . debeantque , & ut sint , & ut , quoad humana natura patitur , beati sint . Nulla in terris gens est tam moribus efferata , in qua iusti & iniusti , boni & mali moralis non sit aliquis naturalis sensus , non secus atq; volupta-

(a) *Cap. I.*

luptatis & doloris, aliquae ejus boni & mali notiones, ac postremo vocabula, quibus eae exprimi solent. Inter omnes gentes, etiam barbaras, laudari quaedam actiones solent ut justae & bonae, quaedam aliae vituperari: sunt sui ubique heroes, virtuosi, boni: sunt scelerati, improbi: itaque poenae ubique & praemia. Unde autem id proficisci dicemus, nisi ex insita omnibus hominibus justitiae & injustitiae, boni & mali regula? Insitam autem dico, quod statim, ac quis adolevit, atque ratione uti coepit, nullo alio magistro, nisi rerum ipsa natura, hujusmodi regula informetur. Est certe hoc argumentum apodicticon. Nisi enim omnibus hominibus certa quaedam ac constans regula animo esset informata, ad quam, velut ad amussim, eas actiones referrent, quas laudant aut vituperant, bonas aut malas praedicant, quid illi hujusmodi vocibus significare vellent? Velle autem aliquid significare, non vero inania vocabula effutire, inde ego conjicio necessario, quod ad hujusmodi vocabula commoventur, atque affectibus agitentur, id quod in illis minime contingere solet, qui vocabula sine mente projiciunt. Agitari animus nequit nisi notionibus boni aut mali, quod per se est perspicuum. Insidet ergo atque infixae est hominum omnium ratione utentium mentibus boni ac mali, honesti & turpis, justitiae & injustitiae notio ac regula, etsi non in omnibus peraeque clare ac distincte, nec in omnibus aequae expedita ac prompta, sed in singulis pro cujusque cultura, exercitio, vitae commercio (a). Inde sensus ille naturalis boni & mali, justitiae, & injustitiae.

§. IV. Constat igitur, omnes homines regula quadam uti non solum dum de aliorum actionibus judicant, verumetiam quum ipsi agunt. Hanc regulam omnes conseruant, aut saltem sequi se arbitrantur. Ac quod aberrant ab ea plerumque, id non fit, quia nul-

(a) *Cap. I.*

nullam habent, sed quia aut affectibus perturbati, aut rerum ignorantia impediti, totam ejus extensionem & usum non semper pervident, nec semper ita instructi sunt, ut in singulis actionibus adhibere illam sciant. Id quod contingit etiam in caeteris artibus ferme omnibus, quarum nullus tam peritus unquam est, ut ei non incidant saepe casus, in quibus aut haereat animi dubius, aut etiam ab artis regula aberraret. Id quod multo etiam difficilius est in morum ac vitae civilis arte, ob multiplicem & pene infinitam rerum atque actionum copiam, & varietatem. Sed haec ipsa rerum prope infinita multitudo & varietas, relationum multiplicitas, ac propterea diversitas actionum pro locis, temporibus, personis, satis demonstrat id, quod diximus, haerere hominum animis certam ac constantem vitae, & morum normam. Nam in tanta hac varietate nemo ullus reperietur, qui dum agit quidpiam, aut de aliorum actionibus judicat, id quod efficiunt quotidie omnes, non regulam aliquam confectetur. Ejus rei homines item omnes doctores: omnes enim judiciorum, aut actionum suarum ex illa regula rationes proferunt. Ipsi sceleratissimi mortalium si crucientur, ut scelerum suorum causas & rationes afferant, ex illa norma afferre conantur: ut etiam quum in usu errant, demonstrent se aliquam habere regulam, ex qua velint judicari. Quocirca non id inquirendum est, insit ne in hominibus justae & honestae regula, quum id omnes perpetuo praeseferant; sed illud potius, quae haec sit, quam vim habeat, & a quo: quod hunc in modum expedire conatur Syckes.

§. V. Rerum haec universitas, cujus exigua homines sunt pars, ita constructa est ac temperata, ut nos cum singulis ferme rebus, quae nos circumambiunt, relationem aliquam habeamus naturalem, ut caeterae cum caeteris. Hujusmodi relationibus mundanus ordo, ejusque pulchritudo continetur. Turbari ergo eae nequeunt, quin ordo iste turbetur. Ac
quem.

quemadmodum totius universi ordo, pulchritudo, & aequalitas ex conservatione ac constantia hujusmodi relationum pendet; ita ordo, aequalitas, ac ipsa denique vitae humanae tranquillitas & beatitudo ab iis relationibus tota est, quas cum rebus, quae nos ambiunt, antecedunt, consequuntur, comitantur, habemus. Qui hujusmodi relationes & circumspicit acute, & sanctas tectas servat, nullaue in parte aut violat, aut praeterit, is omnium hominum beatissimus est: minus beatus, qui aut ignorat quandoque, aut negligit, aut videns prudens violat: ut miserrimus, qui, contra quam Natura fert, perpetuo iis adversatur, velut qui cum adverso flumine colluctatur; aut qui pro veris hominum aut inter sese, aut cum aliis rebus, relationibus, falsas ipse comminiscitur, iisque velut veris obtemperat. Rerum has relationes *veritatem realem* appellant Wollaston & Syckes. Hanc veritatem, ajunt, quilibet, qui nec sensibus, ne ratione sit destitutus, ipse per se animadvertere, & intelligere potest. Sunt enim res, cum quibus has habemus relationes, in propatulo omnibus expositae: natura quoque ipsa earum relationum nos admonet: nam & nos inde affectibus concitat, & tranquillitatem, atque ingentes voluptates in iis procreat, qui secundum naturam vivunt; & perturbationem, aegritudinem, dolores vehementissimos in iis, qui cum natura pugnare instituunt. Ergo & ex rerum ipsarum contemplatione, & ex usu atque commercio vitae hoc in nobis ingeneratur decretum, *oportere rerum naturam sequi*, idest, ut philosophi isti loquuntur, *veritatem realem*.

§. VI. Haec illa regula est, quam omnes homines a natura ipsa discunt, quamque sequi profitentur. Inde bonos aut malos praedicant, quoscumque praedicant. Ea regula informata ratio leges civiles populis dictavit. Quid enim aliud sunt civiles leges, quam peculiares regulae, quibus homines instituuntur, ut ex norma naturae vivant, seu ut rerum relationes, quas natura posuit, idest *veritatem realem*, sectentur?

Nem-

Nempe ut doceantur, quid singulorum expetat natura, ut sint, & bene sint : quid singuli a singulis : quid Principes a subditis, subditi a Principibus : quid cives ab exteris : quid parentes a liberis, liberi a parentibus : quid denique in omni hominum genere ac statu. Porro quid homines a rebus aliis, quae in Tellure gignuntur, aut sunt ; quid a rerum omnium opifice ac Imperatore Deo, ab his Deus. Plures fuere olim, antequam leges illae describerentur, plures quoque hodie sunt nationes, quibus non alia vitae ac morum lex. Nec eas memoro tantum, quae nullo imperio civili continentur, sed earum quoque multas, quae a Principibus reguntur, ut omnes ferme Americanae, plerumque Africanae & Asianae, quod saepe observatum viatoribus (a). Veritas igitur realis naturalis illa est ac insita omnibus vitae & morum regula prima & suprema.

§. VII. Sed haec regula est, ne etiam lex ? Legis partes duae, *decretum*, & *obligatio*. Neque enim decreta, si obligatio desit, vim ac naturam legis obtinebunt, id quod in theoreticis Philosophorum dogmatibus, quorum nulla sit vis ad nos permovendos, seu obligandos, quod perinde est, observare possumus. Ac natura quidem, ut demonstratum est, decreta vitae, & morum in omnibus ingenerat, dum & rerum relationes naturales docet, & singulos ita instituit, ut ex iis quum sciant, tum possint vivere. Sed an etiam obligat ? An singulos ita agit, ut ex iis vivere, ac agere oportere sentiant ? Indit ne singulis ad hanc veritatem consecutandam stimulos ? Obligat tandem ? Obligat profecto. Nam ita singuli homines natura ipsa comparati sunt, ut naturam ducem sectantes bene sint & beati ; ei reluctantes miseri. Decreta igitur

(a) Vid. *Récueil des voyages, qui ont servi à l'établissement & aux progrès de la compagnie des Indes Orientales*.

igitur hujusmodi, quae ex rerum relationibus Natura in nobis imprimit, cum potentissimis motivis ad agendum, vel cessandum sunt conjuncta. Quem enim non moveat voluptas, aut dolor, beatitudo, aut miseria? Quae si cum observatione, aut violatione eorum decretorum sunt connexa, procul dubio intimam habent obligationem. Stimulos atque calcaria, quibus nos impellant, secum ipsa deferunt. Sectatoribus tranquillitatem, & beatitudinem non ostendunt modo, sed revera praestant perduellibus miseriam. Accedit quod nescio quae alia vis, quam distincte intelligere & explicare nequeamus, singulis intrinseca haec decreta comitatur. Ita profecto est. Rerum natura non solum quemque hominem docet justum & injustum, honestum, & turpe, sed ita etiam afficit, ut honesti, & justii notiones mirifice nos delectent: injusti vero & turpis turbent, & infelicitent. Est ergo haec vitae & morum regula obligatoria. Eam obligationem qui minime sentiat, is ratione & sensu humano destitutus sit, necesse est.

§. VIII. Sed haec, quae intrinseca est obligatio, minime ea ad perfectam legem constituendam satis esse potest. Tangitur quidem ea obligatione, & promoveretur natura humana: sed postquam experimenta nos docuerunt, plures esse, qui aut hanc obligationem non semper animadvertant, aut vehementibus affectibus perciti ei reluctentur, aut pravis habitibus corrupti ab ea transversum agantur; nisi vehementioribus stimulis agamur, parum profecto momenti, aut saltem non tantum, quantum necesse est, ad nos plene determinandos, habebit haec obligatio. Itaque tum perfectior erit, & vehementior, quum accedent extrinsecus graves etiam minae, aut ingentia praemia. Nemo enim dubitabit, quin si supremus quidam totius naturae imperator ad hanc regulam sectandam nos aut poenis propositis impellat, aut praemiis alliciat ingentibus, plena sit & perfecta hujusmodi

modi obligatio. In id igitur modo inquit Sykes (a). Sit ne ullus supremus totius naturae opifex atque imperator. Paucis ille hanc rem totam absolvit: nam quoniam rerum generationes & series sunt, eaeque neque ex nihilo esse possunt, neque sine prima; est profecto prima rerum omnium Causa, eaque intelligentissima, potentissima, libera. Hic Deus est: hic summus naturae & optimus Imperator. Eum nemo est, qui aut ignoret, quando certum est facilius repertum iri nationem sine Sole, quam sine Deo, & Religione, quod Plutarchus eleganter dixit; aut possit ignorare, qui oculos habeat & rationem. Quoniam ergo constat inter omnes, & Deum esse, & ab eo naturae ordinem constitutum; quis ignorare queat, hanc esse supremi hujus Imperatoris voluntatem, ut hic naturae ordo, seu, quod tantundem est, haec *veritas realis* integra servetur? Ac si id constat, ne in dubium quidem vocari potest, hujus voluntatis transgressores poenis divinis esse obnoxios. Dei igitur idea, ejusque supremi Imperii cum veritate illa reali connexa vim procul dubio habebit maximam ad homines sui officii commovendos. Erit haec extrinseca obligatio, eaque plena & perfecta, quam ii possunt ignorare, qui una opera ignorent, aut Deum esse, aut universalitatis curam gerere, aut positi rerum ordinis, qui ex aeterna & immutabili ejus ratione proficiscitur, acerrimum esse custodem. Veritas igitur realis utraque illa obligatione corroborata perfecta lex est. Et naturalis quidem lex est, quia ab ipsa rerum natura in singulis hominibus imprimitur: & divina, quia a Deo naturae ordo est, & servatur: & aeterna, quia secundum aeternam Dei rationem est.

§. IX. Interim quoniam nimis ampla rerum natura est, ut plene possit a mente humana comprehendi, hominesque ipsi finiti, ut facile possint a peculia-

culiaribus quibusdam rebus trahi, iisque mancipari; nihil contingere facilius potest, ac saepius, quam ut homines aut huiusmodi legem non semper prae oculis habeant, aut totam ejus extensionem non pervideant, aut etiam a peculiaribus objectis rapti ejus desertores fiant. Quare factum est, ut Deus eandem hanc legem nova via ac ratione promulgaverit, deduxerit latius, novis motivis, novaque vi instruxerit, quo omnibus modis humanae felicitati consuleret, vim interea naturae, & libertati nostrae nullam inferret. Est haec via revelationis, de qua Auctor deinceps ex instituto disserit. Ejus vim, & utilitatem explicat: existentiam demonstrat: sed necessitatem elevat, in quo mirum est virum caetera perspicacissimum non vidisse, se cum tota ratione pugnare. Sic enim ille existimat, revelationem esse quidem utilem, atque maximas ex ea, & plures commoditates in genus humanum derivari: minime tamen necessariam. quod lex illa atque religio naturae sit sufficiens. In quo ille nec humani intellectus vires, nec potentiam naturae humanae satis perpendit. Sed non est opus hoc in loco repetere, quae sunt a nobis alias copiose demonstrata. Admonuisse tantum lectores, ne ejus viri doctrina transversum agantur, hoc in loco satis existimavi.

C A P U T XIV.

*Christiani VVolfii atque Henrici Koehleri de principio
legum naturalium uno & adaequato doctrina
exhibetur.*

§. I. **M**E quoque poenitet in his rebus, quae ad hominum mores efformandos pertinent, quaeque omnibus in medio esse positae debent, nimis esse & longum & metaphysicum. Sed quoniam suscepimus magnorum virorum super legibus naturae sententias recitare, efficere non potuimus, ut Christia-

stianum Wolsium praetermitteremus, cujus tanta sunt in Philosophiam merita, utut ille nimius est in iis omnibus quae quoquo modo attingit, non subtilis modo, sed minutus, & prolixus. Nos studebimus minus esse enigmaticos, quam hujus sectae alumni esse solent: sic enim habeo, plura esse in Leibnitiana & Wolsiniana philosophia penitus vulgaria, quae quoniam novis inconditisque vocabulis ab Auctoribus suis sunt involuta magis, quam explicata, nova minus attentis videri possunt. Sed & habent Philosophi isti id praeter reliquis proprium, ut humanas omnes notiones, etiam eas, quas communis probavit sensus, quaeque suapte natura clarae sunt & distinctae, evolvant, minutatim secent, ut ad simplicissimas adducant, id quod nec necessarium semper est, & plurimam rebus quandoque obscuritatem offundit. Henricus Koehlerus in opere de *jure naturae in primis cogente*, quod edidit Francofurti ad Moenum anno 1738. Wolsii doctrinam in justum systema retulit, sed iisdem ambagibus intricatam. Inde nos haec more nostro extricata paullo & exarsciata dabimus.

§. 2. Quoniam eas naturae leges perquirimus, quibus convenienter hominem vivere oportet, qui velit beate vivere, hominis ipsius naturam omnium primum noscere debemus, si eas intelligere amamus: ex hominis enim natura, cui efformandae & moderandae inserviunt, sunt hujusmodi leges eruendae; quas idcirco is ignoret necesse est, cui minus hominis natura est perspecta. Quo modo leges, quibus horologia conserventur, & fini suo apte convenienterque serviant, scire nequit, cui hujusmodi machinarum structura ac natura ignota fuerit. A natura igitur humana Koehlerus juris naturae tractationem auspiciatur.

§. 3. Constat autem natura humana duabus iisque inter se valde quam diversis, conjectissimis tamen, mentis & corporis. Quum ex genio Metaphysicorum natura entium in eorum *activitate* aut *agendi conatu* posita sit; corporis quidem natura in ejus *vi motrice*,
ani-

animi vero in *vi intellectrice* erit collocanda. Sed hoc etiam plurimum anima a corpore distat, quod in hoc *natura* ab *essentia* distingui potest, quum in illa una eademque res fiat. Corporis *essentia* in ejus *structura & inertia* philosophi isti constituunt (a), quae est ab agendi conatu diversa: Avis illa *intellectrix* mentis est & *natura & essentia*. His interea omnibus conflatur homo. Quare ut hominis *natura* intelligatur utraque illa accurate est pervestiganda, mentis scilicet, & corporis *natura* atque *essentia*.

§. 4. Anima sui conscia est, percipit, cogitat rerum sibi notiones efformat, sentit, imaginatur, fingit, attendit, reflectit, abstrahit, & notiones conficit genericas, experitur, judicat, demonstrat, a cognitis ad incognita progreditur, similitudines rerum velociter observat, nexum possibilem perspicit, voluptatem, taedium, dolorem persentiscit, appetit, avertatur, vult, non vult, mavult. Ea omnia ab ejus *essentia & naturae* fluunt: itaque ei sunt *naturalia*. Eadem autem ratione corporis *naturalia* dicimus ea omnia, quae ab ejus *natura & essentia* proficiscuntur. Quum autem hominis *natura* ex utraque conflata sit, animi scilicet & corporis; inde intelligitur, quae sint hominis *naturalia*, ac proinde quid sit, *hominem congruenter naturae vivere*; nempe secundum haec omnia, quae sibi sunt *naturalia*, vitam agere (b).

§. 5. Eae propositiones genericae, quibus plura & varia aut coexistentia, aut successiva aptantur, ut similiter aut sint, aut fiant, regulae, normae, leges dicuntur (c). Ita regulas aut leges motus vocant Physici eas propositiones genericas, secundum quas *naturales* corporum motus fiunt. Quum autem sit exploratum & certum, omnes mutationes animi & corporis,

Tom. IV.

G

ideft

(a) §. 243.

(b) §. 241.

(c) §. 244.

ideſt naturae humanae, ſecundum conſtitutas a natura regulas fieri; erunt huiusmodi regulae naturae humanae leges, ei inſitae, ideſt naturales. Iis convenienter vivere eſt ſecundum naturalia humanae naturae vivere, ac proinde naturae congruenter (a).

§. 6. Sed quum naturae animi & corporis, licet inter ſe arctiſſime conjunctae, diverſae tamen ſint; ſit ut animi naturales leges ſint a legibus corporis naturalibus diverſae. Ac illas quidem Logico-Morales, has Mechanicas appellat: illae mentis, hae corporis naturam modificant & moderantur. Utriſque igitur convenienter vivere eſt naturae conſentaneae vivere: nam & utraeque inſitae ſunt ac naturales, & utriſque humana natura conſervatur & regitur (b).

§. 7. Jam & totam illam hominis naturam bipartiri neceſſe eſt: eſt enim altera *animalis*, *rationalis* altera. Ac ad primam pertinent ſenſationes, phantasia, aſſociatio imaginum & affectuum, memoria, analogia quaedam rationis, appetitus ſenſitivus, affectus, inſtinctus & ſtimuli naturales, ſpontaneitas (c): Ad alteram vero actus reflectendi, comparandi, viſ ideas genericas efformandi, judicandi, ratiocinandi, experiundi, demonſtrandi, intellectus, ratio, libertas, voluntas (d). Ergo leges naturae humanae naturales aliae homini cum brutis communes erunt, eae nimirum, quae ejus naturam animaleſ continent; aliae homini propriae, quae ſcilicet ad naturam rationalem ſpectant. Quare iterum ſit, ut ſecundum utraſque vivere ſit vivere naturae humanae convenienter.

§. 8. Perſpicua ſunt haec. Illud nunc perquirendum eſt, obligemur, nec ne, ita vivere, & quatenus,

(a) §. 280.

(b) §. 275.

(c) §. 281.

(d) §. 282.

nus, ac qua ratione. Nam quoniam liberi sumus, in eo, quod est convenienter naturae vivere, multipliciter peccare possumus, nisi ita libertas nostra determinetur, ut & sciat, & velit recte cum natura vivere, ne scilicet impellat illam ultra, quam par est, nec plus quam aequum est, cohibeat, nec turbet. Est obligatio connexio motivorum voluntatem ad quidpiam agendum vel omittendum inflectere aptorum cum actionibus ipsis, aut omissionibus (a). Ea motiva esse possunt voluptates, aut dolores, adeoque praemia, aut poenae. Itaque illud quaeritur, sintne ulla huiusmodi motiva, quibus obligemur ad naturam nostram hac, aut illa ratione, haecenus, & non ultra, sectandam? Sed in duplici classe posita esse possunt ea motiva: nam aut a natura ipsa sunt, aut a libera voluntate supremi cuiusdam Naturae principis. Illa *instam* & *naturalem* obligationem constituunt, haec *externam*, & ut vocant, *positivam*. In utramque nunc inquirendum est.

§. 9. Obligationis nomine, quemadmodum dictum est, ea motiva intelliguntur, quae flectere voluntatem queant ad agendum, aut omittendum. Ea autem est humana natura, ut dolore, & voluptate impellatur, aut cohibeatur; obligatio ergo dolore & voluptate continetur. Nascitur in nobis voluptas ex conscientia nostrarum perfectionum, dolor ex conscientia imperfectionum; non solum ergo praesens nostri perfectio, aut imperfectio, verum etiam spes futurae perfectionis, aut imperfectio futurae metus, motiva sunt naturae nostrae permovendae apta. Quare eae genericae propositiones, secundum quas ubi naturae convenienter vivimus perfectionem nostram efficimus, quibus ubi adversamur nos efficimus imperfectiones, erunt non solum regulae & normae vitae humanae, verum etiam leges

G 2

obli-

(a) §. 300.

obligatoriae : ac si & ex ipsa nostri natura intelligantur, & secum ipsae naturaliter eam adnexam habeant obligationem, erunt naturae ipsius leges & intrinsecus obligantes.

§. 10. Observamus perpetuo ex liberis nostris actionibus ; aut omissionibus, plurima consequi naturae nostrae adversa, aut consentanea, & quidem in ipsis actionibus aut omissionibus nostris sui habentia rationem sufficientem. Quum autem quae naturae nostrae sunt consentanea ea nos perficiant ; quae adversa, aut deteriores faciant, aut destruant ; & quae nos perficiunt *bona*, quae aut deteriores faciunt, aut destrunt sint *mala* ; conficitur, plurima bona, aut mala ex liberis nostris actionibus nobis obvenire posse. Obligat vero nos natura ipsa nostra, & intrinsecus ad mala vitanda, sectanda bona ; quia illa imperfectiores nos efficientia dolorem ingenerant ; haec perfectiones, creant voluptatem ; ergo eadem natura nos intrinsecus quoque obligat ad eas actiones edendas, ex quibus bona nobis obtingunt ; vitandas vero eas, ex quibus mala nascuntur.

§. 11. Hinc autem fit, ut libertas humana non ita sibi relicta sit, ut possint ei licere omnia, ad quae peringere potest, sed natura intra quosdam terminos ejus coercetur licentia, idest naturali obligatione tenetur, naturae obligatione regitur. Quare si quae sit generalis regula, qua intelligere possimus, ad quae nos Natura obliget, seu quae sint nostri bona, quae mala, ea lex naturae generica erit. Nam ea & docebit quae agenda, aut omittenda, & ad ea agenda aut omittenda naturali sanctione doloris & voluptatis impeller, idest obligabit.

§. 12. Quoniam demonstratum est, Naturam insita & naturali sanctione nos obligare ad ea efficienda, quae nos perficiunt, vitanda vero, quae nos imperfectiores reddunt ; efficitur inde haec generalis regula : *Quae te statumque tuum perfectiorem efficiunt, facito : ea autem, quae te statumque tuum reddunt im-*
per-

perfectiorem, caveto (a). Est haec naturalis regula, quia e natura ipsa nostra & naturaliter depromitur : cum naturali sanctione conjuncta est, quia qui ea efficit, quae se statumque suum faciunt imperfectiorem, statim dolore, & miseria punitur : contra voluptate, is & affluentissime donatur, qui ea & curat & efficit, quae se statumque suum perfectiorem efficiunt. Quare est generica naturae lex quae praecipit ea, quae agenda sunt, vetatque contraria.

§. 13. Neque vero conquisitis argumentis indigemus ut eam regulam intelligamus : est ea omnibus insita : natura agitatur, ut ea persequamur quae voluptatem & felicitatem, aversemur vero, quae dolorem & miseriam adducunt. Quamobrem videri potest supervacaneus totus ille rerum apparatus, quo Wolfius, atque hinc Koehlerus eam rem demonstratum eunt. Illud potius diligentior operam postulat, quae sint ea, quae nos perficiunt, quae natura ipsa sunt sectanda, quae vero quae imperfectiores faciunt. Haec nisi in classes quasdam item genericas conferamus, erit superior illa lex inutilis : est enim generalior, quam ut ab omnibus peculiaribus actionibus facile aptari possit. Quocirca videamus quemadmodum id isti efficiunt.

§. 14. Quoniam duplici, ut dictum est, homo natura constat, corporis & animi, item animali, & rationali, danda est opera ut utraque & conservetur, & perficiatur, si sanctioni illi naturali parere velimus. Quoniam autem quae naturam nostram conservant & perficiunt procreant voluptatem, laetitiam, animi tranquillitatem, sanitatem, felicitatem denique eam, quae quamdiu hic sumus haberi a nobis potest ; quae vero aut deteriore efficiunt, aut destruunt, dolorem, aegritudinem, perturbationes, morbos, tandem miseriam ; erunt haec totidem tesserae agendorum, aut

omittendorum ex naturali sanctione. Itaque inde intelligere possumus, agenda esse aut omittenda ex naturae imperio; quae acta, aut omissa, voluptatem, laetitiam, animi tranquillitatem, sanitatem important: neque enim tantum Natura cum iis praemium copulat, nisi ut nos ad agendum, aut omittendum impellat. Cui quoniam parendum est, nisi stulte cum ea pugnare velimus; erunt prima argumenta & manifesta agendorum aut omittendorum. Praeterea ne frustra quidem dolorem, aegritudinem, perturbationem, morbos, cum aliis actionibus aut omissionibus copulavit: voluit ergo inde nos ad agendum aut omittendum permovere. Erunt haec ergo altera item manifesta argumenta omissionum aut actionum, dolor, aegritudo, perturbatio, morbi, Quocirca est haec velut vox quaedam naturae cuique intima: voluptate ea & dolore loquitur, quibus quae imperat, aut vetat, clare illa quidem & ex aequo omnibus manifestat.

§. 15. Itane vero, inquit aliquis, brutorum animalium lege vivemus? est enim ea sola & tota animalium brutorum regula: ultra illam nec sciunt quidquam, nec agunt. Non recte. Non alia animalia bruta uti regula, nec cis aut ultra illam efficere, id est in perspicuis: sed naturae magis impetu, quam ulla ratione ad eam sectandam impelluntur. Nos ut bruta legem illam natura ipsa persentimus: impetu quoque, ut illa, animali in illam rapimur. Quid enim juvat naturam dissimulare? Sed ratione, & libertate moderari possumus, & debemus, qua re illa carent. Quamobrem tum demum ea lex a mechanicis ad rationem revocabitur, si ex ratione, non ex bruto tantum impetu, sectabimur. Quaeris, qua in re hic circa eam rationis usus positus sit? Nempe in hoc, ut non ex praesenti tantum voluptate, aut dolore de naturae voluntate judicemus, sed ex summa totius vitae dolorum, aut voluptatum, atque ex ejus summae cum felicitate aut miseria connexionem: Nam vitae humanae felicitas ex summa totius vitae voluptatum
aestis,

aestimanda est, ut miseria ex summa dolorum totius vitae. Itaque usum superioris legis sequentes regulae efficient rectum.

§. 16. Minus bonum est vel. unum malum majori bono comparatum. Quum autem natura nos obliget ad bona sectanda, fugienda vero mala, sit ut ex eodem naturae imperio fugienda sint ea bona, quae nos majoribus privant; ac propterea averfandae eae voluptates, quae majores impediunt: sunt enim minores voluptates, quibus majores impediuntur, veri mali testifera.

§. 17. Minora mala, si conferantur cum majoribus, sunt vera bona. Quare minores dolores collati majoribus sunt boni argumentum. Obligat vero nos Natura ad bona consecranda; ergo in comparatione minoris cum majori malo minus eligendum imperat.

§. 18. Quae praesentia bona impediunt, quo minus summa omnium bonorum, in quo felicitas posita est, major sit & intensior, ea sunt vera mala, ac proinde ex naturae jussu fugienda. Quae vero mala praesentia efficiunt ut minor futura sit tota malorum summa, qua continetur miseria, sunt vera, eaque ex naturae imperio amplectenda.

§. 19. Malum totius est verum semper malum: malum vero partis, si ad totum conservandum aut perficiendum pertineat, verum est bonum. Ergo ex eodem naturae imperio, malum totius perpetuo cavendum: malum vero partis, si toti conservando aut perficiendo necessarium sit, complectendum.

§. 20. Si cum hujusmodi regulis lex illa generica adhibeatur, erit illa praeclara totius humanae vitae, omniumque hominum officiorum norma. Nam inde non solum quae natura nobis debemus, sentiemus, sed intelligemus quoque facillime, quae Deo, aut aliis naturalia debeamus officia. Scilicet & nos statumque nostrum conservare debere a natura discimus; & quae nos conservare, aut destruere, perficere, aut facere deteriores, voluptas, & dolor ostendunt: & quae volupta-

luptates vere conservent aut perficiant, qui vere destruant, aut imperfectiores reddant dolores, superiores quatuor regulae docent (§. 16. 17. 18. 19.). Ex quibus quum id quoque intelligatur, ad summam voluptatum nostrarum idest felicitatem, necessariam esse pietatem & religionem in Deum, iustitiam & amicitiam in ceteros homines; ex eadem illa generica lege derivari possunt officia omnia erga Deum, & proximum. Sed explicemus posteriora haec duo paulo distinctius.

§. 21. Ens necessarium existentiae & essentiae est illud, quod ita est, ut pugnet non esse, & talem habet naturam, ut pugnet aliam habere. Quaecumque autem sunt in Natura rerum sensibus aut rationi nostrae subiecta talis esse naturae reperimus, ut nec pugnet aliam habere posse, nec non esse. Quare fit ut nec necessario sint id, quod sunt, nec necessario existant. In primis autem ejus naturae est homo quod ad utramque sui partem. Contingentia ergo haec sunt omnia, ac cum iis homines quod ad utramque sui partem. Contingentia vero sine ente necessario nec esse, nec concipi possunt; alioquin sine ulla existentiae & naturae suae ratione sufficiente essent, aut conciperentur. Existit ergo ens necessarium existentiae & essentiae, a quo rerum haec Natura est. Deum hunc vocamus.

§. 22. Quum a Deo simus, ab eo quoque conservamur; qui enim necessitate naturae nostrae non sumus ne eadem quidem conservari possumus. Ergo dubitare non possumus, quin is velit nostri conservationem & perfectionem. Est autem is Supremus nostri Dominus; ergo Supremus nostri Dominus, quique possit & severè punire, & praemia magna largiri, nostri perfectionem & conservationem imperat. Non potest ergo non esse & cum hac etiam voluptate conjunctum studium nostri conservandi & perficiendi, quod id Deo supremo nostri Domino gratum sit; & cum dolore, nos deteriores efficere, quum id supremi Domini volun-

luntati adversetur. Nascitur ergo hinc nova obligatio ad nos conservandos & perficiendos. Nam quoniam obligatio voluptate, aut dolore continetur; & cum nova hac voluptate, quod Deo gratum sit, studium nos conservandi & perficiendi conjunctum sit; destructio vero aut imperfectio cum eo quoque dolore, quod Dei voluntati repugnemus; & haec altera exoritur obligatio nos conservandi, & perficiendi.

§. 23. Ex superiori propositione intelligitur, leges naturales, quibus humana regitur natura, a Dei quoque voluntate vim habere obligandi: nam & Dei voluntate ita constructa hominis est natura, & eadem lex omnium illa fundamentalis, qua nos statumque nostrum conservare & perficere nobis imperatur, sancta est. Ergo ad eas constantissime colendas duplici obligatione impellimur, naturali atque cuique insita, & externa seu positiva. Ac licet illa insita sit, & individua sectentur omnes actiones, aut omissiones nostras, minor tamen habenda est, quam externa altera & divina: quia par est credere, leges illas colentibus majora esse a Deo praemia servata, quam quae ipsa praestet natura; violentibus vero sanctas poenas longe acriores, quam ulli naturales dolores. Quumque Deus nequeat esse nisi immutabilis, idem semper volens, idem nolens, sunt praemia illa & poenae certa & immutabilia.

§. 24. Jam quum rerum hanc universitatem ad perfectionum suarum, & *gloriae suae manifestationem* fecisse Deus videatur (a); eodem quoque pertinere debent leges naturae, quum mechanicae, tum morales. Erit ergo harum legum constantia cum universi fine, idest Dei gloria, conjuncta; perturbatio & violatio ei adversa: ac vicissim cultus Dei cum Universi legibus consentaneus: contemptus illis repugnans. Nec vero quod totius Universi fini est adversum consentaneum esse potest natu-

(a) §15. & seqq. VVolf. in Theol. natural.

naturae nostrae, qui sumus universi pars; aut quod est consentaneum, esse nobis adversum. Ergo cultus Dei inter primarias naturae nostrae leges censendus est. Nam quoniam is fini totius rerum universitatis consentiense est, est & naturae nostrae, quae universi pars est, consentaneus: ad ea vero, quae naturae nostrae consentanea sunt, naturae lege obligamur. Fit itaque ut, & quia cum summa voluptatum nostrarum consentit, & quia consentit cum voluntate Dei, insita, & externa obligatione ad Dei cultum obligemur. Quare eadem illa regula naturae generica fons est officiorum etiam eorum, quae Deo debemus.

§. 25. Nec vero difficile est inde quoque officia adversus alios homines derivare. Nam quoniam ad nos statumque nostrum conservandum & perficiendum obligamur; nec in nobis habemus ea omnia, quae ad id sunt necessaria; eorumque partem magnam conferre in nos alii homines possint; nec tandem ea bonorum communio sine reciproca amicitia haberi possit; fit ut amicitia cum aliis hominibus sit ad nos statumque nostrum conservandum necessaria, ac propterea ut ad eam ita obligemur, ut ad nostri custodiam, & culturam.

§. 26. Atque haec fere sunt, quae Wolfius & Koehlerus super naturae humanae legibus docuere, nimis quidem illa abstrusa & intricata, sed vera tamen & perpulchra. Non autem oportet regulas illas, quae nimis sunt proculdubio genericae, & ab hominum usu remorae, latius diducere, quod illi, & nimis quidem prolixè, efficiunt. Nam & eorum libri in manibus sunt omnium, & non admodum difficile est philosophis nostris, qui in superioribus instituti sunt, obvenientibus speciebus aptare. Id quod ut commodius fiat, seu ex Wolfiano systemate, seu ex aliis, quae superius posuimus, de natura actionum humanarum, deque conscientia & imputatione morali paulo latius differemus.

CAPUT XV.

De natura actionum moralium, tum de conscientia & imputatione morali.

§. I. **L** Ex moralis, seu naturalis, seu positiva, eas tantum hominis actiones spectat, quae *morales & humanae* dicuntur, idest quae ab intellectu, & voluntate hominis pendent, non etiam mechanicas, quae naturae sunt animalis & corporae, quaeque libertati non subsunt, nisi *oblique*. Motus sanguinis E.G., cordis, arteriarum, alique pure mechanici, tum quae *passiones* dicuntur, seu impressiones primae in natura nostra aut ab objectis externis excitatae, aut a causis mechanicis nobis intrinsicis erumpentes, imperio libertatis nostrae minime subsunt; neque ideo sunt *actiones morales*, aut in censum *officiorum* veniunt. Dixi autem actiones quoque mechanicas *oblique* libertati posse esse subjectas, quod scilicet plurima possit circa eas libertas nostra, seu agendo, seu omittendo. Ceterum tunc non illae propriae legi morali subjiuntur, sed potius eae voluntariae actiones, aut omissiones, quas circa illas agimus, aut omittimus. Ita respiratio, qua vivimus mechanica est, quae si a causis item mechanicis impediatur, ita ut hominis mors sequatur, nihil est ea in re, quod crimini verti possit: contra si voluntarie spiritum cohibeamus, ut emoriamur, nostri sumus homicidae.

§. II. Intrinsicae autem actionum moralium principia sunt *intellectus*, & *voluntas*. Ut enim actio sit humana, & moralis, utque jure possit imputari seu in bonam, seu in malam partem, necesse est & ut intelligatur, & ut libere agatur: alterum ubi deest; mechanica potius, quam humana & moralis est. Itaque quae ex ignorance, aut coactione aguntur, nisi ipsi ignorance, aut coactionis causae fuerimus libe-

liberae , ea nec crimini , nec virtuti imputari possunt .

§. III. Intellectus in actionem influit *conscientia* actionis , & legis : Libertas *electione* libera . Est autem conscientia ratiocinatio super honestate , aut turpitudine , iustitia , aut iniustitia actionum nostrarum . Ea ratiocinatio syllogismus est , & tribus semper absolvitur , *lege* , *defenitione actionis* , & *sententia* . Lege continetur propositio : definitione actionis assumptio : sententia vero complexio . E. G. *Nemini quidquam malefaciendum* (Ea lex est , quae in omni conscientiae ratiocinio veluti fax quaedam praelucere debet) : *Alterum autem criminari est alteri malefacere* (haec actionis est definitio & constitutio , quae est necessaria , ut actio possit cum lege conferri) : tum sequitur sententia , *ergo alterum criminari lege vetatur* . Haec autem ratiocinatio tum dicitur conscientia , quum , ut dixi , versatur circa proprias actiones , aut omissiones : quod si circa actiones , aut omissiones aliorum instituantur ab iis , qui res humanas moderantur , *imputatio* dici solet , qua scilicet collata alterius actione cum lege , concludimus , illi aut legis poenam debere , quia legem violavit , aut laudem , vel praemium , quia legem viriliter observavit : qua de re paulo post uberius dicemus .

§. IV. Conscientiae plurimas fecere Philosophi partitiones . Ac bonam quidem vocant eam , a qua quis absolvitur : malam vero a qua damnatur . Vocant antecedentem , quae de actionibus nondum editis ratiocinatur , quae nonnisi in bonis , & sapientibus inest : consequentem , quae ratiocinatur de actionibus jam editis , qua depravati quoque homines utuntur , saltem quousque conscientiam *cauteriatam* , ut appellant , non contraxerint , quod consuetudine peccandi sit . Jam conscientia antecedens vel docet actionem ex lege faciendam , vel abstinendum ab actione , utpote contra legem , vel esse permissum agere , aut cessare . Priorem *instigantem* appellant , alteram *revocantem* , tertiam *admonentem* .

§. V.

§. V. Porro conscientia vel recta est, vel erronea.

Quum enim conscientia sit ratiocinatio de bonitate, aut malitia actionis ex lege, si propositio, aut assumptio, aut complexio fuerit falsa, conscientia dicetur erronea: si vero omnia fuerint vera, vocabitur recta.

E. G. si quis ira ratiocinetur: *amor proximi exigit, ut errantes occidam: Publius autem errat; ergo occidere debeo*. Falsa enim est propositio, quum *errantis poëna sit doceri*, inquit gravissime Plato: quare conscientia est erronea. Potest autem quis errare, aut circa jus, aut circa actionem, seu factum. Et in jure quidem aut unam legem pro alia traducens, aut non justam extensionem animo comprehendens. Error juris difficilior est, quam facti: nam facti natura ex infinitis propemodum circumstantiis pendet, quas difficillimum est omnes semper dispicere & in numerato habere. Ex quibus intelligitur, ut quis habeat conscientiam semper rectam, tria potissimum requiri. Primum, ut leges omnes morum calleat: secundum, ut sciat justam legum extensionem dimetiri: tertium, ut sciat facta cognoscere, perpendere, & cum legibus comparare.

§. VI. Est etiam conscientia vel certa, vel probabilis. Certa existit ex clare cognita lege, ejusque extensione, atque clare & distincte definita actione. Id non semper obtineri potest: nam etiam si leges perfecte teneantur, incidunt tamen plerumque casus difficiles, in quibus nec legis extensionem omnem comprehendimus, nec actionem ob multiplices circumstantias scimus definire. Plerumque etiam officia colliduntur, ut videatur alterum alteri adversari, ut quid facto sit opus non clare pervideamus. In his casibus si nihil ex neutra parte clare appareat, conscientia est *dubia*: sin plus ex alterutra, *probabilis*. Conscientia autem dubia, quum dubium ex frivolis causis est, *scrupulosa* appellari solet.

§. VII. Est autem hoc in loco animadvertendum, probabilitatem in scientia morum, aut *intrinsecam* esse, aut *extrinsecam*. Illa ex fontibus hujus scientiae
pra-

TIO DE PRINCIPIIS

propriis nascitur, legibus nimirum vel naturae, vel divinis politivis, vel humanis: haec ex auctoritate Doctorum: Si actio ex suis principiis liquido fluere videtur, idest si clare cum lege videtur consentire, aut ei adversari, conscientia certa est: si non videtur clare, sed videtur tamen aliquo modo, est intrinsecus probabilis: si nullo modo actionem cum lege comparare potes, sed id ab aliis accipias, probabilitas est extrinseca. Haec posterior probabilitas ab intrinseca illa pendet, nec ulla esse potest, ubi nulla est probabilitas intrinseca: neque enim aliam ob rationem doctores auctoritatem faciunt, nisi quod iis & leges perspectas pleneque cognitās, & actiones accurate definitas, & cum legibus collatas supponimus. Quae si in illis desunt, nulla esse potest eorum auctoritas. Id animadvertere eos oportet, qui ex caenosis rivulis morum regulas depromunt. Philosophus in principia iustitiae, & honestatis inquirere debet, in hoc a vulgo dilans, quod totum ex aliorum auctoritate pendet. Neque enim qui de moribus & officiis scribere aut eam legum peritiam adhibuere, quae erat necessaria, aut sinceram semper morum regulam prae oculis habuerunt; ac fuere quidam, qui tempori, sectae, propriis affectibus, aut utilitati interdum serviverunt.

§. VIII. Praeterea conscientia dici solet *libera*, quum nullo affectu, nulla prava cupiditate, nullo pravo habitu impeditur in ratiocinando de bonitate, vel malitia actionis: *minus vero libera*, si ex aliqua superiorum causarum turbetur: quarum conscientiarum illa aptior est officiis intelligendis, & discernendis, quam ista. Quare viro probo curandum est, ut liberam semper, quoad natura humana sinit, conscientiam habeat: dici enim vix potest quantopere turbata conscientia iustitiae & honestati discernendae officiat, idque nobis saepe pro honesto & iusto ostendat, quod e re nostra est, non quod ex regula. Dicitur quoque conscientia *dormitare*, quum animus officio suo minus est intentus. *Cauterio ista* appellatur, quum

quum nihil de honestate, aut turpitudine actionum sollicita est, qualis esse solet in iis, qui consuetudine malefaciendi habitum contraxerunt. Tandem dicitur *expergefieri*, quum quis ad se, & officia sua demum redit. Ex his, quae dicta sunt, patet jam, quae sit conscientia *tranquilla*, aut *remordens*, vel *inquieta*. Atque hae fere sunt conscientiae partitiones.

§. IX. Quaeri hoc in loco potest, an conscientia sit regula morum? Regula morum esse debet *certa*, *recta*, & *constans*, alioquin ne actio quidem humana, quae ad illam regulam exigenda est, certa, recta, & constans erit. Hujusmodi autem regula nequit esse nisi sola lex; & quidem divina, aut quae ex ea, velut ex exemplari, diductae sunt; quia sola Dei ratio certa est, recta, & constans. Quoniam autem lex ope conscientiae actionibus applicatur, inde factum est, ut conscientiam ut recentes Theologi vocaverint *immediatam* morum regulam, legem vero *remotam*. Id vero sic intelligendum est, ut conscientia informata a lege, & recte ratiocinans pro morum regula, si ita loqui placeat, habeatur: exploratum enim est, conscientiam erroneam, stupidam, corruptam, dubiam, non posse haberi pro regula, nisi omnia scelera licita efficere velimus. Nullum enim est scelus, quod non aliqua corrupta conscientia probet, ut praeclare prorsus dixerit Seneca, *nullam esse foeditatem sine suo amatore, nullum errorem sine patrono*.

§. X. Quid? inquit aliquis, agere ne licet contra conscientiam? Non certe licet; sed inde minime fit ut conscientia officiorum nostrorum regula esse possit: nam ne contra conscientiam quidem erroneam agere licet; nec vero quisquam dixerit, conscientiam erroneam esse actionum nostrarum normam. Ac quod non licet quidquam agere, quod cum honestatis aut iustitiae conscientia pugnat, id non a conscientia est, sed a lege, quam conscientia praefert. Quare etiam ubi conscientia erronea est, ei adversari est contra officium

cium facere: quia est videntem ac prudentem legem oppugnatum ire; quia in censum venit non lex, quae non est, sed legis quae esse videtur, contemptus, adversus quam nunquam esse animatum licet. Quare sectanda quidem est conscientia, seu potius lex, quae conscientia informatur, sed accurate & studiose perquirendum est, utrum recta, nec ne sit.

§. XI. Quaeritur item, quid agendum sit cum conscientia probabilis? Repetamus hanc doctrinam paulo altius. Nemo ignorare potest, nisi sit omnino stupidus, hominem naturae ipsius dictamine certum tenere debere ad finem suum iter, siquidem illud occurrat inquirenti perdiligenter: quod si post accuratam, & sedulam diligentiam adhuc lateat, idem rectae rationis dictamen exigit, ut in dubio pars tutior eligatur; in probabilitate vero probabilior, velut fini suo propinquior. Enimvero qui in dubio viam minus tutam, aut in opinionem minus probabilem ingreditur, is dupliciter peccat: nam & legem contemnit, & de fine suo parum est sollicitus. Eam ob rem omnes controversiae, quae super probabilitate praeterito seculo a magnis alioquin ingeniis agitatae sunt, magis ex pugnandi prurigne, quam ex veritatis amore natae mihi videntur. Itaque nisi probabilitas minor sit ea, quae legi faveret, eam sequi, ubi adest probabilitas major, est legum jugum excutere velle.

§. XI. Exiis, quae dicta sunt, facile intelligitur, quatenam sint actiones imputabiles, & quibus imputari possint. Nempe eae actiones sunt imputabiles, quae humanae sunt, idest quae & intelliguntur, quales sint, & ex libertate fiunt. Eae si legi sint conformes, justae, bonae, honestae dicentur: si vero contrariae, malae, iniustae, turpes, ac proinde sanctioni legis obnoxiae. Statim enim ac quis legem violavit, poenae legis subditus fit, quam subire oportet, nisi legislator clementissime indulgeat. Quocirca, ut actio imputetur, duo imprimis sunt necessaria, *summa legis peritiam*, ut scilicet ejus extensio tota animo com-

pre-

prehendatur, & accurata facti cognitio, quod omnes ejus circumstantias. Sed quoniam quaedam sunt, quae efficere possunt, ut actio in genere quidem sit humana, non vero in specie, idest in genere sit imputabilis, non vero in specie, ob adnexas scilicet circumstantias, paullo distinctius ea de re differendum est.

§. XII. Principio nemini imputatur actio, aut omisio, si quis aut egit, aut omisit ex ignorantia, vel errore involuntario: nam ea actio, aut omisio humana esse nequit, nec aequum est actiones, aut omissiones non humanas imputare. Dixi autem ex ignorantia, aut errore involuntario, quod esse potest quaedam ignorantia, ac proinde quidam error voluntarius, quum juris, tum facti. Nimirum ignorare ea, quae officii est scire, voluntaria juris ignorantia est. Ea ergo efficere vetita, aut omittere praecepta, nemo potest, quin actio, aut omisio imputetur. Quod ut intelligatur, animadvertendum est, quaedam esse officia omnibus communia, quaedam vero quorundam statuum propria. Officia omnibus communia ego habeo generalia, quae spectant aut Deum, aut nos ipsos, vel alios ut homines: officia vero propria sunt particularia quae spectant status quosdam naturae advenientes, qualia sunt officia Principis, Patris, Senatoris, Pastoris, cetera. Quod pertinet ad prima officia, in iis, quod ad prima saltem capita, non potest dari ignorantia invincibilis: prima enim juris naturalis capita recta ratio omnes condonet, quemadmodum superius demonstratum est. Contra vero in consequentiis quibusdam ex primis illis capitibus provenientiis, in quibus major perspicacia exigitur, hujusmodi ignorantia locum habere potest. In officiis vero particularibus ignorantia eos tantum excusare potest, qui in illo statu voluntate sua non sunt constituti: nam si in eo statu voluntate sua positi sint, nullo modo officii sui ignorantia eos excusat: quandoquidem inter prima officia ejus status est ea scire, sine quibus persona ejus status geri non potest. Itaque Senatores, Patresfamiliae, Pastores, Doctores, alique quodcumque munus ge-

rentes non excusantur, si in eo munere administrando ex ignorantia peccent: est enim huiusmodi ignorantia voluntaria.

§. XIII. Praeterea nemini imputari possunt actiones cum cognitione alioquin factae, sed tali cognitione, quae omnem libertatis ulum praevertit, nisi eas evitare in potestate nostra fuit. Ita motus affectuum adversus legem, irae, timoris, amoris, aliorum, qui dici solent *primo primi*, quique licet non nascantur, nisi ex objectorum perceptione, tamen motu magis mechanico quam deliberatione voluntatis peraguntur, non sunt imputabiles, nisi aut quum iis causam libere dedimus, aut quum evitare potuissimus, libere tamen omisimus. Prioris partis huius propositionis ratio est, quia liberi non sunt, nec aequum est, ut quod in potestate nostra non est agere, vel omittere, voluntati nostrae imputetur. Alterius vero partis, quia licet *non in se*, saltem *in causa*, ut loquuntur scholae, sunt liberae: quodcumque enim cavere potuissimus, si non fecimus, libere voluimus.

§. XIV. Ad idem genus actionum pertinent eae, quae ex diuturnis habitibus proficiuntur. Huiusmodi actiones plerumque machinales sunt, quia habitus quasi alteram naturam conficiunt. Quare si omnem operam dederimus pravis habitibus extirpandis, nec dum profecerimus, actiones illae erumpentes naturae magis sunt, quam arbitrii, adeoque minime imputabiles. Ceterum si habitus fovemus, aut exuere negligimus, tantum abest ut actiones illae minus imputentur, ut magis etiam sint imputabiles. Nam habitus pravi aut neglecti aut fotti maiorem legis injuriam continent, quam singulares actiones pravae, quae ab habitibus non proveniunt: magis enim vitium in eodem genere est habitus, quam actus.

§. XV. Quaerit hoc in loco quispiam, quid censendum sit de actionibus invitis, & coactis? Actiones coactas hoc in loco appellamus eas quas metu majoris mali agimus, ut quum servus ne occidatur

ab hero suo, alterum occidit ex heri imperio, aut quum nauta, ne mergatur una cum mercibus, merces in mare projicit: actiones vero invitas eas, quae ita a nobis proveniunt, ut ipsi earum non causae. sed instrumenta simus, veluti si quis mea manu alterum feriat, vel si me urgeat, quo alterum impellat, Actiones coactae, dici possunt *mixtae*: eae enim nec plene liberae sunt, nec omnino mechanicae: itaque imputabiles sunt, licet aliquam indulgentiam mereantur. Atque hujusmodi fere sunt pleraeque, quae ex vehementibus affectionibus peraguntur. Ceterum distinguendum est inter actiones, & omissiones. Actiones lege prohibente vetantur: Legis autem prohibentis haec est natura, ut obliget omni tempore, & loco, quod dicunt, *semper, & ad semper*. At omissiones lege praecipiente: Legis vero praecipientis natura est, ut datis occasionibus obliget, non vero *semper, & ad semper*. Itaque actiones mixtae, seu coactae, de quibus loquimur, contra legem prohibentem, semper imputantur: nulla enim tam gravis causa esse potest, qua excusentur. At omissiones coactae contra legem praecipientem excusari possunt, si scilicet gravis quaedam causa occasionem agendi distulit. Sed actiones invitae nullo modo imputantur, neque enim a voluntate nostra ullo modo pendent, ut morales dici possint. Quod si a coactione quidem ceperint, progressu vero voluntariae evadunt, tum de iis, veluti de moralibus, statuendum est.

§. XVI. Sed cui imputari possunt? Nempe causae aut *physicae*, aut *moralis*, scilicet ei, qui aut ipse per se aliquid egit, aut omisit adversus legem, aut ut ageretur aut omitteretur effecit, seu imperio, seu auctoritate & consilio, seu exemplo, seu neglectu sui officii. Illud animadvertendum est, plerumque actiones aut omissiones adversus legem plus causae *moralis*, quoad *physicae* imputari, ut quum actio aut omissio plus intelligentiae & voluntatis, id est plus moralitatis habuit in causa *moralis*, quam in *physica*.

Quo modo imperia eorum, qui plurimum possunt, efficiunt, ut inde acta aut omissa per eos, quibus, ut Tacitus inquit, *obsequii gloria relicta est*, plus imperantibus, quam administris imputentur. Ita plurima plerumque populorum crimina, aut delicta Re-
 ctoribus magis imputantur, quam iis, qui ea aut agunt, aut delinquent. Nam quoniam totus societatis civilis ordo, ac proinde legum observantia, ab ejus moderatoribus nascitur, fieri vix potest, ut quum illi officio suo desunt, cetera ordinata sint & pacata, faciliusque reperies sapientem Rempublicam in turbata Civitate, quam tranquillam & bonam Civitatem in Republica aut somnolenta, aut nefaria.

§. XVII. Diximus ut imputare alicui quis recte quidquam possit, requiri & perfectam legis scientiam, & plenam facti cognitionem, quae sunt nunc perpendenda. Quod spectat ad primum, ut dicatur quis habere perfectam legis scientiam, satis non est, ut verba legis teneat, sed ut vim, animum, finem. Nam si quis plenissime legis verba observet, finem vero violat, legem quoque violasse censendus est. Contra autem ubi quis finem legis observaverit, utcumque contra legis verba egisse videatur, legem observavit, Liberaliter scilicet lex interpretanda est, non serviliter.

§. XVIII. Jam ut finis legis dignoscatur, primum omnium in causas ejus legis impulsivas inquirendum est. In legibus humanis id obtinetur ope historiae legum, & earum rerum, quae quoquo modo leges spectant. Itaque nemo sine cognitione civilis historiae se ad rectam legum interpretationem pertingere posse confidat. In divinis legibus scriptis historia sacra adhibenda est, atque praeterea cognitio naturae Dei, & hominum: inde enim illarum finis dignosci potest: Legum naturae finis praecipuus est, nostri beatitudo: eo enim omnes tendunt: quemadmodum finis legum civilium est salus publica, seu civitatis conservatio, & tranquillitas. Ex his ergo finibus singulae leges in-
 ter-

terpretandae sunt, ut quantum quis, & quatenus adversus legem fecerit, intelligi possit.

§. XIX. Praeterea necesse est imputanti, ut justam extensionem legis comprehendat, ne aut contra voluntatem Legislatoris plus quam par est, legem coarctet, aut aequo nimius provehat. Extensionem legis partim ex ejus fine, partim ex aliis causis impulsivis, partim ex vi verborum discimus. In primis autem necessaria est germana verborum intelligentia: ex eorum enim constitutis notionibus magnum legi lumen accenditur. Vide quae super ea re adnotavit Pufendorffius de Offic. Hom., & Civ. Lib. 1. Capult., ibique Everardus Otto. Ad facti plenam cognitionem consequendam ejus circumstantiae omnes distinguendae sunt, personae scilicet, status, loci, temporis. Singulae enim facti circumstantiae actionis naturam commutare possunt. Vide ut super ea re disputat Heineccius Lib. 1. jur. natur., & gent. Cap. 4. Qua autem ratione adhibendae poenae, & quatenus, id a nobis in libro *de officiis* disputabitur.



LIBER ALTER

*Quemadmodum ex legibus naturae
hominum officia ducantur.*

§ I.



Uod Stoici *καθήκον*, id Cicero officium dixit. Stoicis autem officium est, *id quod cur factum sit probabilis ratio reddi possit*, quemadmodum refert Laërtius Lib. 7. num. 62. Quæ definitio propria est, si nomine *rationis* intelligunt hoc in loco Stoici, quæ ex primis legis naturæ notionibus nascitur. Nam officium nihil aliud revera est nisi quod humanarum actionum norma faciendum, aut omittendum docet. Quare officium facere est ex: regula vivere, ei obtemperare; facere vero contra officium, est extra regulam profligare, aut contra agere. Ex ea definitione intelligitur, officium ad actiones tantum liberas pertinere, non etiam ad necessarias; nam actiones tantum liberae lege morali gubernari possunt. Officiorum partitiō commodissima est in ea, quæ quisque Deo, tum quæ sibi, tandem quæ aliis debet. Quæ aliis debemus item bipartita sunt, nam aut ex jure perfecto debemus, quæ a nobis vi: exigi possunt, & officia *justitiæ* dici possunt; aut debemus ex jure imperfecto, seu caritate generis humani, quæ vi subiecta non sunt, & *humanitatis vel beneficentiæ* appellantur. Sed officia justitiæ ad duo quoque genera spectant: nam alia sunt *absoluta*; alia *hypothetica*. Absoluta sunt ea, quæ ita ex lege naturæ profluunt, ut nullum humanum institutum, aut pactum supponant. Conditionata vero quæ locum non habent, nisi post instituta humana, pacta conventa. Ergo hæc tractatio ita instituetur, ut principio agamus de officiis erga Deum: secundo de officiis erga nos ipsos: tertio

tio de officiis erga alios humanitatis & beneficentiae : quarto de officiis erga alios absolutis : quinto de officiis erga alios hypotheticis : sexto de natura , & origine societatum , & civitatum , deque officiis in societate obtinentibus . Ita autem agemus , ut capita magis officiorum indicaturi simus , quo intelligant adolescentes quemadmodum ex naturae lege vivere debeamus , quam ut rem longe lateque diffusam plene hoc libello comprehensuri simus .

CAPUT I.

De Officiis erga Deum.

§. I. **A**mplissima est haec tractatio , praesertim si Philosophus , quod omnino oportet , se christianum quoque esse meminisse velit . Sed summa nos capita attingemus elementorum angustis , ut dixi , impediti . Fundamentum officiorum omnium , quae Deo debemus , est hoc , quod ab eo conditi sumus , & conservamur , quod is supremus sit nostri dominus , quod bona omnia animi , corporis , fortunae ei accepta referre debemus , quod ab eo tantum veram beatitudinem sperare possimus . Itaque fit , quod alias dictum est , ut primam & perfectissimam ei amicitiam , & servitutem debeamus , eaque omnia officia , quae ex ea amicitia & servitute proficiuntur . Officia autem istaec uno religionis nomine appellatur , quae complectitur amorem , timorem , fidem , spem , obediendi propositum , invocationem , gratiarum actiones , & quae his sunt affinia .

~§. II. Sed quoniam , ut praeclare observat Lactantius , *non potest religio a sapientia separari , quia idem Deus est , quem scire oportet , quod est sapientiae , & idem , quem colere , quod est religionis* ; prima officia hominis circa Dei cognitionem versari debent , ut nempe intelligat , Deum esse aeternum , independentem , simplicissimum , incomprehensibilem , omnipraesentem ,

unum, intelligentem, sapientissimum, omniscium, futurorum etiam praescium, omnipotentem, liberum, veracem, justum, optimum. Nisi enim intelligat haec omnia, perpetuo secum animo verset, & sibi firmissime persuadeat, in officiis suis erga Deum deficiat necesse est. Quare perspicite idem Lactantius Lib. 4. prius est, inquit, *Deum scire, consequens colere*. Agnoverunt idipsum Ethnici Philosophi. Seneca Cap. 95. *Primus est, inquit, Deorum cultus, Deos credere: deinde reddere iis majestatem suam, reddere bonitatem*. Et Epictetus in Enchyridio cap. 38. *Religionis erga Deos immortales praecipuum illud esse scito, rectas de iis habere opiniones*.

§. III. Primum ergo omnium oportet, ut homo religiosus constituat, primum in religione officium esse, intelligere Deum esse, & in ejus attributa diligentissime inquirere, in ea potissimum, quae majorem relationem habent cum creaturis rationalibus: deinde pervidere, quae ex iis attributis confectaria practica ad vitae honestatem & sanctitatem pertinentia consequantur, ut ita scilicet secundum relationes, quas natura nostra cum Deo habet, vivere possit. Et ad cognitionem Dei, ejusque proprietatum duplici via ire possumus, *naturae*, & *revelationis*: dupliciter enim ad homines Deus loquitur, via *naturae*, unde est illud Psalmistae, *Coeli enarrant gloriam Dei*, & via prophetiae. Inprimis Philosophi operam dabunt scrutandae rerum naturae, ejus scilicet investigantes pulchritudinem, magnitudinem, ordinem, rerum singularum fines, & usus, ex quibus Dei sapientia, potentia, bonitas, praescientia intelliguntur. Quocirca studium historiae naturalis, Physicae, Astronomiae, tum & historiae humanae, cum summa hac utilitate conjunctum est, ut nos de natura Dei instruat, atque ad officia adversus eum formet. Hanc partem Theologiae naturalis praeclare persequuti sunt Drheam, & Nieuwentitius.

§. IV. Conjungat porro Philosophus Christianus cum
hoc

hoc studio Scripturae quoque sanctae studium, earumque rerum, quae studio illi sunt necessariae. Ex eo studio non cognitionem tantum theoreticam confectetur, sed practicam potissimum: neque enim aliunde copiosius, & explicatius divina voluntas, quae officiorum nostrorum prima est, & suprema regula, patescit, quam ex literis divinis, quippe quae non ob aliam rationem hominibus datae sunt, nisi ut brevitatem, & imbecillitatem mentis nostrae sustinerent, & perficerent, *ut perfectus scilicet esset homo Dei ad omne opus bonum instructus*, ut loquitur Paulus Apostolus, *ut in verbis Dei cor Dei scrutaremur*, quemadmodum monet Gregorius Magnus.

§. V. Qui vero naturae perscrutandae pares non sunt, ii saltem studium Scripturae divinae continent. At qui neutrum facere possunt, eos audire ex naturali officio debent, qui divinas hujusmodi veritates ex utroque fonte depromtas praedicant. Quicumque autem hoc primum erga Deum officium transgrediuntur, ii si ex ignorantia in ceteris, quae ex eo pendent, peccent, crimini ea ignorantia vertitur, quum sit voluntaria: nam ejus, quod scire officium est, ignorantia voluntaria semper est, quemadmodum superius demonstratum est.

§. VI. Jam vero nullum est Dei attributum, ex quo non aliqua, & magna officia hominis adversus eum deducantur. Ex. gr. ex immensitate Dei illud inprimis proficiscitur officium, quod ad omnem vitam honeste transigendam vim habet plurimam: Scilicet quoniam nos perpetuo sub oculis Dei versamur, in cujus conspectu *ne Angeli quidem sunt mundi*, ut loquitur Jobus, non decet nisi puros & sanctos esse. Quod si inter leges paganae Theologiae illa praecipue celebratur a Cicerone Lib. II. de Leg. *ad Deos caste adèunto*; quam repetunt saepe Seneca, & Juvenalis; quanto nos puriores esse decet, qui in conspectu veri, & potentissimi Numinis perpetuo vivimus? Socrates parens ille philosophiae moralis

ralis inter Graecos, quum templum intraret, hac praecatione utebatur: *o Pan, atque cetera Numina, date quaeſo ut intus pulcher efficiar.*

§. VII. Praeterea ex immutabilitate Dei nascitur in nobis certissima promissorum spes, si ejus legibus conformem vitam duxerimus. Scilicet mutari Deus nequit, ut de spe in illum diffidere possimus. Itaque Paulus Apostolus quum dixisset, se vitam secundum decreta evangelica vixisse, addit: *posthaec reposita est mihi corona justitiae, quam reddet mihi in illa die justus judex.* Ex ejus quoque sapientia, & providentia nascitur interna illa animi quies & confidentia in sapientissimum nostri gubernatorem, quae nos in adversis mirifice solatur, quaeque in iis hominibus esse nequit, qui eo dementiae, & impietatis devenerunt, ut aut nullum esse Deum suspicerentur, aut nullam habere rerum humanarum procuracionem, quorum idcirco tota vita miserrima sit necesse est.

§. VIII. Ex omniscientia, & omnipotentia existit item justus timor, & cautio ne occulte quidem peccandi, quod occulta etiam, ut alia omnia, etiam cogitata animi, aperta sint, & nuda oculis ejus. Ex justitia ut timor peccandi, ita consolatio, dum injuste ab hominibus vexamur: nullum est enim crimen, quod Deus aut cito, aut sero tandem non puniat, atque temporis diuturnitatem gravitate supplicii compensat. Ex imperio in omnia proficiscitur nostrum obsequium, & servitus. Justum enim est, ut in supremum Universi Imperatorem obsequentissimi simus. Ex ejus incomprehensibilitate efficitur in nobis timor, & reverentia, dum de ejus natura consiliis, operibus, differimus, ut ne scilicet ultra fines suos vim rationis nostrae promoveamus. Praeclare dictum est a Platone in Timaeo, *Patrem, & Opificem Mundi invenire difficile: postquam vero inveneris, eloqui vulgo impossibile.* Sed hoc ipsum corrigit S. Gregorius Nazianzenus, affirmatque multo difficilius esse,

Deum

Deum invenire, quam vulgare. Atque idem de ceteris Dei attributis dici potest.

§. IX. Secundum haec curanda sunt alia officia practica. Ea sunt aut interna, aut externa. Interna ad haec praecipua referri solent, amorem, timorem, fidem, spem, gratiarum actionem, obediendi propositum, invocationem, & orationem. Externa sunt, primum non loqui de Deo, deque rebus divinis, nisi honorificentissime, atque ne joco quidem dicere male. Secundum, omnibus signis externis interna illa officia manifestare, ut alii ad similia excitentur. Tertium, veritates divinas alios studiose docere. Quartum, promoveri Dei gloriam, & veram pietatem iis omnibus argumentis, quibus ejus attributa intelligantur. Posteriora haec officia practica per se ipsa manifesta sunt; de primis seu internis paullo copiosius dicemus.

§. X. Principio Deum amare oportere, & quidem super omnia, ac purissimo amore quoad capaces sumus, naturae ratio omnibus dictat. Primo quia summe bonus est. Huc spectat quod Socrates dicere solebat, ipsam veritatem, & pulchritudinem, si sui vultus nobis sine velo ostenderet, incredibiles in nobis flammam accensuram. Secundo, quia Deus tantum summum nostri bonum est, in cujus fruitione beati esse possimus. Praeclare S. Bernardus in tractatu de statu virtutum tomo II. *Homo, inquit, nec per se est, nec per se bonus est . . . Deus enim per se est, & per se bonus est. In eo autem, qui per se est, & per se bonus est, finis nostrae beatitudinis constituitur; ergo in solo Deo.*

§. XI. Tertio, quia is nos amat, ut ex tot in nos collatis beneficiis patet. Quocirca & tertiam hanc amoris speciem, qui est amor gratitudinis, ei debemus. Quin quum perpetua ejus sint in nos beneficia, perpetuus quoque esse debet hic gratitudinis amor. Quarto tandem, quia vult a nobis amari, cujus rei argumentum est, quod cum desiderio insito summi boni nos procreat, quo veluti naturae quadam lege

ad

ad eum rapiamur. Praeclare Augustinus Conf. lib. i. cap. 5. *Quid, inquit, tibi sum ipse, ut amari te jubeas a me, & nisi faciam irascaris mihi, & mineres ingentes misérias? Parvane ipsa est, si non amem te?* Quum porro amari Deus nequeat, nisi de illo cogitemus, ut perpetuo est amandus, ita praecipuum cogitationum nostrarum objectum esse debet. Quare monstro simile mihi videtur, inventum hominem (Christianum ne dicam pudor efficit), qui docere potuit, sufficere homini semel saltem in vita actum amoris Dei concipere. Frontem hominis!

§. XII. Sed amandus quoque est Deus propter utilitatem maximam, quae ex ejus puro amore pro praesenti vita in omni hominum statu proficiscitur. Nam qui eum sapienter & sincero corde amant, ii & pacato animo vivunt in societate humana, & honesti, justi, ac reliquorum officiorum observantissimi sunt. Familias quoque honeste, & tranquille regunt, & publicae rei praepositi populorum felicitatem ex animo promovent: quum contra qui non amant, tristibus curis agitantur, inquieti semper sunt, omnia turbant, suae tantum utilitatis amatores, invidi, maligni, atque omnium scelerum architecti; ut intelligamus, nihil esse posse ea republica turbulentius, in qua aut plures hujusmodi homines reperiuntur, aut tales sunt, qui publicis rebus praesunt. Quicumque historiam humanam vel primis labiis degustaverunt, infinita habent hujus doctrinae exempla. Itaque Origenes in epistola ad Rom Lib. ix. Cap. xxi. perspicue scribit, *ego puto, quod omnis caritas, quae non est secundum Deum, simulata sit.* Enimvero ut argumentum est, non vere diligere Deum, qui non diligit proximum, ut disputat Johannes in Epist. i., ita non sincere, sed simulate diligere proximum, quicumque non recte, nec sincere diligit Deum. Maximum vero argumentum sinceri erga Deum amoris est studium officiorum, quae nobis, quae aliis, quae Deo tandem debemus: mentiuntur enim ii, qui Deum se ama-

amare profitentur, horum autem officiorum quasi immemores vivunt: nam amor Dei a divinarum legum observantia separari non potest.

§. XII. Tum timendus est Deus. Duplex autem est timor, quo Deus timeri potest, *Filialis*, & *Servilis*. Filialis cum amore conjunctus est, & ex amore nascitur; Servilis vero ab amore est sejunctus, & nascitur a poena. Filiali timore timetur Deus, quia amatur: Servili vero, non quia veremur ut Patrem, qui nos amat, sed quia formidamus ut Dominum potentissimum, qui punire possit severissime. Utroque timore Deus timetur utiliter, sed priori sanctius: nam qui posteriori modo timet, poenam magis timet, quam culpam: qui vero timet filiali amore, culpam magis, quam poenam veretur. Apposite B. Augustinus epist. nunc 145., olim 144., quae est ad Anastasium data; *Inimicus*, inquit, *justitiae est, qui poenae timore non peccat*. Timendum autem esse Deum utroque timore brevissime demonstrari potest. Primum Deus est amandus ut Bonus, ut Pater, ut Beneficus, ut ultimus nostri finis, quemadmodum demonstratum est; qui autem ita Deum amat, timet quidquam facere, quod ille improbet, non quia punitur, sed quia veretur eum, quem amat, laedere. Deinde quum Deus potentissimus sit, ejusque voluntas immutabilis, certa est poena, & immutabilis, quam ille peccatoribus minatur: itaque hac etiam ratione justus est Dei timor.

§. XIV. Praeterea quum sit Deus suprema ratio, atque summe bonus, & quidem immutabilis, dubitare nullo modo possumus, ne nos decipiat ubi quidquam docet, aut promittit. Itaque si constet aliquid Deum docuisse, aut promississe, etiamsi id minus ratio nostra assequitur, certissimum illud habere debemus, nec ullo modo de ejus veracitate, aut fidelitate subdubitare. Talis enim dubitatio nequit non esse conjuncta cum maxima Divinitatis injuria. Quare sit, ut certissima fides Deo praestanda sit.

§. XV.

§. XV. Sperare quoque in Deum hominis pii praeceptum officium est. Duabus autem partibus constat hujusmodi spes. Primum sperare debemus esse eum remuneratorem virtutum, quia Deus, qui sapientissime, & munificentissime res omnes gubernat, suum proculdubio constituit virtuti praeonium, nec pro sua sanctitate, & immutabilitate potest nos deludere. Et quamquam in ea nascuntur homines conditione, ut sine Dei gratia nihil mereri possint, quod ad aeternam beatitudinem spectat, ut Christiana docet Theologia; Deus tamen tam bonus est, ut merita sua velut nostra coronet, quemadmodum loquitur alicubi S. Augustinus.

§. XVI. Alterum, quod sperare constantissime debemus, est, Deum poenas ab hominibus scelestis immutabiliter exacturum, quia ut virtutem remunerari, ita vitia punire proprium est sapientissimae providentiae. Nec si Deus differat, aut si impios, & pravos homines cumulare bonis terrestribus videatur, minus sperandum est. Nam ut verbis nobilissimi historici Romani utar, *consuescunt Dei immortales, quo gravius homines ex commutatione rerum doleant, quos pro scelere eorum ulcisci velint, his secundiores interdum res, & diuturnam impunitatem concedere.* Caesar de Bel. Gall. Lib. I. Cap. XIV.

§. XVII. Obsequium erga Deum nascitur ex supremo ejus jure, ac dominio in omnia: correlata enim sunt dominus & servus, dominium & servitus. Tria autem complectitur hoc obsequium. Primum diligentem inquisitionem divinarum legum, quoad cujusque indoles, & status patitur. Videri enim potest contemni Legislator ab eo, qui negligens est in ejus legibus addiscendis. Secundum legum istarum amorem, & vitam secundum eas institutam in timore: non enim obsequens Deo est, qui eum nescit tantum, sed qui secundum leges ejus vivit. Tertium obedire Deo magis, quam hominibus, quippe qui supremus, est nostri dominus, cui Reges omnes obediant oportet,

tet,

ter, & sub quo incurvantur qui portant orbem, ut loquitur Jobus.

§. XVIII. Invocandus quoque Deus est, non quasi ignoret, quid nobis sit usus, sed duas praecipue ob rationes; & quia id est argumentum nostri erga illum obsequii, & quia ita animum nostrum ejus donis excipiendis praeparamus, quam rationem precum, quae Deo ab hominibus funduntur, Platonici constituunt, in primis Jamblicus. Petenda autem sunt a Deo primum omnium bona aeterna, secundum ea, quibus honeste praesens vita sustentetur. Monet Platonius in precibus non individua petenda, sed generatim orandum Deum, quia plerumque nescimus, utrum quae petimus, sint vera bona. In quo cum dogmatibus christianae religionis consentit. Nam Christus Dominus noster dilerte docet sic orandum Deum, *fiat voluntas tua*, increpatque ignorantes homines, *nescitis quid petatis*. Porro oratio a toto quidem homine facienda est, sed mente magis quam corpore; non enim oratio est, quae labiis tantum fit, non etiam corde. Egregia sunt, quae super hac re differit Augustinus in duobus aureis libris de sermone Domini in monte. Legi quoque meretur Moralis Christiana Floriotti.

§. XIX. Tandem quum beneficium, & gratiarum actio sint inter se correlata, ut illo posito, & haec sequatur oportet; nos vero perpetua a Deo beneficia accipiamus; perpetuas quoque illi gratias agere debemus, et animum humilem, ac gratum testificemur, ut nos dignos conservemus, quibus Deus bona sua cumulatus impertiatur. Pertinent ad actionem gratiarum etiam externa quaedam signa grati animi, in primis Sacrificia. Itaque recta ratio Deo sacrificandum praecipit, non quasi terrestrium rerum indigeat, sed in argumentum nostrae adversus illum servitutis. Veterum gentium maxima pars quum solius corporis sensu, & voluptate bona perpenderint, Deoque non celestem, sed humanum tribuerint sensum, terrena bona Diis suis offerebant, illis necessaria, & gra-

ta credentes esse, quae nobis, quemadmodum observat Lactantius Lib. VI. Cap. II. . Sed & Christiana doctrina, & naturalis ratio aequae distant, non haec terrena bona, sed animum innocentem, & incolumem generoso pectus honesto Deo sacrificandum. Praeclare idem Lactantius eodem loco Cap. I.: nihil sancta, & singularis Majestas illa ab homine exigit, quam solam innocentiam, & Cap. II. haec est, inquit, religio celestis, non quae constat ex rebus corruptis, sed quae virtutibus animi, qui oritur e Caelo. Hic verus est cultus, in quo mens colentis seipsam Deo immaculatam victimam sistit. Quid autem causae fuisse dicemus, cur Deus in veteri lege animantium sacrificia praeceperit? Censet Theodoretus, haec sacrificia non fuisse praecepta in veteri lege, sed permitta tantum, ne Hebraei, qui inter gentes idololatrias educati erant, & terrenarum rerum sacrificiis assueti religionem sine ullis externis symbolis delerent. Ac vero difficile est, nisi tota humana natura commutetur, hominem, cujus major pars sensus est & phantasia, sola intelligibili religione Deo devincire: ipse enim suapte natura ad sensum & phantasiam statim dilabitur. Sed fuere certe sacrificia illa Hebraeis praecepta veluti symbola sacrificii Christi, quod saepe memorat Paulus Apostolus. Pertrahat hanc quaest. copiose Joah. Spencerus de legibus Hebraeorum ritualibus.

C A P U T II.

De Officiis Hominis erga seipsum, ac primum de iis, quae cum toti homini, tum corpori debet.

§. I. **E**X iis, quae in superiori libro demonstrata sunt, constat, lege naturae nos obligari ad nostri amicitiam, custodiam, & culturam, ut ideo quidpiam voluntarie efficere nequeamus, quo deterior nostra fiat natura, aut ea scientes, & prudentes negligere, quae ad nostri custodiam, & cul-

culturam sunt necessaria, quin violatae legis naturalis apud Deum simus rei, ac propterea a nostri felicitate longe aberremus, quae solius sapientiae & virtutis effectus esse potest, ut miseria ignorantiae & vitii. Enimvero quodcumque ex superioribus systematibus, quibus *principia* legis naturae *cognoscitiva* constituimus, complecti placet, demonstrari facile potest, hominem sui culturae, & perfectionis negligentem legibus naturae adversari, atque recta in miseriam ire. Nam si Grotii placuerit systema, intelligetur, societatis sollicitum esse non posse, qui sui curam negligit. Si vero Pufendorfii, deducet quilibet aperte, se ex naturae lege sociabilem praestare debere, & propterea sui perfectionem curare. In Kumberlandi vero systemate cura partis, ejusque benevolentia & amicitia necessaria est ad curam, benevolentiam, & amicitiam totius hominum generis. Id ipsum dictum esto de systemate Heinecii. In systemate tandem Wollasthoni, quoniam naturales rerum relationes sectandae sunt, & relatio naturalis, quam nos nobiscum habemus, est relatio intimae amicitiae; inde sequitur debere esse nobis amicos, ac propterea perfectionem nostram curare. Tandem in systemate Wolfii nostri cura & perfectione tota naturae lex explicatur.

§. II. Videbitur fortasse alicui superfluum esse ea de re praecipere, quum a natura ipsa ad nostri tutelam & perfectionem rapiamur, quod nobis cum omnibus animantibus commune est. Statim enim atque animalia nata sunt, ut sint, & bene sint a natura incitantur. Non ego id diffiteor. At quoniam in eo ut nos ex recta ratione amemus, & perficiamus, idest ut nobis amici simus, peccare facillime possumus, peccamusque frequentissime, accurate id, si quidquam aliud, efficiendum est, idest ex certis, & immutabilibus regulis. Perspecte Seneca de Vita beata Cap. I. vivere, inquit, omnes beate volunt: sed ad pervidendum quid sit, quod beatam vitam efficiat, caligant: adeoque non est facile consequi beatam vitam, ut

Tom. IV.

I

ab

ab ea eo longius quisque recedat, quo ad illam concitatus fertur, si via lapsus est.

§. III. Duplex habet objectum nostri custodia, & cultura. Primum vitam hominis animalem, & bona, quae hujus vitae sunt propria: alterum mentem, & ea, quae ad mentem, idest vitam rationalem, pertinent. De prima cultura in hoc capite differemus, de posteriori in sequente. Vita hominis animalis posita est in unione mentis & corporis, atque in earum facultatum exercitio, quae corpore velut instrumento exercentur. Quod igitur ad hanc vitam pertinet, consideranda sunt. I. vita ipsa: II. ejus finis: III. exercitium eorum actuum, quibus is finis obtinetur: IV. instrumenta actuum hujusmodi: V. usus bonorum, quibus haec vita ducitur: super quibus ea nunc sunt praecipienda, quae ex lege naturae derivantur.

§. IV. Ac principio vitae hujus nemo dominus est, ut ad arbitrium projicere eam possit. Quum enim proficiatur ab unione mentis & corporis, cujus causa Deus est, a Deo immediate est. Itaque aut vi abruptum, aut gladio, laqueo, veneno, praecipitio finire, aut neglecta cura abicere, ut inedia, aut inactione adversus pericula, est supremam Dei legem violare, ac adversus illum esse perduellem. Praeclare prius Plato in Phaedone, *in custodia*, inquit, *quadam posui sumus, neque decet quemquam ex ea se ipsum solvere, neque aufugere.* Et Lactantius Lib. III. Cap. 14. *Sicut*, inquit, *in hanc vitam non nostra sponte venimus, ita rursus ex hoc domicilio corporis, quod tradendum nobis assignatum est, ejusdem jussu recedendum est, qui nos in hoc corpus induxit, tamdiu habitaturos, donec jubeat emitti.*

§. V. Quamobrem probari nullo modo potest quod apud veteres quosdam populos fieri solitum fuisse legimus, ut quum ad eam aetatem quis provectus fuisset, in qua aliis inutilis, sibi gravis esset, ipse sponte sua praesidia mortis sibi aacerferet, veluti apud Indos, quod, praeter alios, fecerunt Strabo Geogra-

phus,

DE OFFICIIS.

-151

phus, & Curtius de rebus gestis Alexandri; apud Trapobranenses, de quibus Diodorus Siculus Lib. III. Cap. 58., atque apud alias nationes, quarum exempla produxit Pufendorfius de jur. natur. & gent. Lib. II. Cap. 2. Porro quis probet inhumanam eam legem, quae extitit apud Caecos, ut majores sexaginta annis aconito vitam finirent, ut reliquis cibaria sufficerent?

§. VI. Sed nec illud probandum est, licere se necare, si alias cum probro adversus Deum victurus sit, qua ratione Rabbinum mortem Samsonis excusant. Tandem nec licitum esse potest se occidere ad servandam virginitatem, aut pudicitiam, quod quidam censuerunt: ut idcirco quamvis ignoscamus his virginibus, quas legimus ut virginitatem & pudicitiam servarent, divino quodam impulsu se se interemisse; id tamen per legem naturae fieri posse negamus. Conferatur B. Augustinus Lib. I. de Civitate Dei Cap. 16. Horum omnium una ratio est, quod non liceat in nos jus praeripere, quod proprium Dei est, obligemurque diserte lege naturae ad nos custodiendos, quoad in nobis est. Cicero lib. VI. de Rep. *Nisi enim, inquit, quum Deus is, cujus hoc Templum est, omne, quod conspicis, istis te corporis custodiis liberaverit, huc tibi aditus patere non potest: homines enim sunt hac lege generati, qui tuerentur illum globum, quem in hoc Templo medio vides, quae terra dicitur... Quare & tibi, Publi, & piis omnibus retinendus est animus in custodia corporis, nec injussu ejus, a quo ille est vobis datus; ex hominum vita migrandum est, ne munus humanum a Deo defugisse videamini.*

§. VII. Sed illud in quaestione positum est a viris doctis & eruditis, an aut ob summam calamitatem, quae sit morte ipsa intolerabilior, aut ob certitudinem instantis atrocissimae, vel ignominiosae mortis liceat se necare? Plato Lib. IX. de Legibus negat quidem ob alias causas licere sibi mortem consciscere, sed excipit hunc casum, de quo differimus, nempe ubi quis tristi, & inevitabili fortunae casu cogitur. Idem docet Cicero Lib. 1. Quaelst. Tuscul.

Nam

Nam postquam memorasset mortem Socratis, & Catonis Uticensis, addidit, *vetat Dominans ille in nobis Deus injussu hinc nos suo demigrare. Quum vero causam justam ipse Deus dederit, ut tunc Socrati, nunc Catoni, saepe multis, nre ille mediusfidius vir sapiens laetus ex his tenebris in lucem excesserit illam nec tamen vincula carceris ruperit; (leges enim vetant) sed tamquam a Magistratu, aut aliqua potestate legitima, sic a Deo vocatus exierit.* Scribit idem saepe Seneca. Haec tanti fecit Pufendorffius ut Lib. 11. de jur. natural. & gent. Cap. IV. §. 19. quaestionem in medio reliquisse videatur.

§. VIII. Sed negandum omnino est. 1. Nulla enim naturae necessitas id nobis imperium in nos tradere potest, quod Dei est proprium, quale est jus vitae, & necis. Deinde non levem id providentiae Divinae aut diffidentiam, aut violentiam continet. Nam si Deo omnia sapientissime gubernanti in eas rerum angustias conjicere placet, quae videantur intolerabiles, credendum est, id e re nostra esse, adeoque nullo modo licere adversari, nisi aut de sapientissima Dei providentia diffidere velimus, aut eam violare parati simus: utrumque autem est contra officia, quae Deo debemus, quaeque sunt prima, & maxima. Tum ne fortitudo quidem est sic vitam projicere, quum fortius mala tolerentur, quam iis cedatur, ut praeclare disputat Aristoteles. Id quod vetus poeta eleganter cecinit,

Rebus in adversis facile est contemnere vitam:

Fortius ille facit, qui miser esse potest.

§. IX. Interim quamquam hunc in modum vita custodienda est, mors tamen, cujus nos nec negligentia, nec vi illata causa sumus, omnino contemnenda est, aut saltem non valde timenda: quippe quae & finem praesentium calamitatum facit, & principium alterius beatæ in hominibus piis, & justis. Diei non potest quantopere in vita pacate & libere ducenda contemptus mortis juvet, ac quantopere nos negligentes

& pi-

& pigros, atque in omnibus rebus timidos efficiat nimius horror mortis. Ut autem non valde timeatur, quotidie animo volutanda est, atque in familiaritatem adducenda. Praeterea illud saepe animadvertendum est, stultum esse nimium timere quod evitare nequeas. Sunt veterum Philosophorum dicta quaedam, & facta praeclara, quibus animus ad mortem contemnendam erigitur. Imprimis legenda est Oratio Socratis, quam in Phaedone retulit Plato, primus Tusculanorum Tullii Liber, atque plures eandem in rem Senecae Epistolae.

§. X. Quod si quem perturbet vulgare praepudium, dolorum sensitivorum omnium maximum esse, qui ex separatione corporis & animi sentiri dicitur, inane terribilamentum est: nam quum ea conjunctio nullis corporeis vinculis contineatur, sed posita sit in sola harmonia animi, & corporis a voluntate Dei pendente; ubi cessat nullum ipsa per se sensitivum dolorem creare potest, ac proinde nullus ea in re esse potest in morte dolor, nisi mors contingat ex partium corporis violenta contusione, dilaceratione, inflammatione, constrictione, aut similibus causis. Si vero quis angatur, quod necesse sit morituum quaecumque in hac vita amavit relinquere (qui certe dolor ille est in morte maximus), is assuescat rebus hujus vitae utendis velut in transitu, non ita fruendis, quasi sempiternum habere possit: stultum enim est usuto confidere, quae non solum deficere possunt, verum aliquando debent. Tandem si perturbetur a conscientia vitae non bene actae, is det operam, ut praeterita vitia emendet, ac virtutem perpetuo colat, & constantissime sectetur: cetera laetus sit, & spei plenus bonae.

§. XI. Quum constet lege naturae obligari nos ad vitae custodiam, quaeritur quousque ea peragenda sit? Regula generalis est, non teneri nos vitam tueri cum pari periculo vitae, aut subeundo malum, quod ipsa morte sit atrocius. Primum perire ne peream, ami-

cum occidere, ne occidam, tantumdem est, ac legem violare naturae, ne violem. Deinde subire malum, quod sit morte ipsa atrocius, & nos in statum continuatae per aliquod tempus mortis conijcere, est perpetuo perire, ne semel peream, ad quod lex naturae nullo modo me obligat, quia non potest me ad contraria obligare. Inde responderi potest quaestionibus, sumenda ne sint aegroto remedia morte ipsa atrociora? positus in statu certae mortis teneatur ne subire periculum mortis, quo priorem statum evadat?

§. XII. Superiori regulae addenda est altera, scilicet nos non obligari ad vitam tuendam & perficiendam supra nostras vires, aut supra cognitionem nostram, etsi teneamur ex naturae lege vires nostras conservare, & perficere, atque eam nobis bonorum, & malorum cognitionem comparare, quae vitae tuendae, & perficiendae sit necessaria, idque quatenus naturae nostrae conditio & status permittunt. Prius inde probatur, quod nemo obligari potest ad eas res quae vires suas excedunt, utpote relative impossibiles. Posterius vero ex eo, quod quilibet pro virili parte ut toti generi hominum, ita sibi consulere debet, quemadmodum in superiori Libro demonstratum est.

§. XIII. De defensione nostri adversus invasores prolixè disputari solet. Egit ea de re Grotius Lib. II. de Jure belli, & Pacis, & Pufendorffius de Jure Naturali, & Gentium Lib. item II. Cap. V. Nostri defensio vel sine laesione invasoris agi potest, vel non nisi cum ejus laesione, aut nece. Quin licitum sit vitam priori modo defendere, territando nimirum, aut minitando sine ulla laesione invasoris, nemo umquam dubitaverit. Id immo praeceptum esse censeo: nam qui ita evitare mortem potest, nec efficit, is sui negligit custodiam, ac proinde non minori crimine tenetur, quam qui se ultro interficit. Quomodo & qui arcem, quam tueri facile potuit, inertia, aut panico timore deserit, & qui eam prodit hostibus, aeque adversus Principem peccat.

§. XIV.

§. XIV. De posteriori modo-controvertitur. Quam autem & hoc modo licita sit nostri defensio, quam injuste invadimur, si principia rectae rationis consulamus vix dubitare possumus. Nihil enim magis in Natura perspicuum esse potest, quam licere nobis vi & armis ea jura defendere, quae nobis a Deo tributa sunt, quae profecto frustra data nobis essent, nisi tue-ri liceret: Naturam nobis primum conciliare ut si-mus, & bene simus, secundum nos, alios: generis humani amicitiam a nobis incipere: item a nobis in-cipere curam & custodiam societatis. Itaque nihil ve-rius umquam scriptum fuisse cenleo, quam illud, *vim vi repellere omnia jura sinunt*, quod ea lex non scripta sit, sed nata, ut praeclare Cicero differit pro Milo-ne.

§. XV. Nec vero hoc jus me defendendi cum alte-rius nece, ejus scilicet qui me injuste invadit, ab illius culpa adversus me nascitur, sed a natura ipsa mihi tri-buitur, quae statim ac natus est animans quilibet, Nlum sibi conciliat, ut existat. Idcirco si qui me in-vadit culpa adversus me vacet, non minus licitum est me adversus illum defendere, quam adversus feram irrumpentem. Hoc vero intelligendum semper est cum moderamine inculpatae tutelae, quod in eo positum est, ut si minimo possis aut tui, aut invaloris malo periculum avertere, id potius efficias, quam ad necem confugas: id enim suadet lex amoris erga proximum. Quod moderamen qui non servat potest etiam in ea defensione esse homicida, quae pro sui custodia instituitur.

§. XVI. Ut autem definiatur tempus licitae defen-sionis, distinguendum est inter *statum civilis imperii*, & *statum naturalem*. Brevius est in priori statu defen-sionis intervallum, quippe in quo statu ope civilis imperii quilibet sibi cavere potest. Itaque tempus li-citae defensionis occisivae tamdiu in eo durat, quamdiu vitae periculum, idest ad breve admodum tempus. At in statu naturali durat tamdiu, quamdiu hostis non

est ad eum statum redactus, in quo nequeat amplius me laedere. Ut vero intelligatur, utrum ad hunc statum redactus sit, qui me invasit, argumenta sumenda sunt aut ex sincera ejus protestatione, aut ex depositis viribus, aut ex datis obsidibus, seu pacis pignoribus, aut similibus argumentis. Ex his vero intelligitur, quum Principes, & Respublicae sint inter se in statu naturali, quousque liceat Principi, aut Reipublicae adversus Principem, vel Rempublicam esse in armis, & se defendere. Hoc autem in loco, & illud animadvertendum est, fieri posse, ut invasor transeat in locum ejus, qui invaditur, quo in casu habebit omnia ea jura; quae sunt defensionis, praeterquam si aliqua justa poena ob priorem invasionem dignus sit.

§. XVII. Porro ea defensio non pro vita tantum jure fit, sed etiam pro membris, & sanitate: item pro pudicitia tuenda: praeterea pro bonis omnibus, aut magna eorum parte: tandem pro nostris consanguineis, amicis, ac tandem pro quocumque homine, qui non jure invaditur. Priorum propositionum ratio est, quod per naturam liceat propria jura defendere: quod hujusmodi laesionem ego pati non teneam, ac proinde jure meo propulsare possim quoscumque injustos invasores. Postremae vero propositionis ratio ex cura & tutela societatis proficiscitur: haec enim tutela esse debet omnium adversus omnes. Haec doctrina extendi potest ad quascumque alias atroces corporis injurias, quas quia pati non teneor, jure meo possum propulsare, non ut alium laedam, sed ut me ab injusto invasore defendam. Sed recolendum semper est, cum moderamine & caritate hanc agendam esse jurium nostrorum defensionem: pacem habeat voluntas: bellum necessitas.

§. XVIII. Ceterum haec ita accipienda sunt, ut liceat tantum me defendere, ne quocumque modo laedar. At alia ratio est, si laesus sim: tunc enim in me nullum amplius jus est me vindicandi, dum-

mo-

modo qui laesit ab ulteriori injuria inferenda cessaverit, & si quod mei jus laesit, resarcire sit paratus. Nempe jus illud me defendendi mihi competit, ut ne laedar, non vero in praeteritam laesionem ulciscendi. Itaque vindicta nec in statu civili, nec in naturali privato homini licet, quia non necessaria ad nostri custodiam. Quare non solum adversus Christiana dogmata, verum etiam contra regulas naturae impieccaverunt Casuistae, qui docuerunt, acceptam alampam nece vindicari posse. Sed animadvertendum est, non comprehendi sub hac vetita vindicta, si quis eum qui laesit, poena aliqua cogat, aut ut laesionem resarciat, aut ut emendetur, aut ne se vel alios similiter deinceps laedat: est enim ea justa, & licita punitionis. Vide Grotium de jure Belli, & Pacis Lib. II. cap. 20. Sed in civili imperio id per magistratus procurandum: in Republica enim jus gladii ac vindictae solus habet imperans. In statu naturali quilibet sui ac rerum suarum procurator est. Interim consulenda est recta ratio non affectibus tantum auscultandum, ne qui ratione longe belluas excellere gloriamur, vita ipsa & moribus imitemur.

§. XIX. Super duellis disputari solet. De provocante in civilis imperii statu nulla esse potest apud viros bonos, & legum naturalium gnaros controversia: tam enim non licet ob quascumque acceptas injurias alium provocare ad duellum, quam non licet privata vindicta. In statu vero naturali, ubi nullum est ad communes Magistratus confugium, tum licet, quam qui laesit, aut datam injuriam resarcire nequit, aut adhuc invalor est, id est adhuc perseverat in laedendo, nec alius modus superest, quo ejus pertinacia reprimi possit: id enim poenae magis, quam ultionis rationem habet.

§. XX. De provocato in diversas partes iverunt docti. Si res e suis principiis derivetur, certum est, si fuga non sine periculo sit futura, non teneri provocatum fugere, sed expectare posse invalorem, atque

se

se defendere : scilicet in eo casu nulla alia ratione iusta nostri defensio agi potest : Id tamen intelligitur , dum repentine invadimur : nam si per internuncium , aut epistolam provocemur , nullo modo licet provocanti consentire ; quandoquidem id esset non nos defendere , sed alterum invadere : esset inculpatæ tutelæ defensionem migrare , ut quum declinare periculum possumus , nos potius contra audentissimi pergamus .

§ XXI. Quod si in repentinis invasionibus fuga sit quidem futura sine periculo vitæ , sed cum periculo ejus existimationis , sine qua in societate vivere nequeamus , anceps , magis ob inductos vetustate mores , quam ob rem ipsam , casus mihi videtur . Nam quum hujusmodi fuga censeatur conjuncta cum jactura ejus rei , qua vitam in societate sustentamus , tantumdem creditur esse fugere , quantum vitam deferere . Quocirca plures , nec ii indocti , depravata magis consuetudine abrepti , quam recta rerum ratione ducti , opinati sunt , jus nobis inesse , quo possimus nos tutari , dum id periculum alia via & ratione evadere nequimus , etsi præstantius censeant , & homine Christiano dignius , provocatum etiam cum ejus existimationis læsione periculum declinare . Quare milites , ajunt , qui provocati si renpant , aut fugiant , e militia demittuntur , nullo naturæ jure obligari ad fugiendum arbitrantur . Ego repugno . Nam ea existimatio sine qua in societate vivere nequimus , non ex corporis robore existit , sed ex animi virtute , quam tantum abest ut in his casibus perdamus , ut potius augeamus . Agnosco ego iis , qui non ex recta ratione sed ex affectibus vitam instituerunt , ardua hæc & difficilia videri : sed sunt plerumque æque ardua & difficilia ea , quibus corporis sanitas procuratur , remedia , ut mirandum non sit aspernari nos & refugere animi medicamenta . De humanis officiis ex lege eorum directrice , non ex aut delicatis , aut concitatis affectibus disserendum est . Quæ quum sint , magis quoque falsum est , &
cum

cum naturae jure, aequè ac cum Evangelio repugnans, quod plerisque militum persuasum est, licere provocare ad duellum ob injurias acceptas meru infamiae: quum enim superest alia via vitam, & famam tuendi, est contra leges naturae ad arma confugere.

§. XXI. Quaeritur hoc in loco utrum haec violenta defensio jure naturae praecepta sit, an tantum permessa? Non hic loquimur de militibus in statione positis, aut in praelio justo decertantibus, custodibus, aliisque publico regimini praepositis, qui non possunt sui defensionem deferere, quin traditam custodiam deferant, ad quam jure perfecto, & praeceptivo tenentur ex pacto; sed de iis, quos proprium duntaxat periculum in sui defensionem excitat: De his igitur quaeritur, an liceat in valori cedere sine ullo crimine desertae sui custodiae? Defensionem occisivam intra eos cancellos, de quibus diximus, licitam esse, sed minime praeceptam, adeoque libere eam omittere, atque sinere se interfici, docet Grotius de Jure Belli, & Pacis Lib. II. Cap. I. §. 8. & Pufendorffius Lib. II. de jure naturali, & gentium Cap. IV. §. 2. Sed negat Zeiglerus ad eum Grotii locum, & Auctor Libri de Principiis justitiae, & decori. Et Grotius quidem nullam doctrinae suae aliam rationem proferit, praeter propriam auctoritatem: Pufendorffius vero haec dat rationem, quod scilicet quivis possit privilegio suo renunciare, dummodo id non fiat cum damno communis. Sed demonstrare oportebat jus nos custodiendi & defendendi privilegium esse, non praeceptum. Itaque Pufendorffii ratio nullius est momenti.

§. XXII. Nos in Grotii sententiam imus, eamque sequenti ratiocinio confirmamus. Legis naturae finis non est conservatio & felicitas unius cuiusque partis generis humani, sed totius: non ita ergo mihi imperat mei defensionem, ut simul imperet alterius internecionem, ubi ego alia ratione conservari nequeo: ita enim contraria imperaret, ergo dum mihi jus

hi jus praestit ad me defendendum, jus permissivum dat, non praecipit.

§. XXIII. Idipsum confirmatur ex lege Evangelica. Ex ea enim lege perspicuum est, virtutum omnium maximam esse, & quidem heroicam, quamcumque injuriam pati potius, quam facere. Ea est sententia Christi Domini nostri cum in aliis locis pluribus, tum in eo, *si quis te percusserit in maxillam unam, praebe ei & alteram*. Est autem haec interpretatio juris naturalis *authentica*, quippe quae ab eodem Legislatore proficiscitur, qui legum naturalium conditor est.

§. XXIV. Sed magna iterum exoritur quaestio, utrum haec evangelica doctrina consilium sit, quod pertineat ad eos, qui perfectam virtutem sectantur, an praeceptum, ac propterea omnium? veteres quidam Theologi ita censuerunt, licere nos defendere adversus invasorem, sed sine ejus nece; adeoque doctrinam istam evangelicam velut praeceptum acceperunt, quod pertineat ad omnes. Sed non est simile vero id praeceptum fuisse in Evangelio, ut nullo modo nos adversus invasores cum eorum nece defenderemus, ubi injuste invadimur; id enim si verum esset, leges Evangelicae latronibus potius, & scelestis hominibus consulerent, quam viris bonis, quod dictu nefas est. Deinde iis everteretur jus naturale, quod immutabile suapte natura est. Tercio justum bellum prohiberent, quod non faciunt. Ita saepe ratiocinatur S. Augustinus. Quocirca ex doctrina Evangelica virtus quidem heroica est; sinere se interfici, ne alter pereat, etiam ubi defensio justa est; sed non est proprie dictum praeceptum. Interim illud observandum est diligenter, etiam in justa defensione nihil agendum esse ex odio, sed cuncta ex caritate, & prudentia. Praeclare B. Augustinus, *pacem, inquit, habere debet voluntas, bellum necessitas. Esto etiam bellando pacificus. Itaque hostem pugnantes necessitas non voluntas perimat.*

§. XXV. Jam non tantum vita custodienda est ex natura

turac

turae jure, sed sanitas quoque, quoad quisque scit, & potest: nam sine sanitate vitae animalis vix alia officia rite praestari possunt. Regulae autem pro sanitate custodienda nec plures nec difficiles sunt. Praecipua omnium regularum haec est, *temperanter, & sobrie vive: natura enim paucis est contenta: iis bene se habet: superfluis premitur, & agitur*. Eam regulam & natura ipsa nos docet, & celebratissimi Medici tradunt. Hippocrates in Libro de Morbis potissimam sanitatis regulam esse scribit, *numquam satiare cibis, & impigrum esse ad labores*. Idem praescribit Celsus Lib. 1. Cap. 2. Lege & egregiam Plutarchi tractationem de sanitate tuenda. Ergo contra naturae leges ii peccant, qui intemperanter vivunt. Enimvero quid interest ad homicidium sui, utrum quis lento veneno se necet, an violenter? Itaque sui homicidae jure ii habentur, qui ingluvie, aut ebrietate, aut aliis voluptatibus, vitam suam abbreviant.

§. XXVI. De bonorum fortunae, ut vocant, usu, quae sunt necessaria vitae animali conservandae, hoc in loco pauca differemus. Sunt bona fortunae vitae animali conservandae, ut dixi, necessaria: itaque eadem lex naturae, quae praecipit vitae nostrae conservationem, praecipit quoque, ut instrumenta omnia vitae nobis comparemus, comparata conservemus: vulgatum enim & verissimum est illud axioma, *qui vult finem, vult & media*. Potest autem contra hoc officium tribus modis peccari, negligentia, avaritia, & prodigalitate. Ac primum quum Deus praecipiat nobis nostri custodiam, proculdubio exigit a nobis omnem eam diligentiam, quae ad bene vivendum necessaria est. Quocirca hanc diligentiam negligere est in iis, quae ad vitae custodiam pertinet, peccare. Id vero aut temerariam in Dei providentia confidentiam ostendit, aut apertam legis naturae violationem. Accedit, quod hujusmodi homines non possunt alia ratione vitam sustentare, quam nefanda & injusta faciendo, aut patiundo. Atque hoc officium quum ad omnes omni-

no homines pertinet, tum eorum potissimum est proprium, qui suo pacto, aut contractu aliorum curam gerere debent, quales sunt Patresfamiliae.

§. XXVII. Deinde non ita sectanda, & amanda sunt externa bona, tamquam in iis ultimus nostri finis positus sit: nam qui ita operantur, agunt adversus finem humanae vitae praecipuum, idest beatitudinem, quam in iis rebus collocant, in quibus esse nequit, atque idcirco adversus naturae leges, quae praecipuum illum finem habent, quemadmodum alibi demonstratum est. Sunt igitur ea sectanda, & comparanda fortunae bona, quae vitae animali ducendae sunt necessaria, quae nec multa sunt, nec difficilia paratu, ubi quis non ex cupiditate, sed ex ratione vitam instituit: sed ita conservanda sunt, ut praesentia sint vitae usus, nec tantum nostrae, verumetiam aliorum, non ut contemplationi tantum serviant. Quare ea in re duo, ut dixi, extrema vitia cavenda sunt, nimis eorum bonorum affectus, quasi in eorum contemplatione posita sit, tota nostri felicitas, quod vitium *avaritia* dicitur: & dispersio sine ulla ratione, quae dicitur *prodigalitas*. Utrumque enim vitium contra horum bonorum usum est, adeoque contra naturae legem: sed magis primum, quam secundum.

§. XXVIII. Superior doctrina apertissime posita est in divinis Libris. Matthaei VI. v. 34. *nolite solliciti esse in crastinum: crastinus enim dies sollicitus erit sibi ipsi*. Idest nolite ita esse in crastinum animo occupati, ut idcirco cogamini cetera officia ob eam curam negligere. Et Paulus Apostolus in I. ad Timotheum. cap. VI. v. 7. *Divitibus, inquit, hujus saeculi praecipue non sperare in incerto divitiarum*. Quorum quoque spectant verba, illa ejusdem Apostoli, denique qui utuntur hoc. *Munda sint tamquam non utentes*. Haec non significant, nisi ut ne nimis praesentis vitae bona amemus, aeternorum & spiritualium, quae sola immutabilia sunt & vera, inmemores.

C A P U T III.

De cultura animi.

§. I. **P**ostquam ea hominis officia, quae vitam animalem spectant, per summa capita persequuti sumus, superest ut de cura animi, ejusque cultura dicamus, quae tanto major & accuratior esse debet, quanto est animus corpore ipso praestantior, & animi vita animali nobilior. Accedit altera causa, ob quam primas & maximas curas animi vita a nobis exigit, quod nempe animalis intra breve temporis spatium continetur, illa vero aeternitatem spectat. Ergo quanto praestantiora sunt aeterna bona prae bonis hujus vitae fugacibus, tanto vitae rationalis cura major & diligentior agenda est. Postremo ne vita quidem ipsa animalis ordinata & pacata esse potest, nisi sapiens, ordinatus, & pacatus animus eam moderetur: totum enim regimen vitae nostrae animalis a mente pender, ut perturbatum sit necesse est, ubi illa inepta est ad regendum.

§. II. Spectat vita animi intellectum, & voluntatem, quae praecipuae sunt animi facultates, quibus ille vivit, & operatur. Ad utramque autem facultatem perficiendam nostri illa naturalis amicitia nos obligat, ac propterea naturae lex: nam nos obligat lex naturae ad recte nos amandos, ad felicitatem nostram semper intuendam, & sectandam, adeoque ad ea omnia, quae verae felicitati consequendae sunt necessaria. Ad felicitatem vero consequendam inprimis necessaria est emendatio & perfectio intellectus, ac voluntatis: nam experientia nos docet inter homines miserum non esse, nisi aut stultum, aut scelestum; ergo lex naturae nos obligat ad intellectum & voluntatem emendandam, & perficiendam. Emendatur autem intellectus, quum ab eo causae ignorantiae, & errorum destinentur, voluntas cum ab habitibus pravis purgatur: perficitur vero intellectus scientia,

vo-

voluntas habitibus virtutum; ergo lex naturae praecipit, ut & causas ignorantiae, ac errorum, praesertim quod spectat ad vitam moralem, ab animo removeamus, atque intellectum vera scientia instruamus; & ut voluntatem ab omnibus pravis habitibus purgemus, ac habitibus virtutum ornemus. Atque in his tota animi cultura posita est.

§. III. Omnium igitur primum ex lege naturae cuilibet homini pro sua indole & conditione accurata cura gerenda est intellectus sui. Nam quum intellectus sit veluti fax totius vitae rationalis & moralis, nisi ille ea cognitione informetur, quae ad vitam hanc recte transigendam necessaria est, perturbata & confusa tota erit vita rationalis, & moralis. Ad eam igitur scientiam, veluti ad medium finis nostri consequendi necessarium, suprema illa naturae lex nos obligat. Ac vero si is, qui quum possit, negligit vitam animale curare, & perficere, non recte nec verè se amat; qui dici potest, eum, qui quum possit vitam rationalem perficere, negligit, rite, & verè se amare, idest ex recta ratione amare atque sibi esse amicum?

§. IV. Qua ex re duo consequuntur. Primum obligari nos ad scientiam bonorum, & malorum cum physicorum, tum moralium: physicorum quidem, quia obligamur ad vitae animalis custodiam, quae ut sine bonis physicis conservari nequit, ita a malis physicis plurimum timere debet; moralium vero quia obligamur ad mentem perficiendam, quae bonis moralibus perficitur. Hanc scientiam cuilibet necessariam esse pronuncio, ceteras aut statibus tantum quibusdam necessarias: apud, aut omnino indifferentes. Alterum est obligari quidem homines ad intellectum perficiendum, sed non aequaliter, verum quemlibet pro sua capacitate, & statu, ut idcirco non aequaliter adversus hanc legem ab omnibus peccetur.

§. V. Quibus ex rebus omnibus intelligitur, nulum officium generi humano utilius a Philosophis praestari

stari posse, quam propagationem ejus scientiae, de qua locuti sumus. Ac felices quidem essent populi, si Philosophi quantum temporis in inutilibus quaestionibus frustra terunt, tantum intendere vellent in artes, & cognitiones generi humano necessarias publice augendas, & perpoliendas. Inprimis desiderandum esset, ut qui populos regunt, aut in iis principes sunt, curarent, ut plebei quoque homines legere saltem, & scribere scirent: vix enim dici potest, quantopere inde mores, & artes perficerentur. Itaque ego subrafcor saepissime iis opulentis hominibus, qui vana memoriae suae monumenta relinquunt, haec vero officia, quibus vere immortales fieri possent, praeterreunt. Veteres enim populi non aliam ob rationem Orphaeum, Amphionem, Herculem, aliosque inter Deos retulerunt, nisi quia humanitatem barbaras gentes docuerunt. Sunt adhuc apud nos veteris vestigia ruris, quae si qui excolere aggrediantur, illos ego inter Heroes meritisime retulerim.

§. VI. Jam vero excolenda est & voluntas, quae proprie vir bonus, aut malus quisquam est, & dicitur. Nempe finis legis naturae est perfecta hominis beatitudo: media vero, quae ad eum finem ducunt, sunt amicitia Dei, nostri, aliorum. Comitantur autem tres istas amicitias tria virtutum genera, Theologicarum, Monasticarum, & Politicarum, quarum prima Deum, secundae nos ipsos, tertiae societatem humanam spectant. Ad haec ergo omnia formanda est voluntas, ut sit perfecta. Jam ea perfectio a tribus potissimum causis progignitur, temperamento, intellectu, & habituum moralium exercitio; tres ergo illae causae vehementer excolendae, & ad perfectionem nostram inlectendae sunt.

§. VII. Cultura autem trium illarum naturalium causarum in his praesertim posita est: primum, agreste, & ferox ingenium cicuriendum est, ut ne transversum nos rapiat, quum ad officia conamur. Deinde iracundum, inconstans, turbulentum flectendum paulatim,

latim, ut mitescat, & assuescat freno. Tum praeclaris iusti & honesti notitiis instruendus est intellectus, qui voluntatis lumen est. Tandem exercitatione ipsa virtutum ea acquirenda est indoles, qua, quasi altera natura, recte, iuste, & honeste vivamus. Atque postremum hoc est illud, quo proprie voluntas formatur: nisi enim continuato exercitio virtutis naturam bonam induamus, & praecepta honestatis in succum, & sanguinem convertamus, formari voluntas ad beatitudinem nequit. Ad hoc autem efficiendum juvat inprimis exempla nobis proponere ad imitandum, eorum scilicet, qui justam, honestam, liberalem, magnanimam vitam duxerunt, quorum exemplorum copiosam segetem suppeditat historia sacra, & ecclesiastica: plura quoque subministrat historia ipsa profana; atque in hunc praecipue finem historiae lectio suscipienda est. Eam ob rationem historiam vocat Cicero *Magistram vitae*. Sed quoniam ea de re in secunda parte dictum est copiose, quo in loco de virtute egimus, a longiori oratione hic supersedebimus.

C A P U T IV.

De Officiis erga alios perfectis, & absolutis.

§. I. **E**X iis, quae in superiori Libro demonstrata sunt, perspicuum est, hominem debere aliis hominibus natura sibi aequalibus amicitiam non minorem quam sibi ipsi, etsi non priorem. Haec autem amicitia duo exigit officiorum genera, alia ne quemquam laedamus, alia ut aliorum bona pro virili provehere, & amplificare studeamus. Ea enim ambo officiorum genera ex natura amoris proficiuntur: nam qui amat, nec laedit, quem amat, & quatenus potest, juvat. Priora officia iustitiae appellari solent, posteriora humanitatis, & beneficentiae. Jam vero quum aliorum bona vel naturam ipsam humanam

manam consequantur ; vel sint extrinsecus accersita ad nos conservandos : qualia praesertim sunt bona fortunae ; quae officia spectant ne priora bona deteriora efficiamus , *absoluta* consueverunt appellari : quae vero pertinent , ne laedamus posteriora , *hypothetica* dicta sunt . Ut autem de iis omnibus via & ratione differamus , primum de perfectis & absolutis agemus , deinde de perfectis hypotheticis ; tandem de officiis quae ex humanitate & beneficentia ducuntur .

§. II. Ac principio constituendum est , hominem homini natura esse aequalem . Nam quamquam intensitate qualitarum & perfectionum ejusdem naturae humanae alter alteri saepe praestat , externaque forma , aut moribus , ab altero differt ; natura tamen ipsa non praestat , nec differt , id est essentialia naturae humanae sunt in omnibus hominibus eadem , licet non eadem sint adventitia , quae educatio , ars , imitatio , exercitatio , clima , aliaeque externae causae afferunt . Quare ferri ii nequeunt , qui scribunt , stupidos & barbaros homines plus specie a perspicacibus & cultis differre , quam ab hominibus stupidis animantia bruta perfectiora . Stupiditas enim aut perspicacia , ignavia aut industria , barbaries aut cultura , non sunt argumentum diversae naturae , sed tantum aut diversorum temperamentorum corporis , aut diversorum habituum , ex quibus diversitas tantum accidentalis , non etiam naturae nascitur . Et quemadmodum idem est homo quod ad substantiam , infans , adultus , senex , licet non iidem sint in infante , adulto , & sene habitus intellectus , voluntatis , corporis ; eodem modo homines indocti , stupidi , ignavi , & docti , ac perspicaces , non plures , sed eandem speciem constituunt . Nam quod censet Aristoteles , homines dispari conditione nasci , alios natura dominos , ut barbaros , alios natura servos , ut cultos , id ita accipio , ut naturae consentaneum sit , in societate civili prudentiores gubernare , stupidiore parere , quia regimen politicum sapientiae & prudentiae opus est .

§. III. Ceterum quum dicimus homines natura esse aequales, eas hominum proprietates spectamus, quae omnibus naturales sunt, & insitae: nam alioquin non levis diversitas ut dictum est, inter homines est ex proprietatibus adventitiis, & statibus humanis. Proprietates enim adventitiae velut gradus quosdam perfecti num inter homines pariunt, qui idcirco diversa quoque officia exigunt. Praeterea diversi hominum status, quibus fit, ut alii sint Patres, alii Filii, alii Senes, alii Juvenes, alii Magistratus, alii Populus, alii Imperantes, alii Subditi, alii Sacerdotes, alii Laici, atque innumerabiles alii, & ipsi non parvam differentiam inter homines invehunt, quam observare, & propriis officiis prosequi aequum est, quia id secundum naturam est. De his autem statibus inferius dicturi sumus. Illam nunc naturae aequalitatem consideremus, atque inde profluentia officia explicemus.

§. IV. Quoniam ergo omnes homines quod ad naturam sunt aequales, sequitur, ut in eo, in quo sunt aequales, ex aequo eos lex naturae spectet, & ex aequo omnibus consulat, & ut sint, & ut bene, beateque sint. Ergo omnibus omnino praecipit, ne quemquam ullo modo laedat, idest ne cujusque perfectiones, seu naturales, seu juste acquisitas, deteriores efficiat, neve cujusque juri detrimentum ullum aut impedimentum asserat. Nam si cuiquam liceret quemquam laedere, non omnes ex aequo lex naturae spectaret, nec omnibus ex aequo consuleret, nec propterea omnes ut aequales haberet. Ipsa nos conscientia ejus praecepti admonet: nempe nemo est, qui non clare persentiscat egregiam illam naturae vocem, quod tibi non vis fieri, alteri ne feceris.

§. V. Praeclare Seneca eam rem demonstrat ex natura societatis, in qua vivimus: *Nefas est*, inquit, *nocere patriae: ergo civi quoque: nam hic pars patriae est: sanctae partes, si universum venerabile est; ergo & homini: nam hic in majori tibi urbe ci-*

vis

vis est. Quid si nocere velint manus pedibus, pedibus oculi? Ut omnia inter se membra consentiunt, quia singula servari totius interest, ita homines singulis parcent, quia ad coetum geniti sunt: salva enim esse societas nisi amore & concordia partium non potest. Haec ille de beneficiis. Et certe cum eo, qui ne vilia quidem humanitatis officia mihi praestare paratus est, dummodo ne laedat, vitam socialem inire possumus, & saepissime inimus: at cum paratis ad laesionem nullo modo societatem instituere possumus: quilibet enim quodam naturae impetu ab eo cavet, qui laedere paratus est. Copiose haec explicat Pufendorffius de jure natural. & Gentium Lib. III. Cap. I. §. I.

§. VI. Atque haec adeo perspicua sunt, ut inter scita nationum omnium, saltem non omnino moribus effertarum, hoc maxima cura repetitum legimus, *quod tibi fieri non vis, alteri ne feceris*. Certe inter praecepta honestatis naturalis illud retulerunt Romani, *neminem laedere*. In eadem sententia explicanda atque inculcanda, & veterum Romanorum exemplis confirmanda, plurimus est Cicero in I. Lib. de Offic. Praeclarum est & illud, quod de Alexandro Severo Lampridius refert in ejus vita, adeo nimirum placuisse ei sententiam istam, ut non solum jussit eam praescribi in Palatio, & in publicis operibus, verum etiam quum aliquem increparet ob illatam alteri injuriam, vel damnum, per praeconem praeceperit clamari, *quod tibi fieri non vis, alteri ne feceris*. Idipsum praedicatum apud veteres nationes, imprimis apud Graecas, plurimis demonstrat Grotius. Plato, & Aristoteles, atque alii Graeci Philosophi copiosissime idem dogma explicant, atque inde omnes leges justitiae derivant.

§. VII. Suum igitur cujusque jus omnes leges naturales laedere vetant, id quod eo vel maxime servandum est, quod qui alterum laedit, ne ipse quidem tutus a laesione esse possit, nec propterea tranquille vivere, ad quod omnes, nisi stulti simus, contendere debemus. Quum autem hoc cujusque suum jus ad-

varias perfectiones pertineat , animi nempe , corporis , publicae existimationis , bonorum fortunae ; omnia haec quocumque modo efficere in alio deteriora , est adversus primarias naturae leges peccare . Sed de singulis juris cujusque partibus singillatim discedendum est . Ut autem initium ab animo faciamus , possumus alterius mentem laedere vel in intellectu , vel in voluntate . In intellectu tripliciter : primo omissione culturae , si aut natura , aut conventionem ad eam obligemur : secundo prava institutione : tertio pravis doctrinis .

§. VIII. Ac principio parentes , aut qui parentum loco sunt , tenentur eam liberorum curam suscipere , qua eorum intellectus ea cognitione imbuetur , quae naturae & conditioni eorum est necessaria . Eam curam qui negligunt , aut non recte exercent , ii non minus adversus naturae officia peccant , quam qui dedita opera alienas mentes depravant . Tum Magistri omnes omnium disciplinarum & artium ex conventionem obligantur rite atque recte commissos sibi discipulos erudire . Qui si aut minus sint ipsi in iis versati , aut artem docendi ignorent , & vel nimia longitudine fastidium creent , vel brevitate mentibus tenebras offundant , aut perturbationem doctrinarum & praeceptorum rationem pervertant , aut tandem nimia severitate odium in literas artesque ingenerent in suis , vel nimia indulgentia lascivire sinant ingenia , gravissimo crimini sunt obnoxii . Et quandoquidem omnis laesio natura ipsa reparationem exigit , nisi illata damna refarciant quoad sciunt , & possunt , in laedendo perseverant .

§. IX. Quid , inquit aliquis , si nec meliora sciant , nec melius ? Nempe posteriores , idest magistri , cedere de instituto suo debent , quod sine crimine exercere nequeunt . Priores autem , idest parentes , nihil prius neque antiquius habere debebant , si sapere volebant , & honeste agere , quam ea primum discere , quae sunt ad educationem liberorum necessaria ,

ria ,

ria, quam nuptiis animum intenderent. Id si neglexerunt, atque brutarum animantium in morem in nuptias irruerunt, nec grandiores discere possunt; quoniam fieri nequit, quin patres sint, saltem sapientes institutores liberis dare debent. Nihil clarius ex jure naturali sequi video: natura enim exigit, ut homo homines generet & educet, non aut bruta, aut feras. Interim nihil latius aut frequentius negligitur. Publicum malum, ex quo pessimi quique mortalium proveniunt, & inquinatae scelestis aut ineptissimis civibus civitates.

§. X. Deinde gravius etiam multo adversus naturae leges ii peccant, qui scienter & prudenter pravis vel disciplinis vel doctrinis aliorum mentes inficiunt. Nam & id laedunt dedita opera, quod est in homine praecipuum, & causas ponunt atque semina immensae scelerum segetis: depravato enim semel intellectu non potest non & voluntas quoque depravari, atque inde per totam vitam scelera continuari. Scilicet ii tandem sunt omnium mortalium scelestissimi, qui ex statis animi sententiis & susceptis persuasionibus ad peccandum incitantur, quippe qui scelera perpetrant audentissime, & veluti praeclara facta turpissima crimina habent. Nam qui aut affectu aliquo praevalido, aut ignorance delinquant, ii nec perpetuo mali sunt, & emendari facilius possunt. Argumento esse possunt tot persecutiones in Christianos ab Ethnicis excitatae non aliam ob causam, quam ex falsa Ethnicae superstitionis persuasionem.

§. XI. Porro nec alterius corpus laedere fas est: itaque alium verberibus, plagis, aliisque injuriis afficere, vulnera infigere, membris aut membrorum parte mutilare, inedia, vinculis, tormentis excruciare, res, quae vitae sustentandae sunt necessariae, subtrahere, aut corrumpere dolo malo, quo alter damnum in vita animali patiatur, & similia, jus naturae prohibet, praecipitque contrarium, atque ut

qui talia egerit , quoad potest , & scit , resarciat : Enimvero ejus ratio manifestissima est , quodcumque super legibus naturae adhibere systema placuerit : nam ex Grotiano & Pufendorffiano systemate id pugnat cum societatis custodia , & cum socialitate , adeoque cum naturae lege : ex aliis vero systematibus non minus adversus naturae legem esse comperitur , quia pugnat cum benevolentia communi , cum amore hominum reciproco , cum rerum ordine & relationibus , cum nostra tandem felicitate .

§. XII. Quid , inquit aliquis , si haec ad alterius emendationem fiant ? Respondeo non omnes homines aequale jus emendandi habere . Maximum enim inter homines habent Imperantes supremi : secundum locum habent Parentes : tertium Magistri : quartum ex officio humanitatis & societatis jure ceteri homines : ergo prout cujusque jus est emendandi , ita magis , aut minus late illud exercere potest . Et Imperantes quidem supremi jus habent vitae & necis , ut suo loco demonstrabimus : ergo habent jus corpus affligendi . Sed ut illud , ita hoc tum demum jure exercent , quum nulla alia superest via , quae aut is , qui peccavit , emendari possit , aut damna societati illata reparare : alioquin proculdubio peccant , si cum alia suppetant blandiora remedia , severissima haec & atrocissima adhibent . Imitari oportet Deum supremum Mundi opificem , & sapientissimum Gubernatorem , a quo jus omne Imperandi derivatur : neque enim Deus statim ad extrema supplicia venit , sed monet , atque primum blandissima remedia experitur .

§. XIII. Parentes vero vitae & necis in liberos jus non habent , nisi quum Imperantes simul sunt , idest in statu naturae . Quare tum demum uti pae-
nis corporis afflictivis adversus liberos possunt , quum & nulla adest alia emendandi ratio , & ita sunt moderatae , ut nec sanitas , nec vita periclitetur . Quantumvis enim immorigeri sunt liberi , parentibus (ni-

si in statu naturae, in quo sunt & Imperantes summi) tale non inest jus, ut aut eorum sanitatem, aut vitam laedere per modum poenae possint: totum enim eorum jus ab amore & custodia proficiscitur: amor autem & custodia liberorum minime ad vitam attingit. Accedit quod hujusmodi castigationes, quae bruta magis animantia, quam homines decent, nunquam animos meliores efficiunt, sed peiores. In pueris enim extingunt mentem omnem, & animum humilem ac servilem ingenerant; in adultis vero odium, iram, ferociam progignunt.

§. XIV. Idem dictum esto de Magistris, nisi quod in his, qui animum efformare debent, quique propterea nullum habent jus puniendi, sed docendi tantum & exhortandi, tanto sunt indigniora verbera, quanto ineptiora ad eum finem. Iis tantum praeceptoribus jus inest moderate castigandi, qui infantes educant, idque non quum intellectus emendandus est, sed quum flectenda voluntas: haec enim tantum, non intellectus, modica castigatione corporis inflecti potest. Tandem in iis, qui jus imperandi nullum habent, castigationes corporis nullo modo probari possunt, nec ab injuriis, & laesione excusari.

§. XV. Jam vero nec alterius existimatio laedi potest sine magno adversus naturae legem crimine. Est autem existimatio duplex, altera *simplex*, altera *intensiva*. Illa est quum quis pro non malo habetur; haec vero quum quis ob sua facta egregia, aut egregias virtutes velut excellens inter alios reputatur. Ad utramque existimationem quilibet jus habet, usque dum publico suo facto illam non amittat. Itaque alterius existimationem laedere adversus naturae leges est, & quidem strictas, ut id circo laedens ad refarciendum damnum teneatur. Id potest facillime demonstrari ex utroque illo legis naturalis principio, amicitia nimirum, & custodia societatis. Principio bonorum omnium, quibus homo in societate frui potest, fundamentum est bona existimatio: inde enim

enim est hominum inter se communicatio, ac cum ea communicatio earum rerum quibus bene beateque vivere possumus. ergo omnium dolorum intensissimus est is, qui nascitur ex laesa exiimatione: cum autem dolorem alteri afferre est contra amicitiam, quam naturaliter cum omnibus hominibus habere debemus. Praeterea hic dolor omnium maxime sanctissima societatis vincula dissolvit, hominesque adversus homines armat; ergo est contra primariam naturae legem, quae praecipit, *sancte societatem humani generis servandam*.

§. XVI. Duobus autem modis laedi alterius fama potest, primo fictis ignominiiis, quod dicitur calumniari, secundo occulta & ignota aliis vitia vulgando. Primum proculdubio contra officia justitiae est, ut id circo in perspicuis sit, eum, qui hoc modo alium laesit, ad reparationem teneri, etiamsi ex ea reparatione ejus, qui laesit, infamia sit sequutura; quemadmodum qui me laesit in bonis aliis, obligatur in priorem statum me restituere, etiamsi de statu suo casurus sit: malum enim illatum omni modo reparandum est, si legi satisfacere velimus. Illud quaeritur, utram quis obligetur ad reparationem exiimationis, ubi vita sua periclitetur? Non putaverim, nisi laesio alterius famae gravissima fuerit: nam vita est tale bonum, quod cum nullo alio praesente bono commutari potest. At si laesio alterius famae gravissima sit, & morte ipsa atrocior, nec superfit ullus alius modus famam ablatam restituendi, etiamsi ejus, qui laesit, mors sequutura sit, efficiendum puto. Lex enim naturae omnino reparationem exiimationis exigit.

§. XVII. Qui autem posteriori modo laesit ex quorundam sententia caritatem tantum violavit, non etiam justitiam, ac consequenter non obligatur ad reparationem: scilicet famam non adimit, quae jam alterius crimine laesa est, sed vulgat; id quod contra amicitiam, non contra justitiam esse videtur. Ego

COR-

contra sic sentio, quemlibet habere jus ad bonam famam, quousque facto suo illam non amisit, adeoque qui occulta adhuc privata crimina detegit, cum id proximo adimere, quod ille adhuc possidet, ac propterea reparare teneri.

§. XVIII. Jam vero laeditur alterius fama distictis, conviciis, gestis ironicis, scriptionibus satyricis, factis, aut quocumque alio signo, quo alter in suspicionem trahitur. Itaque homini honesto attente observandum est, quemadmodum loquatur, gestiat, scribat, operetur. Idque eo vel maxime, quod nihil tam pronis auribus audiatur, aut tam jucunde spectetur, ut sunt hominum mores corruptissimi, quam obrectatio, & livor. Accedit quod quum nullius alterius laesionis reparatio sit difficilior, nullum alterum crimen tanto attentius cavendum est, quanto hoc, de quo differimus. Sed quoniam literae, quae jamdiu inter homines adoleverunt, ut loquacitatem, ita alios mordendi pruriginem magnam adduxerunt, ut tum bene sapiant Literatorum scripta, quum amarulentiora sunt; de controversiis Literatorum ut pauca dicamus locus exigit.

§. XIX. Aliorum opiniones refellere, non odio personae, sed veri amore, non modo licet cuique, sed est potissimum Philosophiae, idest inquisitionis veri, officium. Sed intra modum honestatis & urbanitatis hujusmodi confutationes contineri debent. Primum doctrina impetenda est, non mores, ne de Philosopho Satyricus fiat. Quo circa ferri vix possunt ii, qui tum bene alios refutasse arbitrantur, quum aut humiles & infames eorum genealogias contexerunt, aut adolescentiae impuritatem amarulente descripserunt, aut mores corruptos graphice depinxerunt. Nam id praeterquamquod solet esse argumentum injustae causae & animi imbecillis, & impotentis, ad rem quoque nihil pertinet. Neque enim id circo minus verum est, *tres angulos trianguli duobus rectis esse aequales*, quod ab homine moribus

bus depravato, aut vili loco nato dicatur. Deinde ita confutandae sunt aliorum sententiae, ut argumentis, non verbis demonstretur, esse eas absurdas, & ineptas. Quare dicteria illa, auctores illarum sententiarum esse ineptos, perridiculos, pueriles, stultos, & similia, quae comparata sunt ad aliorum existimationem minuendam, pugnant cum naturali honestate & iustitia, pugnant cum amicitia generis humani totius honestatis fundamento, pugnant cum urbanitate. Non possum hac in re satis laudare B. Thomam, veterisque alios scholae philosophos, qui quum res gravissimas pertractent, non solum adversus imperitos auctores absurdarum opinionum, verum etiam Haereticos, & Atheos, nullam unquam animi commotionem praefecerunt, tantum abest ut pugnent conviciis, quibus deinceps refertae Philosophorum scholae fuerunt. Quamobrem & me quoque poenitet, in iis opusculis, quae junior edidi, aut ab ignea adolescentiae vi, aut consuetudine, cui veluti Fato cuidam interdum vel sapientissimis parendum est, quandoque ad falsa haec dicteria abreptum.

§. XX. Sed de verborum usu & abusu in civili societate dicere res ipsa hic postulat. Sermo seu verba, in usum societatis nobis a Deo data sunt: nam nec officia nostra adversus nos ipsos, nec officia adversus Deum, si homo solus in Tellure esset, verborum adminiculo indigerent. Est nempe sermo potissimum societatis ineundae & conservandae vinculum. Enimvero societas sine communicatione sensorum animi nulla esse potest: nec communicatio sensorum animi sine sermone, aut aliis signis, quae vicem verborum gerunt, peragi potest. Ex quo fit, ut societas inter homines nec contrahi, nec stare possit sine verborum usu, aut usu aliorum signorum, quae vicem sermonis obtineant.

§. XXI. Duplex autem est verborum usus, unus Philosophicus, seu reipublicae literariae, alter civilis, seu Reipublicae civilis. Primus est Philosophorum veritatem

tem indagantium, aut docentium, de quo nunc non disputamus: alter est hominum omnium in societate viventium, atque inter se animi sententias communicantium ad vitam civilem commode transigendam, de quo hic differendum est. Hic usus exigit, ut verba adhibeantur cum iis notionibus, quæ cum illis conjuncta sunt inter eos, quibuscum loquimur. Ejus ratio est, quia alioquin verborum finis non obtineretur, sed frustraretur societas. Peccat autem gravius, aut minus grave, qui verba adhibet in usu civili cum alia notione, quam quæ recepta semel est, prout magis, vel minus jura societatis, vel singulorum lædit.

§. XXII. Porro regulæ generales circa hunc vocabulorum usum ad duas sequentes referri possunt. Prima est, quum nullius interest nec jure perfecto, nec imperfecto me loqui, tum tacere crimini verti nequit: jure vero crimini vertitur taciturnitas, ubi alterius interest me loqui. Ea regula demonstratur facile ex fine sermonis civilis. Hic finis est societatem inire, aut conservare, ut dictum est: at quum nullius interest, me loqui, nulla jura societatis aut ineundæ aut conservandæ exigunt, ut loquar; ergo quoniam in hoc casu omnis cessat finis sermonis, nullo jure cogor loqui. Quod si aliorum interfit, me loqui, tum jura societatis silentio læduntur: quocirca silentium in hoc posteriori casu crimini vertitur.

§. XXIII. Itaque dissimulare, seu studiose animi sensa tegere, quum nullius interest, neque ex jure perfecto, neque imperfecto scire, licitum semper est. Scio Ciceronem pertinaciter contendere, dissimulare non esse viri boni. Cujus opinionis, nisi ita accipiat, ut intelligatur ea dissimulatio, qua alter læditur, nullas video rationes: neque vero his in rebus tantum auctoritas valere debet, ut etiam sine ratione defendatur. Dissimulare vero, ubi agitur de bono aliorum, vel non lædendo, vel promovendo;
ad

ad quorum primum jure perfecto obligamur , ad alterum jure imperfecto , non modo viri boni non est , sed est contra justitiam ; laeduntur enim jura aut amicitiae , aut societatis .

§. XXIV. Sunt quibus placet , non eodem modo omnes peccare , qui tacent , ubi aliorum interest , eos loqui . Nempe contendunt eos , qui ex peculiari conventionē , aut pacto loqui tenentur , ut custodes publici , Reipublicae gubernatores , administri , testes publica auctoritate interrogati , ex justitia teneri ad loquendum , ut si taceant , vel dissimulent , indeque damnum nascatur , justitiam laedant , & ad reparationem damni teneantur : ceteros vero , qui loqui ex speciali foedere non obligantur , si taceant , laedere caritatem tantum , nec idcirco obligari ad damnum refarciendum .

§. XXV. Hujus autem doctrinae posterior pars est manifesto falsa , praesertim si agatur de iis rebus , quae ad publicam tranquillitatem & securitatem pertinent ; omnes enim qui in societatem convenerunt , seu diserte , seu tacite , sese obligaverunt ad ea omnia , quae societatis interfunt ; nam sine mutuis hujusmodi pactis nulla societas nec iniri , nec conservari potest . Inter pacta autem hujusmodi praecipuum est , ut in mutuam tranquillitatem & securitatem conspirent omnes . Quare in societate ex pactis ejus fundamentalibus alter alterius custos esse debet . Ergo quicumque silentio suo alterum perdidit , aut alterius bona laedi permisit , aut effecit quominus justitia locum haberet cum publica perniciē , justitiae leges violavit , ac proinde ad damnum reparandum lege naturae primaria obligatur . Illud verum est , neminem obligari cum suo damno , vel periculo , ubi non jus perfectum , sed imperfectum tantum exigit : nam jus humanitatis exigit quidem , ut alterius bona provehamus , sed ita ut ne nos laedamus .

§. XXVI. Altera regula est , contra legem naturae esse alterum verbis , aut aliis signis , quae vicem

eem verborum gerunt , circumvenire , decipere , atque idcirco laedere , & qui id efficit , reparare laesionem debere . Generalis est ejus regulae ratio cum ex lege naturae primaria , quae jubet , ut neminem laedamus , tum ex fine sermonis , & eorum signorum , quae vicem sermonis gerunt , ut scilicet , ne illis utamur contra receptum sensum . Mendacium ergo , idest abusus vocabulorum ad alterum decipiendum , atque ita laedendum , jure naturae primario prohibitum est . Ob eandem rationem jure naturae prohibita sunt omnes *aequivocationes* , & *restrictiones mentales* , ut vocant , ex quibus alterius jus perfectum aut imperfectum laeditur . Quare mirum est quum hujusmodi aequivocationes damnaverunt Gentiles ipsi Philosophi , inprimis severissime Cicero , inventos esse Philosophos Christianos , qui eas defendere potuerint , atque viam aperire infinitis modis alios ludificandi & defraudandi .

§. XXVII. Laeditur autem alter sermone mendaci , quum ejus jus aut perfectum , aut imperfectum violatur . Principio omnes Reipublicae administri jus habent perfectum a nobis exigendi , & ut loquamur , & ne mentiamur , vel aequivocemus in iis rebus , quae ad publicum regimen pertinent . Itaque si nostris mendaciis , vel aequivocationibus eos ludificemus , indeque damnum quodcumque in societate nascatur , contra naturae legem peccamus , & damnum refarcire tenemur . Praeterea omnes homines , cum quibus in naturali societate positi sumus , jus habent perfectum , ut ne a nobis in contractibus , conventionibus , promissis , laedantur . Quare si his modis laesi sint , jure ipso naturali reparationem exigere possunt . Ad haec omnes homines jus habent perfectum , ut nullo modo quibuscumque in rebus fallaci oratione circumveniantur , ex qua quidquam damni eorum animo , vitae , bonis externis , famae inferri possit . Quare si hujusmodi damna illata sint , reparare tenemur . Tandem omnes homines
jure

jure humanitatis imperfecto exigere a nobis possunt , ut quocumque modo scimus & possumus eos juvamus : si id detrectemus facere aut mentiendo , aut aequivocando , officia humanitatis violamus .

§. XXVIII. De mendacio officioso , ut vocant , disputatum est olim acerrime , hodieque disputatur inter doctos . S. Augustinus ad Cosentium hanc quaestionem vocat *latebrosam* , & *inter doctos alternantem* . Grotius Epist. CCXVIII. hac in re se valde aestuasse scribit . Est mendacium officiosum , quum verbis utimur aut contrario , aut diverso sensu , quam quo recepta sunt , ut alteri prosumus , nullius jus laedendo . Recentiores quidam scriptores *falsiloquium* appellant , atque in eo distinguunt a mendacio , quod mendacium semper conjunctum sit cum violatione juris alterius . Sed & sic dicitur *mendacium officiosum* , ut Vulpianus in L. 1. §. 3. ff. de dolo malo memorat apud antiquos & *dolum bonum dictum* : *veteres* , inquit , *dolum etiam bonum dicebant* , & *pro solertia hoc nomen accipiebant* . Nam dolum malum definit eodem loco Labeo , *omnem caliditatem , fallaciam , machinationem , ad circumveniendum , fallendum , decipiendum alterum adhibitam* quae eadem locum habent in dolo mendacio .

§. XXIX. Sanctus Augustinus in laudato loco negat mendacia officiosa esse licita . Eum sequuti sunt Theologi ferme omnes Occidentales . Duplici ratione utuntur . Prima , quod in scripturis sacris omne omnino mendacium prohibeatur . Altera , quod mendacium etiam officiosum cum Dei veracitate pugnat ; quae autem cum divinis perfectionibus pugnant vitia esse constat . Accedit tertia ratio , quod pugnat cum sinceritate viri boni , quae cum sit nobilissima virtus , necesse est , ut quod ei adversatur , sit vitium . Praeterea quaeritur , utrum cum mendacio officioso jurare possimus ? Quum id nemo affirmaverit , concluditur , his mendaciis conscientiae dictamen refragari .

§. XXX. Grotius vero , & Pufendorffius , ac quidam

dam ex Theologis nostris, in contrariam abeunt sententiam, putantque nullo nec naturae, nec positivo jure hujusmodi mendacia prohiberi. Principio, inquit, neque jura cujusquam laedunt, neque amoris aut erga Deum, aut erga nos, aut erga alios adversantur, quinimmo amorem erga proximum continent magnum. Deinde verba sunt instrumenta societatis; ergo licet iis uti in societatis beneficium, quocumque tandem modo adhibeantur, dum nullum nec Dei, nec hominis ullius jus laedunt. Accedit, quod non videretur posse damnari tot hominum honestorum exempla, ut Medicorum, & Administratorum Reipublicae, qui ut secreta tegant, ad hujusmodi falsiloquia saepe confugere tenentur. Tandem veteres aliquot, & doctissimi Patres, imprimis S. Johannes Chrysostomus in Libris de Sacerdotio, non audent haec falsiloquia damnare.

§. XXXI. Quod pertinet ad argumenta partis oppositae, primo respondent, prohiberi in scripturis mendacia perniciofa, nec ullum esse in iis verbum, ex quo possit intelligi, prohiberi etiam falsiloquia officiosa. Argumento vero a veritate Dei desumpto reponunt, nimis illud probare; probat enim mendacia quoque jocosa esse contra legem naturae, quae tamen ipse Augustinus non audet damnare. Praeterquam quod regula, inquit, actionum humanarum, quae efficit iustas, & honestas, est lex a Deo lata, non vero Dei natura. Nam homines quantumcumque conantur, nunquam possunt actiones suas ita componere, ut toti Dei naturae omnibusque Dei proprietatibus sint consentaneae. Quod pertinet ad tertium argumentum, ajunt sinceritatem tum esse virtutem, quam dissimulatio vel falsiloquium sunt contraria officii, quae Deo, vel aliis, debemus: alioquin aliis omnia nostra secreta propalare esset virtus, quam ut plurimum magnum sit stultitiae vitium.

§. XXXII. Quarto tandem argumento respondent, juramentum non homines tantum spectare, sed praeterea obsequium Deo debitum. Quum vero Deus in-

timas quoque cordis cogitationes intueatur, nefas est falsiloquium jurejurando confirmare.

§. XXXIII. Ego in quaestione ancipiti intelligo satius esse, ut ab iis quoque mendaciis vir bonus se absteineat: neque enim dubitari potest, quin iis uti levitatem quamdam contineat & sinceritatis virtutem laedat. Nam licet in posteriori sententia plus videntur probabilitatis intrinsecae, plus est in priori extrinsecae. Videtur enim aliquid concedendum tot viris doctis, & honestis, qui priorem sententiam amplexi sunt. Ceterum ubi quis ea falsiloquia admiserit, putandum non est ea per se levem culpam excedere.

C A P U T V.

De Officiis Justitiae hypotheticis, ab primum de Dominio, ejusque acquirendi modis originariis.

§. I. **Q**uae officia hypothetica dici solent, ea omnia ex duplici ferme fonte derivantur, dominio, & sermone. De Officiis, quae ex sermone proficiuntur, superius differuimus: Ergo superest ut hoc in loco de iis differamus, quae ex rerum dominio nascuntur, quae longe lateque patent, & in quibus (ea est hominum cupiditas) saepius peccamus. Prius vero quam id efficiamus, de natura ipsa domini, ejusque acquirendi modis secundum naturae leges dicemus.

§. II. Dominium Philosophi atque Jurisconsulti discrepantibus definitionibus definiverunt, superque ea re non minus contentiose concertarunt, quam super ipso rerum dominio inter mortales concertari solet. Quoniam vero hujusmodi concertationes ex jure civili magis quam ex naturali oriuntur; & subtilitates juris civilis natura ferme ignorat; hujusmodi disputationes missas faciemus. Placet igitur haec definitio, *jus, seu facultas alios, praeterquam se ipsum, usu rei exclu-*
den-

dendi, seu jus utendi, & omnem alium usu rei excludendi. *Uti* autem hoc in loco pro omnem omnino utilitatem capere positum est. Itaque fit ut dominium in duobus juribus positum sit, utendi, & excludendi alios.

§. III. Dominium autem est *vel proprietatis*, *vel communionis positivae*: illud est jus omnes alios praeter nos ab usu rei excludendi. Hoc vero jus excludendi ceteros praeterquam paucos. In illo res in unius sunt positae potestate & usu: in hoc sunt in usu & potestate paucorum. Hoc & apud veteres quasdam nationes obtinuit, quae majorem rerum partem in communione positiva habuerunt, quales Germani quidam Populi, de quibus Tacitus de moribus Germanorum, & hodie apud nos inter Monachos obtinet. Quae vero res ita sunt in medio omnibus expositae, ut nulli sit jus ullum ab earum usu excludendi, eae in negativa communione positae esse dicuntur. Vide Pufendorf. de jure naturali, & Gent. lib. 4. cap. 4. In hac communione si quis jus habeat rebus communibus utendi, nullum vero habeat jus alios excludendi, dominium non dicitur habere. Quo circa duo sunt necessaria, ut dictum est, ut quis rei alicujus integrum habeat Dominium, jus scilicet utendi, & jus excludendi omnes alios: alterum sine altero, verum & certum dominium non facit.

§. IIII. Ut igitur demonstrari possit, homines dominium rerum Telluris, in qua nascuntur, legitime habere posse, ostendendum est primum, eos habere a natura ipsa jus iis utendi. Deinde habere & jus quasdam res ita in usum suum traducendi, ut ab earum contrectatione jure possint ceteros excludere. Utrumque perfacile factu est. Principio Deus vult ut homines conserventur, quandoquidem vult ut existant. Quum autem ea sit hominum conditio, ut rerum externarum indigeant, quae aut nutriantur, aut contra ea, quae ipsorum compagem destruere possunt, muniantur; profecto eas omnes assuendi, usque ad

vitam conservandam, & tutandam utendi jus a Deo habent: alioquin frustra Deus & hominibus vitam dedesset, & hujusmodi res, quarum pars majorum nulum alium habet usum, produxisset, earumque genera perpetuo conservaret. Consule Pufendorff. de officio hominis & civis lib. I. cap. 12.

§. V. Deinde quod possint homines res quasdam exhausti usus ita in potestatem suam redigere, ut ab earum usu jure alios arceant, sequentes rationes demonstrant. Prima quod quarundam specierum individua, aut sui exiguitate, aut brevi duratione, non possint nisi uni aut paucis sufficere; ergo dum harum rerum aliquam occupavi, jus habeo utendi, & excludendi alios, quum non possit pluribus esse satis. Secunda, quod quaedam rerum genera sunt, quae, nisi industria humana excolantur, aut nullius sunt usus, aut admodum exigui. Si igitur earum partem aliquam ita ego excolui, ut fructus mihi necessarios, vel utiles producat, habeo jus ceteros excludendi, siquidem natura ipsa fit, ut quod ex me tantum est, meum sit. Tertia quod utcumque communio negativa inter paucos homines commode & pacate servari possit; in tanta tamen humani generis multitudine sine continuis discordiis servari nequit; quas discordias proculdubio non amat Deus, cujus leges omnes ad pacem, unitatem, & publicam felicitatem tendunt.

§. VI. Quoniam ergo homines legitimum dominium bonorum Telluris habere possunt, illud superest perquirendum, natura ne in rerum dominio naturali sint, an pactionibus a communione negativa, sed secundum naturae leges, in rerum dominium venerint? Melioribus juris naturae interpretibus placuit, primos homines in communione negativa creatos fuisse, atque in ea mansisse, quamdiu genus humanum intra paucos extitit. Grotius ferme solus in communione positiva primos mortales procreatos opinatur, ut ceteri post illos modis tantum derivativis rerum dominium acquisiverint. Sed prior senten-

tia probabilior profectio est, nisi ab altera solis vocabulis discordet. Enim vero quum Deus res Telluris in omnium hominum usum effecerit, non est credibile, ita primis duobus hominibus, earum usum dedisse, ut jus quoque dederit ceteros omnes excludendi, praesertim, quum illud necessarium non fuerit. Vere ergo Cic. Lib. I. de offic. cap. 7. scripsit. *Sunt privata nulla natura, sed aut veteri occupatione, ut qui quondam in vacua venerunt, aut victoria, lege &c.* S. sic quoque Ambrosius lib. I. de offic. cap. 18. *natura, inquit, omnia omnibus in communi profudit. sic enim Deus generari jussit omnia, ut pastus omnibus communis esset. & terra foret quaedam possessio communis. Natura igitur jus commune fecit, usurpatio jus fecit privatum.* Conferatur Pufendorff. Lib. 4. de jure naturae & Gentium cap. 2.

§. VII. Nec vero dubitare possumus, qui in hoc statu homines per aliquod temporis intervallum permanferint. Est hoc conforme primaevae hominum naturae, & magna veterum consensione firmatum. Nam principio non est verisimile paucos homines sanguine & primaeva charitate conjunctos, quum bona Telluris non solum sufficerent, sed abundarent, atque nec dum luxus, & ex luxu cupiditas & avaritia natae essent, ab ea communione voluisse discedere. Accedit eodem, quod post diluvium veteris illius communionis vestigia quaedam reperiamus in familiis Patriarcharum. Sed reperimus & inter barbaras ac efferatas gentes utriusque continentis, quibus nil dum proprii nisi quod manu cepere. Tandem idem tradidere plures veterum scriptorum, praesertim Plato, Thucydides, Aristoteles, Horatius, Justinus, Seneca, & illi qui seculum aureum descripserunt. Huc pertinet locus Virg. Lib. 1. Georgicorum vers. 125.

..... nec subigebant arva coloni,
Nec signare quidem, aut partiri limite campum
Fas erat: in medium quaerebant: ipsaque Tellus
Omnia liberius nullo poscente ferebat.

§. VIII. Quibus autem ex causis a primaeva illa rerum communione discessum sit, pluribus edisserunt Grot. de jure Bell. & Pac., & Pufendorff. Lib. 4. Cap. 2. Nec vero id explicatu difficile est: nam jure naturae, quod *permisissimum* dicitur, potuisse homines, ubi illa rerum communio minime apta esset vitae pacate transigendae, ab ea discedere, nihil est quod dubitemus: totius enim juris naturae finis, ut saepe dictum est, publica felicitate & tranquillitate continetur: communionem autem rerum adulto humano genere publicae concordiae & tranquillitati adversari, praesertim ut sunt hominum mores & affectus depravatissimi, quum per se manifestum est, tum barbarae illae nationes probant, quae in statu naturae viventes, in mutuo etiam ac perpetuo sunt bello. Ergo jure suo homines ab illa communione discedere potuerunt.

§. IX. Jam modi, quibus olim dominium privatum inductum est, & potest etiamnum induci, in *originarios*, & *derivativos* secundum Grotium dividi solent. Primi sunt *occupatio*, & *necessio*. Secundi vero *divisio*, *cessio*, *traditio*. Scilicet vel a communione rerum negativa usurpatione ad dominium transitur, & modus acquirendi dominium dicitur *occupatio*: vel rebus occupatis natura vel industria aliquid adjungit, & appellatur *accessio*. At res, quae in dominio sunt, vel sunt in *communione positiva*, vel in *proprietate*. Si primum ad proprietatem devenire licet *divisione*, & *cessione*: si alterum, *traditione*. Paucis haec nunc sunt explicanda, ut quae ex dominio nascuntur officia adversus alios, intelligi & dimetiri possint. Et in hoc quidem capite modos originarios expediemus: in sequente de derivativis differemus.

§. X. Ex iis, quae dicta sunt, patet, licere sub dominium nostrum conferre, quae vacua sunt, hoc est in medio posita, & usus finiti. Ea dicitur occupatio. Justa autem est & secundum naturae leges occupatio rerum aut nullius, aut derelictarum.

Ce-

Quare si res dominum habeat, sitque ab eo vel amissa, vel abducta furto, rapina, incendio, vento, flumine, raptu ferae, vel invite projecta, nulla occupatione nostra fieri potest: non dum enim dominus animum eam possidendi abiecit, nec propterea vacua est. Contra vero, si vel animi gratia projecit, ut Polycrates annulum in mare, vel amissam sciens prudensque pro derelicta habeat, ea cedit occupanti; est enim vacua.

§. XI. Ex his sequitur, venationem, piscationem, aucupium esse species occupationis licitas, non modo in locis desertis, & vacuis, verum etiam in territoriis jam occupatis, sicuti tanta sit ferarum, piscium, aut avium multitudo, ut sufficere omnibus videantur. Nam quumgearum rerum species sunt ita copiosae, ut inexhausti sint usus, semper in medio positae centendae sunt, praesertim si nullis locis cohiberi possint. Contra vero si sint tales rerum species, quae non omnibus sufficere possint, eaeque idcirco locis claudi possint, jure occupari possunt, nec in iis venatio, piscatio, aucupium locum amplius habere possunt, nisi quum ita evaserint e custodia, ut nulla domino sit amplius spes recuperandi.

§. XII. Quaeritur hoc in loco, an Mare possit occupari? Quaestio istaec acerrime inter Grotium, & Seldenum, aliosque Belgas & Anglos, saepe quoque inter Principes ferro & igne, disceptata est. Ejus controversiae historiam contexuit Baeclerus ad Grot. lib. 2. de jure Bell. & pac. cap. 2. §. 3. Placuit quibusdam mare non posse occupari, quia corporali possessione retineri nequit: nam occupatio animo simul & corpore facienda est. Id ipsum & ineptum jure censet Pufendorff. Nam mare navibus, portubus, propugnaculis, praesertim ad freta, & promontoria, non secus atque Tellus, corporali possessione occupari potest. Distinguendi potius sunt duo marium usus, quorum alter est navigatio, alter piscatio piscium, aliarumque exhausti usus, cetorum, gemmarum &c. Pri-

mus usus natura liber esse debet : natura enim humana exigit , ut inter plures nationes commercium intercedat . Atque inde factum est , quemadmodum praeclare observat Grotius , ut non omnibus ferat omnia Tellus , quo nationes diffitae necessario commercio inter se jungantur . Hunc usum occupare vel contra naturae legem est . Id tamen non vetat , quin si alicujus nationis navigatio possit esse infesta , vel perniciofa alteri , possit haec altera illam impedire , non jure occupationis maris ; sed jure defensionis , quod ita nationibus adversus nationes convenit , ut hominibus singulis adversus singulos . Alter vero usus , idest piscatio , quum est rerum finiti usus , jure naturae occupari potest , nec licet adversus eos , qui semel occupaverunt , depugnare , ut de possessione ejiciantur .

§. XIII. Illud etiam quaeritur , an occupatio bellica ex iisdem principiis justa demonstrari possit ? Ex quo tempore Martis furor homines adversus homines armavit , captis urbibus , aut direptis , capientium aexistimata sunt non tantum verbes ipsae , & agri , verum quoque homines , *divina humanaque omnia* , creditumque justas esse hujusmodi occupationes . Historici omnes , quum ea narrant , *jure belli* , *jure Gentium* ea omnia fieri victorum dicunt . Quum nulla occupatio justa esse queat , nisi rerum vacuarum , aut non jure occupatarum , ut demonstratum est , res vero in bello captae nullo modo dici possint vacuae ; quinimmo quaedam , ut homines , ne per fictionem quidem esse possint nullius ; sequitur earum rerum omnium occupationem non posse esse justam ex eo principio , quod sit rerum vacuarum . Laborant igitur viri docti , ut tale inveniant principium juris naturae quo hujusmodi bellicas occupationes defendere possint a furto & rapina .

§. XIV. Pufendorff. de Jure Naturae , & Gentium lib. 4. cap. 6. §. 14. sic rem componere studet . In bello res hostium in ordine ad alium hostem redun-

duntur dominio veluti vacuae , non quod hostes per bellum ipso jure rerum suarum domini esse designant , sed quia illorum dominium non obstat , quo minus hostis victor res eas auferre , sibi que habere possit . Quae doctrina huc redit , eas res esse vacuas , quia alter hostis ob majorem potentiam jure quasi suo auferre potest . Quod si verum est , *omnia sunt virorum fortium* , adeoque principium juris naturae , id est justii & injusti criterium , positum est in armis & viribus , quod mere Hobbesianum est , quodque ne Pufendorff. quidem ipse dixerit .

§. XV. Ego rem sic explico . Occupationes bellicas non posse esse justas , nisi in bello justo , exploratum est . Bellum autem justum tum geritur , quum aut jura nostra defenduntur defensione inculpata , aut ablata repetuntur . In his casibus secundum principia superius demonstrata licitum est eo usque bellum protrahere , quousque hostis in eo statu constituatur , in quo aut non possit amplius nos injuria laceessere , aut nostra nobis jura refecerit . Quod si ad hostem comprimendum necessarium sit ei vires auferre , urbes , divitias , homines , quin id sit justum nemo dubitabit . Accedit quoque , quod justitia ipsa exigat , ut dum initur pax , tantum rerum hostilium retineatur , quantum sufficit ad belli impensas compensandas .

§. XVI. Praeterea licitum est in bello justo retinere ea , quae reddita hostes iterum adversus nos armare possint . Homines vero nisi refractarii & perpetuo contumaces , nullo modo retineri possunt sub servitute , licet in custodia haberi queant ii , qui bello originem dedere , aut milites , donec res pace componatur , ne scilicet si restituantur , hostem adversum nos potentiores efficiant . Sic enim statuo , totam Ethnicorum philosophiam , qui opinabantur posse in capitis urbibus homines omnes aut ad interuersionem usque delere , aut servare ad justam servitutem , falsam omnino esse , nec locum habere posse , nisi in uno tantum casu , quum scilicet nullus alius

mo-

modus superest , quo ad justam pacem & obedientiam redigantur . Sed & imperium in homines in naturali statu viventes jure belli occupari nequit , nisi si occupetur , aut ad eos conservandos , ne scilicet illa naturali libertate abutentes in mutuam perniciem ruant ; aut ad nos rutos reddendos ab eorum incursionibus . Horum omnium una est ratio , quod homines omnes liberi nascentur , nec liceat sub imperium mittere , nisi aut ob eorum crimina , quae solo imperio expiari possint , aut ob eorum liberam deditionem . Ex his , quae dicta sunt dijudicari facile potest , an S. August. de imperio Romanorum disputans recte scripserit , *Romanis , si vellent esse justis , redeundum fuisse ad Casas .*

§. XVII. Ad justam quoque occupationem pertinent Thesauri , de quorum prioribus dominis nullo certo argumento vel indicio constat : ii enim naturaliter sunt inventoris , veluti res nullius . Quanquam aliter legibus quibusdam civilibus populorum constitutum quandoque est , id quod in antecessum fieri potest : nam potest populus , aut Princeps , cujus est territorii imperium , in antecessum haec sibi reservare , & quodammodo occupare ; quo casu inventor nihil juris habet in hujusmodi res . Sed leges Populorum civiles super thesauris videri possunt apud eos , qui ea de re ex instituto differuerunt . In primis consuli possunt Grot. de jure Bell. & Pac. lib. 2. cap. 8. ibique commentatores , Seldenus lib. 6. Juris Naturalis & Gentium cap. 4. , & Gotofredus tomo 3. codicis Theodosi : pag. 285.

§. XVIII. Veniamus ad accessiones . Alter modus , ut dictum est , acquirendi dominium originarius est accessio , per quam intelligimus jus ea , quae substantiae nobis acquisitae accedunt , incrementa nobis vindicandi . Quum autem res nostrae incrementum accipere possint vel naturae ipsius beneficio , vel industria nostra , vel natura & industria simul ; inde factum est , ut jurisconsulti accessionem partiti sint

sint in *naturalem*, *industrialem*, & *mixtam*. Sic, e. g. folius naturae beneficio debemus faeturam animalium, accessionem per alluvionem, & similia: industriae nostrae tantum speciem rei nostrae industrialis, scripturam, sculpturam, picturam, & similia. Denique messem, vindemiam, aliosque fructus telluris nostrae naturae simul & industriae debemus.

§. XIX. Quod autem pertinet ad justitiam hujusmodi accessionum, in naturali accessione distinguendum putat Grot., utrum res nostra tale cepit incrementum, de cujus origine & priori domino nullo certo argumento constet, vel aliquid, quod in alterius dominio est, rei nostrae accessit. Priori casu, quum res illa, de cujus domino nihil certi constat, pro re nullius merito habeatur, ea jure nobis cedit, veluti vacua, seu nullius. At in posteriori casu res habet dominum, qui alios usu rei suae jure excludere potest; ea igitur nostra effici nequit. Quare si possit separari a re nostra, reddenda est priori domino: si non possit, dandum est pretium. Haec omnia manifesto fluunt ex iis regulis, quae superius positae sunt.

§. XX. Porro super accessionibus industrialibus, & mixtis sequentes regulas, ex principiis juris naturae statuit Heineccius de jure Naturae, & Gent. lib. 1. cap. 9. Quum agatur de accessione rei alienae ad rem nostram nobis invitis, aut insciis, (nam si consenserimus, res utraque in communione positiva erit), distinguendum est, utrum ea accessione res nostra evaserit deterior, vel plane inutilis, an vero melior, praestantiorque. Primo casu, qui id efficit accepta re corrupta, ubi eam dominus concedere velit, tenetur ad omne damnum nobis refarciendum, id est ad restituendum non solum rei pretium, etiam justae affectionis, verum etiam quicquid in bonis nostris laesit. Id sequitur manifesto ex regulis de nomine laedendo, quas natura omnibus praescripsit, & quas superius explicuimus.

§. XXI.

§. XXI. In secundo casu iterum distinguendum est, possint nempe res junctae sine notabili dispendio & damno separari, necne. Primo casu, quum utriusque rei domino jus sit alterum rei suae usu excludendi; id vero aliter fieri nequeat, quam rebus illis separatis, conficitur eas esse separandas. Posteriori casu alteri addicenda est, qui alteri pretium rei suae reddat. Addicenda autem est ex regulis prudentium ei, cujus pars nobilior est, & praestantior. Scio Jurisconsultos Romanos censere, ubi duae res dolo malo junctae sint, accessionem sequi dominum principalis, qualis est aedificatio in solo alieno. Si id fit ex legibus societatis civilis, idque in paenam ejus, qui prudens ac videns rem suam alteri conjunxerit, non audeo damnare, dummodo, ne res juncta sit magni pretii. At id ex lege naturali non sequitur, neque consentaneum est mutuae hominum charitati. Ex his principiis responderi potest infinitis quaestionibus, quas super his rebus Jurisconsulti, & Theologi morales excitaverunt: nos principia explicanda suscepimus, non singulas species definiendas.

C A P U T VI.

De modis acquirendi Domini derivatis.

§. I. **Q**uae in dominio jam constituta sunt, vel sunt in communione positiva, vel in proprietate, ut supra dictum est. A communione positiva ad proprietatem fit transitus, aut divisione, aut cessione. Divisione quidem, si quilibet partem rei juri suo proportionatam in proprietatem accipiat: cessione vero si rem totam reliqui socii ei cedant. Res vero in proprietate positae transeunt in alterius dominium traditione, cujus nomine intelligo omnem omnino alienationem, quae jure fit.

§. II. Alienationes dividi solent ab iis, qui haec
sub

subtilius disputant, primo in *voluntarias*, & *involuntarias*, seu *necessarias*. Necessariae appellantur eae, quae ex anteriori acquirentis jure proficiuntur, quae necessariae dicuntur in effectu, non in causa: neque enim ulla alienatio in causa necessaria concipi potest. Voluntariae vero sunt, quae de novo decernuntur, libere consentientibus tradente & accipiente. Secundo dividuntur in *puras*, & *conditionales*. Primae domini translationem a nulla conditione suspendunt; secundae vero a conditione aliqua vel circumstantia. Tertio dividuntur in alienationes de praesenti, & de futuro. Primae sunt, quum nobis adhuc vivis rerum nostrarum dominium in alios transfertur: secundae quum transfertur post mortem nostram. Jam consensus in futuram alienationem vel est expressus, & dicitur alienatio testamentaria: vel ex fine, intentione, & conjectura voluntatis colligitur, quemadmodum putat Grotius, & dicitur successio ab intestato.

§. III. Quum res in communione positiva est, jure naturae, nisi aliud pactis constitutum sit, cuilibet licet provocare ad divisionem, portionemque suam repetere, praesertim si ea communio minus sit ei commoda, ut scilicet dominium juris sui plenum habere possit. Nisi enim id liceret, inutile esset rerum dominium. Quid, inquit aliquis, si communio illa his legibus statuta sit, ut esse debeat perpetua? Respondeo pacta sancte servanda esse, sed eas communionis illius leges non posse semper intelligi ita, ut etiam si minus commoda sit sociis communio, perpetuo retinenda sit: neque enim credendum est, socios his legibus communionem inire voluisse; quia natura fit, ut quisque statum minus commodum aversetur. Quare ea pacta interpretationem aliquam excipere possunt. Id tantum vetat non pactorum modo fides, sed lex naturae primaria, ne tunc a communione discedere velimus, quum fieri nequit sine aliorum sociorum damno.

§. IV.

§. IV. Res autem communis vel dividua est, vel individua. Si primum nihil magis aequum est, quam ut scindatur in partes, ac sua cuilibet addicatur. Si posterius, uni addicitur, qui ceteris sociis pro ratis portionibus satisfaciat: nequem enim ad divisionem jure provocari potest, quippe qua res corrumpitur. In addicenda uni prae aliis re indivisibili, aut eligenda persona ex communi sociorum consensu, aut, ubi plures contendunt, sorti id committendum est. Nam quod quidam docent, rem addicendam ei personae, quae praerogativa aliqua ab aliis distinguitur, id ex jure naturae non est, quando agitur de Justitia commutatrice.

§. V. Sunt res quaedam pluribus communes, ad quas licet omnes simul jus perfectum habent, nemo tamen habet singillatim: e. g. ad eleemosinas, quas montes Pietatis dicti elargiri ex legato debent, omnes pauperes jus habent acquisitum ex eorum legatis, qui hujusmodi montes fundaverunt: sed nemo habet singillatim jus perfectum. In his rebus dividendis locum non habet perfecta aequalitas rei dividendae, sed proportio Geometrica; nec ex jure perfecto, sed imperfecto. Proportio Geometrica in hoc posita est, ut sit ratio dati ad jus ejus cui datur, ut ratio ejus, quod datur alteri ad ejus jus. Ita si sit 6. ad 2. in ratione tripla, erit 12. ad 4. in eadem ratione. Quare in his rebus dividendis servandum non est illud, ut totum ad totum, ita pars similis ad similem, sed potius illud, ut sit datum X. ad indigentiam, e. g., pauperis A., ut est datum Z. ad indigentiam pauperis B. Explicemus hoc exemplo: Mille pauperes habeant jus ad mille aureos natum ex alterius benignitate. In his aureis distribuendis non est servanda prior illa proportio, ut singulis pauperibus dentur singuli aurei, sed haec potius, ut si pauperi A. cujus indigentia erat 6., datum sit 2.; pauperi B. cujus indigentia est 12., detur 4.: ita servabitur proportio Geometrica. Eadem porro propor-

tio servanda est in iustitia distributrice, quum agitur de paenis, praemiis, aut officiis ex cuiusque meritis distribuendis, modo nihil praecessit, quo jus iustitiae distributricis evaserit jus strictum iustitiae commutativae. Ea vero quae dicitur ab Aristotele proportio Arithmetica, quae posita est in medio indivisibili & aequaliter ab utroque extremo distante, quale est 6. a. 2. & 10., locum in his rebus nullum habere potest, sed ne in iis quidem semper virtutibus, quae nostris custodiam & culturam spectant, quod paulo post ipse Aristoteles animadvertit.

§. VI. Quaeritur hoc in loco, quanam harum proportionum in paenis infligendis servanda sit? Distinguendum est: habent enim paenae duplicem finem, satisfactionem injuriae alterius datae, & publicum exemplum, ne scilicet similiter peccetur. Quod ad primum finem, perfecta aequalitas servanda est; agitur enim de jure alterius perfecto reparando. Quod ad alterum finem Geometrica proportio locum habere debet: nam plerumque ob publicam utilitatem licet esse paulo severiorem, seu gravius punire, quam crimen absolute consideratum meretur. Quandoque ob eandem rationem licet aliquid remittere de constituta poena, si id futurum sit in publicam utilitatem.

§. VII. Si res communis uni sociorum attribuitur, ea vocatur cessio. Quum autem unus in reliquorum omnium locum succedat, sequitur eum succedere quoque in jura omnia eorundem, atque idcirco subire debere, ut omnia commoda, ita incommoda. Ex quo naturali principio recte deduxerunt Jurisconsulti Romani, easdem omnino exceptiones opponi posse cessionario, quibus adversus cedentem locus fuisset. Sed ex eodem principio sequitur, seu res dividatur, seu concedatur uni, intelligi traditum liberum dominium rei: ac propterea socios efficere debere, ne dominus in eo dominio impediatur a causa aliqua antecedente. Id torum dicitur a Jurisconsultis *evictionem* rei praestare. Quocirca praestatio evictionis ex ipso naturae jure proficiscitur.

§. VIII.

§. VIII. Veniamus ad traditionem. Homines rerum dominos dominium patrimonii sui, aut totum, aut ex parte in alios transferre posse, juris est naturalis post introductum rerum dominium: inest enim hoc jus in ipsa domini plenæ natura, quæ posita est in jure omni modo re sua utendi. Itaque præclare Aristot., *proprietas*, inquit, *definitio est, ubi pones nos est jus alienandi*. Ceterum nulli dubium est, quin possit per societatem, aut eum, qui in societate summum habet imperium, constitui, ut non nisi sub certis conditionibus dominium transferatur: nam rerum privatarum dominia non possunt ita administrari, ut publica civitatis felicitas laedatur. Quare jure prodigis alienare prohibetur: jure prohibetur alienare iis, qui nondum plenam rationem habent. Eadem de regula in quibusdam civitatibus prohiberi potest alienare in estraneos quædam rerum genera. Eæ autem prohibitiones naturæ domini non adversantur: siquidem ipsa naturæ lex præcipit, ut ita rebus nostris utamur, ut neminem interea laedamus, ne ipsis quidem nobis exceptis.

§. IX. Ex doctrina Jurisconsultorum, dominium traditione translatum non intelligitur, nisi rei possessione tradita. Apud plerâque etiam Europæ Gentes exigitur, ut traditionis apud Populum, aut Magistratum fiat professio, & relatio in acta. Quæ omnia ex jure sunt civili, prudenter licet statuta ad fraudes cavendas. Nam alioquin jus naturæ hujusmodi formalitates ignorat: sufficit nempe nostra voluntas tradendi expressa per verba, aut alia signa externa, & consensus acceptantis, item aliquo signo externo expressus. Externa autem esse debent signa dantis, & acceptantis: nam solus actus internus non est congruens naturæ societatis humanæ. Vide Grot. de jure Belli, & Pacis lib. 2. cap. 6., ibique Cocceii.

§. X. Sed ut transferatur dominium necessarium quoque est, ut qui tradit rem aliquam, habeat, aut habere possit transferendi voluntatem. Quocirca ex
com-

commodato, deposito, locato non intelligitur dominium transferri, multo minus si res tradatur praecario, vel alio titulo pro tradentis arbitrio revocabili: non enim qui tradit voluntatem habet alienandi. Praeterea si animum tradendi vel alienandi habere quis nequeat, quo tempore tradit, ut infans, furiosus, mentecaptus, similes; nullo modo transfertur dominium: nam voluntas non est rationalis.

§. XI. Jam vero potest quis non integrum dominium transferre, sed sibi ex re sua commodum aliquod, aut utilitatem, reservare: potest ad tempus, aut sub conditione aliqua, vel obligatione transferre: Id enim proprium est dominii pleni & absoluti. Inde natae sunt servitutes, inde genera dominiorum, pleni, & minus pleni, directi, & utilis, de quibus diligentissime Jurisconsulti differunt. Omnes hujusmodi alienandi species ex natura dominii consequuntur. Quare, quum dominium rite acquisitum vim habeat ex lege naturae, inde quoque haec omnia vim suam trahunt; quae proinde servare necesse est.

§. XII. Inter species alienationis usitatiores & testamentum recensetur. Sed illud inter doctos summo opere controversitur, utrum ex jure naturae, an vero ex jure civili vim suam habeant testamenta. Ea controversia non parvi est momenti, Etenim si testamenta jure naturae rata sunt, nulla humana auctoritate aut rescindi, aut immutari possunt, sanctumque habendum est, quodcumque eum in modum statutum est. Contra vero si ex jure tantum civili vim suam habent, ubi summus Imperans e republica esse judicaverit, ea rescindere, vel immutare jure suo potest, velut summus Reipublicae moderator.

§. XIII. Ut ea controversia rite componatur omnium primum constituenda est testamenti definitio, ut ejus constet natura. Grotius lib. 2. de Jure Belli, & Pacis cap. 6. §. 4. testamentum sic definit, *alienatio universi patrimonii nostri in mortis eventum, ante eam,*

Tom. IV.

M

revo-

revocabilis, retento interim jure possidendi, & fruendi. At recte Pufendorff. lib. 4. de Jure naturae, & Gent: cap. 10. §. 2., aliique viri docti observarunt, Grotianam definitionem esse contradictoriam, seu constare ex repugnantibus: neque enim testamentum esse potest alienario, ubi & revocabilis sit, & retineatur jus possidendi, & fruendi, ac consequenter alios excludendi. Hoc enim jus integrum dominium constituit, quod ubi non transfertur, ne alienatio quidem testamentum esse potest. Sane vero posita Grotiana definitione rogant, quandonam testamentum alienatio sit, ante ne quam testator moriatur, an postquam obierit? non primum, quum adhuc retineatur dominium: nec alterum, quum jam dominio excesserit, quod idcirco transferre amplius nequit: morte enim rerum terrestrium finiuntur dominia. Itaque rectius Pufendorff. ipse testamentum ex mente Jurisconsultorum Romanorum definit, *declarationem voluntatis nostrae circa successores in bona nostra post mortem nostram, quae tamen ante mortem pro libito nostro sit mutabilis, & revocabilis.* Est scilicet hujusmodi declaratio pollicitatio quaedam, quae nullum jus in heredem transfert: tales enim pollicitationes revocabiles esse ipse ostendit Grotius lib. 2. de Jure Belli & Pacis cap. II.

§. XIV. Hac posita definitione, quaeritur, an introducto legitime rerum dominio, ex ejus natura necessario consequatur, ut quis ita efficaciter testari possit, ut ejus testamentum jure naturae vim & efficaciam habeat, quemadmodum omnis alia voluntaria alienatio, quae inter vivos fit? Grotii mens est, testamentum, ut alios actus externos, qui societatem spectant, formam certam posse accipere a jure civili, secundum quam nisi instituantur, effectum nullum sint habituri: at substantiam ipsam testamenti cognatam dominio esse, eoque posito, esse juris naturalis. Sed dubia super ea re non levia movet Pufendorff. Henricus vero de Cocceii Commentario

rio in eum Grotii locum, Samuel de Cocceii dissertatione 12. prooemiali ad Grot. lib. 4. cap. 3. sectione 4. Heinecc. Lib. 1. Juris naturalis & Gent. cap. II., alique viri docti, rotunde negant testamenta juris esse naturae.

§. XV. Nos sequentibus propositionibus rem expediemus, Prima est, non potest jus naturae rata habere testamenta tanquam alienationes in mortis eventum. Primum, alienatio non fit nisi voluntate rationali, qua volumus dominium transferre: quum autem testatores neque vivi dominium rerum suarum in heredem transferant, neque possint transferre postquam occiderunt, quia dominia morte finiuntur; sequitur testamentum non esse alienationem, neque id circo velut alienationem a lege naturae comprobari. Videntur hoc intellexisse Jurisconsulti Romani, qui ut huic difficultati obviam irent, ad fictiones confugerunt: Finxerunt enim momentum aditionis hereditatis cum momento mortis testatoris idem esse, & hoc momentum unum idemque cum momento testamentifactionis. Sed hujusmodi fictiones alienae sunt a naturae simplicitate & veritate.

§. XVI. Deinde, omnis alienatio ut vim a natura habeat exigit in alienante voluntatem dandi, in excipiente recipiendi, quae in testamento desunt. Tum dominium rerum terrestrium in usum presentis tantum vitae nobis concessum est; ergo morte finitur. Quare quum jus alienandi sequatur dominium, nullum nobis competere potest, postquam occidimus. Testator autem non alienat vivens, quia nullum jus transfert in heredem; ergo Testamentifactio vim habere nequit ex naturali lege tanquam alienatio.

§. XVII. Altera propositio est, consentaneum est juri naturae rata servare testamenta, ubi nihil reipublicae interest: at si reipublicae intersit, potest illa summus Imperans aut rescindere, aut permutare. Ratio primae partis est, quia interest tranquillitatis.

publicae ita esse singulis persuasum, ut possint de rebus suis disponere post mortem. Ad rem Quintil. declamatione 308. *Neque enim aliud videtur solatium mortis, quam voluntas ultra mortem; alioquin potest grave videri & ipsum patrimonium, si non integram legem habeat, & quum omne jus in id nobis permittatur viventibus, auferatur morientibus.*

§. XVIII. Secundae partis demonstratio omnium expeditissima est. Tota enim ratio, ob quam testamenta juri naturae conformia pronunciamus, desumta est ex fine legum naturalium, publica scilicet tranquillitate: ergo ubi ejusmodi sunt testamenta, ut publicae utilitati & tranquillitati adversentur, nullo modo aequum est, ut servantur rata. Jam vero quum judicium supremum earum rerum, quae ad publicam civium utilitatem pertinent, in imperio civili sit summorum Imperantium; efficitur eorum juris esse ejusmodi species perpendere, & secundum publicam utilitatem definire. Nec desunt exempla apud veteres rescissorum testamentorum etiam secundum solemnitates juris civilis factorum, veluti quum testamentum Tiberii Senatus irritum declaravit, ut narrat Dio lib. 49., & testamentum Virgillii, quo constituerat, *sua rapidis aboleri carmina flammis*, invalidavit Augustus. Accedit, quod Romani ipsi Jurisconsulti & Imperatores non omnibus testamenti factionem concedunt. Ita e. g. deportatus non habet testamenti factionem, etsi retineat omnia, quae sunt juris naturae, l. i. c. de bonorum possessione.

§. XIX. Quae autem dicta sunt in priori propositione ita intellecta volumus, ut infinita illa testandi licentia, quam leges Romanae induxerunt, quae nullam aliam habeat regulam, nisi testatoris libidinem, non ex jure naturae, sed civili tantum vim habeat. At liberorum, Nepotum, aliorumque in linea recta successio in bona Paterna, vel avita, jure & ordine naturae constat, quia ex jure & ordine naturali est, ut Parentes liberis, quos voluntarie genuerunt

runt, provideant. Secundo quia in ordine naturæ est, ut Parentes in bonis acquirendis non sibi tantum, sed posteritati quoque suæ prospiciant; quo fine defraudaretur natura, si eorum posteritas ab hereditate excluderetur. Tertio quia tota linea recta dum superstes est una cum stipite in eorum bonorum possessione est, ut idcirco una occupasse videatur. Quarto quia familia est unum corpus artificiale, cujus caput natura ipsa est Paterfamilias, aut, eo deficiente, is, qui Patri conjunctior est. Quare ut in Imperio familiae naturaliter succedit is, qui Patri est conjunctior, ita quoque succedit in bonorum possessione, quæ est ratio Samuelis de Cocceii. Hinc apud veteres quasque nationes non aliud ferme testamentum obtinuit, quam hoc, ut sui cuique liberi, aut sanguine conjunctiores, heredes essent. Apud Germanos, *heredes successoresque sui cuique liberi, & nullum testamentum*. (Tacitus de moribus Germanorum cap. 20.) Idem antiquitus observatum Athenis colligi potest ex Plutarcho in Solone. Idem factitatum apud Hebræos demonstrat Seldenus de Successione ad leges hebræorum cap. 24.

CAPUT VII.

De Officiis, quæ ex dominio rerum proficiunt.

§. I. **Q**uemadmodum bona Telluris iuste & honeste nostra efficere possimus, iisque pacata uti conscientia, in superioribus demonstratum est. Nunc in id inquirendum, quæ super iis adversus alios officia servare oporteat. Officia, quæ adversus alios ex rerum dominio nascuntur, paucis regulis complexus est Pufendorff. de officio hominis & civis cap. 13. Eas nos in medium proferemus paucis adnotationibus additis. Prima regula est, *ut quilibet teneatur alterum (non hostem, adversus quem bellum iustum gerat) pati rebus suis quiete frui, neque vi, aut per fraudem illas*

illas corrumpere, intervenire, aut ad se trahere, qua regula furta, rapinae, damna, injuriae, fraudes, & alia crimina in res alienas tendentia, prohibentur. Ejus regulae ratio ex omnibus systematibus juris naturalis desumi potest. Primo id exigit custodia societatis: ita enim societas sancte custoditur, si cuique sua jura servantur. Secundo id postulat amor, quo ex lege naturali omnes amare tenemur: is enim vetat cuique injustum dolorem inferre. Tertio non patitur contrarium natura dominii, quod, ut demonstratum est, leges naturae probant. Tandem id gentium omnium leges civiles confirmant. Nam quamquam de Aegyptiis, & Spartanis contrarium referatur, quippe apud quos furta permessa fuisse dicuntur; ea tamen, quae dicebantur furta, proprie dicta furta non erant, ubi omnes consentiebant: quandoquidem quibus in casibus bona dominorum voluntate veluti in medio posita sunt, nullum furtum admitti potest.

§. II. Sed quaeri potest, utrum eadem lege prohibeantur usucapiones, itaut praescriptio longi temporis, vel immemorialis, res alienas nostras facere nequeat? Usucapiones longi temporis vel immemoriales res alienas efficere nostras, legibus Romanorum civilibus statutum est. Quumque eae leges evaserint jus commune gentium Europaeorum, hinc hujusmodi praescriptiones in tota Europa invaluerunt. Sed & apud Hebraeos, & Graecos, aliasque antiquas Nationes idipsum approbatum legibus. Vide Grotium lib. 2. de jure Belli, & Pacis cap. 4. Cicero in 2. de officiis contra aequitatem esse pronunciat, *ut agrum multis annis, aut etiam seculis ante possessum, qui habuit amittat.* Grotius idipsum sequentibus argumentis confirmat, quod scilicet & controversiae nunquam finirentur, & omnium animi dominiorum incertitudine perturbarentur, & lites ex litibus sererentur, si longi temporis praescriptio res alienas non faceret nostras.

§. III. At difficile est demonstrare ex principiis juris

juris naturae, usucapiones quantivis temporis iustas evadere posse, nisi accedat voluntas legitimi domini. Ipse Grotius agnoscit, tempus suapte naturam nullam effectricem habere: *Nihil*, inquit, *fit a tempore, quanquam nihil non fit in tempore*. Efficere ergo tempus nequit, ut quod meum est, sine voluntate, aut facto meo, evadat alienum. Quod si leges civiles id constituunt, censendum est id efficere in paenam, qua legitimus dominus ob suam negligentiam punitur. Ac vero, aut res, quae usucapitur, a nobis sublata fuit furto, vel rapina, & tum lex ipsa duodecim tabularum negat usucapi posse, *Adversus furem aeterna auctoritas esto*; aut casu vel fortuito in alienam possessionem transiit, & possessor posterior, quum legitimus ejus dominium non habeat, ne transferre quidem potest in alios, ut perspicte ratiocinatur Cujacius ad l. 1. de usucapionibus. Vide & Samuelem de Cocceii dissertatione 12. proemiali ad Grotium lib. 4. cap. 3. Sect. 5.

§. IV. Secunda Pufendorff. regula est, *quando res aliena ad nos pervenit sine nostro crimine, & bona nostra fide, eamque adhuc in nostra potestate habemus, tenemur efficere, quantum in nobis est, ut illa in potestatem legitimi sui domini redeat*. Scilicet id exigit natura domini, & generica illa naturae lex; quae suum cuique jus tribuendum praecipit. Ceterum non tenemur rem hanc restituere nostris impensis, si periit: nullo enim crimine eam habemus. Praeterea si quas in ea servanda impensas fecimus, recte possumus repetere, aut tantisper, quoad illae compensentur, retinere. Ad restituendam porro rem tunc actu tenemur, quum nobis innotuit, rem illam esse alienam. Sed quod justo titulo acquisivimus, non tenemur ipsi in dubbium revocare, & velut publice denunciare, quousque solida dubitandi argumenta nos non sollicitent.

§. V. Et hoc quidem officium rem alienam legitimo domino restituendi prius est atque potius of-

ficiis ceteris , quae ex peculiari contractu nascuntur , ut si collidantur , illud servandum potius sit , quam haec . E. g. si quis rem furtivam , me imprudente , apud me deponat , & interim mihi innotescat dominus , teneor furi restituere ex peculiari officio depositi , domino vero legitimo ex officio generico domini : quum autem posterius officium sit potius & antiquius ; efficitur ut nullus super sit locus officio peculiari , quod nascitur ex deposito . Neque necesse est distinguere inter jus civile , & naturale , quod efficit Triphonus in l. 31. ff. depositi : Jus enim naturae antiquius est & potius jure civili , ut si collidantur , prius servandum sit . Laudo ego Jurisconsultorum Romanorum sollicitudinem , qui his disputationibus bonam fidem inter cives firmare student : sed nego eam firmari posse officiorum naturalium violatione , ut civilia serventur .

§. VI. Regula Pufendorff. tertia est : *Si res aliena bona fide parva sit consumpta , officii est naturalis tantumdem restituere domino , quantum ex eo patrimonio nostro accessit , seu in quantum facti sumus ditiores , ne scilicet ex immerito alterius damno lucrum capiamus .* Eam tamen regulam sic intelligendam docet , ut restituere teneamur id , in quo facti sumus locupletiores aut ex ipsius rei substantia , aut ex rei fructibus naturalibus , non vero si ex fructibus industriis . Oppugnat hanc regulam Barbeiracius adnotationibus in opus majus Pufendorffii , eo argumento , quod qui possidet bona fide tantisper dum possidet loco domini est , ac propterea ut dominus omnem utilitatem ex re possessa jure capere potest . Sed , me saltem auctore , praevalere debet principium alterum , *neminem locupletari oportere immerito alterius damno .* Videri possunt , quae ad hunc locum Pufendorff. adnotavit Everardus Otto .

§. VII. Superiorem regulam sequentibus aliis idem auctor illustrat . Prima est , *possessor bonae fidei non tenetur ad ullam restitutionem , si res perierit , nec quidquam*

quam ex ea patrimonio nostro accessit. Nulla scilicet ratio exstat, quae eum obligare possit ad restituendum.

Secunda, bonae fidei possessor tenetur ad restituendam rem, si extet, & simul fructus exstantes; naturaliter enim ad quem pertinet res, pertinent & fructus naturales. Licet tamen hujusmodi possessori detrudere omnes impensas in re ejusque cultura factas, saltem impensas necessarias, & utiles.

Tertia, bonae fidei possessor tenetur ad restitutionem fructuum consumptorum, si alias ex rebus suis tantundem consumpturus fuisset. Regula est Grotiana, super qua itidem cum Barbeiraciolis est.

Quarta, bonae fidei possessor non tenetur compensare fructus quos neglexit; quia nec re habet, nec quidquam inde rei suae accessit.

Quinta, si bonae fidei possessor rem alienam sibi donatam alii donaverit, non tenetur tantundem restituere, nisi omnino ex officio aliquo tantundem donaturus fuerat: tunc enim lucrum fuit rei suae percipisse.

Sexta, si bonae fidei possessor rem alienam oneroso titulo acquisitam, veluti emtione, commutatione &c., quocumque modo alienaverit, non tenetur restituere, nisi quatenus ex ea lucrum fecerit. Ratio eadem est, quae in superioribus prolata est.

Septima, bonae fidei possessor etiam oneroso titulo rem alienam acquisitam tenetur restituere, si extet, neque dominum id quod pro ea erogavit pretii reposcere potest, sed actionem adversus illum habet, abs quo eam rem accepit.

§. VIII. Regula tandem Pufendorff. quarta generalis est hujusmodi, *qui rem alienam invenit, quam domino invito excidisse probabile est, non potest eam colligere hoc animo, ut domino repetenti denegat*. Quamquam si dominus non appareat jure retinere potest.

Hujus regulae ratio eadem est, atque superiorum. Singularis fuit super hac re Spartanorum lex, quae
non

non posuisti ne tollas. Quae lex nullo modo commendari potest, ne dum in copiosis & frequentibus urbibus, sed ne in agris quidem, quum utrobique facillimum sit hujusmodi res jacentes corrumpi. Humanitatis potius jura docent, ut res jacentes tollantur, & loco depositi habeantur. Ex hac porro regula adjudicari potest, quid censendum sit de quarundam Nationum lege, qua res naufragorum Fisco addicuntur: eam enim esse contra naturam ratio disertissime docet. Pluribus adversus hujusmodi leges declamaverunt Bodinus de Republica lib. 1. cap. 10. Grot. lib. 2. de Jure. Bel. & Pac. cap. 7. Jacobus Gothofredus de imperio maris cap. 2., alique. Ac revera quid est aliud hominem adversa fortuna conflictatum velut pro summa miseriarum spoliare?

§. IX. Quae in loco potest, ubi dominus non compareat, quid faciendum sit de rebus inventis? quorundam Theologorum opinio est, res hujusmodi erogandas esse in pauperes. Nempe id est de alieno esse benignum. Itaque si ex jure perfecto id docent, errant profecto: quum enim tales res non sint pauperum, nullo jure perfecto cogimur pauperibus dare. Si vero pronunciant ex jure beneficentiae, tum id faciendum est, quum eae res nobis necessariae non sunt. Siquidem jura humanitatis a nobis incipiunt. Pertinet ad hanc rem illud Senecae, *dabo egenti, sed ut ipse non egeam: succurram perituro, sed ut ipse non peream*.

C A P U T VIII.

De pactis & contractibus, deque officiis inde provenientibus.

§. I. **H**ominum improbitas ac mala fides primam pactis originem dedisse videtur: nam inter viros undequaque bonos, juris & honestatis amantes, ac propterea naturaliter & reciproce amicos

cos ; nullus pactis locus est , quia necesse non est . Praeclare ab Aristotele observatum est , in locum amicitiae iustitiam successisse , quae ut legibus contineretur necessarium non fuisset , si homines , ut natura esse deberent , ita revera essent sinceri alii aliorum amici . Contractibus vero commerciorum tres , ut mihi videtur , causae originem fecere , dominia , nostri immoderatus amor , & rerum ad vitam necessariorum non ubique eadem copia . Nam primum cum res in proprietatem hominum devenerunt , ab earum usu ceteri omnes , praeterquam possessores , sunt exclusi : ergo ubi earum rerum indigent , ad commercium , & contractus confugere debent . Deinde si inductis dominiis tanta esset hominum erga homines caritas , ut nihil , quod aliis deest , non statim a locupletioribus suppeditaretur , commercio , & contractibus locus non esset . Tandem *non omnibus fert omnia Tellus ,*

Hic segetes , illic veniunt felicius uvae .

Ergo inde quoque factum est , ut dissitae nationes rerum commercia inter se se instituerint , ut earum rerum , quibus ad usum vitae indigebant , sibi copiam pararent . Videatur Grot. sub initium libelli *De mari libero* .

§. II. Sed quo commercia inter homines mutuo sibi diffidentes cum aliqua securitate agerentur , ad contractus , quae iurisjurandi religione sanciebantur , ventum est , habuitque iis simplicioribus temporibus , etiam inter feroces homines , eam vim sola pactorum religio , quam nostrorum temporum , quum religio magno publico malo contemni coepit , atrocissimae poenae non habent . Est autem contractus *duorum consensus de rebus operisve inter se se ex obligatione perfecta communicandis* . Itaque vis contractus nascitur ex mutua promissione , seu pacto , cui standum , nisi res commutentur , jus naturae aperte docet : nam qui pactis & promissionibus non stat , eum laedit , cui promissum est , quod lex naturae vetat . Communicantur autem aut

res

res cum rebus , aut operae cum operis , aut res cum operis : nam haec tantum sunt in commercio . Sed ut in hac commutatione nemo laedatur , instituitur comparatio inter res & res' ; operas & operas ; res & operas . Et quidem comparantur haec omnia quantitate , pondere , intensitate , utilitate , publica aestimatione . Ea omnia nomine pretii veniunt . Itaque pretio instituuntur commercia omnia .

§. III. Est autem duplex pretium , *vulgare* , & *eminens* . Vulgare est , cum singulae res singulis rebus aestimantur , aut operae operis , quod usu venit in permutationibus , in quibus aut aequalis quantitas , vel aequale pondus , spectatur , si fuerint res ejusdem generis : aut proportio tantum , si diversi generis . Eminens autem pretium est , cum electa una re , quae sit nec nimis vulgaris , nec nimis rara , quaeque non facile corrumpi possit , ea ceterae aestimantur : talia sunt metalla . Dicitur autem eminens , quia continet pretium omnium rerum , quae sunt in commercio . Constituendum autem pretium , seu aestimatio rerum , a fine . Is finis triplex est , vitae necessitas , utilitas , & voluptas . Primo loco spectantur res , operaeque necessariae , idest eae , sine quibus vita humana transigi nullo modo potest . Deinde utiles , sine quibus scilicet transigitur vita , sed cum incommodo , & aerumna . Tandem voluptuosae , sine quibus commode quoque vivere possumus , sed sine luxu & superfluis voluptatibus . Quod spectat ad res necessarias , usus nationum ferme omnium est , etiam moratissimarum , majus , aut minus pretium iis statuere , & ex earum caritate , vel copia majori vel minori , & ex affectu ac desiderio eorum , qui eas res quaerunt . Ita intenditur pretium , si aut qui quaerunt , magno earum amore teneantur , aut si earum rerum sit inopia : sin vero haec fuerint contraria , pretium remitti solet .

§. IV. Sed quaeritur , an ob hujusmodi rerum rari-

raritatem, vel quaerentium copiam jure intendi possit pretium? Id generatim fit etiam inter moratissimas nationes, ut dixi. Sed, si ex natura vivere velimus, ita faciendum est, ut indigi non excarnificentur, avari vero ditentur: id enim neque jus naturae perfectum probare potest, quod utilitati non paucorum, sed omnium hominum prospicit: neque patitur jus imperfectum humanitatis. Ceterum ut interest Reip., ne publico damno in rerum inopia nimis intendatur pretium; ita quoque interest, ut ne nihil intendatur. Cum enim res paucae sunt, pretium vero vile, usu plures consumuntur, quam oportet: quo fit, ut caritas deinde major, atque inopia nascatur; quum intenso pretio rebus parcere soleamus. Quantum vero intendi pretium, aut remitti fas sit, vel oporteat, ex rerum, temporum, locorum, personarum circumstantiis viri prudentes dijudicabunt.

§. V. In rebus utilibus, sed non absolute necessariis, magis etiam licet pretium intendere, cum sine iis possit quidem vita sustentari, licet cum incommodo aliquo. At in voluptuosis nihil praecipio jure naturae, nec perfecto, nec imperfecto. Non perfecto, quoniam eae nec necessariae sunt, nec majorem vitae commoditatem faciunt; non imperfecto, quia amor generis humani neminem subigit, ut alterius luxum sua opera faciat. Itaque in his rebus censeo, ubi aliae causae e publica, vel privata re nullae subsint, id pretium constituere licere, quod cuique placuerit. Ita picturae, sculpturae, gemmis, aliisque rebus licet per legem naturae id pretium ponere, quod placeat, modo emptores adsint.

§. VI. Antiquissimis mortalibus, antequam nummus repèriretur, pretio vulgari commercia omnia agitabantur: Id quod & ex veterum nationum memoriis constat, & ex pristino hominum statu comprobari potest: nam cum veteres illi maxima ex parte in statu viverent naturali, difficillime omnes in eodem

dem instituto convenire poterant , quod necessarium erat ad usum nummi introducendum . Aucto autem luxu , adeoque commerciis proVectis , necessitas , & utilitas commerciorum eos impulit ad pretium eminens instituendum : nam ita & facilius commercia omnia etiam cum exteris agere poterant , & singulos contractus expeditius ac commodius perficere . Scilicet permutatio , quâ solâ ante inventum nummum commercia omnia agebantur , nec semper locum habere potest , quum plerumque alter contrahentium earum rerum indigeat , quas alter non possidet ; nec facile in diffinis commerciis semper observari . Sed perpendamus accuratius contractuum praecipuos .

§. VII. Simplicissimus , & antiquissimus contractuum omnium est permutatio , idest rei nostrae pro re alterius datio . Id cum dupliciter fieri possit , primum ut neutra res aestimetur , idest certum ei pretium statuatur ; deinde ut utriusque rei ineatur ratio , constituaturque praecisum pretium : prior permutatio *simplex* vocabitur , posterior *aestimatoria* . Et illa quidem donationi reciprocae , haec emtioni venditioni quodammodo similis est , quod Jurisperiti Romani agnoverunt in lege 1. §. 10. *de contrahenda emptione* . Quumque prior agitativissima veteribus & antiquissima fuerit ; intelligitur inde , quanto simplicius veteres mortales , tanto inter se amicissime vixisse . Cultis nationibus id olim servatum erat , quod Horatius lib 2. satyra 3. scripsit .

..... *Omnis enim res ,
Virtus , fama , decus , divina humanaque pulchris
Divitiis parent.*

§. VIII. In priori permutatione necesse non est , ut aequalitas servetur , quoniam , ut dictum est , suapte natura eam non exigit , sed reciprocae donationi similis est , censeturque alterum alteri donare , si quid res rem , aut opera operam excedat . Nemo praeterea de laesione conqueri potest , nisi ubi dolus malus & circumventio intercessit ,
aut

aut ibi , qui pretiosorem pro viliori permutavit , non gaudebat libera de rebus suis disponendi facultate. Contra in contractibus aestimatoriis , in quibus utriusque rei pretium instituitur , necessario observanda est aequalitas , quia ea spectatur pacto seu expresse , seu tacito . Itaque in his , ubi laesio intercessit , tenetur , qui laesit , alterum indemnem facere , nisi laesio admodum exigui momenti fuerit : nam hic contractus natura sua perfectam , ut dixi , aequalitatem spectat. Jure Romano enormis laesio censetur , si ultra dimidium pretii sit , *lege XI. , codice de rescindenda emptione* . Sed putaverim etiam laesionem infra dimidium enormem plerumque esse . Quod de permutatione dictum est , idem dicendum est de contractibus , quos innominatos dixere , *do ut facias ; facio ut des ; facio ut facias* , qui ad permutationem procul dubio spectant . Scilicet distinguendi sunt ii in aestimatorios , & simplicies : ac in primis perfecta aequalitas necessario servanda est , non item in secundis .

§. IX. Contractuum alter , qui & ante nummum inventum usum habere potuit , est commodatum , quo nomine intelligitur pactum cum obligatione perfecta conjunctum de re nostra alteri sub conditione restitutionis in specie praestanda . Ut officia circa commodatum explicentur distinctius , tria expedienda sunt : primum , an commodati substantia a solo contrahentium consensu pendeat , an etiam a rei traditione ? Secundum , an aliquid accipi possit rei commodatae causa ? Tertium , si res commodata pereat fortuito , idest nulla commodatarii culpa , cui pereat ? Quod ad primum attinet , dubitari non potest , quin si Jus naturale spectemus , commodatum substantiam suam a traditione rei capiat . Antequam enim res tradatur , pactum potius commodati dici potest , quam ipsum commodatum .

§. X. Quod vero pertinet ad alteram quaestionem , vocatur quidem commodatum ab omnibus *contractus gratuitus* , quia scilicet ex origine sua talis est : sed
usu

usu receptissimum est, legibus civilibus non improban-
tibus, aliquid accipere. Nec negari potest, si res
commodata usu paulatim consumetur, ut vestes,
aut similia, tantum posse nos jure pacisci, quantum
usu ipso pretii de re consumitur. Nam quamquam
commodatum ad actus beneficentiae pertineat, nullo
tamen jure perfecto obligamur ad beneficentiam cum
notabili diminutione patrimonii nostri: id virtutis est,
non stricti juris. Sed excipiendus est casus summae
commodatarii necessitatis & inopiae: inhumanum
enim videri potest, ex paupere velle commodum
suum facere. Quod autem diximus, ita intelligen-
dum est, si agatur de rebus vitae necessariis, aut
summe utilibus: nam si res fuerint merae voluptatis,
atque ad luxum potius, quam ad vitam pertinentes,
tantum censeo posse nos jure pacisci, quantum alter
paratus est dare. Quare in his casibus videri nequit
adversus naturam, *commodatum in locationem* converti.

§. XI. In tertia quaestione Jurisconsulti ipsi Ro-
mani non videntur sibi convenire, si credimus
Heineccio. Nam Gajus lege 1. ff. *de obligationibus*
& *actionibus* generatim pronunciat, commodatarium
casum fortuitum non teneri praestare. At lege 21. &
ff. *commodati*, si res commodata furto sublata fuerit,
actionem *commodati* dari supponit Africanus. Sed
Gajus eos tantum casus excipit, quibus humana in-
firmitas resistere non potest, veluti incendium, ruinam,
nausfragium etc. non eos, qui exactissima diligentia vi-
tari potuissent, inter quos est furtum. Quare ii Juris-
consulti minime inter se pugnant. Grot. lib. 2. de Jure
belli, & Pacis, cap. XII. §. XIII. ita distinguit: Si res
apud dominum similiter peritura erat, commodatarium
liberari ab ejus pretio solvendo: contra si peritura non fue-
rit. Hoc ultimum probat ex naturae beneficentiae: non
enim ea patitur dominum rei ex beneficio damnum
reportare. Grotium sequitur Pufendorff. lib. V. de
Jure Nat., & Gent, cap. IV., §. VI. Grotii argu-
mentum invictum est, si aut culpâ commodatarii res

pe-

periit , aut si id inter paciscentes convenerit : contra vero si casu mere fortuito res periit : cum enim ii casus a sola Providentia divina proficiantur , adeoque nemini possint imputari ; nullo jure perfectio cogi potest commodatarius ad hujusmodi casus praestandos .

§: XII. Sequitur depositum , cui locus esse potuit etiam ante nummum inventum . Est autem hic contractus ex origine & natura sua omnino gratuitus : exigat enim humanitas ac beneficentia , ut , quocumque modo possumus , maxime cum parvo nostro incommodo , alterius bona conservemus . Nihil hoc contractu veteres habuere sanctius , quia deponens summam fiduciam in depositarii fide ac diligentia collocat : nihil autem turpius excogitari potest & a Jure naturali magis abhorrens , quam amicum ab amico amicitiae obrentu falli . Hinc insignis depositi religio non modo apud Hebraeos . (Exod. XXII. v. VII. , Josephus Judaic. antiquitatum lib. IV. cap. VIII. ,) verum etiam apud Graecos , & Romanos . Vide Herodotum lib. VI. cap. LXXXVII. , & Juvenalem sat. XIII. Praeclare Cic. pro Rosc. Amer. , *perditissimi* , inquit , *est hominis simul & amicitiam dissolvere , & fallere eum , qui laesus non esset , nisi credidisset* . Aristoteles in problematibus sectione XXIX. quaestione II. , & VI. pluribus rationibus demonstrat , majorem esse perfidiam depositarii , quam mutuatarij . Hanc religionem , & fidem depositi confirmarunt leges Romanae ; & sanctissime custodiendam praeceperunt , ut cum ex aliis locis Pandectarum , tum praecipue ex titulo *depositi* constat ,

§: XIII. Quod pertinet ad officia depositarii , paucis illa complexus est Heinec. lib. 1. de Jure Nat. , & Gent. cap. XIII. §: CCCVL. Primum depositarius tenetur ad accuratam rei depositae custodiam , non tamen majorem , quam qua utimur in rebus nostris conservandis , cum id nullo modo ex jure bene-

Tom. IV.

N

ficen-

ficentiae sequatur, cujus depositum est actus, nisi tribus casibus, si aut res sit pretiosissima, aut ex ea omnes alicujus fortunae pendeant, aut si super ea expresse ita sit conventum. Quaerit hoc in loco Pufendorfius, si in eo casu sim constitutus nulla mea culpa, ut aut rem depositam, aut meam perdere sit necesse, quid mihi faciendum sit? paucis ea quaestio explicari potest ex iis, quae superius sunt dicta, Scilicet ut res deposita pretiosissima sit, aut ex ea fortunae omnes deponentis pendeant, nostra non tanti, sola jura beneficentiae & magnae amicitiae exigere possunt, ut illam nostrae praeferamus: quod si aequae nostra interest rem nostram conservare, ne illa quidem: nam neminem teneor amare plusquam me.

§. XIV. Secundum officium depositarii est, ut ne depositum involucris aut vinculis exuat, neve sine consensu domini in usus suos adhibeat, nisi ubi ea adigat necessitas, ut improbus sit amicus, si usum deneget.

§. XV. Tertium officium est, ut rem depositam domino, quandocunque eam reposcit, reddat, nisi aliud recta ratio exegerit: nam alioquin *depositum* (inquit Philo Judaeus de plantatione Noe;) *quod accepisti a sobrio, nec ebrio, nec prodigo, nec furem reddideris, proditio enim isthaec, non redditio est.* Vide & Tullium lib. III. de Offic., Senecam de Benefic. lib. IV., cap. X., & S. Ambrosium de Officiis lib. I., cap. ultimo.

§. XVI. Quartum tandem officium depositarii est, ut si sua culpa depositum sit amissum, ejus aestimationem restituat. Romanae leges in duplum damnant eum, qui depositum miserabile, seu quod propter imminens periculum tumultus, incendii, ruinae, naufragii, depositum est, fuerit inficiatus, aut dolose detrectaverit restituere: Vide legem primam ff. depositi: ibi Praetor edicit, *Quod neque tumultus, neque incendii, neque ruinae, neque naufragii causa de-*
posi-

positum sit , in simplum : earum autem rerum , quae supra comprehensae sunt , in ipsum in duplum
judicium dabo . Id turpius furto recte pronunciat Pufendorff. loco superius laudato : cujus ratio est , quia magis amicitiam oppugnat , sub qua res deposita est.

§. XVII. Contractuum , qui invento jam nummo praecipue obtinent , potissimus est *emptio & venditio* , de quo hoc in loco per summa saltem capita dicendum est . Est autem emptio venditio contractus de re pro certo pretio tradenda . Permutationi aestimatoriae similis est , si rei substantiam spectes ; in modo tamen differt , quod emptio venditio non perficiatur , nisi pecunia numerata ex Jure Romano (nam Jure naturae quocunque pretio perfici potest) ; nec propterea a permutatione aestimatoria differt . Quamquam inter ipsos Romanos Jurisconsultos , Sabinianos , & Proculianos , acerrime super ea re disputatum est . Nos controversias Juris Civilis ejus interpretibus omitimus .

§. XVIII. Praecipuum venditoris atque emptoris , & reciprocum officium est , ut utrique res , seu merces , & pretium sint probe nota . Proinde nunc modo venditor ejus qualitates , vitia , onera , umbram in oculos , aliosque sensus non incurrunt , emptori indicare tenetur , verum etiam pati , ut hic rem lustret oculis , aliisque modis exploret , ac propterea ut rerum , quae ad gustum pertinent , venditio non prius perfecta sit , quam facta degustatione ; rerum vero reliquarum , quae exploratione indigent , non prius , quam facta sit exploratio . Praeclara sunt , quae super hac re differit Cic. lib. III. de Officiis . Quo in loco illud praecipue monet , longius Philosophi honestatem progredi debere , quam legum civilium vim . Nam leges civiles his in rebus eas tantum fraudes vetant , quae sensibus explorari possunt : Philosophus eas etiam , quas ratio , & intelligentia ex naturae Jure comprehendit . Uno haec omnia principio confirmari possunt , nullo modo licere alium

decipere , Sed & illud addit idem Auctor , etiam patientia vitia nominatim dicenda esse . In quo Ciceroni adfentio : nemini enim licere arbitror ex alterius negligentia , vel stupiditate lucrum facere .

§. XIX. Illa hoc in loco quaestio interferi solet , penes quem sit periculum rei venditae , nec dum traditae ? Pufendorff. de Jure nat. , & Gen. lib. V. cap. III. §. III. distinguendum putat , utrum traditioni certus dies constitutus sit , nec ne ? deinde utrum elapsus sit is dies , nec ne ? Si sit praefixus , nec dum elapsus , venditoris vult esse periculum : contra vero si elapsus sit . Si vero non sit praefixus dies , distinguit iterum , utrum mora , quae inter perfectum contractum & traditionem intercedit sit necessaria ad rem in loco sitendam , an ea mora a venditore proveniat , an tandem ab emptore . Primo , & altero casu venditoris esse periculum docet : postremo vero emptoris tantum ; id quod ratio manifeste comprobatur . Quod si emptor venditori tantisper rei venditae custodiam commiserit , alter contractus instituitur , nimirum Depositi . Sed leges Romanorum generatim pronunciant , emptoris esse periculum omne , quia post emptionem venditionem peractam res emptoris est , adeoque ei perit , modo casu pereat fortuito .

§. XX. Inter contractus , qui & ante , & post inventum nummum locum habent , potissimus est contractus *mutui* , idest praestatio rerum fungibilium ea lege facta , ut tantundem non quidem specie , sed genere restituatur . Dicuntur autem res fungibiles eae , quas admunerare , admetiri , & appendere solemus , Earum ea est natura , ut nullus illarum sine abusu , idest sine consumatione , usus sit , accipiantque solutionem , sive in genere , sive in specie . Est autem manifestum ex ipsa mutui definitione , creditorem in mutuo alienare rem in specie , atque sibi cavere de genere , adeoque rei ; quam alteri dat mutuo , dominium , & consequenter periculum esse penes eum , qui rem accipit .

§. XXI.

§. XXI. Ex natura hujus contractus manifestum est, debitorem obligatum esse ad tantundem, non modo ratione quantitatis, sed etiam qualitatis reddendum. Quaesitum est, si pecunia mutuo data fuerit, ejusque valor postea vel auctus sit, vel imminutus, in ea restituenda cujus temporis ratio sit habenda, ejus ne, in quo est credita, an ejus in quo restituitur? Temporis ejus, in quo pecunia accepta est, rationem habendam esse pronunciat Grotius, eumque viri plures docti sectantur. Sed id difficultate non vacat; quia nimirum qui accepit se obligavit ex natura hujus contractus ad tantundem restituendum pretio, non quantitate naturali. Quare posterioriorem opinionem aequiorem putaverim.

§. XXII. Cum mutuum instituatur in eorum commodum & utilitatem, qui accipiunt, dubitari non potest, esse contractum gratuitum ex jure humanitatis, & beneficentiae proficiscentem. Sed observatum est superius, & alios contractus ex eadem beneficentia natos, refrigescere paulatim caritate, onerosos evasisse. Ita de mutuo quoque factum est, ut plerumque ultra sortem creditor aliquid sibi stipularetur, quod usurae nomine venit. Celeberrima nunc agitur quaestio, an jus naturae hujusmodi usuras omnes vetet, & semper? Tum an saltem eas usuras vetet jus divinum positivum? Ingens super ea re volumen paucis ab hinc annis edidit Broederfen Parochus Delphensis. Sub idem tempus Italica lingua doctum & eruditum opus procudit Maffei Veronensis, quod inscripsit *Dell' impiego del danaro*. Auctores illi post Grotium Commentariis in Lucam cap. VI. Salmasium de usuris, Pufendorff., aliosque, id ex instituto agunt, ut probent, non omnes usuras esse prohibitas, sed eas tantum, quae aut nimis exuberantes sunt, aut extorquentur a pauperibus. Cum occasione operis Maffei Pater Concina doctus Dominicanus opinionem hanc exagitasset, & opus Maffei confutare adgressus esset, exortique essent rumores haud sper-

nendi, Benedictus XIV. Pontifex maximus docta & accurata sua decretali Epistolâ ad Episcopos Italiae datâ ita rem composuit, ut negaret ex mutuo vi mutui ullas usuras accipi posse, quod is contractus suapte natura gratuitus sit, ac propterea perfectam aequalitatem inter datum & acceptum exigit: concederet vero posse accipi ratione aliorum contractuum aut *titulorum* cum mutuo junctorum.

§. XXIII. Nos rem sequentibus propositionibus explicabimus.

Propositio I. Pecunia est in commercio, ut res ceterae in usum humanae vitae factae, adeoque negotiatione frugifera est. Est haec propositio propter continua commerciorum experimenta tam perspicua, ut mirum sit Aristotelem (liquidem ejus mentem tenemus) pecuniam sterilem vocare potuisse. Scilicet pecunia naturâ quidem sterilis est, idest nullos fructus naturales progignit; at civiliter foecunda est, progignitque fructus uberrimos, seu potius instrumentum est uberrimorum fructuum.

Propositio II. Ius naturae non prohibet usuras ex pecunia mutua, quae negotiationi data frugifera est, modo non exigatur vi mutui. Id Agnoscit Benedictus XIV., qui concedit usuras accipi posse ex aliis contractibus negotiosis, aut aliis titulis cum mutuo junctis. Revera id nec vetat amor justitiae, nec beneficentiae. Principio, qui ex negotiosa pecunia aliquid sibi stipulatur, nullo modo alium laedit, qui lubentissime partem lucri, quod ex aliena pecunia comparat, alteri est concessurus. Deinde quid vetat de accessionibus patrimonii nostri aliquid alteri promittere, qui nos ad eas faciendas quocunque modo juvat? Quod si libentissime promittimus, alter sine ulla injuria accipere potest. Tum nec contra beneficentiam est, quae spectat egenos, qui sumptam pecuniam in privatos usus consumunt, non eos, qui novis accessionibus ditari volunt. Quae enim ratio nos cogere potest, ut benefici simus iis, qui

qui nostris beneficiis non indigent? Quod si beneficentia non exigit, ut non indigis beneficiamus, ne mutuum beneficentiae quidem erit quae ei ad negotiationem pecunia praestatur, nec proinde ab eo acceptae usurae vi mutui accipientur.

Propositio III. jus naturae prohibet usuras ex pecunia mutuo data ei, in cuius manibus non est frugifera, idest data pauperi, qui in usum vitae statim est elargiturus. Primum id esset exigere usuras ex mutuo ipsius mutui vi, idest ex beneficio: quare mutuum, idest beneficium converteretur in contractum minime gratuitum, id quod contra naturam esset. Deinde usurae illae ex alterius patrimonio acciperentur, non ex fructibus pecuniae, adeoque alterius patrimonium deterius efficerent, quod est contra jus naturae perfectum, ut adeo, qui tales usuras accipiunt, obligentur ad restitutionem.

Propositio IV. Scriptura Sacra aperte prohibet usuras, saltem in sensu superioris propositionis, idest quae ex mutuo vi mutui exiguntur. Nam Exod. XXII. v. XXV. aperte scriptum est: *Si pecuniam mutuum dederis populo meo pauperi, qui habitat tecum, non urgebis eum, quasi exactor, nec usuris opprimes.* Similia leguntur Levitici XXV. v. XXXVI. & XXXVII. Deuter. XXIII. v. XIX., & XX. David quoque in Psalmis beatum praedicat eum, qui pecuniam suam non dedit ad usuram. Nec dicat quispiam, huiusmodi leges spectare Remp. Hebraeorum, atque tempus ejus Reipublicae, quemadmodum leges omnes civiles: non enim aut ceremonias spectant, aut formas judiciorum, quae tantum leges cum Reipublica Hebraica & Sinagoga sepultae sunt; sed spectant mores, quae leges eternae esse debent. Praeterea Lucae VI. v. XXXV. legitur, *mutuum date, nihil inde sperantes.* Nam quamquam Textus Graecus, atque superiorum sententiarum contextus videantur non loqui singulariter de usuris, sed generatim de omnibus officiis beneficentiae, quae praestan-

da sunt illis etiam , a quibus *mutuum* , idest paria , & reciproca officia expectare nequeamus , tamen Patrum omnium veterum consensus efficit , ut de usuris sit locus iste interpretandus , praesertim quum inter cetera beneficentiae officia , & *mutuum* locum habeat .

Propositio V. A paupere nullo titulo exigí possunt usurae , nec ob lucrum cessans , nec ob damnum emergens , si vere benefici esse velimus : exactae tamen iustitiae non adversantur , sed amicitiae tantum generis humani . Nam pauperi jure caritatis tenemur benefacere gratis : qui autem usuras a paupere exigit , non eum sublevat , sed excarnificat , atque opprimit : minus ejus patrimonium efficit , etsi primo adspectu ei benefacere videatur . Interim quum nullo jure stricto obligemur alteri benefacere cum nostro damno , ubi in his casibus exiguntur , amicitiam , non iustitiam laedunt .

§. XXIV. Quaesitum est hoc in loco , utrum usurae ex pecuniâ mutuâ , quas exigere solent *Montes* , qui *pietatis* dicuntur , sint licitae ? Usus horum *Montium* , ut appellantur , caepit in Italia sub initium saeculi XVI. aut XV. exeuntis , nec caepit sine gravissimis Theologorum ejus temporis querelis . In primis Card. Cajetanus doctum super ea re opusculum vulgavit , in quo hujusmodi usuras improbat . Idem fecere alii gravissimi Theologi , donec Leo X. P. M. a. MDCXV. in Synodo Lateranensi hujusmodi usuras hac conditione probavit , ut moderatae essent , & quatenus inservirent locorum Administris alendis . Nec eas improbare possumus , dum binas istas condiciones habeant , ut & moderatae sint , & exigantur titulo administrationis , seu sustentationis ministrorum . Sed quoniam ambae hujusmodi conditiones in majori horum locorum parte hodie desunt , nam & immoderatae usurae exiguntur , & hujusmodi loca in immensum divitiis aucta sunt , ut non egeant usurarum pro alendis Administris ; non video, quid

quid consentire possint cum Jure Naturae, atque Legibus Evangelicis. Certe nisi aequioribus conditionibus exigantur, difficile est illas a crimine foeneris defendere.

§. XXV. Jam & illud quaeri potest, quibus modis a pactorum obligationibus honeste solvi possimus. Pactorum omnium, contractuum & conventionum finis Fides est, idest promissorum, conventorumque constantia & impletio. Quum haec facta est, simul pactis satisfactum est. Hinc illud Jurisconsultorum, *facta solutione cessat omnis obligatio*. Intelligitur autem fieri solutionem, si integra fiat, si personae cui debemus, aut alteri ex consensu principalis, si cum omnibus circumstantiis pacto adnexis. Atque hic est primus modus quo obligationes ex contractibus & pactis naturaliter cessant.

§. XXVI. Alter modus est compensatio. Si is, cui debeo, undecumque tandem tantundem acceperit, cessat in me obligatio solvendi, nisi forte pretium affectionis solvendum supersit. Non intelligitur autem facta compensatio, si quis alteri invito velut in solutum obtrudit, quod ei a tertio debetur.

§. XXVII. Tertius modus est condonatio, quum is, cui debeo, jure suo ultro se abdicat. Parum autem refert, verbis ne an factis, veluti redditione, vel laceratione chirographi, aliisque, mentem suam exprimat creditor: modo tamen haec laceratio non fiat veluti per furorem, aut animo novas tabulas scribendi.

§. XXVIII. Quartus modus est mutuus dissensus: quandoquidem nihil tam est naturale, quam eodem modo quidque dissolvi, quo colligatum est, lege XXXV. Dig. de Regulis juris. Intelligitur autem hoc modo, aut rei natura, aut leges huic dissensui non obstant. Itaque matrimonium, quoniam ex natura sua individuam vitae conjunctionem spectat ad proles procreationem & educationem, quamquam mutuo consensu contractum est, non potest tamen, quum consummatum

tum est, mutuo dissensu dissolvi.

§. XXIX. Quaeritur utrum alterius perfidia mihi jus det discedendi a pacto? dubitari nequit: pacta enim mutuo consensu stant: itaque altera parte dissidente, liber sum. Perfidus tamen, si alter pacto non renunciaverit, adhuc obligatus remanet; quia generatim nequeunt pacta dissolvi unius tantum partis dissensu.

§. XXX. Praeterea si tempus constitutum praeterierit, aut appositae conditiones deficient, aut alter paciscentium moriatur, solutum est pactum, nisi ita conventum fuerit, ut in rebus, & ad posteros obligatio demandetur. Quae omnia sunt per se manifesta.

§. XXXI. Ad haec, mutato rerum statu, in quo pactum inaedificatum fuerit, aut re, de qua pactum initum erat, pereunte, pacti quoque obligatio cessat: stare enim nequit pactum, pacti fundamento destructo. Atque hi ferme sunt modi omnes naturales, quibus obligatio ex pactis cessat. Modos vero civiles Jurisconsulti docebunt.

C A P U T IX.

De Officiis adversus alios, quae imperfecta dici solent.

§. I. **O**fficia juris perfecti, ut vocantur, duobus illis regulis continentur, *neminem laedere, & suum cuique jus tribue, ac integrum esse sinizo*. Ad ea jure stricto & perfecto obligamur, ut si violaverimus, eodem jure stricto damnum rescire teneamur. Ea qui observaverit *justus dicitur*: neque enim ultra ea justitia quidquam aliud adversus alios nobis praecipit. Sed nondum tamen ad plenam honestatem pervenit, neque dum plene vir bonus & socialis est. *Quantillum est*, inquit eleganter Seneca, *alterum non laedere, cui prodesse debeas*? Itaque ad plenam honestatem efficiendam & hoc quoque necessarium est, ut & amice cum aliis vivamus, ut humani, utque libe-

liberales & beneficii sumus. De his ergo adversus alios, officiis nunc disputaturi sumus.

§. II. Dicuntur autem officia haec *imperfecta*, non quod eorum ommissio, quum adest occasio ea tribuendi, non ut naturae morali & rationali adversa imputetur, sed quod ad ea praestanda non possumus jure stricto cogi, quemadmodum ad priora, sed jure humanitatis tantum & caritatis impellimur. Praeterea perfectorum officiorum violatio ad damni reparationem nos obligat, non item posteriorum. Sed tanto est turpius posteriora non praestare, quum possumus & occasio adest, quanto minus illa juri coactionis subsunt. Itaque quum in praestatione priorum officiorum homo dicatur justus, quia alterius jus non violavit, ob praestationem posteriorum bonus & honestus dicitur, quia aliis quocunque modo potest, prodesse studet, solo amore societatis impulsus.

§. III. Officiorum juris imperfecti regula fundamentalis est, *quodcunque ab aliis tibi fieri vis, id tu aliis facito*. Quumque ea, quae nobis ab aliis fieri volumus, duorum sint generum, *humanitatis* scilicet, seu *innoxiae utilitatis*, cum sine ullo facientis detrimento nobis succurritur, & *beneficentiae* cum aliquo beneficientis detrimento nostra sit utilitas; utrumque aliis praestare debemus, si gloriari velimus, nos esse homines, nihilque a nobis humani alienum esse, ac si miseriam cavere velimus, quae ut alias dictum est, perpetuo & naturaliter stultitiam & improbitatem comitatur. Hanc doctrinam omnia principia legis naturalis suadent. Principio Deus ad colendam societatem, mutuam concordiam, amorem, benevolentiam, naturae ipsius voce nos exhortatur: nam cognitionem quamdam naturalem inter nos constituit: similitudo autem naturae & naturalis cognatio, quae inter omnes est homines, mutuam amicitiam exigit. Deinde tranquillitatis & utilitatis nostrae causa haec officia aliis praestanda sunt: nam sine hujusmodi officiis & cognatio illa ac societas humani gene-

ris

ris distrahitur , & ipsi , qui nullo amoris vinculo cum aliis conjungimur , nec tutam , nec tranquillam vitam agere possumus .

§. IV. Praeterea id abhorret non a natura tantum humana ; sed etiam a belluina , nullo beneficio inter se homines copulari , quum videamus mutuam sibi opem in periculis etiam feras praestare . Turpissimum autem est , & contra naturam ipsam , homines ad locieratem genitos ipsis esse animantibus brutis efferatioribus . Quamobrem ut nihil est , quod magis homines efficiat illustres , & per omnia ora celeberrimos , quam humanitas , & beneficentia , ut recte Cicero gloriam definiverit *famam meritorum in patriam , & genus humanum* ; ita nihil , quod magis dehonestet efficiatque execrabiles , quam truculentia , morum ferocitas , avaritia , & odium in genus humanum . Itaque barbarus sit oportet , & feris animantibus , quam hominibus , similior , qui aliis officia utilitatis innoxiae denegat , idest , qui sine suo detrimento , quum id facere potest , alterum ope , aut consilio non juvet , ejus res non servet pro virili , errantem non revocet in viam , sitienti aquam profluentem , algenti ignem , peregrino hospitium neget , aut similia detrectet , quae aliis prosunt , nobis vero detrimento non sunt .

§. V. Praeclara sunt , quae super ea re veteres sapientes scripsere . Cicero in 1. de Offic. cap. VII. utraque humanitatis & beneficentiae officia accurate ex natura ipsa humana deducit : *Sed quoniam* , inquit , *ut praeclare scriptum est a Platone , non nobis solum nati sumus , ortusque nostri patria vindicat partem , partem parentes , partem amici ; atque , ut placet Stoicis , quae in terris gignuntur , ad usum hominum omnia creari , homines autem hominum causa esse generatos , ut ipsi inter se aliis alii prodesse possint ; in hoc debemus naturam ducem sequi , & communes utilitates in medium asferre , mutatione officiorum , dando , accipiendo , tum artibus , tum opera , tum facultatibus ,*
devin.

devincire hominum inter se societatem . Super iisdem principiis ratiocinantur veteres alii Philosophi . Philo Judeus in Libro Quod Deus sit immutabilis : Abominandi , inquit , sunt homines , qui propriam tantum utilitatem captant , contemnis ceteris , tamquam sibi solis nati , non item innum-ris aliis , patri , matri , uxori , liberis , humano denique generi . Eandem rationem premit Marcus Antoninus Lib. III. §. 4. . Cognatum est , inquit , rationale omne , & naturae ipsius humanae ratio ab unoquoque hoc exigit , ut quorumvis hominum curam habeat . Seneca quoque quum alibi , tum praesertim epist. LXXXV. ad Lucil. Membra , inquit , sumus unius corporis magni . Sed illud imprimis egregium , quod societatem humanam lapidum fornicationi simillimam dicit , quae caesura , nisi lapides invicem obstarent , hoc ipso sustinetur .

§. VI. Jam vero dubitare non possumus , quin hoc ipsum praecipuum sit Christianae Philosophiae dogma . Proximum enim nostrum sicut nos ipsos amare oportere Christianae Religionis Libri docent . Dicitur in iis ex amore Dei & proximi universam legem pendere . Paulus caritatem vocat , *complementum legis , & summam legis* . Eam praesert etiam Fidei , & Spei , quum horum trium caritatem majus vocat . Alibi idem Apostolus scribit hominem sine caritate , etiamsi tantam habeat fidem . ut montes transferat , esse nihil , esse sicut *aes tinniens* . Addit praeterea omnes alias virtutes & corporis castigationes , etiamsi quis se injiciat in ignem , sine caritate nihil valere . Scribens ad Colossenses cap. III. v. 14. postquam enumerasset pleraque alia officia hominis Christiani , concludit , *super omnia autem caritatem habere* . Torus quoque in ea doctrina praedicanda est Johannes in Epistolis suis .

§. VII. Ut autem hoc efficere possimus , danda est opera , ut animum nostrum , corpus atque alia bona ita excolamus , ut aliorum commoda promoveri possimus , velut si ingenii solertia talia reperiamus ,
qui-

quibus vita humana reddatur instructior, quum in literis & artibus, tum in iis omnibus, quibus ad commode & pacate vivendum indigemus: aut saltem si mercaturis, aut aliis modis publicam felicitatem juvemus. Perspecte Pufendorffius Lib. III. de jure natur., & gent. cap. III. §. II. pronunciat, *in legem naturae peccare eos, qui nulla honesta arte se excolunt, sibi que ignavi, aliis graves, animam pro sale habent, ne putrescant, aliorum fruges consumere nati.* Vide eundem de Offic. Hominis, & Civis lib. I. cap. VIII. §. II. ibique Everardum Ottonem.

§. VIII. Sapienter ignavis & inutilibus hominibus extirpandis e Republica apud Ægyptios quondam cautum erat, ut omnes nomina sua apud Magistratum profiterentur, indicantes simul quo proventu, & vitæ genere victum sibi quisque compararet. Mendici, aut injustum quaestum agitantes, mortis paena puniebantur. Vide Diodorum Siculum lib. I. cap. LXVII. Similem legem apud Sardos recitat Ælianus lib. IV. histor. var. cap. I. Apud Massilienses mendicis, qui vitam inertem mendicando agebant, portæ clauderentur, ut tradit Valerius Maximus lib. II. cap. VI. Recenti memoria gravissimæ leges in mendicos & vagos tota Europa latae sunt. Sed id desiderandum esset, ut quoniam nec possumus, nec, si possumus, fas est, eos e Tellure ejicere, qua cura, qui mendicam vitam agitant, e sapientibus Rebuspublicis ejiciuntur, eadem ad artes & commercia adhiberentur: inutiles enim futurae sunt hujusmodi leges, nisi prospiciatur accurate quo genere vitæ hujusmodi mendici, & vagi societati esse possint utiles, atque in eo genere adhibeantur.

§. IX. Contra vero apud easdem veteres nationes celebratissimi semper fuerunt, qui utilia vitæ humanæ per solertiam excogitarunt; quique non sibi tantum retinuerunt, sed cum aliis communicaverunt ac Deorum concilio adscripti fuerunt, quia scilicet utilibus inventis, aut salutaribus institutis vitam humanam

nam reddiderunt instructiorem , & feliciorem . Vide Ciceronem in 1. de nat. Deor. Virgilius in VI. Æneidos Libro ex eadem persuasione iis apud Æliſios locum fecit peculiarem ,

Inventas qui vitam excoluere per artes ,

Quique ſui memores alios fecere merendo .

Hujus humanitatis cum beneficentia conjunctae egregia quaedam antiquorum instituta leguntur . Plutarchus in quaeſt. Sympoſiacis lib. VII. quaeſt. 4. quaerit, cur antiqui Romani aliquid in menſa ſemper reliquerint , neque lampades extinxerint ? Atque inter praecipuas rationes hanc proferit , ut nempe humanitati & beneficentiae aſſueſcerent . Super qua re deinceps praeclara quaedam commentatur . Inter Pythagorae praecepta exitat illud , *arborem fructiferam neque corrumpendam , neque violandam* , ne ſcilicet commodum aliorum , quod deinde naſci poteſt , pracludatur . Errant nempe ii , qui cenſent , jure ſuo res , quae utiles aliis eſſe poſſunt , ſibi vero inutiles ſunt , quum in proprio dominio ſunt conſtitutae , corrumpere poſſe ; quaſi Natura res utilitati tantum noſtrae progignat . Platonis lex eſt lib. VIII. de legib. , *nec ſpicilegium in meſſe , nec racementem in vindemiam faciendam* , ut ſcilicet habeant pauperes cives unde paupertati ſuae ſuccurrant . Eadem lex data fuit Hebraeis , quemadmodum legitur Levit. cap. XIX. v. IX. & cap. XXIII. v. 32. & Deuteron cap. XXIV. v. 19.

§. X. Ceterum ſi officia humanitatis nobis noxia ſint futura , aut noſtris cognatis , amicis , civibus , aut ſi pluribus noxia , uni tantum utilia , aut cui-cumque tandem noxia , ea praestanda non ſunt , nec , ſi praestentur , beneficia , ſed maleficia appellanda ſunt . Nam principio nemo tenetur alium amare cum ſui ipſius incommodo . Deinde nemo tenetur amare extraneum plus quam civem , aut cognatum . Tandem non licet alterum odiſſe , ut alterum ames . Non nego , quando de rebus noſtris agitur , quandoque
omnium

omnium virtutum heroicarum maximam esse ex principio amoris alterius vitam, aut commoda, vitae & utilitatibus nostris praeferre. Sed nulla naturae lege, nullo jure nec perfecto, nec imperfecto ad id obligamur, nisi fortasse quum de totius Reipublicae salute agitur, quo in casu potius est ut pars, quam ut totum intereat, prospiciendumque est civitatis potius utilitati, & incolumitati, ex qua singulorum incolumitas pendet, quam privatae, quae totam civitatem servare nequit. Hinc intelligitur, licere dedere civem innocentem, ne tota civitas pereat; quia scilicet is civis ipse se tradere debebat, si civis officia omnia implere volebat.

§. XI. Atque hinc sequitur in bello ex parte nostra justo licere officia innoxiae etiam utilitatis hostibus denegare, si ea praestita validiores efficiant ad nos laedendum. Itaque prohibere ab aquisitione, corrumpere commeatus, aut alias commoditates intervertere, si id fiat, ut hostes debellantur in bello justo, licitum est. Vide Grotium lib. II. de jur. Bell. & Pac. cap. 2. In his enim casibus denegationes hujusmodi officiorum spectandae sunt velut media, & arma, quibus nos adversus hostes defendamus, aut velut punitiones injusti alterius belli. Quod si ea officia praestita minime sint nobis nocitura, tum insignis esset inhumanitas denegare.

§. XII. Hoc ipsum tenendum est ubi humanitas, & beneficentia illi ipsi, cui in praesens placet, postea non leve damnum sit allatura, veluti aegro frigidam ministrare, quae inde ei sit nocitura. Ratio semper eadem est, quod scilicet nemini malum faciendum est sub quocumque boni praetextu. Atque id etiam in officiis justitiae obrinet: alteri enim jus suumtribuendum non est tum cum damno esse potest. E. G. non est reddendum domino depositum, si redditum ei nociturum sit. Vide ut hunc locum copiose pertractat Cicero in III. de offic.

§. XIII. Praeterea officia humanitatis (idem de beneficiis)

neſicientia dictum eſto) ordinem quemdam requirunt , ut quum omnibus praestari nequeunt, iis primum praestentur , qui nobis sunt aut natura , aut loco conjunctiores , Primum parentibus , filiis , aliisque sanguine cognatis : deinde amicis interioribus : tertio popularibus nostris : tandem reliquis, si iis locus sit ullus. Qui sine ulla ratione hunc ordinem turbat , stulte adversus praeceptum amicitiae peccat . Praescribere haec veteres in *carmine aureo* , quod Pythagorae tribuitur apud Stanlejum in histor. Philoſophiae part. VIII. , cap. IV.

*Primum immortales Divos pro lege colunto ,
Et jusjurandum ; Heroas clarum genus inde :
Daemones hinc terris mixti sua jura ferunto :
Inde parentis honos sequitor : tum sanguinis ordo :
Post alii sunt , virtus ut maxima , amici .*

§. XIV. Jam quum officia humanitatis non debeantur aliis ob ulla illorum erga nos merita , sed tantum ob naturae aequalitatem , ac propterea ob naturalem omnium cum omnibus societatem & cognationem , qua fit , ut alios non minus , quam nos ipsos amare debeamus; inde sequitur iis etiam tribuenda esse , aut qui nullo modo essent paria relaturi , aut qui nos odio habent , dummodo inimicum nostrum adversus nos potentiorum non efficiant , aut arment. Cavendum igitur est , ne in hujusmodi rebus non secundum rationem & naturalem honestatem , sed secundum affectus judicemus. Distincte hanc doctrinam praecipit Christus Salvator noster Matthaei V. & Lucae VI. Sed Philosophi ipsi id cognoverunt. Extat praeclarus Hieroclis locus , unde fit , inquit , ut recte dicatur , virum bonum odisse neminem , solumque bonum & amicum existere . Quum enim bonum diligit , non eum , qui malus sit , putat inimicum . Sin autem virtute praeditum quaerit ad societatem , ex omnibus eum diligit , qui probus sit . Atque in amicitiae legibus Deum ipsum imitatur , qui nullum quidem solum odisse , sed eum potissimum , qui bonus est , amplecti.

Tom. IV. O

Eti, & diligere ; Dignum Christiano homine iudicium ! Sed pervulgata erat haec apud veteres sententia , totam Philosophiam esse imitationem Dei , atque principium virtutum omnium esse hoc , *Deum imitator , & sequitor* . Vide ut haec explicat Samuel de Cocceii in Introductione ad Grotium Dissertat. XII.

§. XV. Accedit , quod multae sint utilitates , quae ex ipsis inimicis nostris capi possunt : quo in argumento luculenter versati sunt Aristoteles *ad Nicomachum lib. VIII.* Plutarchus *de Utilitate ex inimicis capienda* , & Cardanus in egregio opere *de utilitate ex adversis capienda lib. III. cap. 13.* Ego paucas attingam . Principio observandum est , neminem in societate Civili sine inimicis esse posse , non magis quam sine amicis ; nisi fortasse qui adeo abjectus sit & ignotus , ut misericordiae potius , & contemptus , quam aemulationis , invidentiae , odii objectum sit . Nam homines , praesertim illustres , si boni fuerint , necesse est ut omnes malos habeant inimicos , quod gloriosum est inimicitiae genus ; si vero fuerint mali , aequum est , ut aversos habeant omnes bonos .

§. XVI. Deinde inimici necessarii sunt ad virum bonum & illustrem efficiendum ; stimulos enim addunt virtuti , & animi aciem intendunt : *marcet sine adversario virtus* , inquit eleganter Seneca , Ac vero quis sine lucta corpus ad labores induruit ? Quis animum ad scientiam & virtutem sine contentione exercuit ? Itaque inimici nostri , si sapimus , paedagogi nostri esse possunt , tanto utiliores , quanto minus adulari parati . Experientia docuit adversarios illustrem esse magnorum virorum scholam , quietem vero & perpetuam felicitatem homines etiam virtuosos corrumpere . Tertio , inimicitiae hoc quoque viris bonis utilitatis afferunt , ut iis omnes virtutis amicos concilient , omnesque adjungant inimicorum suorum inimicos . Quarto si quis ulciscendi animum habeat in promptu est illustre vindictae genus , ex inimicorum calumniis aut dictis in melius semper proficere , atque

atque sic , quae sunt vitia ; emendare . Quinto si quis gloriam ex virtute quaerat , quae sola vera gloria est , nulla est illustrior virtus , quam animi mansuetudo , ut non solum inimicis generose parcamus , verum etiam ut liberalissime beneficemus .

§. XVII. Jam transeamus ad officia beneficentiae , quae gradum amicitiae continent sublimiorem , quam officia innoxiae utilitatis . Obligari autem nos & ad haec officia , & natura ipsa humana , & conditio societatis demonstrat . Primum , quum reciproce homines in huiusmodi officiorum indigentia reperiantur , aut possint reperiri , si volunt ea in his casibus sibi ab aliis tribui , necesse est , ut & aliis vicissim tribuant . Deinde talis est societatis natura , ut non possit illa esse perfecta , & tranquilla , nisi reciprocus sit bonorum inter omnes influxus , nisi scilicet bona omnia & commoditates vitae , quoad fieri potest , cum iis communicentur , qui indigent . Ad haec , vetus proverbium est , *Amicorum omnia esse debere communia* ; oportet autem ut vir bonus in societate exiens neminem odio habeat , idest ut omnibus sit amicus ; ergo adversus omnes beneficus pro ratione graduum amicitiae .

§. XVIII. Haec bonorum Communicatio *beneficium* appellatur , & studium benefaciendi *beneficentia* . Quare definiri solet beneficium *res , vel actio alteri profutura , quam ei sine spe restitutionis , aut retributionis praestamus* . Dicitur autem *actio , vel res alteri profutura* , ut explicetur essentia ipsa beneficii : nisi enim beneficium alteri prosit , non est beneficium , ut si laedat , maleficium est . Dicitur *sine spe retributionis* , non quidem , ut excludatur spes gratitudinis , sed ut caveatur , ne ea spes praecipua causa sit beneficii impulsiva , aut ne ea spes in conditionem veniat , sub qua beneficium praestatur . Sunt enim haec beneficia mercenaria , eaque ad commercium potius pertinent & mercaturam quamdam , quam ad beneficentiam . Vide Senecam lib. 6. de beneficiis cap. 14.

§. XIX. Ut autem beneficentia sit virtus, possitque merito imputari, proficisci debet ex directa voluntate alteri utilitatem deferendi: quae si desit, aut indirecta tantum sit, beneficium inter virtutes recenseri nequit. E. g. si quis ludens, nolens mihi benefacere, impellat me ad agrum meum effodiendum, atque in eo thesaurum inveniam, non potest ille pro beneficio mihi facto imputare: Nec beneficium est, si quis me ad dignitatem aliquam promoveat, ut locum vacuum ei relinquam ad maiorem, quam ille ambit. Minus quoque beneficium est, si quis volens me laedere, magnam mihi afferat utilitatem. Quare Josephi Fratres non poterant illi pro beneficio imputare, quod eorum opera ad summam in Aegypto dignitatem evaserat. Elegans est super ea re Phaedri fabella, Mustela ab homine prehensa rogat, ut sibi parcat, quia molestis muribus purget domum. Cui villicus

. *Faceres si causa mei,
Gratum esset, & dedissem veniam supplici:
Nunc quia laboras, ut fruaris reliquis,
Quae sint rosuri, simul & ipsos devores,
Noli imputare vanum beneficium mihi.*

§. XX. Sed ut natura beneficii praestationibus & largitionibus conveniat, prudenter & sapienter dispensandae sunt: prodiga enim rerum elargitio sine dispectu eorum, quibus praestantur, ac sine graduum amicitiae distinctione, beneficium non est, sed stulta profusio. Discernendi igitur sunt in beneficiis tribuendis necessarii ab extraneis, intimiores a remotioribus, indigentiores a minus indigentibus, digniores a minus dignis. Itaque ceteris paribus praeferendi sunt necessarii extraneis, intimiores minus intimis, indigentiores minus indigentibus, digniores minus dignis, ii qui non suo merito miseria laborant, iis, qui merito suo in eum statum prolapsi sunt. Praeterea perspicuum est, ne beneficentia plurimorum alati ignaviam, qua fiat, ut in societate homines ignavi, &

sce-

ſceleſti multiplicentur cum maxima Reipublicae perniciē . Quae benefaciendi prudentia niſi adhibeatur, huiusmodi largitiones maleſicia potius ſunt , quam beneficia . Quocirca ſi vere dictum eſt a Philoſophis , nullam eſſe virtutem ſine prudentia , tum poſſimum de beneficentia dicendum eſt .

§. XXI. Inter caetera autem beneficentiae officia locum praecipuum ſibi vindicant hospitalitas , & eleemoſina , ſeu beneficium quod ei praestatur , qui non ſuo merito miſeria laborat . Hospitalitas , id eſt peregrinos & viatores indigentes in domum admittere , & menſae participes efficere , omnium beneficiorum nobiliſſimum eſt , & magis ſecundum finem legum naturalium : finis enim legum naturalium , ut alias dictum eſt , eſt mutua caritas , ex qua tantum ea eſſe poteſt hominum beatitudo , quam in terra habere poſſunt . At ex omnibus virtutibus humanis nulla eſt , quae arctius vinculum , & ſtabilius amicitiae & caritatis efficit , quam hospitalitas , qua velut religione quadam ſibi homines copulantur . Vide ut ſuper ea re praeclare diſſerit Ariſtoteles lib. 2. magnorum moralium cap. 2.

§. XXII. Egregia ſunt iudicia & exempla huius virtutis apud eas nationes, tum antiquas , cum recentes , quae barbarae a nobis ſolent appellari . Totā vetuſtas ethnica credidit , & Deos plerumque peregrinari , & hospites omnes eſſe a Iove , ut ex Homeri Odiſſea , aliisque veteribus ſcriptoribus diſcimus . Ex iis principiis ſibi perſuaſerunt , omnium virtutum humanarum hospitalitatem praecipue colendam . Ex fragmentis veterum hiftoriarum Gentilium, atque ex Hiftoria Moſaica illud etiam diſcimus , homines diluvio Noetico viciniore nihil tam impenſe coluiſſe , quam hospitalitatem : quo vero ab illis temporibus longius diſceſſerunt, & civilius vivere caeperunt, eo magis aucto vitae luxu, & habendi cupiditate, minus humanos evaſiſſe . Perſae publica habent hodie conſtituta hoſpitia , & paſſim per totam Perſidem ,

in quibus magna caritate viatores excipiuntur, quemadmodum narrant Petrus Vallengis, & Chardinus in Itinerariis Persicis.

§. XXIII. Jam vero quidam fuerunt Populi, qui legibus latis hospitalitatem praeceperunt, ut peregrinis consulerent. Ælianus lib. 4. historiae variae cap. 1. hanc legem Lucanorum recitat, *si sub occasum scelis venerit peregrinus, volueritque sub tectum alicujus divertere, & is hominem non suscepit, mulctetur, & poenas luat*. De antiquis Slavis Hermoldus in Chronico Slavorum lib. 1. cap. 82. profert eorum hanc legem, *ut si quis peregrinum hospitio non excepisset, sed ejecisset, ejus domum vel facultates incendio consumere liceret*. Et jure quidem Populi isti de servanda humanitate solliciti fuerunt. Sed optandum fuisset, ut homines sponte sua nullis legibus coacti hujusmodi officia praestarent.

§. XXIV. Sed & hospitalitas passim quoque commendatur in scripturis sacris. Isaiae cap. 68. vers. 7. *Frangere exurienti panem, & egenos, vagosque inducere in domum tuam*. Jobus cap. 31. inter ceteras virtutes suas recenset, *foris non mansit peregrinus, ostium viatori patuit*. Paulus Apost. ad Rom. 12. vers. 13. *hospitalitatem sectamini*, Petrus item Apost. epist. 1. cap. 4. vers. 9. *hospitales estote alii erga alios*. Christus Dominus noster Matthaei 21. vers. 36. inter ceteras causas, ex quibus sententiam salutis prolaturus olim est in die judicii extremi erga Electos, hospitalitatem refert: *Peregrinus, inquit, fui, & excepistis me*. Secundum haec praecepta primaevi Christiani, antequam luxus & avaritia, ut cetera seculi vitia, in nos invalissent, vitam suam instituerunt, ut ex tota historia Ecclesiastica patet.

§. XXV. Vitium huic virtuti oppositum est inhospitalitas, quae & Naturae, & Evangelio juxta repugnat, ut ex superioribus manifestum est. Veteres Poetae, ut hoc vitium plene depingerent, finxerunt, Lycaonem de homine in lupum fuisse trans-

mu-

mutatum, quod peregrinos hospitio exceptos necaret, aut expoliaret. In duo autem capita hoc vitium dividitur: primum est hospitio peregrinos non excipere, quum adest occasio: alterum, postquam exceperis, violare. Et utrumque quidem inhumanum est, sed posterius proculdubio inhumanius, quia sancte initam amicitiam laedit. Ad rem Ovidius,

Turpius eiicitur, quam non admittitur hospes.

Inhospitalitatem severissime Deus ulciscitur; ejus exempla habemus in Sodomitas (Genesis cap. 19.) & in Beniaminitas (Judicum cap. 19.)

§. XXVI. Alterum & praecipuum beneficentiae officium est, ut diximus, eleemosina. Et generatim quidem eleemosina significat quidquid beneficii, aut humanitatis in proximum nostrum ex commiseratione conferimus. S. August. in Enchyrid. ad Laurentium cap. 72. eleemosinam generatim acceptam sic describit, *Dare exurienti cibum, sitienti potum, nudo vestitum, peregrinanti hospitium, fugienti latibulum, aegroto, vel incluso visitationem, captivo redemptionem, debili subvectionem, caeco deductionem, non sano medelam, erranti viam, deliberanti consilium, & quod cuique necessarium est indigenti.* Ceterum cum notione angustiori apud recentes scriptores accipitur, ut significet eam elargitionem, quae alteri indigenti fit. Ad eleemosinam autem elargiendam nos obligari, ex iisdem principiis intelligimus, quae nos admonent, ut aliis ea omnia faciamus, quae volumus ab iis nobis fieri.

§. XXVII. Scripturae divinae passim eleemosinas praecipiunt, atque in iis tantam vim inesse dicunt, ut per eas ingentia crimina dimitti pronuncient. Extat super ea re S. Cypriani libellus *de opere & eleemosinis*. Sub initium ejus libri postquam dixisset Cyprianus sordes post baptismum admissas eleemosinis ablui posse, addidit: *Loquitur in scripturis divinis Spiritus Sanctus & dicit, eleemosinis, & fide delicta purgantur.* Idem denuo dicit, sicut aqua ex-

tinguit ignem, sic eleemosina extinguit peccatum. Deinceps recitat testimonium ex cap. 2. Lucae, *date eleemosinam, & ecce munda vobis omnia.* Vide & S. August. cap. 37. Enchyrid.

§. XXVIII. Sed hoc in loco animadvertendum est primo, non divites tantum, eosque qui rebus abundant obligari ad eleemosinam, sed etiam eos, qui licet non multum possident, habent tamen, quod pro modulo suo erogare possint in pauperes. Id intelligitur primum ex naturae ratione: nam in omnibus hominibus talis inest natura, ut ad alterius miseriam misericordia tangatur. Hunc vero affectum non omnibus dedisset natura, nisi voluisset, ut non affectu tantum omnes omnium misererentur, verum etiam re, quoad possent, omnibus opitularentur. Suadet idipsum naturae aequalitas, & natura societatis, quae bonorum exigit communicationem. Deinde idipsum colligitur ex doctrina Evangelii, quae extat cap. 21. Lucae. Extat locus egregius S. Basilii Homilia in siccitatem, & famem: licet, inquit, unus tantum tibi sit panis, ad fores autem mendicus adstet, deprome unicum illum ex cella poenaria.

§. XXIX. Deinde animadvertendum est, in eligenda eleemosina distinguendum quidem esse inter pauperes digniores, & minus dignos: non ita tamen, ut reputetur legitima causa denegandi eleemosinam, quod is, qui petit, indignus ea sit, quae fuit quorundam Casuistarum opinio: eleemosina enim indigenti datur, non moribus indigentis. Illud certe distinguendum est, ut intelligatur, utrum is, qui petit ex ignavia in eo statu sit, an vero ex necessitate. Primo jure denegatur, ne scilicet nostra elargitione alterius ignaviam, & vitia alamus. At contra omne jus denegatur alteri. Confer Ciceronem lib. 1. de Offic. cap. 15.

§. XXX. Praeterea cavenda est & altera quorundam Casuistarum opinio, non esse dandam eleemosinam cum ullo nostro detrimento, sed tantum de mere super-

perfluis . Ea doctrina cum altera conjuncta , nemini quidquam esse unquam superflui , comparata est ad omnem caritatem , & beneficentiam auferendam . Enim vero si ex iis superfluis danda est eleemosina , quae cupiditatibus nostris superfluit , quoniam nulla iis superfluit . (Libidini enim nihil est unquam satis) , nihil unquam erit , quod detur .

C A P U T X.

De Amicitia .

§. I. Postquam de Officiis humanitatis , & beneficentiae, idest universalis erga genus humanum amicitiae, disputatum est , operae pretium est , perpauca de arctiori illa amicitia differere , qua maximus benevolentiae , & conjunctionis gradus inter homines continetur . Disseruit ea de re praeclare & saepe Plato , tum Aristoteles in octavo ad Nicomachum , & Cicero in Laelio . Ac quamquam magis eam , quae esse inter homines deberet , quam quae aut est , aut esse potest , amicitiam exorment ; juvat tamen plurimum earum etiam virtutum elegantissima descripta habere exemplaria , quas cogitatione magis , quam opera complecti possumus : habent enim illa nescio quam vim , occultam quidem , sed prope divinam , ad animos permovendos atque incitandos : quae si non licet semper assequi , saepe utilissime imitamur . Quare quamquam ea est mortalium natura ut nihil videantur sincere amare posse praeter seipsos , propterque se amare cetera , ac ideo ejus amicitiae , quam Plato , & Tullius tam pulchris coloribus depinxere , minus sint capaces ; intelligent saltem qui hujusmodi amicitiae verae praeccepta legent , ad eam se quam proxime accedere oportere , si ea voluptate tangi velint , quae ex reciproca animorum communicatione est , qua nihil ego jucundius , nec optabilius putaverim . Non ignoro fuisse plerisque viros eruditos & acutos , qui magnam indu-

industriam & diligentiam in eo posuere, totamque suam adhibuere eloquentiam, ut omnem humanae naturae foeditatem, omnia vitia retergerent: eam ad veram amicitiam & virtutem oblipam & contumacem demonstrarent, eaque in re nos longe brutis animantibus esse deteriores ostenderent, in quibus non exemplaria modo virtutum, in primis amicitiae, sed virtutes ipsas, tanto pulchriores, quanto sine vitiorum mixtura, inesse opinantur. Qui si id efficiant, quo in nobis comparatione cum inferioribus verecundiam concitent, eoque nos ad veram virtutem impellant, minus illi peccant: sed peccant tamen. Nam & taedium tam malignae naturae in nobis ingenerant, & quoniam ut alii aliis diffidamus nos instruunt, omnia societatis & communionis inter nos vincula abruptunt. At enim, *φιλαυτία*,

Quae nunc nos coquit & versat in pectore fixa,
prohibet quo minus alios sincere amemus: ita fit, ut eae virtutes, quae adversus alios sunt, speciem virtutis habere possint, naturam non possint. Sed hi aequo subtilius philosophantes non videntur id intellexisse, quod maxime cupiebant. Scilicet eas sibi excogitare virtutes, quibus ad totum genus humanum perdendum nulla sunt vitia aptiora, quaeque si hominibus concedantur, irato Deo genitos clamabimus. Nam si verae virtutes ab omni nostro amore & cura esse sejunctae debent, miseros esse eos oportet, qui virtuosus esse volunt; immo ne esse quidem, quia nec ut sint beati, nec ut sint, cogitare aut curare debent, quo iis exornentur virtutibus, quae nullo modo ab utilitate aut felicitate nostra profiscantur. Quod si probare nequeunt, fateantur, veram virtutem, ut non potest, ita ne debere quidem a nostri amore & utilitate esse separatam, in eoque esse virtutis praestantiam positam, ut nequeat nostri felicitatem efficere a felicitate aliorum sejunctam. Quamobrem in eo potius operam ponant suam, ut demonstrent, ita esse homines a Natura comparatos, ut tum se recte & sapien-

sapienter ament, ac sui felicitatem sequantur, quum pro virili & aliorum felicitati student.

§. II. Sed inde, unde exorſi ſumus, redeamus. *Amicitia eſt ben-volentia mutua & manifeſta, qua alter alteri ipſius cauſſa bonum cupit.* Quamquam autem ſine benevolentia nulla eſſe poſſit amicitia, non tamen omnis benevolentia eſt amicitia. Eſt enim quaedam benevolentia non mutua: quaedam non manifeſta alteri: Quaedam denique plane otioſa, hoc eſt non conjuncta cum deſiderio convictus, neque cum cupiditate gratificandi alteri: quorum utrumque in vera amicitia requiritur. Ex eo vero oritur amicitia, quod alter in altero, vel re ipſa deprehendit, vel ineſſe credit ejusmodi bonum, quod amore, & benevolentia dignum ſit, ac arctiorem cum eo nexum & conjunctionem exigit. Haec enim perſuaſio impetum illum, quem natura nobis ad amicitiam indidit, excitat, & promovet. Nam homines natura ipſa ad ſe mutuo amandos, ut ſaepe dictum eſt, geniti ſunt: quia nempe ſine mutuo amore non ſolum nec beate, nec bene eſſe poſſunt, ſed ne eſſe quidem.

§. III. Sunt autem bona omnia, quae amicitiam parere poſſunt, tria omnino, ut obſervat Ariſtoteles, *jucundum, utile, honeſtum*. Ex ſolo autem honeſto ſtabilis, & vera naſcitur amicitia: nam cum duo illa priora facili mutationi ſubjecta ſint, neceſſe eſt ut amicitia diſſolvatur, ubi illa ceſſaverint. Praeterea, qui alterum amat jucunditatis, vel utilitatis ergo, ſe potius amat, quam alterum, ut id circo ubi voluptas, & utilitas ceſſat, amor quoque omnis perit. Adde, quod in hac amicitia perfecta animorum conjunctio & fides mutua, ſine quibus amicitia conſiſtere nequit, nullae eſſe poſſint. Contra vero, quae virtuti & honeſtati tribuitur amicitia, & vera eſt, & aeterna. Nam etiamſi contingat partem alteram deteriorem fieri, amicus ejus vitiis iraceſcere ſemper, ſed amicum conſtantiffime amabit, quem emendatum, non vero nullum volet.

§. IV.

§. IV. Amicitiam & in omni fortuna, & in omni aetate atque statu hominis esse necessariam, accurate prorsus demonstravit Aristoteles lib. 8. ad Nicomacum, cap. 1. , ut egregie pronunciet Cicero, *non aqua, non igni pluribus nos uti locis, quam amicitia, & Solem e mundo tollere videri, qui amicitiam e vita tollant*. Enim vero in secunda fortuna duobus potissimum de causis opus est amicis. Prima, quia sine iis fructus bonorum propemodum perit, beneficentia, inquam, & jucunditas illa, quae in amicos maxime exercetur. Praeterea nullius boni sine socio jucunda esse potest possessio, ita ut in maximis opibus colloquium & victum amicorum omnes homines desiderarent. Secunda quia opus est custodia, & tutela bonorum, quae quo majora sunt, eo plures nanciscuntur aucupes, & aegrius custodiuntur. Quo circa qui plus possident, plures quoque & majores amicos habeant necesse est.

§. V. In adversa fortuna opus esse amicis, cum solatii, tum perflugii, & auxilii gratia, nemo ignorare potest, nisi qui nihil unquam adversi in vita expertus est. Eleganter haec omnia complexus est Cicero in libro de amicitia: *Cui, inquit, potest esse vita vitalis, ut ait Ennius, qui non in amici mutua benevolentia conquiescat? Quid dulcius, quam habere, qui cum omnia audeas sic loqui, ut tecum? Quis esset tantus fructus in prosperis rebus, nisi haberes, qui illis aequae ac tu ipse, gauderet? Adversas vero res ferre difficile esset sine eo, qui illas gravius etiam, quam tu, ferret.*

§. VI. Porro in omni aetate pernecessariam esse amicitiam est exploratum. Nam, ut ab ipsis exordiamur incunabulis, in infantia nobis opus est amicitia & tenero parentum amore, quo rite educari possimus. Est enim haec aetas tenella, ac non corporis tantum vitiis, sed cum primis animi obnoxia, ut id circo sinceri & magni educatorum amoris indigeat. Itaque ita divina Providentia comparatum est, ut natura ipsa

ipsa omnes homines tenerrimo erga liberos ferantur amore . Hunc amorem aufer , quid nisi aut brevi deserta Tellus , aut impiis & nefandis latronibus esset oppressa ?

§. VII. Quod ad adolescentiam attinet , ei etiam amicis maxime est opus , Primo propter imbecillitatem judicii : Secundo ob affectuum vehementiam : Tertio ob rerum imperitiam . Itaque nisi adolescentes amice instituuntur , artibus ingenuis erudiantur , moribus imbuuntur honestis , revocenturque a vitiorum illecebris , ac sicubi exorbitare coeperint , moneantur , & in viam retrahantur , profecto aut crudi proveniunt lateres , aut indomitæ ferae . Quo circa nihil habere prius & majus adolescentes debent , quam ut viros probos , rerum peritos , prudentesque & doctos in amicitiam adfiscant , Incredibile dictu est , quam rite , & vehementer hac via proficiant , Hac arte educabantur nobiles juvenes Persae . Vide Xenophontem in *Educatione Cyri* .

§. VIII. Sed & viri opus habent amicis , cum ad rerum cognitionem , tum maxime ad actionem . In cognitione quidem , & ad consilia ineunda , & ad ea exequenda , Nam plus vident oculi , quam oculus , ut est in proverbio . Deinde ad res gerendas non mediocre praesidium est in amicorum benevolentia , *Virtutum* , inquit Cicero , *amicitia adjutrix a natura est data , non vitiorum comes : ut quoniam solitaria non posset virtus ad ea , quae summa sunt , pervenire , conjuncta & sociata cum altera perveniret* .

§. IX. Jam vero nulla aetas magis amicorum indiget , quam senum . Senes enim ob mentis & corporis imbecillitatem neque se , neque sua recte curare possunt , neque eas res obire , quae aut animi , aut corporis robur aliquod exigunt . Praeterea quoniam haec aetas quasi solitarios homines efficit , nisi convictu amicorum recreentur senes , vitam minime optabilem vivant necesse est : otium enim in solitudine mors quaedam est hominis viventis .

§. X.

§. X. De privata amicitiae utilitate hucusque disseruimus: Publica nunc paucis demonstranda est. Ac publice amicitiam esse non modo utilem, sed necessariam, inde facile perspicitur, quod ea tanquam vinculo civitates contineantur, & ad magnitudinem, & felicitatem suam perducantur. Efficit enim publica amicorum amicitia, ut alii aliorum commoda promoveant, ad praeclara facinora se se mutuo adjuvent, comunibus viribus hostibus resistant. Itaque vetusti legumlatores plus in amicitia inter cives concilianda, quam in constituenda iustitia adlaboraverunt; quemadmodum Aristoteles observat: quod scilicet non ignorarent, constituta amicitia, iustitiam sequi sponte sua: cum est contrario posita iustitia, non necessario sequatur amicitia. Praeterea rerum publicarum gubernatores cum sciant quantum momenti ad tranquille civitatem regendam in opinionum etiam concordia positum sit, illud quoque curarunt, ut una esset in republica religio, ut eodem modo & cogitarent omnes, & agerent.

§. XI. Quae cum ita sint, videamus modo, quae sint praecepta amicitiae, aut ineundae, aut conservandae, aut etiam dissolvendae, ubi opus est. Ineundae amicitiae potissima praecepta sunt duo. Primum, ne statim quemvis in amicitiam adsciscamus, sed probe prius mores ejus, ac fidem exploremus, cum quo arctiorem contrahere amicitiam volumus. Imprudentis enim est ei te, & tua concedere, quem non probe prius novisti. Vide Sen. Epist. 3. Huc pertinet vulgatissimum adagium, *multos salis modios una esse edendos, donec amicitia penitus coalescat*.

§. XII. Exploratur autem futurus amicus quinque praecipue modis, secretis, pecuniis, & lucro, honoribus, adversa fortuna, & anteacta cum aliis amicis vita. Principio, *comissa tenere qui nequit, hic niger est, hunc tu Romane caveto*, praeclare inquit Horatius: quantumvis enim quisquam natura bonus sit, tamen si garrulus fuerit in arctiorem amicitiam admit-

admittendus non est ; nam consistere nequit vera amicitia sine animorum perfecta conjunctione : nec perfecta conjunctio haberi potest , ubi altera pars levis est & garrula . Discimus autem alterum esse garrulum , primo si facile sua , & suorum patefaciat secreta : secundo si verbosus sit , & fabulator : tertio si percunctator molestus : Hinc illud , *percunctatorem fuge : garrulus idem est.*

§. XIII. Deinde quoniam inter affectus vehementiores , quibus homines agitari solent , connumerandi sunt avaritia , seu lucri cupiditas , & ambitio , idest dignitatis immoderata cupido , qui amici causa lucrum , & dignitates contemnit , ut se non patiat ab iis abstrahi , & separari ab amicitia , proculdubio , si ceterae adsint dotes , in amicitiam adiscipi potest . At si lucri cupidus fuerit , aut nimis ambitiosus , omnia lucro & dignitati postponet . Itaque omnium hominum ad amicitiam ineptissimi sunt avarus , & ambitiosus . *Est enim amicitia* , inquit praeclare Cicero , *nihil aliud , nisi omnium divinarum humanarumque rerum cum benevolentia , & caritate summa consensio .* Qui autem haec consensio cum avaro , & ambitioso esse potest ? Atque id in primis animadvertendum est , ambitiosum , si intelligat , te aptum ambitioni suae instrumentum esse posse , misere amicitiam simulare : neque enim inter omnes homines quisquam est ambitioso magis adulator . Accurate igitur haec adulatio perpendenda est , & ab amicitia , cui simillima est , discernenda . Extat super ea egregium Plutarchi opusculum , *quomodo discerni queat adulator ab amico* ,

§. XIV. Sed nulla magis in re exploratur animus ad veram amicitiam compositus & aptus , praeterquam in adversa fortuna : in eo enim hominis statu aperte intelligitur , quantum quisque se , quantum amicum amet . Inde illud est proverbium , *Amicus certus in re incerta cernitur* . Nam qui amicum in re incerta deserit , is magis fortunae , quam personae amicus fuisse

fuisse videtur . Quocirca minime amici putandi sunt illi , de quibus Ovidius ait,

Tempore felici multi numerantur amici .

Sed ii tandem veri amici sunt , qui in adversa fortuna constantissime adhaerent , Prudentis autem hominis est , priusquam intimae amicitiae contrahat , huiusmodi confingere casus , qui incerti & dubii videantur , ut ita , ficta calamitate , exploret quid sperare liceat in vera .

§. XV. Praeterea omnium tutissima & compendiosa explorandi amicos ratio est inquirere , quomodo illi adversus alios amicos se gesserint , aut adhuc gerant . *Talem* , inquit perspicere Isocrates , *erga te fore amicum intellige , qualis erga alios fuit* . Exploratio autem haec , de qua in hoc primo praecepto locuti sumus , ad amicitiae stabilitatem plurimum facit : quia quem explorasti , ei non diffides , non male de eo suspicaberis , nec ab eo metues , non facile conquereris , nec aliorum de ipso querelas admittes , quae amicitias disturbare solent . Lege Ciceronem de amicitia , & Senecam in Epistola III.

§. XVI. Secundum praeceptum ineundae amicitiae est , ut tot tibi copules amicos , quot una tecum , atque inter se familiaritatem colere commode possint , & libenter velint , ac quorum usibus inservire queas . Utrumque enim horum jus verae amicitiae postulat . Non probo igitur magnum intimorum amicorum numerum , Primo , difficile est unius hominis mores explorare : quid plurium ? Secundo , cum omnibus convictus , & frequens conversatio haberi nequit ; unde est necesse , ut brevi tempore amicitiae evanescant . Tertio omnibus inserviri non potest , quod amicitiae iura exigunt . Itaque quisque sui , ac conditionis suae rationem inire debet , ut intelligat , quot sibi amici intimiores esse queant . Intimiores dico : nam vulgares qui dicuntur amici , quorum tamen amicitia ad animi penetralia non pertingit , multo plures haberi possunt , seu potius hanc amicitiam cum omnibus

bus iis, quibuscum versamur, percolere debemus.

§. XVII. Praecepta amicitiae colendae & conservandae ad sequentia conferri possunt. Primum, ut in amicitia amor fervorem habeat, & constantiam. Amoris fervor in hoc primum dignoscitur, ut alter alteri optima quaeque cupiat non secus atque sibi, & ut ea consequatur amicus, sedulam det operam. Deinde in eo, ut alter alterius rebus secundis aequae laetetur, ac suis; adversis autem aequae tristetur. Demonstrabit vero amoris constantiam, si nulla de causa patiatur ab hoc erga amicum amore divelli, non lucro, non honore, non labore, & periculo, non temporis diuturnitate, nec locorum distantia.

§. XVIII. Secundum praeceptum est, ut maxima sit inter amicos voluntatum consensio. Haec consensio in eo primum manifestanda est, ut amicus amici studiis, & propensionibus, modo nihil turpis contineant, non solum non adversetur, sed ultro obsequatur, & iisdem delectari se ostendat. Secundo, ut sententias ejus & consilia non carpat, sed vel approbet, vel, si non rectas putet, ut modeste ac urbane repugnet, ac flectere potius blande amicum studeat, quam vi, aut jurgiis alio rapere. Praeterea, ut non acerbe, non ambiciose, nec pertinaciter opiniones suas adversus amicum propugnet: omnium enim hominum amicitiae ineptissimi sunt, qui dicuntur contradictores perpetui, & acerbi. Tandem amicus amicum aliqua in re dissentientem aequo ferat animo: quaedam enim indulgenda sunt constitutioni animi, vel corporis, loco, tempori, aliisque circumstantiis. Sed cavenda est scurrilis assentatio. Perbelle Horatius lib. 1. Epist. 18.

Ut Matrona meretrici dispar erit, atque

Discolor, infido scurrae distabit amicus.

§. XIX. Tertium praeceptum est, ut officiorum sit inter amicos vicissitudo, & paritas quoad utriusque fortuna, conditio, aetas patitur. Observabitur autem hoc praeceptum, si tales in amicos nostros nos esse sa-

Tom. IV.

P

taga-

tagamus , quales eos in nos vellemus . Quae autem amicus amico officia debeat , ex iis , quae superius de beneficentia dicta sunt , intelligi potest : est enim amicitia maximus & reciprocus benevolentiae gradus . Possunt autem amicorum officia ad duo potissimum capita conferri , consilium , & auxilium . In consilio promptitudo , & sinceritas eluceant . Quod ad auxilium pertinet , illud amico in dubia , aut adversa fortuna praecipue debemus . Inter auxilia vero maximum est , & quod amicitiam heroicam constituit , ut minime vereamur bona , libertatem , & vitam denique pro amico in causa iusta & honesta impendere . Hinc laudatur in Evangelio huiusmodi amicitia : *Nemo majorem charitatem habet , quam ut animam suam ponat pro amicis suis .*

§. XX. Quartum praeceptum est , ut sepe & libenter cum amicis conversemur , & colloquamur , coram quidem , si praesentes sint , per litteras vero , si absentes . Qui hoc officium transgrediuntur , ostendunt se amicitiae poenitere , aut amicum negligere , quo fit , ut amicitia paullatim intercizat . In conversatione autem cum amicis sequentia sunt observanda . Primum in sermonibus veracitas , candor , & fides : simulatio omnis , & assentatio abesto . Sed & parva mendacia a conversatione amicorum abesse debent : ea enim efficiunt , ut paulatim amicus amico diffidat . Secundo comitas , suavitas , & elegantia morum : Vitanda ergo est rusticitas , incompta asperitas , & quidquid hominibus politioribus grave esse potest . Tertio taciturnitas : capitale enim in amicitia est non solum secreta referare , sed etiam familiares sermones vulgare . Nam ea est amicitiae natura , ut amicus cum amico velut cum altero se agere possit . Duo amicorum officia praestantissima binis versibus complexus est Horatius in Epistola superius laudata .

Arcanum neque tu scrutaberis alius unquam ;

Commissumque teget & vino tortus & ira .

§. XXI. Quintum est praeceptum , ut ne facile fini-

sinistris de amico suspicionibus aures accomodemus , neve ejus virtuti , ac fidei temere diffidamus : *nam multi fallere docuerunt , dum timent falli , & aliis jupeccandi suspicando fecerunt* , quod praeclare observat Seneca in laudata Epistola tertia . Non quaelibet amici dicta , aut facta , quae incauto fortassis exciderunt , in crimen trahenda sunt , quasi in nostrum contemptum dicta , aut facta . Aequitas in judicando adhibenda est , atque omnia in meliorem partem interpretanda , quousque clare non pateat , alterum ab amicitia discessisse , ac nos laedere voluisse .

§. XXII. Sextum praeceptum est , ut ne criminationes , aut querelas de amicis facile admittamus , sed eorum , praesertim absentium , famam summo studio , ac fide contra calumniatores defendamus . Praeterea ipsi amicos numquam criminemur , nec facile apud quemquam de iis conqueramur . Si quid vero contingat , de quo amicos velimus admonitos , illud servemus vetus dictum , *secreto amicos admone , laudapalam* .

§. XXIII. Jam septimum est , ut nemo reprehensiones , atque admonitiones amicorum spernat : ut nemo illis monentibus succenseat : ut recte monentibus libenter pareat : ut salutaria consilia & quaeratur apud amicos prudentiores , & avide arripiat . Enim vero qui hoc praecepto continetur , praecipuus est amicitiae & pulcherrimus fructus : scilicet amicorum reprehensionibus , admonitionibus , consiliis in melius proficere .

§. XXIV. Octavum praeceptum est , ut si quos amicus habeat naevos , quos corrigere non possimus , quique tanti non sint , ut amicitiam idcirco dirimere debeamus , eos aequiori feramus animo . Praeterea , ut ejus in nos delictis lubenter ignoscamus , dum non constat , ea ex averso animo proficisci : ut dissimulemus ea , quae salva virtute & honestate dissimulari possunt . Atque hoc praeceptum iis potissimum observandum est , qui cum amicis paullo iracundioribus ,

aut morosioribus agunt, quales in primis solent esse senes.

§. XXV. Postremum tandem conservandae amicitiae praeceptum est, ut consentaneum amicis honorem exhibeamus: ut eos in honoris significatione praevenire studeamus: ut omnia, quae eorum contemptum demonstrare possent, diligenter vitemus. Ceterum inter amicos fugienda est nimis anxia caeremoniarum, ut vocantur, superstitio, quae adulantis potius est, quam amici. Danda est opera, ut in vultu, voce, ac gestu familiaritatis, & fiduciae mutuae inter amicos signa existant.

§. XXVI. Haec autem, quae recensuimus praecepta, amicitiam inter pares potissimum spectant. Sed quoniam amicitia inter inferiores quoque & superiores esse potest, amicorum imparium officia paucis nunc sunt comprahendenda. Principio in dispari amicitia, qui opibus, aut alio bonorum genere abundant, quod in inferiorum amicorum usum convertere possunt, id libenter efficiant: in hoc enim praecipue amicorum communio posita est, ut quoad rerum natura patitur, omnia inter amicos aequentur. Secundo, ut ii, qui dignitate antecellunt, si se ad inferiores amicos demittant, comitate, facilitate, modestiaque sua eos erigant, non vero supercilio suo, ac nimia gravitate deterreant. Tertio ut quocumque possunt modo amicos, quos virtus, aut sapientia commendat, honoratiores semper reddant, illis dignitatem suam quodammodo communicantes.

§. XXVII. Inferiores vero superioribus amicis haec debent officia. Primum, ut ne iis invideant id, quo superiores sunt. Secundum ut perpetuo honorent & colant, caveantque, ne ob familiaritatem, modestiam, & humanitatem eorum, illos contemnant: sed cum illis facilitate, modestia, & verecundia certent. Verecundia enim cum ceterarum omnium virtutum, tum in primis amicitiae custos est. Tertium ut si superiores amici jure regendi praesint, justum iis sem-

per obsequium praestent, nec amicitia abutantur ad criminum impunitatem. Quartum, ut eorum beneficiis, cum paria referre nequeunt, gratum semper animum ostendant.

§. XXVIII. Quamquam autem natura verae amicitiae, quae virtute innititur, & conservatur, exigit, ut sit aeterna, tamen huiusmodi casus intervenire possunt, quibus necesse sit, omnem amicitiam dissolvere. Ac plures proferri solent dissolvendae amicitiae causae, quae non omnes iustae, aut honestae sunt. Sed una est in primis honesta, & iusta, si amicus ad insanabilem improbitatem deflexerit: si nos criminum comites obstinate velit. Amicitia enim adiutrix virtutum a natura data est, non comes vitiorum, scelestissimique sunt ii, qui ne amicitiae renuncient, amico ad crimina & vitia vires suppetant. Ceterum omnia primum blande sunt pertentanda, ut ad bonam frugem amicum perducamus. Ubi nihil succedit, palam amicitiae nuncium mittendum est. Quod ita est intelligendum, ut ab amicitiae vinculo diffiliamus, non ut veterem amicum oderimus: neminem enim odisse ex naturae lege licet. Memorandum illud, quod superius admonuimus, virum bonum odisse neminem, amicitiam vero cum iis tantum copulare, qui itidem boni sunt. Sed legatur Aristoteles, & Cicero.

C A P U T XI.

De Officiis senum & juniorum, Divitum & pauperum, aegrorum & sanorum.

§. I. **S**unt quaedam alia hominum officia, quae proficiuntur ex diversis statibus, aetatum bonorum fortunae, & corporis, de quibus hic commodius eodem compendio differemus. Ac principio senum officia enumerabimus. Praeclara sunt, quae de senum officiis praecipit Cicero in lib. de Senectute.

te . Is libet attente legendus est . Nos paucis , ad exitum hujus libelli properantes . I. Senum officium est , ut sint graves : ea enim gravitate auctoritatem sibi apud juniores conciliant . Posita est autem gravitas in sermone , & gestu . Sermo esse debet parvus , & sententiarum plenus : gestus rarus , nec ludicrus . Nihil enim turpius esse potest sene scurruli . II. Debent esse sobrii ; quod praeter rationes Naturae , quas protulit Cicero in laudato libello , Scriptura quoque sacra docet in Epist. ad Titum cap. 2. v. 2. . III. Oportet ut sint patientes , nec facile in iram erumpant , quod Officium major pars senum praetergrediuntur , atque ita odium sui in minoribus excitant . Praestat ad hanc patientiam acquirendam memorare saepissime , quae nobis , aut aliis in anteaeta vita acciderint . IV. Affectus suos debent moderari ; perridiculi enim sunt in senibus juveniles affectus , non secus atque vestes juvenum : quumque praecipuus senum affectus sit avaritia , omnibus modis conari debent , ut avaritiae medeantur , praesertim quum absurdum sit eo tempore rebus parcere , quo brevius iis utendum est . Itaque ob hanc rationem tolerabilior videri posset in adolescente in longam spem a natura facto , quam in sene , omnia , mox relicturo , avaritia , nisi in iis affectibus partem majorem temperamentum haberet , quam ratio . Nam temperamento fit , ut adolescentes laetiores , eoque liberales sint , senes vero tristiores , eoque iracundi , & avari , Sed potest plurimum in temperamenta proculdubio ratio , eaque cum omnibus , tum senibus praecipue utendum est .

§. II. Non esse debent queruli de vitae brevitate : idem enim dici posset ab eo qui octigesimum annum vixisset ; quia nempe praeterita aetas quamvis longa , quum effluxit , nulla consolatione permulcere potest stultam senectutem . Quocirca oportet recte , et sapienter vixisse eum qui sapienter mori velit . Quibus enim nihil opis est in ipsis ad bene beateque viven-

vivendum, iis (inquit Cato apud Ciceronem) omnis gravis est aetas. Qui autem omnia bona a se ipsis petunt, iis nihil potest malum videri, quod naturae necessitas ferat. Sed certe sunt hac in re hominum mores ac judicia prorsus perridicula. Idem enim nos, qui saepe de vitae brevitate conquerimur, quum aut otium est grave, aut vel levissimae molestiae angunt, aut spes agitat, temporis quasi aeternitatem lamentamur. Ita fit, ut ne ipsi quidem sciamus qualis sit optanda aetas. V. Instruere Juniores in vitae praeceptis, ac regulis, ac in eo efficiendo & aetatis auctoritate, & veterum rerum memoria uti. Sed in eo cavere debent a vitio senibus prope communi, loquacitate, & acti temporis laudatione, insectatione praesentis: id enim aut a rusticitate provenit, aut ab indignatione non iusta erga praesens, quod statim sunt relicturi. Quocirca omnia ratione, & maturo iudicio expendere debent. VI. Petere a Deo quotidianis peccatorum suorum veniam, scientes quoniam vitae humanae terminus appropinquat.

§. III. Officia juniorum sunt sequentia. I. Studiose vitare juveniles cupiditates, quae hanc aetatem transversum agere solent. II. Audire rationem in omnibus, & monita sapientum, ac seniorum, quam suos privatos affectus. Nisi autem id quotidie perpendeant, a natura paulo fervidiore, atque ab exemplis corruptorum juvenum, facile a virtute abstrahuntur, atque in vitia eunt praecipites. III. Deo sacrare florem juventutis, nec expectare, ut postquam juventutem per scelera omnia traduxerint, fecem senectutis illi offerant. IV. Revereri seniores, & iis obsequi. Senectus enim non gravitate tantum, verum etiam experientia vitae, longe venerabilis est. Pudet me, quum juvenum Spartanorum reverentiam & obsequium erga senes animo volvo, praesentis juvenum nostrorum impudentiae, & immodestiae. V. Ambitionem, prodigam effusionem, otium, luxuriam, quae solent esse juvenum vitia, summo studio compescere,

scere, aut vitare. VI. Fugere multiloquentiam, & jactantiam, in quae item vitia prona est juvenus. Egregium illud est, & memoratu dignissimum, quod de Zenone Stoico retulit Diogenes Laertius. Quum enim adolescens jactabundus & loquax per multam horam caput obtudisset graviorum Philosophorum, tum Zeno gravissime, vide, inquit, ut natura duas aures nobis tribuit, oculosque duos, unum autem os, ut nimirum audiremus, ac videremus multa, loqueremur vero paucis. Tu igitur cave, ne cerebrum per os effundatur. Digna Philosopho vox!

§. IV. Est & alius hominum status respectu bonorum fortunae: nam alii divites sunt, alii pauperes. Divitum ergo officia sunt I. Divitiis suis non effferri, nec superbire. Quam enim stolidum est, ea ne superbire, quae repente abire potest? Iis enim rebus homo sit vere magnus, quae non extrinsecae sunt, sed quae intrinsecae animo, idest virtute. Vide, ut hoc ipsum monet Paulus Apostolus in 1. epistola ad Timotheum cap. VI. v. 13. II. expendere accurate, an bonis artibus divites evaserint; nisi enim id sit, aliena consumunt. Quod eo libentius moneo, quod pauci sint mortalium, qui postquam ad summa fortunarum evaserunt, retro respiciant. III. non collocare in divitiis fiduciam suam, sed in uno Deo vivo, quod praecipit Apost. in eadem Epist. ad Timoth. Ejus officii duae sunt rationes. Prima quia incerta est divitiarum possessio, atque esse potest Nisus, qui modo Cresus erat, ut eleganter ait Ovidius. Altera quia nec vitam praesentem tranquillio-rem efficere possunt sine virtute, nec animum ex-
polire, & instruere. Hinc illud Salomonis: *Quid profunt stulto divitiae, si non possit emere Sapientiam?* Accedit, quod in Scripturis Sanctis fiducia in divitiis vocetur idololatria (ad Ephes. V. v. 5.) dicanturque divitiae esse obstaculo saluti nostrae (Matt. XIII. v. 22.) IV. non nimium gloriari ob possessionem divitiarum, siquidem non meliorem reddunt animum,
nec

nec corpus ab innumeris malis liberant . Itaque praeclare Horatius , *valeat possessor oportet* ,

Si comportatis rebus bene cogitat uti.

V. Divitiis non abuti , ad luxum , computationes , atque ad froenum affectibus reliquis laxandum . Nempe earum finis unica est vitae sustentatio & commoditas . Quocirca qui alium in finem divitiis abutuntur , naturae adversantur . VI. Nunquam contemnere pauperes , in quod vitium divites pronissimi sunt , quod se una cum divitiis metientes , majores pauperibus , erroneo judicio , esse putant , basim scilicet cum statua conjungentes , ut eleganter Nicolius inquit : Esse ergo debent cum pauperibus liberales ; eorumque amantes . VII. Iis uti ad honorem Dei , in pios usus , & ad verae Religionis promotionem : scilicet inter officia vitae humanae praecipua illud locum tenet , *omnia in gloriam Dei facite* , ut docet Apost. VIII. Contenti esse debent iis , quas possident , divitiis , nec immoderata cupidine novas acquirendi cruciari . Sane ex sapientum omnium scitis , nihil inter homines stolidius est , quam dum novis semper bonis studemus , non iuri praesentibus .

§. V. Officia vero pauperum sunt I. non murmurare adversus Divinam Providentiam , nec despondere animum . Qui enim sibi persuasit , Deum sapientissime , & effusione maxima suae bonitatis omnia gubernare , intelligere statim debet , Deo iustas esse rationes , ob quas nos in paupertate detinet : scilicet , aut ut irritamenta & illecebras peccatorum nobis eripiat : aut ut fidem , & constantiam exploret : aut ut castiget , quod suis bonis abusi sumus : aut ut ab amore mundi nos divellat : aut ut formet ad patientiam . Uno verbo , Ita divina providentia comparatum est , ut paupertas & miseria natura ipsa fere semper aut proles sint erroris & malitiae , aut sepes . Elegantissime Plautus in Trinummo *Luxuriae* sororem germanam esse voluit *inopiam* II. Apud se reputare plurimas secum utilitates paupertatem conjunctas habere : scilicet gravissimis

mis ac molestissimis affectibus, quibus solent angī divites, nos paupertas liberat. Egregium est, quod de Cresō Lydorum Rege retulit Herodotus lib. I., cui tantum abest, ut Solon immensas divitias inviserit, ut potius beatiorē illo reputaverit pauperem quendam Atheniensem. III. Victum sibi comparare honesto labore. IV. ob paupertatem suam, dummodo a vitiis non processerit, nec vitiis alatur, non erubescere. Poplicola, qui primus Romanorum Consul fuit, in tanta paupertate obiit, ut de publico aerario deferri debuērit: neque interim ea paupertas tanto viro de parte gloria quidquam detulit. Phocion, quum a Rege Philippo munera magnae pecuniae repudiaret, legatique hortarentur accipere, simulque admonerent, si ipse his facile careret, liberis tamen suis prospiceret, quibus difficile esset in summa paupertate tantam paternam tueri gloriam, his ille, *Si mei similes erunt, idem hic, inquit, agellus illos alet, qui me ad hanc dignitatem perduxit: sin dissimiles sint futuri, volo meis impensis illorum alere, augerique luxuriam.* Nepos in Phoc. V. Non debent esse superbi: pauper enim superbus intolerabilis est. VI. Non abuti eleemosinis ad intemperantiam, & luxum, quod qui faciunt, graviter peccare censendi sunt contra finem eleemosinarum VII. Non mendicare, si aliter sibi victum quaerere possunt: est enim id manifestum furtum. VIII. Precari Deum perpetuo, ut ipsis det, quo patienter ferre paupertatem possint.

§. VI. Ratione corporis alii homines sunt sani, alii aegroti. Sanorum officia sunt. I. Incumbere quantocius virtuti, dum valent, neque expectare, ut Horatius eleganter dicit, *dum defluat annis*. Id enim est temerario de vita longaeva iudicare. Praeterea nemo certus esse potest se deinceps commodum futurum, & difficilius fit, quum vitiorum habitus profundas jecerint radices. II. Nunquam sibi blandiri, sed quotidie se mori posse cogitare. Digna lectu sunt, quae super hac re passim praecipit Seneca in Epistolis

lis . III. sua negotia omnia , dum bona valetudine possunt, ita disponere , ut nihil eos turbet instante morte. Prudentiae enim id est oeconomicae . IV. Frequentibus precibus omnia ad bene moriendum subsidia a Deo implorare .

§. VII. Aegrorum autem sunt . I. Reputare secum Deum ipsis morbos immisisse , quibus aut purgaret a vitiis , aut praepararet ad virtutem . Dici vix potest , quantopere aegrotos levet , atque constanter efficiat haec cogitatio . II. Deum benedicere , quemadmodum Sanctus Job , non murmurare , illud secum cogitando , quod Salomon dicit , *meliora sunt vulnera diligentis , quam oscula odio habentis* . III. Quin gratias Deo agere , qui quum jure severius possit animadvertere , tam leviter puniat . IV. Vitam suam , quum praesentem , tum veterem accurate expendere , num singulari aliquo crimine eum morbum meruerint . V. Remedia necessaria non negligere , ne videantur obistere Divinae providentiae , saltem dum remedia non sint magis intolerabilia , quam mors . VI. Non quaerere sanitatem malis artibus . Itaque omnino reiicienda est eorum opinio , qui docent , si morbus sit ex maleficio , licere maleficium maleficio dissolvere . VII. Se ad mortem sponte componere . Quid enim turpius , & Christiano potissimum homine indignius , quam expectare ut ab aliis vix vi disponatur ad mortem , ad quam continenter tendimus ?

C A P U T XII.

De Statu hominis sociali , deque variis officiis , quae ex variis societatum generibus proficiuntur , ac primum virorum & uxorum , parentum & liberorum .

§. I. **O**Portet nunc hominem in statu sociali contemplari , atque in eo ad officia for-

formare ; quod nos hoc capite summatim , quatenus elementorum angustiae sinunt , efficiemus . Societatum ab Aristotile tria statuuntur genera , minimarum ac simplicium , mediarum ac paulo compositiorum , & magnarum , seu Civitatum , & Regnorum . Minima societas posita est in unione Maris & Foeminae per legitimas nuptias contracta . Haec omnium societatum simplicissima est & prima . Itaque idem Philosophus eleganter nuptias appellat *Elementa Civitatis* prima , quemadmodum atomi prima sunt corporum elementa . Mediae societates sunt familiae , quae paulo compositiores sunt , quam primae illae , constantque ex Patre , & Matrefamilias , liberis atque servis . Hae societates si extra majora imperia civilia vivant , cum civili imperio sunt monarchico : Pater enim velut princeps familiae & Rex est , ac familia tota parvum Regnum , quod antiquis mortalibus non ignotum fuit , ut ex regimine Patriarcharum discimus , atque non uno in loco indicat Homerus Ethnicorum omnium scriptorum antiquissimus & alteris mundi originibus vicinior , dum Cyclopum mores describit . Societates majores sunt Civitates , Regna , Imperia , quae ex pluribus primi , & secundi generis constantur .

§. II. De causis , ut vocant , impulsivis societatum minorum haud valde disputatur , inter doctos . Nuptiarum enim duas impulsivas causas reperimus , unam *internam* , appetitum Veneris , quo animantia ipsa Bruta ad sobolem procreandam impelluntur : alterum *externam* , Deum nempe , qui primas nuptias , quae essent exemplar ceterarum , & constituit , & benedixit ; atque faecundavit , quod nos Historia Sacra docet . Secundum Nuptias vero provenere Familiae , quae societates sunt secundi generis . Eae proculdubio tribus causis ortum debent , *Necessitati* , *Naturali* cuidam erga parentes *obsequio* , & *Gratitudini* . Nam principio Infantes , & Pueri , dum in minoribus sunt ad omnia officia vitae animalis ac civilis majorum indigent auxilio , & institutione .

Ita-

Itaque haec necessitas parentibus illos arctissime conjungit. Deinde omnes homines cum naturali quadam erga parentes veneratione a natura gignuntur : inde item unio cum parentibus , atque parentum ergo amor inter semet. Tandem Beneficiorum acceptorum memoria gratos liberos erga parentes efficit . Ea tertia unionis causa .

§. III. Sed de causis impulsivis Civitatis , atque Imperii civilis , magna est inter doctos disceptatio . Sunt qui putant , opus Naturae esse Civitates & Imperia civilia , ut Joannes Fridericus Horaius de Civitate lib. I. cap. IV. §. VI. , quod scilicet naturali quodam , ac a Deo disposito rerum ordine , & consequutione naturae , primum sint natae , hodieque nascantur civitates , & Imperia civilia . Nimirum primum par mortalium , ex quo totum genus humanum fuit propagatum , amore conjugali captum fuit ad nuptias : inde vero natura ipsâ soboles naturali erga parentes amore iis adhaesit : hinc familiae paulatim multiplicatae manserunt inter se conjunctae , expertae commoda , ac voluptates vitae civilis : quae paullatim auctae integras gentes constituerunt , quod Sacrae historiae consentaneum est : hunc enim in modum illa docet plebrasque Asiae & Africae gentes coaluisse . In Arabia notae adhuc tribus , tribuumque eadem origo atque Hebraicarum . *Bolenvilliers vita Muham.* . Non igitur , nisi commentum habet , quod Thucydides , Plato , Aristoteles , Cicero , aliique retulerunt , olim , genus humanum per silvas vagam , ac solitariam vitam ferarum more egisse ; quod id commentum in eorum tantum Philosophorum systemate locum habere potuerit , qui homines e Tellure genitos sibi persuadere , alioquin confectarium esset sine principio . Ac vero gentes omnes , quae nuper orbi nostro innotuerunt , aliqua inter se civilis societatis saltem imagine conjunctae sunt repertae ; Vide Kolbi in descriptione *capitis bonae spei* , & itineraria Americae recentissima .

§. IV. Alii vero , ut Plato , & Cicero , ut ne quid

quid dicam de Philosophis Epicureis , quum constitissent , homines olim vagam & ferinam vitam agitalle , (id quod qui negat , in nationum originibus hospes sit necesse est) censuerunt indigentia & utilitate motos fuisse ad Civitates , & Imperia civilia statuenda , quippe a quibus ea comoda haberent , quae aliunde frustra sperarent . Pufendorffius genuinam hanc ponit coeuntium in civitates hominum causam , ut scilicet praesidia vitae sibi compararent contra mala , quae homini ab homine imminet . Sunt qui putant , nefarios primum homines Imperia civilia inter se constituisse ad bonos opprimendos , bonosque impulsisse ad idem efficiendum . Plerasque Graeciae civitates ita coaluisse docet Thucydides lib. I. *de bello Peloponnesiaco* . Inprimis vero ingeniosum est Vici nostri sistema , qui ex ferino statu tonitru homines ad nuptias , & hinc familias , impulsos fuisse contendit . Inde vero partim amore naturali , partim nefariorum metu natas Civitates , & Imperia civilia . Ego sic sentio , ex omnibus his causis aliquas natas civitates , & imperia civilia , quod nos veteres nationum historiae conducunt . Praeclare Cicero lib. II. *de off. cap. 6. atque etiam* , inquit , *subiiciunt se homines imperio alterius , & potestati pluribus de causis . Ducuntur enim aut benevolentia , aut beneficiorum magnitudine , aut dignitatis praeslantia , aut spe sibi id utile futurum , aut metu , ne vi parere cogantur , aut spe largitionis promissionisque capti , aut postremo , ut saepe in nostra Republica videmus , mercede conducti .*

§. V. Jam societatibus omnibus , cujuscunque eas sint generis , id comune est , ut sint veluti *personae morales & artificiales* . Scilicet qui in societatem coeunt , in hunc finem consentire omnes debent , ut sese mutuo foveant , atque defendant , quemadmodum in persona naturali partes omnes in unam conspirant harmoniam . Atque ut ex harmonia personae naturalis ejus salus existit , ita ex concordia in iisdem mediis , atque conspiratione in eundem finem , eorum , qui societatem

con-

constituunt , nascitur , & conservatur salus . Ita singulorum in societate coeuntium quasi unus esse debet intellectus , atque una voluntas ; neque enim aliter inter eos concordia ulla esse potest ; quae unitas intellectus , & voluntatis a legibus seu naturae , seu civilibus , aut a pactis progignitur . Nec ullo modo esse potest civitas , ubi aut leges , aut pacta omnes homines non uno modo ad eadem velle , eadem nolle incitaverint . Ex quo illud sequitur confectarium diligentissime observandum , omnes socios obligari ad actiones suas fini societatis conformandas : nili enim conforment , dissoluta sit societas necesse est . Itaque ex fine societatis officia sociorum sunt deducenda . Officia autem dico , quae societatem ipsam spectant : nam de officiis societatis adversus societatem idem omnino dicendum est , quod de officiis hominis adversus hominem praecepimus , quoniam singulae societates velut personae morales sunt .

§. VI. Ut autem per summa capita praecipua societatum officia prosequamur, initium faciemus a simplicibus , idest a conjugio , & familia , quae sunt majorum societatum & civitatum seminaria . Ita autem haec officia explicabimus , ut cum iis quae ratio & jus naturae praecipiunt , leges etiam christianorum sacras jungamus aliquando . Conjugii , seu nuptiarum naturales fines duo statui possunt , procreatio ac educatio proles , & vitae socialis voluptas , quos fines & ratio naturalis dictat , & aperte docet Scriptura , quum alibi , tum praecipue initio Geneseos . Enim vero & sine conjugio genus humanum *unius esset aevi turba* , ut ille eleganter dixit : & fas non est , ut qui sunt ratione praediti ferocia animantia in civitatem invehant , quales futuri essent homines sine cultura , & educatione . Quare non ut generent solum liberos , sed & ut educent excolantque , mas & foemina nuptias ineunt . Sed & socialis conjugum vita , praesertim si mores & temperamenta utriusque sibi sint concordia , vitam efficit laetiolem & jucundiolem , habetque vim amicitiae

citiae incredibilem quum in prospera , tum in adversa fortuna , quod ex iis , quae superius de amicitia differuimus , facile intelligitur .

§. VII. Ex iis finibus deducenda officia virorum, & uxorum, quae nos paucis indigitabimus. Ac principio viri debent amare uxores suas. Eum enim Amorem & natura conjugii exigit , quod amicitiae genus arctissimae est ; & Scriptura divina praecipit (ad Ephesios cap. V. v. 23. ad Coloss. cap. III. v. 19.) II. debent eas curare , ut seiplos , earum saluti , incolumitati , prosperitati studere , tamquam si essent una persona , qua ratione intelligendum est illud Dei verbum in Genesi , *quamobrem relinquet homo patrem & matrem suam , & adhaerebit uxori suae , & erunt duo in carne una* . III. Debent eorum malis succurrere . IV. Omnia externa Amoris testimonia ipsis dare . V. tribuere illis honorem , ut infimioribus , quod praecipit Apostolus epistola I. ad Corinth. cap. III v. 7. . VI. Imperium suum in eas ita moderari , ut pateat eos cum ipsis cohabitare , tamquam cum amicis , non tanquam cum ancillis . VII. Naevos tollerare , si corrigi non possint . VIII. Non eas excipere verbis asperis , aut minacibus ab humanitate abhorrentibus , non vultu austero , moroso , torvo , & iram , odiumve spirante , non factis ab ira , & odio profectis , non verbis , aut gestu , quibus contemptus significetur : sunt enim haec amicitiae contraria , quae inter conjuges esse debet & arcta & sincera . IX. debent ipsis servare fidem , quia eam promiserunt , & quia non sunt Domini sui corporis , ut monet Paulus Apostolus I. ad Corinth. VII. v. 4. , & 5. . Virorum itaque virtutes esse debent Dei amor , prudentia , mansuetudo , ac lenitas , vigilantia , diligentia , animus fortis . Horum omnium una ratio est , quia nec vita haec socialis sine his virtutibus esse potest , nec prolis procreatio , & educatio legitime fieri .

§. VIII. Officia uxorum sunt . I. Debent subiici ma-

maritis in omnibus, quae a Deo prohibita non sunt: quia viri natura ipsa praerogativam quasi Principis gerunt in familia: quocirca nullo modo uxores auctoritatem sibi usurpare in maritos fas est. Vide ut haec inculcat Scriptura I. Petri v. 3. cap. I., ad Ephes. V. v. 4. I. ad Timoth. cap. II. v. 12. I. ad Corinth. cap. II. v. 8. . II. Quod ex antecedente sequitur, revereri debent maritos, & ut verbis Petri Epist. I. cap. III. v. 6. utar, *colere, ut Sara Abrahamum*. III. Tenuerrimo amore complecti, & omni obsequio legitimo ipsorum benevolentiam sibi conciliare. IV. Fidem ipsis inviolatam fervare. V. Eorum malam indolem sua mansuetudine, & prudentia vincere. VI. Condonare ipsis, si quid duri adversus eas praestiterint. VII. Eos sedulo curare, & iis opem ferre in omnibus. VIII. Eorum bona, vel pessima oeconomia, vel malis artibus numquam dilapidare, & consumere. IX. Eorum saluti aeternae sermonibus piis consulere. Praeclare quidem ad haec significanda veteres Germani, ut ex Tacito discimus *de moribus Germ.* consueverant in nuptiis mariti juxta & uxores dona haec sibi mittere, boves jugatos, hastam, equum phaleratum. Virtutes igitur necessariae in mulieribus sunt lenitas, castitas, fides, diligentia, prudentia, modestia, aeconomia, pietas.

§. VIII. Porro officia parentum erga liberos sunt. I. Parentes debent amare liberos, non tamen stulte deperire: is enim amor necessarius est & ad societatem familiae pacatam conservandam, & ad probam educationem. II. Honestè educare debent. Complectitur autem honesta educatio quum rectam atque honestam intellectus & voluntatis institutionem, tum alimenta, & cultum corporis, quorum utrumque debet esse frugi, liberali tamen homine, ac puero dignum. Vitanda itaque sunt luxus, & sordes, quae extrema sunt educationis vitia. III. De veritatibus Christianis accurate eos instruere debent, Dei in illis amorem, & pietatem instillare, horrorem vitii in-

Tom. IV.

Q

gene

generare , non solum verbis , & adhortationibus , verum maxime exemplo vitae suae : dici enim vix potest quantopere animi puerorum ab exemplo majorum commoveantur : sunt enim infantes , & pueri mollicerae simillimi in quibus quidvis vultu , gestu , verbis , actione quacumque facile imprefferis . IV. Castigare , quum est opus , licet non ultra modum : neque enim id natura , neque prudens institutio exigit : quippe nimia poena ingenium liberorum obtunditur , & de liberali fit servile . Ceterum ut severius in liberos imperium paternum non est secundum naturam ; ita nimia ejus imperii deminutio , quae apud eos paulatim veteri disciplinae successit , rectae liberorum educationi adversatur . Ac quemadmodum veteres nationum leges nimia severitate peccarunt , ita recentia instituta nimia indulgentia . V. nullis eorum vitiis blandiri , ne pueri sibi persuadeant , majora etiam licere . VI. Affectus eorum , quum erumpunt , reprimere , sed rationibus ex honestate depromtis , non injuriis , in quo imprudentes patresfamilias plerumque peccant . VII. eos non irritare , vel honesta atque aequa illis denegando , vel nimis severe eos tractando , vel immerentes verberando , vel nihil condonando . Nam illud summum jus est summa injuria , & huc quoque pertinet .

§. IX. Porro VIII. parentum erga liberos officium est , numquam iis aliquid mali praescribere ; ita enim auctoritate parentum scelesti fieri incipiunt , ac deinceps vix ulla medicina corrigi possunt . IX. eorum naevos tolerare , quum corrigi nequeunt . X. Ipsis comparare bona necessaria : impelluntur enim eo a natura ipsa , quae non tantum affectum erga comoda liberorum in parentibus ingenerat , verum etiam aperte docet , quoniam liberum fuit parentibus abstinere a conjugio , liberis non fuit nasci , ut eorum sustentationi prospiciatur . Scilicet postquam voluisti finem , necesse est , ut & media velis .

§. X. Officia autem liberorum erga parentes sunt sequen-

sequentia . I. Amare parentes tenerrimo amore , & hunc amorem omnibus occasionibus testari . Est enim id consequens non naturae tantum , verum etiam beneficiorum parentum in liberos . Ceterum non plus amare oportet , quam Deum , quod Christus Servator noster praecipit Matt. X. v. 37. II. Revereri eos , & omnia reverentiae officia exhibere , ore , gestu & opere , non solum tanquam vitae nostrae auctoribus , verum etiam , ut aetate majoribus . Dici vix potest , quantum hujusmodi reverentia erga majores conferat & ad honestam disciplinam , & ad publicos mores , ac civitatis tranquillitatem . Si Spartanorum hac in re Adolescentium pudorem , & reverentiam erga majores natu referre vellemus , quod facit Plutarchus pluribus in locis , puderet nos , qui Christiani sumus , longe ab iis superatos . III. obedire iis in omnibus , quae Dei legibus non sunt contraria . IV. in necessitatibus iis subvenire (Matt. XV. 4.) Duae superiores propositiones perspicue derivantur , & ex dependentia liberorum a Parentibus , & ex jure gratitudinis . V. Eorum naevos tolerare , nec irridere , ut Cham , qui id circo in filio fuit maledictus a Deo . VI. In ipsos nunquam aut audaciter , aut iracunde insurgere : est enim id e diametro oppositum reverentiae , quam naturâ parentibus debemus . VII. Nihil alicujus momeuti aggredi absque suis consiliis , praesertim nuptias . Praeclara sunt hujus honestatis exempla & in familiis Patriarcharum , quorum historiam Moyses in Genesi descripsit , & in familiis vetustis Romanorum . Dici non potest satis , quantopere id conferat ad finem familiae . VIII. Eorum famam quam fieri potest , tueri : quippe quorum existimatio ad nos quoque pertinet . IX. precibus Deo commendare .

§. XI. Officia fratrum & sororum sunt . Ut se mutuo amore prosequantur . Is enim amor ad concordiam familiae necessarius est . Neque quidquam familias magis dissipat , ac evertit , quam hujusmo-

di inter fratres bellum civile . II. ut nunquam sibi invicem invideant , quae causa fuit primi , quod in Tellure contigit,fratricidii, unde tot mala in secta Cainitarum pervenere . III. ut delatoribus aures non praebeant. Sunt enim inter homines quidam ita comparati , ut gaudeant discordias ferere , ut ex aliorum malis sibi consulant . Itaque cum hujusmodi referuntur res a malignis hominibus , prudentiae & amoris , ac sinceritatis fratrum erit statim aperire blandis verbis , ne occulta gliscant mala , sed patefacta evanescant . Est enim animus corporis tumori similis : nisi scilicet evacuetur , perpetuo inflatur , usquedum perrumpat . IV. Ut mutuis comodis invigilent , & sibi auxilium praestent . V. Ut ad virtutem , & pietatem se mutuo excitent , atque adhortentur . VI. Ut minores majoribus deferant honorem : majores vero blandissime cum minoribus agant . Eorum omnium una semper est ratio , quia scilicet id exigit finis familiae , cui contraire est jus omne naturae pervertere .

§. XII. Jam pertinent ad familias & servi . De servorum adversus dominos officiis nihil interest quidquam hic praecipere : iis enim non scribimus . Dominorum vero officia uno verbo comprehenduntur ab Apost. ad Coloss. IV. v. 1. , ut scilicet *aequitatem servis exhibeant* . Posita autem est haec aequitas in sequentibus officiis . I. Ut nihil , nisi justum , & aequum praecipiant , nihil , nisi honestati consentaneum , nihil , nisi cujusvis viribus , aetati , ingenio adaptatum , et in his praecipendis non utantur verbis asperis , vultuque torvo , sed blandis , ac subridenti . Maximae enim prudentiae est , cum amore aliquid a servis exigere possis , ne modis petas , qui odium pariant . Nihil pulchrius est Dominis , quam amari a servis ; ita familiae concordiae & paci prospicitur : Ita familia ex hominibus honestis , atque ex virtute viventibus conflatur . Ad rem Cicero lib. II. de offic. cap. 7. rerum omnium nec
aptius

aptius est quidquam ad opes tuendas, quam diligere, nec alienius, quam timeri. Praeclare Ennius. Quem metuunt, oderunt: quem quisque odit perisse expectit. . . . Malus enim custos diuturnitatis metus: contraque benevolentia fidelis est vel ad perpetuitatem.

§. XIII. Alterum dominorum adversus servos officium est, ut ne in eos absolutum imperium exerceant, nec sibi permissum imaginentur, sed dominium limitatum, cujus rationem reddere debeant Deo, ut Domino communi ipsorum, & servorum, quemadmodum docet Paulus Apost. ad Ephes. III. v. 9.. Tale sane imperium manifesto contrarium est naturali hominum aequalitati, de qua superius dictum est. II. Ut iis suppeditent humanissime, quae ad eorum victum, & vestitum pertinent. III. ut eos instituunt in doctrina religionis, & morum: in quo officio exercendo, vix dictu est facile, quam sint praesentes domini pigri, atque immemores, quantaque eam ob rem improborum & perditissimorum hominum colluvie majores urbes inquinatae sint. IV. Ut erga eos sint humani & lenes, non cum ipsis tanquam cum pecudibus agentes, in quo item publice peccatur. V. Ut ab iis immoderatos labores non exigant. VI. Ut eos mercede justa non fraudent. VII. Ut in morbis aut senectute eorum rationem habeant: exigit enim id & gratitudo, & peculiaris societatis dominorum, ac servorum amor: itaut jure inhumanus is habeatur, qui in hujusmodi necessitatibus servos dejicit, aut deserit. VIII. Ut protervos corrigant, & eorum contumaciam blande primum, mox etiam severe, curent, inemendabiles autem expellant domo. IX. Ut non patiantur eos ignavos, ebriosos, blasphemos, aut erga alios injuriosos.

CAPUT XIII.

De Imperantibus , tum de Subditorum officiis .

§. I. **D**ivisio statuum hominum in societate civili viventium praecipua nascitur ex ratione imperii, ut alii scilicet sint Principes, alii subditi, alii Magistratus, alii populus. De quorum officiis nunc eodem compendio, quo superiora sunt explicata, dicemus. Sed primum paucis explicanda est origo summorum imperantium. Duo sunt in summis imperantibus considerata, persona, quae imperat, & jura, quibus imperat. Personae electio a populo est, qui sive expresse consentit, ut ea potius quam altera regnet, ut in regnis electivis; sive tacite, ut in regnis hereditariis, perinde est. Quod pertinet ad jura summorum imperantium, ea duum sunt generum, *Immanentia*, & *Transcuntia*, ut vocant. Immanentia sunt, quae respiciunt internam constitutionem, & pacem imperii: Transcuntia vero, quae spectant externam securitatem. Utraque a naturae fontibus proficiscuntur, adeoque jura sunt divina. Atque hoc sensu Paulus Apost. in Epist. ad Rom. cap. XIII. scribit: *qui potestati resistit, Dei ordinationi resistit, quia non est potestas, nisi a Deo*. Hinc fit, ut in istiusmodi juri- bus Principes soli Deo subsint, ac propterea ut a nemine in eorum exercitio impediri queant: non enim a subditis, quorum in obsequio tantum gloria reli- cta est: nec ab aliis Principibus, cum quibus sunt in statu naturae, adeoque aequalitatis.

§. II. Porro jura majestatis immanentia sunt, 1. Leges ferre. 2. earum effectum imputare, paenam scilicet vel praemium civile. 3. Magistratus constituere. 4. Tributa, aut vectigalia imponere, si id Reip. gubernatio exigat. 5. Invigilare circa commercia, adeoque mensuras, pondera, rerum qualitates, mone- tas, ut scilicet & copia, & justitia in civitate cunctis mo-
dis

dis regnet. 6. Tutelam religionis suscipere, summoque imperio uti in omnes, per quos Reip. finis turbari potest. Haec ex civitatis, cui praeest, sine intelliguntur, nempe publica salute & felicitate. Transcuntia sunt. 1. Jus militiae. 2. Jus belli & pacis. 3. Jus legatorum mittendorum. 4. Jus foederum feriendorum, ac cetera, quae spectant externam securitatem civitatis. Ex fine civitatis officia Imperantium deduci debent, quae his duobus continentur. 1. Omnia efficere, quae ad tranquillitatem, prosperitatem & securitatem civitatis necessaria sunt. 2. Ab iis omnibus, quae civitatem deteriore effecere possunt, cavere. Alioquin Deo aut negligentiae, aut injuriae datae poenas reddituri sunt acres. Sed de his differere politicae scientiae est, quam hoc in loco tradere animus non est. Populorum ergo, quod nostra interest, officia explicemus.

§. III. Primum itaque populi officium est Principes honorare, quia eorum jura, & Potestas Divinae sunt originis, ut ex superioribus constat. Diserte id quoque praecipit Scriptura sacra Prov. VIII. v. 13. ad Rom. XIII. v. 1. Nam quemadmodum Episcopi sunt ministri Dei in iis quae ad religionem Christianam pertinent, quos Spiritus Sanctus posuit Rectores Ecclesiae; ita Principes sunt Dei administri in regimine politico, ut ordinata, & pacata sit hominum vita.

II. Amare eos, ut Patres populi, a quibus multa commoda ad nos redundant. Amare porro non tantum amore amicitiae, velut homines nobis natura aequales, verum etiam amore obsequii, qui scilicet cum timore filiali sit conjunctus, ut statu superiores. Haec duo officia ex ipso publico societatis fine demonstrari possunt. Nam quoniam imperantes reip. bono constituti sunt, quidquid officii in eos a subditis praestatur in bonum publicum confertur. Praeterea veneratio, amor, ac timor communis civitatis Patris ac Principis in membra ipsa politici corporis diffunditur: probi enim & obsequiosi erga Principem cives se mutuo quoque merentur ac amant; ex quo reciproco amore publica fluit felicitas.

III. Iis obedire in omnibus, quae officiis erga Deum non obstant. Nam Jure naturae imperant, cui contraire sine crimine nequimus. Docet idipsum aperte Paulus Apost. in Epist. ad Rom. cap. XIII., ut intelligere possimus falsam esse & seditiosam quorundam Casuistarum doctrinam, *Leges civiles non obligare in conscientia*. IV. Iis solvere tributa; nam ea seu expresse, seu tacite pacti sumus: neque vero sine iis Principes onera imperii portare possunt. Praecipit hoc ipsum idem Paulus eodem loco. V. Iis servare fidem, non fovere seditiones nec rebelles: sunt enim haec omnia contra obsequium, quod principibus debemus. VI. Precari Deum pro iis (1. ad Timoth. cap. II.) Nec refert, si quandoque minus sint honesti, & iusti; nostri enim non est, sed Dei id dijudicare, quum Deum tantum in terris superiorem habeant Principes. Sed & discimus ex Tertulliano, aliisque veteribus Christianae religionis apologistis, priscos illos Christianos Deum praecatos fuisse etiam pro iis Romanis imperatoribus, qui Christianos exquisitis modis vexabant. Accedit, quod eorum, si quae forte sunt vitia, magnis commodis, quae inde in civitatem redundant, compensanda sunt. Tum egregium illud Taciti memorandum est, *toleranda regum ingenia, nec usui esse crebras mutationes*.

C A P U T XIV.

De Officiis Magistratum.

§. I. **D**Icamus nunc de officiis Magistratum. Quantopere Reip. intersit ab optimis magistratibus gubernari, nemo est qui non intelligat. Nihil enim juvat ad publicam felicitatem bonos habere Principes, ac sapientissimas leges, nisi magistratus quoque, qui praesunt, idonei sint, & boni: sunt enim magistratus non tam ministri legum, earumque interpretes, &, ut Jurisconsultus ait, *Sacerdo-*

cerdotes iustitiae, verum etiam vivae leges, aut *vivae legum voces*, quemadmodum eleganter vocat Mar-
 cianus lege 8. §. *de iustitia*, & *jure*, ex quibus proin-
 de totus Reip. ordo pendet. Itaque optimi, & sa-
 pientis Principis est non solum civitatem sanctissimis
 legibus ornare, sed in primis idoneos magistratus ei
 praeficere. Pertinet huc Platonis illud vulgatissimum,
felices Respublicae, in quibus aut Philosophi regnant,
aut Reges philosophantur. Philosophos autem dixit
 non eos, qui in sterili contemplatione versantur, sed
 qui versantur in mundo hominum, quique didicerunt
 & hominum mores, & quae civitatibus utilia, quae
 noxia sint, quique ipsi viri boni sint: idest & in
 jure dicendo incorrupti, exprompti, sortes, & aditu fa-
 ciles, & in rebus gerendis multae patientiae. Itaque
 in magistratibus amplissima cognitio, & *incoctum ge-*
neroso pectus honesto, & magnus animus ac fortis
 exigitur.

§. II. Primum igitur officium magistratus est, ut
 legum scientiam habeat, ita ut in eo legum ignora-
 tio sit semper culpabilis. Animadvertendum autem
 est, non sufficere eam legum scientiam, quae ex
 compendiolis discitur, quae sunt hodie Legum & Politi-
 cae studia ferme omnia, sed necessariam esse omnigenam
 prudentiam civilem, & politicam, quae sive ex natura ipsa
 hauritur, sive ex doctorum hominum commentariis,
 sive ex historia nationum, sive ex legibus, & mo-
 ribus propriae gentis. Alterum officium est, ut pru-
 dentiam, solertiam, vigilantiam, maximamque ani-
 mi attentionem adhibeant in hominum actionibus ex-
 pendendis, & ad praescripta legum exigendis. Ter-
 tium est, ut se liberos contineant ab omni affectu
 amoris, irae, odii, avaritiae, metus, &c. neque
 enim bene judicare potest corruptus iudex. Quartum
 officium est, subditorum saluti consulere, eamque
 pro viribus curare, tum Religioni verae patrocinando,
 tum pacem & tranquillitatem civilem conservando,
 tum Principi suppeditando sapientissimas leges, & se-
 cun-

cundum eas prudenter, fortiter, & incorrupte jus dicendo. Plura sunt super ea re a Jurisconsultis Romanis egregie tradita, quae Tribonianus collegit in primo digestorum libro a titulo IX. ad ultimum, quae si ut lectu dignissima sunt & leguntur a pluribus, ita opere ipso exigenter, nae eae felices Resp. quibus hujusmodi praeessent mortales.

§. III. His dotibus, & virtutibus qui fuerint destituti ad Rempubicam gerendam accedere sine gravissimo crimine non possunt. Quid enim est aliud eam personam velle gerere, quam nescias? Quid autem Reip. illudere? Quid aliud Deum, & homines contemnere? Nam non idem est magistratum gerere, atque vilissimas quasque artes mechanicas, in quibus sive excellas, sive sis mediocris, aut ineptus, haud magno publico sit malo: est enim nobilissimam Reip. partem manu tenere, &, si nescias, totam pessumdare.


§. IV. Officia populorum erga magistratus sunt, primum, iis obedire in omnibus, quae conscientiam non laedunt: nam vices Principum gerunt, quibus ex jure naturae obedientia debetur. Secundum, timere, revereri, honorare velut administratos Dei in regimine politico. Diserte id docet Paulus Apostolus in saepe laudata Epistola ad Rom. cap. 13. Tertium est, iis resistere, si aut Religioni Christianae quidquam adversum jubeant, cum oporteat obedire Deo magis, quam hominibus; aut leges Reip. fundamentales improbo conatu evertere moliantur: ratio est, quia tunc magistratus non sunt, sed Reip. hostes clandestini, eoque nocentiores. Non est autem difficile, reliqua capita officiorum nostrorum adversus magistratus ex his paucis principiis derivare.

(1)

ADHORTATIO.

AD STUDIA LITERARUM,

*Habita in Neap. Lyceo , in solemnii
Studiorum instauratione
an. 1749.*

I.  Ui hodie ad literarum studia ag-
grediuntur , ac vereor ne eorum
quoque plerique , qui longius sunt
progressi , de humanitatis Discipli-
nis ita vulgo differunt , ut habere
illas videantur quasi distractas humanae rationis
particulas , ut natura & constitutione diversas
ita officio & fine discrepantes , ac domicilio
tantum , non secus atque plantas , quae com-
muni solo committuntur , cognatas . Quam late
haec opinio pervagata sit , hinc licet scire ,
quod ex tanta hominum copia , qui litteris ani-
mum applicant , vix unum aut alterum reperia-
mus , qui tota earum spatia percurrat , quique
se tum demum in singulis profecisse agnoscat ,
quum omnes uno veluti vinculo , & , qua sunt
a Natura factae , concatenatione conjunxerit .
Reliqua turba , & Philosophorum plebes id sibi
pensi datum credunt , ut ceterarum incuriosi ,
partem quampiam decerpant , atque in ea , ni-
hil de communi earum fine & officio solliciti ,
utcumque se exercent , suae , ut pecora utili-
tati

(II)

tati addicti , generis humani publicae obliti .
Accedit altera , ut magis quoque falsa ; ita pestilentior , non discentium modo , sed quorundam etiam Doctorum persuasio , litteras ita menti acuendae , augendae , informandae natas , ut contra earum sit officium , aut animum quoque attingere , ac ad honestatem componere , aut in Civitatem descendere , artes & instituta humana perfecturas . Itaque rite , ac sancte quoque , si Diis placet , tradi illas , aut disci etiam in summa morum pravitate arbitrantur : atque nonnulli sunt , qui tum perbelle sibi plaudunt , tanquam egregie profecerint , quum impudentiores in criminando , in laceffendo audaciores , in humanis divinisque rebus miscendis promptiores evaserunt . Hinc Scientiarum distractio , discidium , vasticies venit : hinc tot in litteraria republica seditiones , & singulorum adversus singulos machinationes : hinc Doctrinarum quarundam primum conteratus , mox etiam averfatio , & odium : hinc alii super alios congesti ad stupendas moles libri , partim inepti , & perridiculi , partim avitae religionis , aut antiquorum morum turbatores , ut ad veram sapientiam contendentibus non solum periculū plenum , verum etiam implicitum & undequaque obsessum iter esse videatur : hinc tandem tot monstrosi errores , quibus a fine suo revocatae litterae , saepe in publicam perniciem sunt conversae . Atque unde , quaeso vos , Auditores , plurimorum animis haec nuper incessit suspicio , plusne utilitatis , an damni , generi humano litterae afferant ? Unde quidam ut ne co-

lerent

(III)

lerent absterriti , non pauci abalienati ; ne tuerentur ? Intelligo nunc , Auditores , praeclare & sapienter majores nostros egisse , qui sanctissimis legibus constituerunt , nemini ad summos honores in Scientiarum Academiis aditum patere posse , qui supra morum probitatem , primum per universum litterarum curriculum non fuisset ipse manductus ; tum singulas earum partes alios cum laude docuisset . Scilicet experimento didicerant , & inutiles esse Disciplinas , nisi humanitatem , honestatem , justitiam importent ; & unum esse Scientiarum omnium quasi corpus , ut nisi partes ejus omnes sibi mutuo opem praestent , ac officia reciprocant , continuo alias ab aliis praecisas distrahi & dissipari , atque a fine suo longissime aberrare . Quamobrem hanc ego sapientum praecipuam esse debere diligentiam censeo , ut in id operam ponant omnem , quo opinioniones illae ex vulgarium Philosophorum animis tandem aliquando eradicentur . Sublata enim eorum malorum , quae vulgo litteris tribui solent , causa , ecquis praeterea usque adeo futurus est iniquus , ut litteras , ac litterarum studiosos homines criminetur ? Nam earum in rempublicam non solum utilitatem , sed necessitatem quoque satis demonstrant , & Rationis humanae natura , & natura Legum ac Imperiorum , & necessitas atque utilitas Artium . Sed quoniam ea nunc de re mihi dicendum est , ut nobiles adolescentes , qui huc frequentes convenerunt , intelligant , nulla in re se utilius operam suam collocare posse , quam in ea , qua una sibi , patriaeque cari vivant : vos oro , atque

(IV)

que obtestor sapientes , publicaeque felicitatis amantissimi viri , ut quando ego tantae causae dicendae nec ingenii viribus , nec eloquentia ullo modo par esse possum , ipsi iudicio ac favore vestro quasi succenturiati adsitis .

II. Rationem in communem generis humani utilitatem nobis a Deo esse datam , eo minus dubitari potest , quo majorem illa & ampliorem finem spectat , quam cuiusque est privata utilitas . Nam quid nobis adinuisset , tam longe lateque vagantem tribuere , nec praesentia modo comprehendentem , sed & remotissima prospicientem , antecedentia cum consequentibus connectentem , & communes causas ac fines indagantem , si privatae cuiusque utilitati & abdomini tribueretur ? Neque enim Deus supervacua machinatur . Certe in brutis , quae neque in societate omnium ad omnia a Natura procreantur ; neque ejus ineundae dotes ullas habent , tam late cognitio patet , quam sensus ; tam vero late sensus , quam finis , idest suus cuiusque venter . Nulla apud ea generalis communium causarum & finium , nulla reciprocorum officiorum , eorumque regulae & mensurae , nulla abstracta , & ab omni corporearum rerum ambitu segregata cognitio : humi prona fingit Natura , & ventri obedientia , ut necessarium non sit vitae agenda & tuenda instrumenta habere patentiora . Aristoteles vir in primis acutus & doctus hominem ad communitatem generari sic colligit , quod inter tot animantium genera is tantum praeditus sit sermone , quo animi sensa distinguere possit , notare , & cum aliis communi-

(V)

municare . Quorsum haec nisi coetum & societatem spectarent ? At idem , ac magis etiam necessario , ex ratione , cujus sermo apud alios interpretes est , colligere potuisset . Nam aliorum intellectus ergo loquimur , & continuo conticescimus, ubi id esse supervacaneum sentimus. Accedit, quod ubi nulla etiam nostri utilitas agitur , loqui tamen aliquid , vel audire velimus . Quae sollicitudo & curiositas , quae in iis animantibus , quae ad societatem non sunt facta , nulla esseprehenditur , satis , ut opinor , perspicuum argumentum est , rationem humanam non ad nostri tantum & privatam utilitatem , sed ad generis humani publicam pertinere . Quo modo si oculi differere possent , illi intelligerent profecto se non sui tantum , sed totius corporis causa in eo esse constructos : neque enim nisi ita esset , tam late ac longe intueri deberet , nec in eo esse positos loco , unde totum corpus modico flexu moderari possent . Ex quo illud efficerent , tum rite se videndi munere perfungi , quum toti corpori vident , ac videndo toti consulunt . Conficio , si quid cerno , & rationem communitatis ergo nobis datam , & tum recte & sapienter ea nos uti , quum non nobis tantum scimus , sed parentibus , patriae , amicis , toti denique hominum generi , quocum naturali quadam cognatione & amicitia continemur . Qua in re sic ego judico , Auditores, eos omnes, qui non hoc sibi rationis munus proponunt , ratione abuti , atque Naturae ipsi vehementer adversari .

III. Sed quae erit via recte ratione utendi,
ut

(VI)

ut ne ea extra munus suum evagetur? nempe aut nulla omnino, aut solae litterae, disciplina nimirum & institutio sapientiae. Est enim ratio formanda, est augenda, est instruenda arte & regulis. Formatur autem & instruitur praeceptis, & habitu ratiocinandi: augetur rerum notionibus. Has velut materiem rationis; illam artem dicere possumus. Nempe Natura simplicem nobis, & nudam sentiendi, cogitandi, intelligendi facultatem tribuit: materiem studio & industria comparandam praecipit: artem exercitio contrahendam. Jam quae Artium aut Scientiarum est, quae in rationem aut instituendam & formandam, aut augendam non aliquid conferat? Nam inveniendi & ratiocinandi, tum differendi & docendi facultatem Logica, Rhetorica, Poetica efficiunt: accuratius etiam & subtilius demonstrandi & concludendi Geometria & Algebra. Materiem suppeditat Naturae & hominum historia: hanc in artem effingunt Physica, Ethica, Theologia, Jurisprudentia. Sed & necessarium est rationi formandae & augendae ut cum aliis communicemus, quae didicimus, & ab aliis vicissim sua accipiamus, ut ita ex omnium mentium humanarum velut confluentibus rivulis sapientia coalescat. Eo comparata sunt Grammatica, & Linguarum studia. Quae quum sint, quam Scientiarum, quam Litterarum partem contemnemus, quum nulla sit, a qua humana ratio non excolatur, informetur, augeatur? Aut potius, quum nihil aliud sint Scientiae omnes, nisi una formata & adulta ratio, qui illas aut negligamus

(VII)

mus , aut oderimus , quin non toti tantum hominum generi , sed nobis irati & infensi simus? Est enim , per Deum immortalem , qui pejus sibi conciliatus esse videatur , qui vehementius utilitati , & felicitati suae adversetur , quique sollemnius insaniat , quam qui intellectum & rationem communis & privatae vitae instrumenta , sibi invidet ? Quamobrem , Auditores , nisi poenitet , nos non belluas , sed homines , idest rationales & sociabiles animantes esse natos , intelligamus , naturalis esse officii , summis studiis litteras percolere , sine quibus ut vix rationis participes , ita ne homines quidem & sociales esse possumus.

IV. Non sum autem nescius , esse qui clamant , a Diis iratis homini rationem esse tributam , quae non modo nullam utilitatem nobis afferat , sed summas inducat calamitates . Quid ? nulli ne ii nati esse vellent ? an stipites & bruti ? an constante & infinita rerum comprehensione praediti ? an potius cum ea , qua gignuntur , ratione , sed ab iis malis , quae pravus rationis usus haud dubium peperit plurima , immunes ? Detur optio . Est quisquam , qui diu deliberandum in re minime perplexa arbitretur ? Neque enim eo insaniae evadere nos posse puto , ut aut nulli , aut stipites ac bruti , aut Dii nati esse velimus . Nam & ut non simus , & ut Dii simus , idest undequaque perfecti atque absoluti , cum tota pugnat rerum natura , quippe extra genitarum rerum conditionem : itaque ut non adpetere , nisi stulte , ita super iis deliberare sapienter non possumus . Non ergo ratio-

Tom. VI.

R

nem

(VIII)

nem accusare isti videntur , si recte adhibuerimus , sed rationis abusus ; quum maximae sint & in singulos homines , & in totam societatem rationis utilitates . Quis autem ignorat , tum esse maximos rationis abusus , ac tum maximas hominum ab hominibus calamitates existere , quum neglecta ratio brutescit ? Necessesse est enim , ut , inculta ratione , sensus & adfectus dominantur , ex quorum imperio cuncta , quae patimur , mala derivantur . Nam sic natura comparatum est , ut , quum adpetitus sint vehementes praeter rationem , aut contra rationem animi commotiones , tum imperent , quum ratio parit , pariant , ubi illa imperat . Ac quemadmodum generosus equus imperat , nisi parit ; ita nisi ratio a sensibus sese extricat , & se sibi vindicat , ut alteram hominis partem regere possit , fieri nequit , quin in vile servitium a libidine rapiatur . Una ergo via , una ars est hujusmodi mala averrucandi , rationem excolere , atque loco & dignitati suae restituere . Et vero ad rationem perficiendam , & adfectus intra suos cancellos coercendos datae sunt leges , non tantum antiquiores illae , quae naturales dicuntur , & a quibus sunt ceterae aut expressae , aut contrivatae , sed illae etiam populorum tam multiplices & variae , quae civiles appellantur . Sed quid quaeso vos , Auditores , sunt leges , nisi scita sapientum , qui earum finis , nisi ut rationi praesidio sint ? Nam quum in omni lege Decretum sit , & Sanctio ; illo mens efficitur & informatur ratio ; hac , hac velut freno , compescitur cupiditas .

IN Utrum

(IX)

Utrumque autem quantae intelligentiae, providentiae, & sapientiae opus esse putabimus? V. Sed quando ad res humano generi propiores me detulit oratio, efficiam, ut ex hoc inprimis loco intelligatis, quantopere toti Rei publicae necessariae sint litterae. Nullam esse societatem, ac ne latronum quidem & piratarum, quae sine legibus aut primum coire, aut deinde se conservare possit, id equidem neminem ignorare arbitror, Auditores. Nam unus esse debet sociorum omnium finis, una mens, una officia: nulla hominum communitas, ubi singulis sui fines, ubi alii ab aliis dissident, vitalis esse potest. Ut si unum quodque corporis humani membrum sensum hunc haberet, ut posse putaret se valere, etiam a reliquis praecisum, quae propter seditionem ab aliis faceret, debilitari, & interficere totum corpus necesse esset. In tanta autem hominum varietate, tamque multiplici decretorum & opinionum copia, quae esse potest ratio & via, qua in concordiam adducantur, qua idem sapiant, idem velint omnes? Nempe aut nulla, aut lex, ut ea quasi quadam virgula divina omnes regantur. Non inscite igitur quidam sapientes dixere, non societatem tantum, sed omnem eam humanitatem, quam in Civitatibus videmus, & qua a bellicuarum vita discernimur, descriptis legibus deberi acceptam. Quis enim vestrum ignorat, ita naturam rerum tulisse, ut quodam tempore homines juris naturae negligentes, civili nondum descripto, fusi per agros, ac dispersi vagaren-

garentur , tantumque haberent , quantum manu ac viribus per caedem ac vulnera eripere aut retinere potuissent ? Atque inter hanc vitam perpolitam humanitate , & illam immanem nihil interest , quam jus , atque vis : necesse enim est , ut vis imperet , ubi lege homines non aequantur .

VI Quae quum ita se habeant , ubi nulla etiam adsint alia argumenta , quibus litterarum in rempublicam necessitatem & utilitatem demonstramus , certe est hoc palmare , non constare sapientiam sine litteris , nec sine sapientia leges , nec porro sine sapientissimis legibus rempublicam consistere . Quod adeo verum est , ut praecclare veteres , esse leges munus Deorum dixerint : quod ego sic accipio , non ut mendacio legibus auctoritatem & majestatem conciliare voluerint ; sed ut ostenderent , inter curas humanas nullam esse debere consilii , rationis , sapientiae pleniorē , neque idcirco aliam Deo digniorem , quam legislationem . Scilicet quum leges populis in societate continendis , ac securis & beatis efficiendis dentur , non illae esse possunt ratione destitutae , sed expressae a natura ipsa populorum , locorum , temporum vitae regulae . Ac quemadmodum quae moventur & aguntur machinae naturis & constitutionibus suis consentanee aguntur , frangunturque citius , quam permoventur , ubi contra impulerimus ; eodem modo nisi naturae & constitutioni singularum societatum ; tum populorum moribus & temperamentis ; viribus quoque & opibus ; loco praeterea & tempori ;

tan-

(XI)

tandem finibus & ordinibus leges adaptentur , sunt populis graves , principibus molestae , periculi plenae , & ubertissimae irarum , bellorumque causae . Quid quod ne supremus quidem ille Deus rerum omnium opifex & moderator , nisi ex rerum ipsarum natura velut manantes , leges ullas intelligit , aut sancit ? Itaque qui res Naturae contemplantur , ii non sine incredibili quadam animi voluptate animadvertunt , iis esse singulas legibus constructas , iisque gubernari , ut nihil aptius , nihil sapientius , nihil praestantius excogitari possit .

VII. Quapropter intelligitis , Auditores , ut nihil tam vitae & societati hominum necessarium , quam leges , ita nihil esse inter homines , quod majorem sublimium rerum intelligentiam , plurimarum & diversarum prudentiam , mentem perspicaciorem , & ampliorem , adeoque Artium omnium & Scientiarum opem desideret , quam propriis quemque populum legibus moderari . Quod nisi verum esset , qui tanta doctorum hominum consensione dicere Plato potuerit , tum beatas fore respublicas , quum aut Philosophi regnant , aut Reges philosophantur ? Certe inter omnes nationes eae opibus , imperio , & publica felicitate semper praecelluerunt , quae sapientioribus legibus gubernatae sunt , ut olim Aegyptii , Judaei , Graeci , Persae , Romani ; nunc vero maxima Europae pars . Atque , quod praecipue animadvertendum est , eae ipsae gentes , quarum imperium sempiternitatem spectare videbatur , non primum imperium & libertatem amiserunt ,

(XII)

quam quum legibus nullus apud lascivientes juniores honos , nulla dignitas , nullus amplius fuit locus . Adeo illud verum est , quibus primum fundamentis res humanae increverunt , iisdem stare , nec cadere , nisi quum illa prolabantur ! Oro autem vos , Auditores , quid erant tot populorum leges , nisi veluti succus ac spiritus temporis diuturnitate consumatae sapientiae ? Quid nisi Philosophiae partus ? Alioquin cur non eo quoque imperii & felicitatis venire penitissimi Scythae , & Lapones , Peruviani , Brasilianique , Caffari , aut interiores alii Africae populi , moribus & vitae consuetudine efferati , litteris ac legibus destituti , ac una pene dixerim forma corporis a belluis discriminati ? Quod si quidam venire , aut longa domi bellicae schola edocti venire , ut olim Romani , nunc Ruteni : aut ab iis , quos beluina vi devicerant , absorpti , & paulatim exculti fuere , ut penitissimi Scythae ; aut quasi turbines repente dissipati sunt & dispersi , ut Gothi ; aut non Regnum , sed vis & immanitas eorum fuit , ut Turcarum . Nam Turcae impetu primum & robore corporum proruperunt : tum nostrorum lascivie , atque superbia , scilicet iis , quae secundae res amant , ferociiores facti dominationem constituerunt . Sed eam qua vi bruta occupaverunt , eadem retinent . Quumque nihil tyrannidi tam sit contrarium , quam sapientia , leges , justum imperium ; omnia determinanda putaverunt , quae rationem perpolire possent , metum populis detrahere , ac liberratem , opes , felicitatem importare .

Non

(XIII)

Non corpora tantum , sed ingenia hominum fecere mancipia , ut una armorum vis , unus metus regnaret . Itaque ut sibi imperium firmarent , tot gentes ac populos in miseram servitutem dedere , perpetuis opprimunt aerumnis , atque pecorum indolem induere cogunt . Est quisquam , qui ubinam gentium hanc rempublicam exoptet ? Est qui hanc populorum felicitatem vocet ? Est ergo perspicuum nec imperium esse posse , ubi nullae sunt litterae ; & , si quod est , id non populis beandis , sed iis opprimendis ac determinandis aptius esse .

VIII. Nec vero ob id tantum litterae in publicam felicitatem influunt , quod sapientiam legislatricem gignunt , sine qua res publica aut non esse , aut non nisi discors , & in seipsa ruens esse potest , sed eo etiam plurimum , quod Artes humanae vitae necessarias aut pariunt , aut acceptas provehunt longissime , aut repertas perpoliunt , efficiuntque faciliores & utiliores . Atque utinam pro cuiusmodi argumenti dignitate nobis aut oratio & facultas , aut tempus suppeteret . Sed Adolescentibus ingenii acumine & diligentia praestantissimis vel rerum capita indigitasse satis superque erit . Artium alias esse humano generi necessarias , alias longe utiles , alias ad commoditatem ac vitae ornatum & decus conferre , id in perspicuis est . Necessarias Natura ipsa eorum , sine quibus esse non possumus , alacris indagatrix ; excogitavit ; utiles hominis sollertia ; reliquas amor voluptatis invexit . Quaedam quoque sunt ,

(XIV)

quas fortunae cuidam & casui debeamus. Quaeritis quas litteris ? sunt haud dubium suae . Sed ubi nullae sint , parva ne Ars est sapientia ipsa , quam litterae & efficiunt & alunt ? Est enim ceterarum omnium suprema quaedam Ars & regula . Ac ut Artes suis quaeque instrumentis opera perficiunt ; ita sapientiae instrumenta sunt Artes . Ea perpoliuntur ; ea perficiuntur : una illas regit sapientia : una agit , ac quasi animat . Sapientiae est , quod paucioribus instrumentis , & usu facilioribus , quam olim , utantur Artes : quod paucioribus viribus & breviori tempore indigeant , uni debemus sapientiae : a sapientia didicimus Artes ad ea adhibere , ad quae apud veteres minime pertinebant : eadem usus Artium antiquioribus ignotos adinvenit . Ita factum est , ut & publice sint apud nos pervagatae , & populares , ut ita dicam , evaserint . Inde privatis quoque opes tantae , quantas vix integrae gentes olim habuerunt : inde commoditates ac voluptates eae , quibus si majorum nostrorum vita compareretur , videri possumus non modo a summa inopia ad summam copiam , sed ab immanitate ad humanitatem translati . Artium harum pleraeque antiquis notae : notae barbaris ; at quotus eorum quisque , quo ire possent , perspexerat ? Quotus quisque omnes earum usus comprehenderat ? Itaque quum illi , tum isti etiam in Artium apparatu , vitae dulcedinem , cui illae efficiendae natae sunt , ignoraverunt . Nempe quia nec litterarum apud illos commercium ,
nec

(XV)

nec ratio adulta & perfecta . Nam ex quo Typographicae artis (quam ego de Caelo delapsam semper putabo) beneficio factum est , ut rationis humanae cogitata & inventa inter diffitas terra marique regiones tam facile communicarentur , atque ex singulorum intelligentia , veluti ex collatis succis , cujusque mens succresceret ; incredibile dictu est , quantum augmentum Artibus omnibus , quanta facilitas , quanta promittitudo accesserit : incredibile quam illae longe lateque defluerint ; quam uberes fructus , ac quantas vitae commoditates adduxerint . Quis ignorat , eo intra bina saecula ventum esse opum & volupratum , quo per infinita anteaeta minime veneramus ? Equidem , Auditores , mecum ipse quandoque prae laetitia illacrimari soleo , dum praesentem totius Europae quum faciem atque habitum , tum in primis interiorem spiritum & mentem , tacitus meditor , & cum veteri Europa contendo . Nam olim obsideri tantam , nunc tandem habitari & coli mihi videtur . Orbis , quos Oceanus a nobis determinaverat , junximus : terras ac maria emensi sumus : iis quoque , quae superna nobis sunt , & quorum admirandorum tantum causa natum se dicebat Anaxagoras , Caelo & Astris , ad commercia agitando , devehendas opes , & pretiosiora quaeque ultimarum gentium in Europam deportanda , usi sumus . Debemus haec navigationi : hanc Nauticae & Geographiae : has Opticae & Astronomiae ; istas Geometriae : omnes Philosophiae , idest amoris & studio sapientiae .

ciae . Quo igitur ego alio argumento totius Philosophiae idest litterarum omnium in rempublicam utilitatem demonstrabo , quum videam ita populorum felicitatem cum sapientia esse conjunctam , ut altera alteram perpetuo sequatur ? Culmen attigisse videntur hac nostra aetate litterae : eodem evasere commercia , artes , vitae commoda , opes , voluptates . Humiliores illae superiori jacebant : minor erat Europae ubertas , minor publica felicitas : supererant adhuc antiqui ruris vestigia . Si vetustissima tempora dispiciamus , nullas reperiemus , aut modo natas . Sed videre quoque possumus homines quasi terris prorepentes propter glandem & cubilia unguibus & fustibus pugnare . Cur ergo totam hanc Europae felicitatem litteris non retulerim acceptam ?

IX. Sed audiamus litterarum vituperatores . Ii non unius sunt generis , nec ex eodem omnes loco in nos impetunt . Nam quidam sunt , qui rerum ignari humanarum perridiculos eos vocant , & homines reipublicae inutiles , qui tota vita in Caelo & Astris contemplandis intenti sunt . Hos ego morabor ? Qui si sciant , nec sine Astronomia Geographiam , nec sine Geographia Nauticam , nec sine Nautica ingentes , quibus jam luxuriamur , opes esse posse , minus illi leves & inconsiderati sint . Alii sunt , qui in Mathematica studia magis etiam invehuntur . Hos ego humanae vitae peritos dicam ? Qui ignorant quantum tota Mechanica emolumenti humanis labo-

(XVII)

laboribus afferat ? Qui commerciorum scientiae, quae nobilissima est & utilissima, sunt expertes ? Qui & Bellicae, & Architectonicae artis sunt inscii ? Qui fortassis ne Musica quidem capiuntur ? Alioquin qui ignorare possunt, has omnes Artes a Mathematicis disciplinis esse progenitas, ab iis ali, iis propagari, expoliri, perfici ? Jam sunt alii, qui adversus Linguarum, & Antiquitatum studiosos debacchantur, quasi homines sibi nimium arrogantes, intempestive loquaces, intempestive arcanos, nugigerulos, reipub. fucos. Sed secernamus, amabo vos, hominum mores a litteris : neque enim illud nunc agitur, ut quorundam litteratorum vitia, si quae sunt, defendamus. Rerum antiquarum studia & publico regimini, & Artibus conferre, is dubitare potest, qui historiam quoque omnem inutilem esse censeat. At qui non ignorat, quanta sint in totam humanam vitam, ejusque partes omnes, historiae utilitates, quanta accessio Artibus ex veterum, aut peregrinorum repertorum collatione sit facta, is eam diligentiam quam viri antiquitatum studiosi in antiqua aut peregrina historia e tenebris eruenda, collocant, non modo utilem, sed necessariam quoque fateri cogetur. Ac vero non intelligo, Auditores, quid sit, ut vetustatis rudera quaedam nummos, picturas, statuas, harumque rerum fragmenta tantopere aestimemus, ac veluti sacra veneremur, & plurimis invidemus ; eos vero, qui inde hominum, rerumque seriem longa

(XVIII)

longa aetate turbatam restituerunt , qui , quousque majores nostros imitari possemus , docuerunt , contemnamus ? Alii tantem Physica studia , velut incerta , atque id circo inutilia traducunt . Sed ut nihil dicam de eorum , quum in alias Artes , tum praesertim in Medicinam utilitate , parum ne illa privatae publicaeque felicitati conferunt ? Haec enim nos quum ceteras res plurimas , tum , quod est difficillimum , docuerunt , ut nosmetipsos nosceremus : haec ut Deum contemplaremur : haec ut humanitatem & justitiam coleremus . Nam quum Caelum , Terras , Maria , rerumque omnium Naturam perspexerimus , eaque unde generata , quo modo obitura , quid in iis mortale , & caducum , quid divinum aeternumque sit viderimus , ipsumque omnia moderantem & regentem Deum pene prehenderimus , nosque non unis circumdatos moenibus populares alicujus definiti loci , sed cives totius mundi , quasi unius urbis agnoverimus ; in hoc conspectu & cognitione tum totius , tum nostrae praesertim naturae , quam ipsi nos moderamur , quam justitiae & pietati obsequentes sumus , quam denique beati ? At enim minutiora sunt quandoque haec studia , quam ut iis ingenuum hominem , & communi bono natum incumbere par sit . Mores sunt isti hominum , non litterarum , Auditores . Quid quod ad nullius rei summam , nisi parvis praecedentibus initiis perveniri potest ? Teritur quoque minutis quibusdam , & ab hominum commercio velut semotis quaestionibus

(XIX)

stionibus ingenium , acuitur , ac ad severiora exercetur . Tum nonnulla hujusmodi cum sublimioribus aut utilioribus dogmatibus quasi necessariam habent concatenationem , ut non posse videatur ad haec deveniri , nisi illis emensis . At ubi cetera desunt , genus quoddam saevitiae est , postquam quis majorem curarum partem in seria contulerit , prohibere , ne & suo ingenio indulgeat , neve aliquando , quod Thebanus Epaminondas solitus erat , equiter in arundine longa . Detur haec naturae venia: sint animorum quaedam diverticula , in quibus , veluti soluti & liberi , spatiemur .

Sunt igitur , si quid confeci , litterae omnes hoc etiam nomine reipub. utiles , quod & Artes perficiunt , sine quibus illa esse nequit ; & peregrinas important ; & feros mores emolliunt , ac societatem faciunt jucundiorē . Quod si qui sunt , qui praeterea non solum ut inutiles , sed publice etiam perniciosas eas accusare pergunt , eos oro , ut quoniam aut rerum ignoratione , aut morum quadam ferocia peccant , suae in primis naturae studiosiores esse velint , tum in Civitatem , & Imperiorum indolem , Legum , & Artium necessitatem diligentius inquirere . Intelligent illos profecto , nisi stipites sint & bardi , & rationem , qua a Deo ornati sumus , totius generis humani felicitatem natura sua spectare ; & tum ad id esse aptam , quum adulta est , idest litteris formata & corroborata . & nullam hominum societatem , ut non sine Legibus , Artibus , Religione coalescere primum ,
tum

tum consistere posse, ita non sine litteris & sapientia, sine quibus nec Leges, nec Artes; nec Religio, qua nihil carius habere debemus, esse & conservari possunt. Me quod attinet, Auditores, id nunc unum a Deo optimo maximo optaverim, ut quandoquidem consueta fastidimus, nec bona nisi quum amiserimus, aestimare didicimus, in barbaras terras, ac ultra Oceani fines repente transvehamur, indeque, quasi de specula quadam, res humanas contemplemur, ac nostra cum feris nationibus conferamus. Tum enim vero animadvertere possimus, quanta sit earum nationum felicitas, ad quas tantum Dei beneficium, quantum sunt litterae & sapientia, delatum est: tum sentire quantae sit immanuatis factum esse, ut quod natura, & maiestate sua barbarorum quoque admirationem & amorem excitat, apud nos egeat patroni; illud nempe, quod si gentibus non omnino stupidis exprobremus, rem suapte natura amabilem, utilitatis & commodi plenam, qua una belluis praececellimus, exceptam semel avidissime, determinatam velle, nullam illae atrocior sibi factam injuriam putent. Tum tandem intelligere, nullum esse inter Dei munera quod gratiori animo excipere debeamus; quod vehementius percolere, quo magis laetari.

Vos nunc, generosi Adollescentes, appello. Vos reipub. seminarium: Vos tolerandis & agendis fortibus magnis natos: Vos praeclare & inter omnes nationes praestantissima indole
genitos

(XXI)

genitos . Heu ! pergite qua caepistis . Quod acrius incitamentum expectatis ? Si qua gloria nominis : si qua patriae caritas ; si quis vestri , fortunarumque vestrarum amor : si incredibilis animi voluptas vos tangit : ite , defendate litteras , Imperii rectrices , altrices Artium , tutrices pietatis . Eo vos Parentes , eo tota vocat Italia . Italia gentium olim domina : Italia Artium , legumque , humanitatis quondam propagatrix . Agite dum : & postquam fortunante Deo Regem & Imperium recuperavimus , nobis vindicate & litteras : sancte colite : alacres , quo tendunt , ducite .

F I N I S.



1. The first part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

2. The second part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

3. The third part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

4. The fourth part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

5. The fifth part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

6. The sixth part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

7. The seventh part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

8. The eighth part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

9. The ninth part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

10. The tenth part of the document is a list of names and addresses, which appears to be a directory or a list of contacts. The names are written in a cursive script, and the addresses are listed below them.

100

214-1-2

PANDIMIGLIO

21 DIC. 1970

LEGATORIA - ROMA

